

Columbia University in the City of New York

THE LIBRARIES




X 9

5 Tom : 12 : 6

L. Green

LA.

Paris 5th Dec
1720



INSTITUTIONES
PHILOSOPHICÆ
AD FACILIOREM
VETERUM AC RECENTIORUM PHILOSOPHORUM
LECTIONEM
COMPARATÆ

*Opera & studio V. Cl. EDMUNDI PURCHOTII
Senonensis, in consultissima Juris utriusque Facultate
Licentiati Universitatis Parisiensis antehac Rectoris, &
emeriti Philosophiæ Professoris.*

EDITIO TERTIA LOCUPLETIOR.
TOMUS PRIMUS

Complectens Logicam & Metaphysicam.



LUGDUNI,
Apud ANTONIUM BOUDET, viæ
Mercatoriæ, sub signo Crucis Auræ.

M. DCC. XI.
CUM PRIVILEGIO REGIS.

194 P86
I
v4



PRÆFATIO.



U A M nunc dicimus *Philosophiam*, veteres *Sapientiam* appellabant, rerum videlicet *divinarum*, & *humanarum*, causarumque, quibus hæ res continentur, *scientiam*. Hanc ab omnipotente Deo numeris omnibus absolutam sine ullo labore accepisse dicitur primus hominum parens Adamus. Sed cum ob violatam Dei legem ab eo, in quo positus erat, deliciarum horto fuisset expulsus, inter cæteras peccati pœnas, quibus obnoxius esse cœpit, ignorantia tenebris traditus, in eas posteritatem secum traxit omnem. Quare nulla propemodum excellentis illius, cœlestisque doni in hominum animis vestigia supererant, cum nonnulli excusâ cæterorum socordiâ, rerum pulcherrimarum admiratione commoti, & frequenti effectuum singularium observatione, quæ *experientia* dicitur, edocti, eam à fundamentis instaurare omni ope ac studio sunt aggressi.

ã ij

Id autem ferè apud omnes constat scientiæ naturalis , liberaliumque artium studium in Græcia potissimum viguisse : sed , quod ait Diogenes Laertius in Proœmio , ad vitas Philosophorum , Philosophiam in Græcia natam esse , non secus ac homines ipsos , à vero prorsus est alienum. Nam ut omittam quod ait Josephus *lib. 1. Antiquitatum Judaicarum cap. 3.* Sethi nepotes Cœlorum ordinem , ac syderum cursus observasse ; nevé inventa sua ex hominum notitia dilaberentur , cum Adamus generalem Mundi interitum , unum incendio , diluvio alterum prædixisset , duas excitasse columnas , alteram lateritiâ , alteram lapideam , & utrique sua inventa insculpsisse , ut si lateritiâ diluvio periret , superstes esset lapidea , quæ hominibus discendi copiam faceret : ut hæc , inquam , omittam , quæ vulgò nota sunt : (quamquam Ethnicis magna ex parte fuerint ignota) nemo sanè inficias ibit Hebræorum Patriarchas ac Duces , ut Abrahamum , Moïsem , & alios rerum naturalium scientiâ fuisse informatos , non secus ac Salomonem Judæorum Regem , qui , ut testantur sacre literæ libro 3. Reg. capite 4. disputavit super lignis à Cedro , quæ est in Libano , usque ad byssopum , quæ egreditur de pariete ; & disseruit de jumentis , & volucribus , & reptilibus & piscibus. Illud insuper ipsorum Ethnico-

P R Æ F A T I O.

V

rum testimonio certum est Assyrios & Chaldæos in Astronomia cum laude fuisse versatos, invitante scilicet eos planâ paten-
tique regione, quam incolebant, ex qua
syderum cursus liberè observare poterant.
Hinc Tullius lib. 1. *de Divinatione* Chaldæos
cognitione astrorum, solertiâque ingeniorum
antecelluisse memorat.

Ab Assyriis autem & Chaldæis, teste Jo-
sepho lib. 1. *Antiquitatum Judaicarum cap. 9.*
Arithmetica per Abrahamum translata est
ad Ægyptios, qui necessitate compulsi
Geometriæ pariter studuerunt: quoniam
per anniversariam Nili inundationem, ut
Proclus refert, agrorum termini apud illos
sic turbarentur, ut discerni postea sine
Geometria non possent.

Tandem ab Ægyptiis ad Phœnices si-
mul & ad Græcos trajecto mari delata est
Geometria; quam videlicet in Ægypto di-
dicit Thales Milesius, & in Græciam in-
tulit, ut narrat ipse Diogenes Laertius in
ejus vîta.

Itaque non Græcis solis acceptam refer-
re debemus Philosophiam: sed quemad-
modum apud eos extitere viri ingenio, &
rerum naturalium cognitione præcellen-
tes, qui *Sapientes* primùm, postea *Philosophi*
sunt appellati: ita cæteris quoque nationi-
bus sui fuerunt veritatis interpretes ac doc-

tores ; Hebræis quidem , *Rabbini* ; Babylo-
niis & Assyriis ; *Chaldaei* ; Persis , *Magi* ;
Indis , *Brachmanes* , seu *Gymnosophistæ* ; imò
& in extremis Orientis oris apud *Sinas* fue-
re disciplinarum humanarum & liberalium
Artium cultores , in quibus maximè cele-
bratur *Confucius* , qui ideo *Sinensis Philosophus*
appellatur. Item apud Ægyptios *Hie-
rophantæ* , apud Gallos *Druide* florue-
runt.

Præcipua autem Philosophiæ gloria Græ-
cis ideo tribuitur , quòd ii diligentius in-
cubuerint in singulas illius partes , eamque
in quoddam veluti corpus digestam scriptis
suis ad posteros transmiserint. Quamobrem
illustriores Philosophorum sectæ , de qui-
bus mentio fit in Scholis , à Græcis sunt re-
petendæ.

Illustriores Philosophorum sectæ.

S E C T A autem est quædam hominum
multitudo , quæ ab aliis quodammodò
secta , & divisa certum doctrinæ genus sub
aliquo Duce *sectatur*. Hinc vel à *secando* ,
vel à *sectando* nominata est *secta*.

Porrò primi Græcorum Philosophi in
duas sectas dividuntur ; scilicet in *Dogmati-
cam* , & *Academicam*.

Secta dogmatica eos comprehendit Phi-

losophos , qui veritatem affecutos esse se , saltem in pluribus contendunt : quæ iterum duplex est , *Ionica* & *Italica*.

Ionicæ sectæ dux fuit Thales , dictus *Milesius* , sive quia *Miletum* , quæ urbs est *Jonæ* caput , patriam habuit ; sive quia , cum ex *Phœnicia* oriundus esset , inter ci-ves *Milesios* , ut quidam tradunt , fuit ad-scriptus. Ipsum anno primo olympiadis 35. natum esse memorat Apollodorus apud *Diogenem Laertium* in ejus vitâ , mortuum verò anno ætatis septuagesimo. Annus au-tem ille primus olympiadis 35. est 639 , ante æram vulgarem Christianorum , & à mundo condito 3365. *Thaletem* sectati sunt *Anaximander* , *Anaximenes* , *Anaxa-goras* , *Xenophanes* , *Heraclitus* , *Demo-critus* & alii ; qui omnes præceptoris sui *Philosophiam* illustrarunt , & ad *Socratem* usque ac *Platonem* perduxerunt.

Italicæ princeps fuit *Pythagoras Samius* , qui cum *Pherecydis Syri* fuisset discipulus , ac *Ægyptum* & *Babyloniæ* doctrinæ com-parandæ gratiâ perlustrasset , tandem rece-pit se in *Italiam* , tempore *Servii Tullii Ro-manorum Regis* , & *Crotonæ* non longè à *Tarento* *Philosophiæ* per annos circiter viginti operam navavit , indeque postea *Me-tapontum* profectus testante *Justino lib. 20.*

hystoriarum cap. 4. diem ibi supremum obiit an. 4. Olympiadis 70, ut ex Eusebio in chronico tradit-Ussërius ad annum mundi 3507. Ab eo primùm Philosophiæ nomen usurpatum est. Quippe cùm per Peloponnesum transiens interrogatus esset à Leonte *Sicyoniorum* vel *Phliasiorum* Tyranno (erant autem *Sicyon* & *Phlius* urbes Peloponnesi) quem se profiteretur: respondit se *Philosophum* esse, hoc est, sapientiæ studiosum; modestiore scilicet appellatione usus, inquit Diogenes Laërtius in Proœmio ad Vitas Philosophorum, ut retunderet fastum ac superbiam Græcorum qui se *Sapientes* prædicabant: quia solus Deus verè sapiens dici potest; homines verò potius sapientiæ amatores sunt nominandi, quàm sapientes.

Pythagoræ dogmata inter cæteros amplexi sunt *Timeus* Locrensis, *Archytas* Tarentinus, *Philolaus* Crotoniata, *Parmenides* & *Zeno* ambo Eleatæ, quorum hic dialecticæ auctor dicitur à Diogene Laertio in proœmio, ac *Melissus* Samius: qui omnes Physicæ seu naturali scientiæ præcipuam dederunt operam ad institutionem usque veteris Academiæ, cujus Princeps fuit Socrates: quo tempore Philosophi animum à rebus physicis ad morum scientiam Socratis exemplo converterunt.

P R Æ F A T I O. ix

Secta Academica nomen suum desumpsit ab *Academia*, hoc est, à loco nemoroso in suburbio Athenarum sito, quem heros nobilis, *Academus* nomine, Philosophorum exercitationibus consecrarat. Hujus sectæ Philosophi assensum omnem cohibebant; nihil omnino affirmabant: ipsaque rursus in veterem, mediam, & novam Academiam fuit divisa.

Veteris Academiæ Principes fuere *Socrates*, & ejus discipulus *Plato*. Unde veteres Academici, iidem *Platonici* dicti sunt, ut & *Sceptici* seu Inquisitores: quòd licet ignotam esse veritatem arbitrarentur, de ea tamen invenienda non desperarent; ideoque ejus inquisitioni constanter vacarent. *Pyrrhonic* quoque vocati sunt à *Pyrrhone* Academico.

Socrates in Attica natus est anno 4. Olympiadis 77. secundum *Diogenem Laertium* in ejus vita: hoc est, anno mundi juxta calculum *Usserianum* 3536. mortuus verò an. 1. Olympiadis 95. ætatis septuagesimo. Primus ille à rebus occultis, ut ait *Cicero* lib. 1. Academicarum quæstionum, & ab ipsa natura involutis, in quibus omnes ante eum Philosophi occupati fuerant, avocavit Philosophiam, & ad vitam communem adduxit, ut de virtutibus & vitiis, omninoque de bonis & malis quæreretur: cœlestia autem vel
a. v.

procul esse à nostra cognitione censeret : vel si maxime cognita essent , nihil tamen ad bene vivendum conferre. Hic in omnibus ferè sermonibus , qui ab iis , qui illum audierunt , perscripti variè & copiosè sunt , ita disputabat , ut nihil affirmaret ipse , refelleret alios , nihil se scire diceret , nisi id ipsum.

Operam Socrati dedere Crito , Aristippus , Cebes , Xenophon , Euclides , &c. Sed inter eos omnes eminebat divinus Plato Atheniensis , qui & Socrati in Academia successit , ejusque methodo insistens , nihil affirmabat ; sed ut ait idem Tullius eodem libro 1. Academicarum quæst. multa in ejus libris in utramque partem differuntur , de omnibus quæritur , nihil certi dicitur. Plato autem discipulum inter cæteros habuit Aristotelem Peripateticæ sectæ postea principem , & sibi adversarium.

Post mortem Platonis & Speusippi , cæteri Socratis successores in Academia timidam illam philosophandi methodum abjicere ; & in Dogmaticorum partes translati , triplicem constituere sectam , Peripateticorum , Stoicorum , & Epicureorum.

Peripatetici præceptore gloriantur Aristotele Stagyrîtâ , sive Stagyrâ oppido Macedonia oriundo , circa annum mundi 3621. scilicet anno primo Olympiadis 99. In Lyceo , sive loco prope Athenas amcenissimo

sectæ Peripateticæ dedit originem. Dicta autem fuit secta *Peripatetica*, hoc est, ambulans, quòd Aristotelis discipuli inter ambulandum disputarent.

Stoicorum Dux fuit *Zeno* Cittieus, sive è Cittio Cypri oppido oriundus, qui Athenis in *Stoa* seu Porticu severioris Philosophiæ dogmata magnâ cum nominis celebritate tradebat circa olympiadem 130.

Epicurei ita vocati sunt ab *Epicuro* hujus sectæ Patrono, qui in hortis, ubi suos agebat conventus, *Democriti* placita, quæ propria fecerat, explicabat. Obiit anno secundo olympiadis 127. post mundum conditum 373. cum vixisset annos 72. Epicuri Philosophiam latinis carminibus in sex libros distributis scripsit *Lucretius* Cicerone duodecim annis minor; eamque nostris temporibus illustravit, ac multis in locis, uti par erat, emendavit *Gassendus*.

Intereà verò, Socratis Methodus ab *Arcefila* revocata fuerat circa olympiadem 120. unde ipse secundæ seu mediæ Academiæ Princeps nominatur. Is autem Socratis opinioni hoc addidit, ut non modò nihil sciri affirmaret cum Socrate, sed ne posse quidem rem ullam sciri contenderet. Hinc novi Academici, iidem *Acataleptici* sunt vocati; quasi diceret, qui nihil omnino comprehendere se posse profiterentur.

Arcefilæ suffragati sunt *Lacydes*, novæ seu tertiæ Academiæ auctor, *Evander*, & præcipuè *Carneades*, qui Romæ magna cum eloquentia novorum Academicorum doctrinam explicuit; ibique discipulos habuit *Clitomachum*, *Philonem*, & *Antiochum*, à quibus eruditus est *Cicero*, qui & ipse Academicus fuit, ac Platonicæ methodi strenuus assertor.

Sequentibus porro temporibus post Christi adventum doctrina Platonis ad octavum circiter Ecclesiæ seculum primas semper obtinuit; eique antiquiores Ecclesiæ Patres; *Justinus* martyr, *Clemens Alexandrinus*, *Origenes*, sanctus *Basilius*, sanctus *Gregorius Nazianzenus*, aliique studium & vigilias suas consecrarunt. Eandem inter Latinos Patres diligentissimè excolnit sanctus *Augustinus*, qui, ut erat acerrimo ingenio, multis eam partibus illustravit, & ad refellendos Ethnicorum errores, asserendamque Religionis Christianæ veritatem feliciter adhibuit.

Circa finem autem octavi seculi, & initio noni, Arabes, qui antea Duce *Mahomete* vastissimas regiones ferro flammæque subegerant, quique tùm latè in *Africâ* & *Hispaniâ* dominabantur, *Aristotelis* doctrinam dudum sopitam exfuscitarunt. Scholasque instituerunt publicas, ubi lecti fue-

runt ipsius libri arabicè redditi ; idque per quadringentos circiter annos , quibus Arabes plurimi magnam scientiæ famam sunt consecuti. Inter eos tamen *Avicennas* & *Averroes* præcipuum sibi locum vindicant.

Itaque ex Africâ in Europam & ex Hispaniâ in Galliam transmigravit Aristotelis Philosophia , ac in Scholis Parisiensibus tradi cœpit eo , quo ab Arabibus recepta fuerat , modo , subtili scilicet & contentioso : eaque *disputatrix* & *contentiosa* Philosophia, quæ sermonis barbariem secum in scholas invexit , *Scholastica* vocata est, quod in Scholis ad nostra usque tempora sit usurpata : quamvis tamen variam diversis temporibus fortunam experta sit , de qua *Launoïus*.

Hanc methodum , quæ si conclusiones tantum justas ex principiis certis aut probabilibus deducat , nec in vanas futilisque Sophistarum altercationes evagetur , non modò nihil vitii , sed plurimum habet utilitatis, cum laude in Parisiensi Schola sectati sunt plurimi præstantes viri , inter quos velut antesignani celebrantur , *Petrus Abaelardus* Nannetensis non minùs ingenii subtilitate ac auditorum frequentia , quam suis cum *Heloïssa* eruditâ puellâ postea conjuge, amoribus clarus. *Petrus* natione *Lombardus* , Episcopus Parisiensis , qui ob cole-

lectas sanctorum Patrum circa fidei Christianæ mysteria sententias, & in quatuor libros digestas circa medium duodecimi seculi, *Magister Sententiarum* est cognominatus, & Scholasticorum parens meritò habetur. *Alexander Halensis* Franciscanus, *Doctor irrefragabilis* dictus. *Albertus Magnus* Dominicanus, Præceptor Sancti Thomæ Aquinatis, Philosophorum ac Theologorum scholasticorum facile principis.

Inter Scholasticos, seu novos peripateticos, tres sunt illustriores sectæ in Academia Parisiensi natæ.

Prima est Thomistarum, qui Præceptorem habere se gloriantur *Divum Thomam Aquinatem*, patriâ Neapolitanum, professione Dominicanum, *Doctorem Angelicum* appellatum; qui circa medium 13. seculi scholarum principis nomen Lutetiæ Parisiorum obtinuit.

Secunda est Scotistarum, qui Ducem sequuntur *Joannem Dunz*, natione Scotum, instituto Minoritam, *Doctorem subtilem* cognominatum; qui Parisiis quoque circa finem decimi tertii seculi, & initio decimi quarti sectæ suæ fundamenta jecit.

Tertia est Nominalium, qui nomina & voces objectum esse Logicæ contendebant, quorum Doctor fuit *Guillelmus Ockamus*.

natione Anglus, ejusdem Ordinis Fratrum Minorum, & Scoti discipulus; qui non longè post initium decimi quarti seculi in eadem Academia Parisiensi sese ostentavit.

Istæ tres sectæ ad nos usque in Scholis perseverarunt, nisi quòd circa medium 17. seculi Galilæus egregius Ducis Hetruriæ Mathematicus, excusso inveteratæ in Scholis consuetudinis iugo, novas vias tentavit. Hujus vestigiis inhærentes plurimi, ut Gassendus, Cartesius, Harvæus, Malpighius, Borellus, alique non pauci, *mechanicam* Philosophiam à Democrito & Epicuro quondam excultam, sed multis postea seculis derelictam instaurarunt, ac multis locis, prout necessarium visum est, reformarunt.

Ex recentioribus autem Philosophorum sectis duæ potissimum celebrantur; *Gassendistarum* nempe, & *Cartesianorum*.

Gassendistæ ducem habent *Petrum Gassendum* presbyterum, Præpositum Ecclesiæ Diniensis in Gallo-Provincia, & Regium in Academia Parisiensi Matheseos Professore; qui editis variarum Philosophiæ partium, ac multiplicis literaturæ voluminibus clarus obiit Parisiis circa finem mensis Novembris, an. Domini 1655. ætatis 63. cum novem mensibus, & diebus tredecim, ac in Æde beati Nicolai de Cam-

pi, conditus est, intra sepulchrum viri nobilis, & de literis optimè meriti Henrici Ludovici Haberti *de Montmor*, Libellorum supplicum Magistri, ubi legi potest ipsius Epitaphium infra marmoream ejus effigiem positum.

Cartesiani sectantur Renatum *Descartes*, Dominum *de Perron*, ex gente nobili apud *Aremoricos* oriundum. Is *Hagæ Turonum* in Gallia natus anno 1596. primum studuit *Flexiæ* apud Patres *Jesuitas*: tum perfectis studiis in Germaniam, partim militandi, partim peregrinandi animo est perfectus. Cumque ibi aliquando quierus esset per hyemem in *hypocausto*, meditationibus Philosophicis vacare cœpit. Deinde in *Bataviâ* translatus totum se deinceps Philosophiæ tradidit: Tandem in *Sueciam* vocatus à *Christina* Regina sapientissima, *Holmiæ* occubuit die 11. Februarii, an. Domini 1650. ætatis 53, cum decem mensibus & undecim diebus. Ibidem in ea cœmeterii parte, quâ sepeliuntur parvuli, sacro baptismate abluti, & proinde in Christi gratia mortui, procurante illustri *Petro Chanut* Galliarum Legato fuit positus. Sed illius reliquiæ, è sepulchro eductæ, *Lutetiam* advectæ sunt. an. 1666. & in *Æde Divæ Genoveses* conditæ; ubi duo Epitaphia elegantissima, alterum latinum, alterum gallicum, infra ip-

sius effigiem leguntur.

Atque hæ sunt illustriores Philosophorum sectæ ad nostra usque tempora apud Europæos notæ. Sed anno 1687. prodiit Lutetiæ Parisiorum *Sinensis Philosophia* latinè reddita è manuscripto Bibliothecæ Regis Christianissimi, auctore *Confucio* Sinarum Philosopho, interpretibus quatuor Missionariis Jesuitis. Ex quo intelligere licet Philosophiam, præsertim eam, quæ circa mores & vitæ civilis institutionem versatur, apud nationes quoque illas in extremo Oriente positas incultam, non jacuisse; sed multis retrò seculis summo in honore fuisse habitam. Fuit enim *Confucius*, ut vulgò existimatur, Pythagoræ ferè coævus, utpote quingentis quinquaginta & amplius annis ante Christi ortum, Cyro Persis imperante, natus. Hunc Sinen- ses veluti principem suæ Philosophiæ sequuntur, & colunt. Nec tantum scientiâ & morum probitate clarus, sed prisca etiam nobilitate fuit illustris. Nam & ab *Hoam-ti* primo gentis Imperatore ortum habuisse dicitur; & ipsius filii ac nepotes testantibus iisdem interpretibus, per annos bis mille ducentos & amplius, stirpem illius conser- varunt: siquidem anno 1687. quo scribe- bant, ejus nepos ordine 68. cum titulo Ducis, *solus è Sinensibus ab omni tributo liber, in pro-*

pria & perantiqua sua familia sede & urbe commorabatur.

Opus porrò Confucianum, quod ab illis eruditis viris in lucem emissum est, Moralem scientiam spectat, variaque vitæ rectè ac feliciter transigendæ præcepta completur, quibus egregia Auctoris indoles, judicium acre, & magna vis mentis cum longo rerum usu conjuncta se produnt.

Ratio & partitio operis.

HIS verò circa illustriores Philosophorum sectas, & Philosophiæ progressum observatis, jam superest ut consilii nostri rationem in his Philosophicis Institutionibus tradendis aperiamus. Cùm autem *Institutiones Philosophicæ* dicimus, satis profectò significamus nobis id non fuisse propositum, ut quæcumque ad singulas Philosophiæ partes, maximè verò ad Physicam, seu Physico-Mathematicam pertinent, penitus exhauriremus; id enim multorum hominum & annorum laborem poscere videtur: sed illud tantùm habuimus in animo, ut generalia disciplinarum omnium principia traderemus, quibus quicumque per biennium Academicum forent eruditi, inoffenso pede ad secretiora disciplinarum naturalium arcana in quavis Philosopho-

rum hypothefi progredi ; & ad superiores etiam facultates , *Theologiam sacram* , *Jurisprudentiam* , & *Medendi artem* conferre se possent , ad quas hodie passim videmus homines *illoris* , ut aiunt , *pedibus* accedere. Aliunde persuasum nobis est ponendum esse inquisitioni nostræ modum. Etenim ubi ad certum terminum pervenimus cætera quæ ulterius in Disciplinis naturalibus prosequimur , in minutias & futilitates degenerant. Tempus autem quod breve nobis concessum est , ut sapienter nos admonerat ante aliquot annos magnæ vir eruditionis , majorisque modestiæ ac sanctitatis, *Joannes Mabillonius* Remensis, Sacerdos Benedictinus è Congregatione sancti Mauri, Tractatu de Studiis Monasticis , parte 2. cap. 15. tempus, inquam , adeo pretiosa res est , ut in sterilibus speculationibus consumi sine piaculo non possit. Quemadmodum autem in iis artibus , quæ manu exercentur, opera quædam usibus humanis destinata , ut claves , seras seu claustra ferrea polire ac perficere, aut columnas affabrè tornare, aliave hujus generis opera facere non immeritò apud homines in pretio est; figuras verò torno facili tam exiles effingere ut eas pixidibus includi necesse sit , ne levi ventorum halitu diruantur , vel cate-nulas constringendis pulicibus idoneas fa-


bricare , similibusque opusculis vacare, quales erant Myrmecidæ Milesii , & Callicratis Lacedæmonii. quadrigæ , quæ sub musca poterant abscondi , ut refert Ælianus lib. 1. var. hist. cap. 17. *vana est*, ut ipse loquitur *temporis jactura* : sic in Philosophia nostra si quid sit utile, si quid verum atque decens, id omni studio quærendum ; Metaphysicas verò subtilitates, vel minutias Physicas , vel inutilitates Mathematicas studiosius consuetari , inanis est gloria , & labor inutilis. Si tamen in tenues illas & evanidas speculationes incidant nonnulli, dum aliud melius quærunt, eæ utique in transitu non sunt omitrendæ : sed attendendum maximè ad illud Platonis, quod narrat idem Ælianus lib. 2. var. hist. c. 27. Cum Anniceris quidam Cyrenensis ob curruum regendorum peritiam, cujus singulare & insolitum , sed inutile specimen ediderat , superbè sese efferreret, omnesque ipsum admirarentur : *Plato nimiam ejus industriam reprehendit , inquit fieri non posse , ut qui rebus tam nullius pretii operam navaret adeo diligentem , posset magnis & præclaris vacare.* Hoc animo cogitare opus est , & simul præ oculis semper habere præclarum illud dignumque sapienter responsum, quod apud Phædrum legitur Fabularum lib. 3. Apologo 15.

Nisi utile est quod facimus, stulta est gloria.

Igitur Philosophiam sic tractabimus, ut quæ ad utilitatem communem, & specialiter ad Dei ac nostri notitiam, virtutumque nostrarum augmentum, quidpiam conferre videbuntur, ea potissimum sectemur. Si quid ex auctoribus quibuscunque seu vivis seu mortuis, quod ad rem nostram conferat, desumpserimus, id ipsis acceptum honorificè referemus, nec quisquam plagii crimen jure nobis objiciet. Quod si quorundam opiniones refellere fuerimus coacti, sine verborum acerbitate, & plerumque suppresso nomine id præstabimus. A Logica sumemus initium; deinde ad Metaphysicam, Geometriam, & Physicam veniemus: ut postquam humana mens tum Dei, tum sui ipsius, multarumque rerum naturalium notitiâ fuerit informata, tandem in Ethica, quæ opus claudet, vitæ sapienter instituendæ rationem addiscat.

In singulis autem Philosophiæ partibus hac methodo utemur. Primum eas secundum subjectam cuique materiam certis *partibus* distinguemus: iis partibus adjungemus *sectiones*, quas adhuc in *capita* partiemur. Præterea in singulis capitibus *propositiones* quasdam seu *theoremata*, aut *conclusiones*, aut *assertiones*, aut *theses* juxta re-

ceptam Scholarum methodum quâ Geometrae utuntur ex principiis antea positis deducere, validisque argumentis nitentur communicare. Tum si quæ ex iis propositionibus *confectaria*, sive, ut aiunt, *corollaria*, quæ sunt veluti ipsarum *corollæ*, aut *coronides*, seu *complementa*, naturaliter consequantur, ea non omittemus. Denique Adversariorum argumentis occurrere, solidèque, si fieri potest, sed semper candidè respondere conabimur. Cætera ex peculiaribus singularum partium præfationibus ac procæmiis intelligi poterunt. Nunc generales quædam Philosophiæ pro-
lusiones sunt præmittendæ.




M O N I T U M.

QUOTIES *allegavimus Artem cogitandi,*
quod frequenter accidit in Logicâ, ter-
tiam illius Editionem an. 1668. adeundam vo-
luimus.

In Aristotele citando usi sumus editione
Guillemi Du Val Pontoesiani ann. 1629.


Denique Sanctum Augustinum laudavimus ex
editione Monachorum Benedictinorum Congre-
gat. S. Mauri.



APPROBATIO.

NOs Consiliarius & Medicus Regis
Ordinarius, Serenissimæ Ducissæ Bur-
gundiæ Archiater, & Doct̃or Medicus Pari-
siensis, speciali delegatione Illustrissimi
Galliarum Cancellarii legimus Librum,
cui titulus, EDMUNDI PURCHOTII *Senonensis*,
antehac Rectoris Academia Parisiensis,
& Philosophiæ Professoris, *Institutio Philosophica*
ad faciliorem veterum ac recentiorum
Philosophorum lectionem comparata. Quem
librum multis jam partibus auctum & lo-
cupletatum dignum censuimus, qui typis
iterum ac saepius imprimeretur. Datum
Versaliis, die 24. Novembris, an. 1698.

BOURDELOT.



INDEX



INDEX

TITULORUM TOMI PRIMI.

I NSTITUTIONES PHILOSOPHICÆ
ad faciliorem veterum ac recentiorum
Philosophorum lectionem comparatæ.

pag.

I

Proœmium.

ibid.

C A P. I. *Quomodo investiganda veritas, qua-
que Philosophia operam daturò
sint prænoscenda.*

ibid.

C A P. II. *De nomine, notione & existentia
Philosophia.*

14

C A P. III. *De origine & causis Philosophia.*

29

C A P. IV. *De divisione seu partibus Philoso-
phia.*

33

LOGICA SIVE SCIENTIA

cogitationum rectrix.

Proœmium.

36

PARS PRIMA LOGICES,

De perceptione vel idea.

45

C A P. I. *Quid sit perceptio, vel idea & quot
modis sumatur.*

46

Tom. I.

2

I N D E X.

C A P. II. De veritate & falsitate idearum. 51

C A P. III. De universalitate , particularitate,
& singularitate idearum : ubi de
quinque ideis universalibus Por-
phyrii. 58

C A P. IV. De claritate & distinctione idea-
rum. 68

C A P. V. De Categoriis tam Aristotelis , tam
aliorum Philosophorum. 75

C A P. VI. De idearum signis. 87

P A R S S E C U N D A L O G I C E S.

De judicio. 100

S E C T I O I. De judicio , prout in mente
existit, spectato. ibid.

C A P. I. De natura judicii. 101

C A P. II. De precipuis errorum in judiciis no-
stris occurrentium fontibus. 105

C A P. III. Que sint judiciorum nostrorum erro-
ribus adhibenda remedia. 112

S E C T I O II. De enuntiatione. 118

C A P. I. De natura enuntiationis seu propo-
sitionis. 119

I N D E X.

C A P. II. *De proprietatibus enuntiationis, seu propositionis.* 123

C A P. III. *De variis propositionum speciebus.* 142

C A P. IV. *De definitione & divisione, quae praecipuae sunt orationis, seu enuntiationis species à Logicis spectanda.* 148

P A R S T E R T I A L O G I C E S.

De ratiocinatione. 156

C A P. I. *De ratiocinationis natura.* ibid.

C A P. II. *De argumentatione, & variis illius speciebus.* 161

C A P. III. *De syllogismo simplici.* 166

C A P. IV. *De singulis syllogismorum simplicium figuris.* 174

C A P. V. *De syllogismo conjunctivo & illius speciebus.* 182

C A P. VI. *De reductione syllogismorum imperfectorum ad perfectos.* 186

C A P. VII. *De inventione medii, seu de locis dialecticis.* 193

C A P. VIII. *De Sophistarum fallaciis.* 199

P A R S Q U A R T A L O G I C E S.

De methodo. 205

C A P. I. *Quid sit methodus generatim.* ibid.
ē ij

INDEX.

C A P. II. De <i>methodo analytica</i> , seu <i>resolutionis & inventionis</i> .	207
C A P. III. De <i>methodo synthetica</i> .	216

METAPHYSICA

Seu PRIMA PHILOSOPHIA.

Præfatio.	233
-----------	-----

PARS I. METAPHYSICÆ,

Sive ONTOLOGIA. 238

C A P. I. De <i>ente & modo entis generatim</i> .	
pag.	239
C A P. II. De <i>attributis tum ipsi enti, tum entis modo communibus</i> .	248
C A P. III. De <i>attributis soli enti, aut substantia propriis</i> .	264
C A P. IV. De <i>primis axiomatis, quæ ex entis ipsius ac modi entis generatim, & utriusque attributorum ideis sunt conficta</i> .	276

PARS II. METAPHYSICES,

Sive PNEUMATOLOGIA. 297

SECTIO I. De Deo.	298
-------------------	-----

C A P. I. <i>Quid Dei nomine, omnibus in</i>	
--	--

INDEX.

mentem veniat , & quomodo à nobis cognoscatur. 299

CAP. II. *Quibus potissimum rationibus existentia Dei demonstrari possit.* 310

CAP. III. *De precipuis Dei attributis , & speciatim de immensitate ac aternitate.* 332

CAP. IV. *De infinitate Dei.* 347

CAP. V. *De scientia , voluntate , omnipotentia , libertate , ac decretis divinis.* 359

CAP. VI. *De Deo Creatore.* 389

CAP. VII. *De Deo conservante & providente.* 400

CAP. VIII. *De Deo movente & concurrente.* 422

SECTIO II. *De Angelis.* 467

CAP. I. *De natura Angelorum.* 468

CAP. II. *Quaesita quadam de Angelis proponuntur , & vulgata iis responsa subjiciuntur.* 472

SECTIO III. *De mente humana.* 478

CAP. I. *Quid sit mens humana.* 479

CAP. II. *Quomodo mens humana seipsam cognoscat.* 485

ε iiij

INDEX.

- CAP. III. *Utrum mens humana demonstrare
possit immortalis.* 490
- CAP. IV. *De humano intellectu & ideis.*
505
- CAP. V. *De humana voluntate, & liber-
tate.* 534
- CAP. VI. *De naturalibus humana mentis
habitibus.* 540
-

AVIS

AUX RELIEURS

Pour placer les TAB.

TOM. I. TAB. 1. 2.

TOM. II. TAB. 3. 4. 5. 6. 7. 8.
9. 10. 11. 12. 13. 14. 15.

TOM. III. TAB. 16. 17. 18. 19.
20. 21. 22. 23. 24. 25. 26. 27.
28. 29. 30. 31. 32. 33. 34.

SUMMA PRIVILEGII.

QUOD supplex à Rege Christianissimo postulavit EDMUNDUS PURCHOTIUS Senonensis, in utroque Jure Licentiatus, Academiæ Parisiensis Syndicus, antehac Rector & emeritus Philosophiæ Professor, ut sibi liceret denuò edere, ac typis imprimendum dare opus à se compositum, multisque nunc partibus amplificatum, cui titulus, *institut. Philosophi ad faciliorem veterum ac recentiorum Philosophorum lectionem comparat.* id ipsi Regio diplomate, dato Versaliis anno 1698. die 28. Decembris, & sigillo majori munito indultum est, simulque vetitum ne quis præter illius voluntatem idem opus intra Gallici Imperii ditionem typis imprimat, aut vendat per octo annos, ab ea die, quâ prius obtentum Privilegium vim habere desinet, nimirum à die decima-quintâ Octobris anni 1703. numerandos. Si quis secùs fecerit eum 3000. aureorum multâ puniri placuit, aliisque subijci pœnis in ipso Diplomate contentis, cujus summario ad operis initium aut finem exscripto non fidei minùs haberi Rex voluit quàm ipsi diplomati.


Ejus tenorem publicis Typographorum ac Bibliopolarum actis inscriptum, die 19. Januarii anno 1699. sua subscriptione testatus est ad calcem ipsius Diplomatis,
BALLARD, Syndicus.


Quicquid juris habuit Auctor, ex indulto sibi Privilegio, id JOANNI-BAPTISTÆ COIGNARD, Typographo Regio, conditionibus intra eorum utrumque initis, ultrâ concessit.

A P P R O B A T I O .

EX Madato Illustrissimi Gallix Cancellarii ,
Ego in Sacra Facultate Parisiensi Doctor Theolo-
logus, ac librorum Censor Regius, legi & recensui
*Institutiones Philosophicas ad faciliorem veterum ac
recentiorum Philosophorum lectionem comparatas ,*
Operâ & studio viri clarissimi **E D M U N D I**
P O U R C H O T Senonensis , in Parisiensi Juris-
utriusque Facultate Licentiati , Universitatis ante-
hac Rectoris & emeriti Philosophix Professoris ;
opus , meo quidem judicio , eximium , elegans ,
limatum , & ordine præclaro digestum ; in quo
Vir præstantissimus , de Literis & de Academiâ
Parisiensi bene semper meritis eruditionis multæ
ac multiplicis , etiam sacræ , ut decet Philoso-
phum verè ac perdoctè Christianum , varia & ex-
quisita prodit specimina. Quapropter luce & laude
publicâ dignissimum mihi videtur. Datum Parisiis
Augusti die 13. an. 1710.

A N Q U E T I L .





P R I V I L E G E D U R O Y .

LOUIS, par la grace de Dieu, Roy de France & de Navarre : A nos amez & feaux Conseillers les Gens tenans nos Cours de Parlement, Maistres des Requestes ordinaires de nôtre Hostel, Grand Conseil, Prevost de Paris, Baillifs, Sénéchaux, leurs Lieutenans Civils, & autres nos Justiciers qu'il appartiendra, Salut : JEAN-BAPTISTE COIGNARD, nôtre Imprimeur ordinaire, & de l'Académie Françoisse, à Paris, Nous ayant fait remontrer qu'il luy a esté mis entre les mains un Manuscrit intitulé, *Antiquitates Constantinopolitana, &c.* composé par le P. Dom Anselme Banduri Religieux Benedictin de la Congregation de Melita, lequel Ouvrage il desireroit imprimer ; & comme il est une suite de l'Histoire Byzantine imprimée ci-devant en nôtre Imprimerie du Louvre, le rendre conforme, autant qu'il sera possible, aux autres Tomes imprimez de ladite Histoire Eysantine, tant pour la grandeur du volume, que pour la beauté des caracteres & du Papier, tailles douces, lettres grises, ornemens & autres choses qui pourront contribuer à la perfection dudit Ouvrage. Mais comme il ne le peut faire sans s'engager à une tres-grande dépense, Nous, voulant favoriser le zele dudit Coignard, & luy donner les moyens d'executer cet Ouvrage, voulant en même temps encourager les Imprimeurs à entreprendre des Editions de Livres utiles au public pour l'avancement des Sciences & des belles Lettres qui ont toujours esté florissantes dans nôtre Royaume, soustenir en mesme temps l'Imprimerie, qui a esté cultivée par nos Sujets avec tant de reputation & de succès, & recompenser

ceux qui se distinguent dans cette Profession par les Editions des bons Livres ; Nous luy avons permis & accordé , permettons & accordons par ces Presentes d'imprimer ou faire imprimer , de la mesme forme , caractere & papier que les autres Volumes de la Bysantine , ledit Livre *Antiquitates Constantinopolitana* , & de reimprimer ou faire reimprimer le Dictionnaire Historique de Morery , revû , corrigé & augmenté : le Dictionnaire des Arts & des Sciences du Sieur Corneille : les Traductions de quelques Livres de saint Augustin & de Ciceron par le Sieur du Bois ; *Catechismus ad Ordinandos : Institut. Philosoph.* Edm. Pourchot : les Oeuvres du Sieur Domat : la Methode des Fortifications du Sieur de Vauban : & l'Imitation de Jesus-Christ , traduite par le Sieur Macé , en telle forme , marge , caractere , & autant de fois que bon luy semblera , pendant le temps de D I X - H U I T A N N E ' E S consecutives , à compter du jour de la date des Presentes & sans tirer à consequence ; à condition neanmoins que l'Impression dudit Livre *Antiquitates Constantinopolitana* sera achevée dans le temps de deux années , à compter pareillement lesdites deux années de la date des Presentes ; faisant deffenses à tous Imprimeurs , Libraires & autres , d'imprimer , faire imprimer , vendre & distribuer lesdits Livres , sous quelque prétexte que ce soit , mesme d'Impression étrangere & autrement , sans le consentement de l'Exposant ou de ses Ayans cause , sur peine de confiscation des Exemplaires contrefaits , de trois mille livres d'amende contre chacun des contrevenants , applicable un tiers à Nous , un tiers à l'Hôtel-Dieu de Paris , l'autre audit Exposant , & de tous dépens , dommages & interêts ; à la charge que ces Presentes seront enregistrées tout au long sur le Registre de la Communauté des Imprimeurs & Libraires de Paris , &

ce dans trois mois de la date d'icelles: Que l'impression desdits Livres sera faite dans nôtre Royaume, & non ailleurs, & ce en bon papier & en beaux caracteres, conformément aux Reglemens de la Librairie:& qu'avant que les exposer en vente, il en sera mis deux Exemplaires dans nôtre Bibliotheque publique, un dans celle de nôtre Chateau du Louvre, & un dans celle de nôtre treshier & feal Chevalier, Chancelier de France, le Sieur PHELYPEAUX Comte de PONTCHARTRAIN, Commandeur de nos Ordres, le tout à peine de nullité des Presentes, du contenu desquelles Vous mandons & enjoignons de faire jouir ledit Exposant ou ses Ayans cause, pleinement & paisiblement, sans souffrir qu'il luy soit fait aucun trouble ou empêchement: Voulons que la Copie desdites Presentes, qui sera imprimée au commencement ou à la fin desdits Livres, soit tenuë pour deuëment signifiée, & qu'aux Copies collationnées par l'un de nos amez & feaux Conseillers & Secretaires, foy soit adjoutée comme à l'Original. Commandons au premier nôtre Huissier ou Sergent, de faire pour l'exécution d'icelles, tous Actes requis & necessaires, sans demander autre permission, & nonobstant clameur de Haro, Charte Normande, & autres Lettres à ce contraires: Car tel est nôtre plaisir. DONNE' à Versailles, le trentième jour de Janvier mil sept cens sept, & de nôtre Regne le soixante-quatrième. Par le Roy en son Conseil,

L A U T H I E R. Et scellé.


Registré sur le Registre N°. 2. de la Communauté des Libraires & Imprimeurs de Paris, page 162. N°. 357. conformément aux Reglemens, & notamment à l'Arrest du Conseil du 13. Aoust 1703. à Paris le 4. Février 1707. Signé GUERIN, Syndic.

J'ay cédé & transporté à M. ANTOINE BOUDET
Libraire à Lyon tous les droits que j'ay au
present Privilege, que le Roy m'a accordé pour
l'Impression de la Philosophie de Mr POURCHOT
pour en jouir en mon lieu & place suivant nos
conventions particulieres , à Paris le douzième
avril 1709.

COIGNARD.

*Registré la presente Cession sur le Registre N°. 2.
de la Communauté des Libraires & imprimeurs de
Paris page 436. N°. 848. conformément aux Regle-
ments , & notamment à l'Arrest du Conseil du 13.
aoust 1703. à Paris ce 12. avril 1709.*

L. SEVESTRE Syndic.



INSTITU



INSTITUTIONES

PHILOSOPHICÆ

AD FACILIOREM VETERUM

ac recentiorum Philosophorum

lectionem comparatæ.

PROOEMIUM.

ANTEQUAM ad singulas Philosophiæ partes accedamus, quatuor nobis occurrunt explicanda. Primum, quomodo investiganda veritas, quæque Philosophiæ operam daturo sint prænoscentia. Secundum, de nomine, notione, & existentia Philosophiæ. Tertium, de illius origine & causis. Quartum denique de illius divisione & partibus.

CAPUT I.

Quomodo investiganda veritas, quæque Philosophia operam daturo sint prænoscentia.

QUICUMQUE animum ad Philosophiam adiunxere, ii omnes in veritatis inquisitione.

Tom. I.

A.

sunt versati sed non omnes eandem viam tenuerunt. Alii quippe, ut *Academici*, rerum naturalium obscuritate deterri, longius progredi non audebant: & aditum omnem ad veritatem mortalibus interclusum esse conquesti, naturam accusabant, quæ *in profundo veritatem*, ut aiebat Democritus, *penitus abstrusisset*: quare ii *Acataleptici* nuncupati, ut in Præfatione notavimus. Alii, nempe *Sceptici*, nihil quidem hætenus sciri arbitrabantur: non tamen continuo animum despondendum; sed diligentius huic negotio incumbendum putabant; studiumque omne in investiganda veritate collocabant. Alii denique, quos *Dogmaticos* vocant, multa se ignorare fatebantur: ita tamen ut nonnulla sibi comperta esse ducerent, eaque præsertim quæ nobis consciis in mente nostra peraguntur. Quæ in re non tantum majorem; sed sanio rem quoque Philosophorum partem in suam sententiam adduxerunt. Unde sanctus Augustinus contra Academicos in Enchiridio ad Laurentium, num.7. alias, cap.20. hæc habet: *Cum istis verò, utrum le- qui debeamus ignoro, qui non victuros in æternum, sed in præsentia se vivere nesciunt: imò nescire se dicunt, quod nescire non possunt. Neque enim quisquam finitur nescire se vivere: quandoquidem si non vivit, non potest aliquid vel nescire; quoniam non solum scire, verum etiam nescire viventis est. Sed videlicet non assentiendo quod vivant, cavere sibi videntur errorem: cum etiam errando convincantur vivere; quoniam non potest, qui non vivit, errare. Sicut ergo nos vivere non solum verum, sed etiam certum est: ita vera & certa sunt multa, quibus non assentiri absit ut sapientia potius quam dementia nominanda sit.*

Verum ut aliquid ex iis, quæ extra nos sunt posita, nobis constare possit, non quâcumque viâ, sed certo tramite incedendum videtur. Multi quippe sunt calles, qui nos à veritate revocent, una fere

via, quæ ad eam ducat. Quare ut à scopo non aberremus, hæc nobis præstanda sunt.

Primum quidem, emendandi errores, quicumque vel à sensibus externis, vel à phantasia, vel ab affectibus animi, aut propensionibus voluntatis, imò ab intellectione pura originem ducunt, de quibus suo loco dicemus. Deinde, ineunda certa via aut methodus, quâ cogitationes nostras sic ordinemus; ut nihil quasi verum approbemus, quod non prius maturè ac diligenter fuerit à nobis exploratum.

Hæc verò non consequemur nisi quæcumque hactenus nobis comperta credidimus, ea denuò excutiamus: ut novo isto ac severo examine, quæ vera sunt ac certa, ab iis quæ falsa vel dubia sunt, fecernamus. Non enim in sterili dubitatione cum Academicis & Scepticis perpetuò hærendum: sed si quando dubitare nos contigerit, utiliter certè nobis est dubitandum.

Neque verò de omnibus dubitare licet: cum quædam sint principia adeo clara, ut de iis ambigere, accedente etiam voluntatis imperio, non possimus. Nam v. g. dubitare non possum, quin *totum sit suâ parte majus*; quin mens cogitationem, & corpus extensionem postulet: quia in idea clara & distincta *totius*, comprehensam partem intelligo; in idea *mentis*, cogitationem; in idea *corporis*, extensionem contentam video. Adeo ut, cum agitur de rerum essentia seu natura *evidentiam*, id est, *claritatem & distinctionem idearum*, spectare possimus, tanquam judiciorum nostrorum regulam; & hoc principium velut cæterorum fundamentum assumere: *Quicquid clarè & distinctè ad alicujus rei naturam pertinere concipitur, id de ea re verum est; seu de ea tanquam verum certissimè potest affirmari.*

Sed cum præsertim sensus nostri, ut potè falla-

ces, in varios errores circa corporum existentiam & qualitates nos abduxerint, à quibus liberari oporteat eos, qui fructum aliquem è Philosophiæ studio reportare velint: utilissimum, imò necessarium nobis videtur in ipso Philosophiæ limine, iudicium nostrum circa res præsertim sensibiles ita sustinere, ut nihil de earum existentia & qualitatibus tanquam certum affirmemus, nisi attento animo, & præjudiciis libero à nobis fuerit perpensum. Dum autem animum ita suspendemus circa rerum extra nos positarum, maximeque sensibilibus existentiam & qualitates: dubitare tamen non poterimus, quin dubitantes, seu cogitantes simus; sive, quin existamus nos, qui dubitamus aut cogitamus. Quamobrem quicquid Acataleptici & Pyrrhonicæ obtendant, certum nobis est nos existere, dum cogitamus: ac meritò prima cognitio certa, quæ nobis naturali ordine philosophantibus circa rerum existentiam occurrit, haberi potest ista; *cogito, existo*: sive, ego existo, qui dubito aut cogito: ut optimè observavit sanctus Augustinus, lib. 2. de libero arbitrio, num. 7. aliàs cap. 3. ubi Alipium cum Evodio disputantem inducens, hæc sub Alipii persona Deum existere ostensurus præmittit. *Prius abs te quero, ut de manifestissimis capiamus exordium, utrum tu ipse sis, an te fortasse metuis, ne in hac interrogatione fallaris, cum utique si non esses, falli omnino non posses?*

Idipsum usurpavit Cartesius, tum secundâ Meditatione metaphysicâ, tum primâ parte principiorum, num. 7. tum aliis locis.

Ideo verò certum mihi est existere me, dum dubito, aut alio modo cogito, quod *intimo sensu* conficius mihi sim existere me & cogitare. At quamvis id in meipso non sentirem, de nullo tamen alio cogitante dubitare possem, quin existeret: cum in idea cogitantis inclusam existentis ideam clarè

intelligam. Unde juxta principium superiùs stabilitum constare mihi debet, eum omnem, qui cogitat, existere.

Quocirca non tantùm mihi conscius sum me existere, dum cogito; sed præterea certum mihi est me *substantiam esse cogitantem*, id est, percipientem & volentem: hoc enim attributum mihi competere intelligo; tametsi nihil dum ampliùs de me, seu de natura aut essentia mea, quàm quod sim substantia cogitans, percipiam. Quippe pauca scio, multa ignoro: eamque ignorantiam, ut defectum seu *imperfectiorem* intueor. Deinde persuasum mihi est me non semper extitisse; nec ullam in me vim agnosco, quàm existentiam meam longiùs proferre possim: adeoque necesse est me ab aliquo potentiore, & proinde perfectiorem fuisse conditum, qui me perpetuò conservet; quique, si sit à seipso, ac omni perfectionum genere gaudeat, *Deus* à me appellatur.

Hunc verò existere per necessarium video: tum quia alium existentiae meae primum auctorem habere non possum; tum etiam quia imperfectum esse me pronuntio. Etenim imperfectum me non dicerem, nisi per comparisonem ad aliquod ens summè perfectum, cujus ideam gero. Ea verò idea Entis summè perfecti à solo Ente summè perfecto suppeditari mihi potuit; cùm à me, qui sum imperfectus, formari, ex mei, aut aliarum rerum consideratione, nequiverit: atque ita existit Ens summè perfectum, sive Deus.

Jam verò si Deus est, isque summè perfectus: certè bonum eum esse ac omnipotentem oportet, qui me illustrare queat; non perpetuò decipere velit. Itaque cùm jamdiu mihi videar vividè sentire quædam corpora; ac unum præ cæteris conjunctissimum mihi esse intelligam, mihi profectò dubitare non licet, quin hæc eo modo sint, quo à me per-

A iij.

ciuntur. Adeo ut quemadmodum per *ideam claram* de rerum essentia judico ; ita per *sensum vividum, constantem, & diuturnum* de corporum existentia fiam certus. Igitur corpus mihi adesse dicam, quod ab aliis, quibus ambitur corporibus, vario modo afficitur.

At varias illas affectiones ego, qui sum substantia cogitans, sive mens, percipio, & quidem interdum nolens : nec tamen ullam habitudinem inter mentis cogitationes & affectiones corporis, puta extensionem, figuram, motum & quietem adverto : quare hinc mihi inferre licet eam legem à potentissimo illo & optimo conditore inter mentem & corpus, ex quibus coalesco, fuisse constitutam, *ut occasione quorundam corporis motuum, quadam excitarentur in mente cogitationes ; & vicissim quasdam cogitationes aliqui motus in corpore subsequerentur.* Ita tamen eas cogitationes mihi per illam legem adesse sentio, ut ipsis acquiescendi, vel assensum meum sustinendi facultas in me plerumque remaneat. Quare duplicem in me, seu potius in mente meâ, (nam me jam ex mente & corpore constantem esse scio) facultatem aut vim aut potentiam esse colligo ; alteram *percipientem*, quæ mihi passiva videtur ; alteram *volentem*, seu *assentientem & dissentientem*, quæ activa est : illi *intellectus* aut aliquando *sensus* ; huic *voluntatis* ; aut etiam quandoque *libertatis* nomen tribuo.

Cumque ad eorum, quæ deinceps dicenda sunt, intelligentiam operæ pretium sit ceteras vires aut qualitates & functiones non tantum mentis nostræ, sed etiam nostri corporis, imò & illas quæ utrique naturæ quodammodo communes sunt, saltem aliquatenus cognoscere ; pauca de hoc argumento tradere hoc loco convenientissimum videtur : nam id ad rationem investigandæ veritatis & assequendæ Philosophiæ maximè pertinet.

Primò igitur perceptionem (sive *intellectio* sit, sive *sensio* , quod deinceps explicabimus) in me exerior : eaque , me nonnunquam invito , in mente meâ excitatur ; quod argumenta est illam non activam sed passivam esse mentis meæ affectionem. Exempli causâ , si quis me pungat aut vellicet , non possum non sentire dolorem : si quis contentâ voce loquatur , vel quidpiam oculis meis exhibeat , non possum non audire , aut videre. Denique multas mihi sentio adesse ideas vel cogitationes , quas amovere nequeo , quoniam cum certis corporis motibus , qui tunc temporis vigent , naturaliter connectuntur , ob eam legem quæ à Deo inter motus corporeos & cogitationes mentis est stabilita. Sed voluntas activa est ; illiusque actus semper fit sponte ; quamvis modò fiat necessariò , (id est, sic fiat ut non possit non fieri ; modò fiat liberè ,) id est , ita fiat , ut possit omiti , seu non fieri. Verbi gratiâ , volo , sive amo aut appeto felicitatem meam necessariò , quia non possum eam non appetere : sed possum in bona quædam privata vel ferri vel non ferri ad libitum ; puta possum ambulare vel non ambulare ; invisere & amplecti amicum , vel ab ejus conspectu & complexu abstinere. Porrò cum actus voluntatis *necessarius* est , dicitur simpliciter *voluntarius* : Cum verò ita sit , ut possit non fieri , vocatur propriè *Liber*. Igitur assensus quem veritati cuidam præbeo , semper est voluntarius : sed aliquando necessarius est , aliquando Liber. Exempli gratiâ non possum non assentiri huic axiomati , *omne totum est majus sua parte* : quoniam in ideâ clarâ & distinctâ totius partem comprehensam intelligo. At possum judicium meum , sive assensum aut dissensum in aliis plurimis cohibere. Hinc est quod quædam judicia temeraria dicuntur , cum nempe de rebus non satis exploratis fiunt.

A iiiij

2. Duplex est in nobis concipiendi ratio. Nam si nulla in conceptu nostro interveniat imago corporea, ut cum concipimus Deum, cogitationem, &c. dicitur *pura intellectio*, & ad intellectum solum pertinet. Sed si conceptio fiat cum imagine corporeâ, ut cum concipitur Sol, Arbor, &c. dicitur *imaginatio*, & ad Phantasiam seu vim imaginatricem refertur. Sin autem occasione motuum aut vestigiorum in cerebro factorum, quidpiam recordemur, vocatur *Memoria*. Ubi advertendum, quacumque ratione fiat perceptio, mentem nostram non esse sibi suum lumen, sed à Deo *illuminari*, seu rerum ideis, aut occasione motuum corporeorum, aut sine illâ occasione informari. Item cum quiddam volumus seu nolumus; five cum rei cuiuspiam assentimur, aut ab eâ dissentimus; si id fiat placidè, & sine ullo sensibili corporis motu, ut cum optamus æternam felicitatem, ac æternam miseriam refugimus, hic actus solius *voluntatis* proprius dicitur. At si sensibilis quidam corporis motus intercedat, ut cum in rem sensibilem propendimus, aut ab eâ abhorremus; tum *Appetitus sentientis* motus nominatur.

3. Præter eas facultates, scilicet *Intellectum* & *voluntatem*, quæ solius mentis sunt propriæ: præter *Phantasiam*, *Memoriam*, & *Appetitum sentientem*, qui sensus interni dicuntur, & menti, quatenus cum corpore juncta est, competunt: aliæ sunt facultates menti pariter & corpori quodammodo communes; nempe *sensus externi*, putà *visus*, seu facultas videndi lumen & colores: *Auditus*, seu potentia audiendi sonos; *Olfactus*, seu vis olfaciendi odores; *Gustatus*, seu facultas gustandi sapes; & tactus, seu vis aut potestas tangendi qualitates tactiles, quales sunt calor, frigus, humiditas, siccitas, &c.

4. Extat etiam in nobis facultas seu vis *motrix*,

quâ corpus nostrum aut pars corporis movetur. Atque hic motus vel naturalis est & necessarius, qualis est motus cordis, & arteriarum, digestio ciborum, &c. vel est voluntarius, & excitatur à voluntate, ut motio brachiorum, pedum, &c. Prior motus pertinet ad facultatem omnino corpoream; posterior à mente simul & corpore proficiscitur.

5. Hæ facultates minimè sunt res aliquæ vel entia, seu *entitates*, ut loquuntur, à mente & corpore reipsa distinctæ. Nam mens, quatenus intelligit sine Phantasmate corporeo, dicitur *intellectus*: quatenus vult placidè & sine corporis motu, *voluntas* nominatur. Item quatenus percipit per imagines seu Phantasmata, dicitur *Phantasia*, seu vis imaginatrix; quatenus recordatur occasione motuum aut vestigiorum in cerebro factorum, vocatur *Memoria*. Denique quatenus experit aut fugit rem sensibilem cum aliquo corporis motu, *Appetitus sentiens* appellatur. Similiter mens videt per oculos, audit per aures, olfacit per nares, gustat per linguam, tangit per manus, pedes, &c. Quod si mens intimo sensu quiddam in se sentiat, ut cum sentit, & quodammodo secum scit, se esse, se cogitare, gaudere, dolere, &c. Hic percipiendi modus dicitur *Conscientia*.

6. Verum ut innotescat commercium quod inter corpus & mentem intercedit vi legis ab Auctore naturæ sancitæ, per quam occasione motuum corporeorum oriuntur in mente cogitationes, & vicissim occasione cogitationum mentis excitantur motus in corpore, advertendum corpus humanum, cui mens conjuncta est, magno organorum apparatu esse instructum. Etenim præter caput, truncum, & artus, seu manus & pedes; præter organa sensuum, nempe oculos, aures, nares, &c. triplex in eo vasorum genus est conspicuum; scilicet

cet arteriæ , venæ , & nervi.

7. Arteriæ omnes ex *Aorta* , seu arteria magna , quæ sinistro cordis ventriculo (nam duo sunt in corde ventriculi) conjungitur , velut ex trunco oriuntur. Venæ item omnes in *venam cavam* , quæ dextro cordis sinui seu ventriculo adjacet , tanquam in truncum definunt. Itaque sanguis è sinistro cordis sinu singulis pulsibus erumpens in *Aortam* seu arteriam magnam ; hinc in alias minores abigitur arterias , & ad partes extremas , ut iis cedat in alimentum , traducitur. Quoniam verò à corde semper impellitur , postquam ad extremas corporis partes appulit , per cæcos carniū meatus in venulas quasdam tenuissimas , quæ idcirco dicuntur *Capillares* , immittitur. Tum ex minoribus venis in majores & tandem in *venam cavam* , ex eaque in dextrum cordis ventriculum refertur. Ex dextro cordis ventriculo per arteriam pulmonarem transit in pulmones , ex iisque per venam pulmonarem reducitur in sinistrum cordis sinum : unde rursus per arterias ad partes extremas fluit , & à partibus extremis ad cor per venas continuo circuitu refluit.

At ubi sanguis per arterias , quæ *Carotides* dicuntur , in cerebrum evehctus est , tum subtiliores ejus partes in cerebri glandulis excernuntur , & substantiam tenuissimam componunt , quæ *spiritus animalis* nominatur. Substantia verò illa nervis tanquam fistulis seu canalibus è cerebro prodeuntibus excipitur , ac per eos non tantum ad omnia sensuum organa , puta ad oculos , ad aures , ad nares , ad linguam ; verum etiam ad omnes partes mobiles , tum externas , ut ad brachia , ad pedes , &c. tum internas , ut ad cor , ad pulmones , &c. transmittitur ; ac præcipua est omnium , qui in iis partibus excitantur , motuum causa vel occasio.

9. In iis spirituum motibus , (sive voluntati nostræ subjiciantur , ut motus brachiorum vel pedum , &c. qui dicuntur *voluntarii* ; sive naturaliter & sive voluntatis nostræ imperio fiant , ut motus cordis arteriarum , &c. qui dicuntur motus *naturales* sive *necessarii* :) in iis , inquam , motibus , vires omnes seu facultates aut potentiae naturales , tum quæ ad corpus solum , tum quæ ad mentem simul & ad corpus pertinent , sunt præsertim collocatae.

10. Potentiis illis seu facultatibus aut viribus naturalibus adveniunt *habitus* naturales , seu *facilitates agendi repetitis actibus comparata*. Hæ facilitates in liberiori spirituum motu , & vestigiis , per eos spiritus cerebro impressis , maximè consistunt. Ubi enim ad rem aliquam attendimus , tum per legem inter mentem & corpus sancitam spiritus animales ad certam cerebri partem confluunt ; ac si sæpius in rem eandem sumus intenti , in eandem quoque partem ii spiritus irruunt , ibique majora relinquunt vestigia , patentioresque aperiunt meatus , per quos reversi , iisdem , quibus excitati sunt cogitationibus , præbent occasionem. Non quòd ulla sit similitudo inter imagines corporeas , seu impressa cerebro vestigia , & cogitationes nostras : sed quod lex illa constituta sit ab Auctore naturæ inter mentem & corpus , ut illius cogitationes & hujus motus inter se sociarentur , ac simul redirent.

11. Ex habitibus alii juvant mentem solam , alii solum corpus : illi *spiritalis* dicuntur , hi *corporei*. v. g. cum quis sæpius citharam pulsavit , certum est spiritus animales in ejus digitos seu digitorum *musculos* , per nervos sæpius influxisse , & proinde faciliores sibi fecisse vias in iis *musculis* , hoc est , in partibus organicis , quæ intumescendo partes adjacentes & mobiles trahunt ac movent , quales

magno numero in variis corporis membris reperiuntur , de quibus dicendum erit suo loco. Quâ quidem ratione producitur habitus corporeus. Quod si quis à pulsandâ cithara diutiùs abstineat , meatus illi paulatim abducuntur , & minuitur habitus corporeus , vel etiam omnino extinguitur. Similiter cum de eadem re sæpius cogitamus , determinatur spirituum motus in easdem cerebri partes , ubi imprimit vestigia , quibus mens ad eandem cogitationes, per eam legem de qua dicimus, excitatur. Hanc enim labori nostro *mercedem* tribuit Deus , ut cum diu multumque in re aliqua cognoscendâ laboravimus , illam deinceps , quoties attentum præbemus animum , cognoscamus. Si quis igitur per multos annos aliis rebus animum adjungat , prior habitus debilitatur , & aliquando penitus deletur.

12. Habitus spirituales , vel boni sunt & dicuntur *virtutes* ; vel mali , & *vitia* nominantur. Rursus vel cognitionem juvant & dicuntur vulgò *intellectuales* , quoniam cognitio est intellectui propria ; vel spectant mores , ac voluntatem movent , & dicuntur *morales*.

13. Virtutes seu boni habitus intellectuales quinque recensentur ab Aristotele , Lib. 6. Eth. cap. 3. scilicet , *Intelligentia* , *Sapientia* , *Scientia* , *Prudentia* & *Ars* , de quibus capite sequenti. Mali vero habitus seu vitia mentis sunt *Error* & *Hæresis*. Virtutes Morales sunt vel primariæ & *Cardinales* , vel secundariæ & *Adjunctæ*. Virtutes Cardinales sunt quatuor nimirum *Prudentia* , *Iustitia* , *Fortitudo* , & *Temperantia* , de quibus agemus in Ethica. Adjunctæ sunt multò plures quas ibidem exponemus.

14. Non est silentio prætermittendum ab eadem lege quæ inter motus corporeos & cogitationes mentis stabilita est, affectus animi seu *passiones*

ut vocant , potissimum pendere. Cum enim variorum objectorum occasione varii spirituum animalium motus in nobis excitentur , iis quandoque vehementer afficitur animus , ut vice versâ cogitationes quasdam mentis sequuntur diversi spirituum motus , quibus corpus seu potius partes corporis variis modis quatiuntur , extenduntur , contrahuntur , prout affectus cujusque natura postulat sic in lætitiâ dilatatur cor , & contrahitur in tristitiâ. Aliter sanguis & spiritus fluunt in amore , aliter in odio , aliter in audacia & metu , aliter in ira. Affectus autem primarii , à quibus cæteri pendent sunt *Admiratio* , *amor* , *odium* , *desiderium* , *lætitia* , *tristitia* , ut dicemus in *Phyfica*.

15. In nobis igitur , ut omnia compendio repetamus , est substantia cogitans sive mens ; est & substantia extensa sive corpus. Utrique suæ sunt facultates tunc propriæ tum communes. Facultatibus adveniunt habitus sive spirituales sive corporei , adsunt etiam quandoque affectus seu *Passiones*. Quæ omnia sine lege , cujus meminimus , explicari nequeunt aut intelligi.

Magna igitur vis est hujus legis , licet connexio quæ inter motus corporeos & mentis cogitationes intercedit , clarè & distinctè à nobis statim non percipiatur. Hanc tamen legem à Deo sanciri potuisse tam clarum est , ut nihil manifestius esse possit ; sancitam verò fuisse quotidiana probat experientia , quâ dum pungimur aut urimur , doloris perceptionem in nobis excitari sentimus ; ut vicissim dum brachium aut pedem volumus movere , statim illius motum ad vota nostra subsequi comperimus. Hujus igitur legis frequentem habebimus mentionem , ut multorum quæ in nobis contingunt , rationem reddamus. Sed præsertim toto hoc opere in id incum-

bemus, ut errores in quos incidimus, emendentur, & quantum fieri potest sanum de rebus propositis feramus iudicium.

Errores verò nostri oriuntur, ut diximus, primò à sensibus externis, nimirum visu, auditu, &c. quatenus tales esse iudicamus qualitates sensibiles in objectis externis, qualis est sensus in nobis earum occasione excitatus. 2º. à Phantasia seu vi imaginatrice, quæ sensus est internus, ut cum v. g. antipodas nostros inverso capite, & sursum erectis pedibus ambulantes fingimus. 3º. ab affectibus animi. Nam ex Aristotele lib. 6. Eth. cap. ultimo, *Quisque iudicat pro ut est affectus*: Idque vulgò experiuntur omnes. 4º. ab inclinationibus seu propensionibus nostræ voluntatis. Unde illud Virgilii Eclog. 8.

Qui amant, ipsi sibi somnia fingunt.

Denique ab intellectione pura: ut cum mentem nostram idearum suarum productricem esse cogitamus. His igitur omnibus, quatenus licet, mendum: nam is est Philosophiæ Scopus præcipuus de cuius natura jam est disputandum.

C A P U T II.

De nomine, notione & existentia Philosophiæ.

PHILOSOPHIA nihil aliud est, si interpretari velis, quàm *studium & amor sapientia*, inquit Tullius libro 2. de Officiis. Sapientia autem est, ut à veteribus Philosophis, eosdem referente, definitum est, *rerum divinarum & humanarum, causarumque, quibus hæ res continentur, scientia*. Id est, certa quædam notitia tum Dei ipsius, divinorumque ejus operum; tum earum rerum quæ ab hominibus pendent, aut ad homines spectant. Per

res quippe *divinas* intelligimus Deum ipsum, & divina illius opera: per *humanas* verò, ea omnia, quæ pendent ab hominibus: in quo genere sunt cogitationes mentis, actus voluntatis & opera quævis arte facta.

De Deo quidem, & spiritualibus ejus operibus agit *Metaphysica*, aut ea saltem *Metaphysicæ* pars, quæ *Pneumatologia* dicitur. De corporeis verò tractant *Physica* & *Mathematica disciplina*, quæ *Physicæ* partes non immeritò habentur. Denique *Logica* & *Ethica* circa res humanas versantur: id est circa eas res, quæ pendent ab hominibus: cujusmodi sunt *cogitationes mentis*, quas *Logica* dirigit ad verum; & *actus voluntatis*, quos ad honestatem conformat *Ethica*.

Non autem satis est Philosopho res ipsas cognoscere: sed earum quoque causas perspectas habere debet. *Ut enim res sciri dicatur*, teste Aristotele lib. 1. posteriorum Analyticorum, cap. 2. *explorata oportet esse causam, propter quam ita est*; vel saltem propter quam ita esse constanter affirmatur, aut negatur. Exempli causâ affirmo triangulum, in circulo inscriptum, seu contentum, esse minus circulo, ob eam rationem seu causam, quòd pars sit minor toto, & contentum continente. Hic enim *causâ* nomen latius usurpandum videtur; scilicet pro *omni ratione*, propter quam aliquid esse, vel non esse certò nobis constat. Nec alio fere modo in *Metaphysicis*, aut *Mathematicis* sumi debet. In *Physicis* tamen res ferè sciri non dicitur, nisi causa, propter quam ita est, omnino percipiatur. Hinc in allata definitione adduntur hæc verba, *causarumque quibus hæ res continentur*. Quæ quidem causæ sunt, præsertim *effëtrix*, à qua res producit; tum *materia* & *forma*, ex quibus constat, ac denique *finis*, cujus gratiâ sit, ut prima parte *Metaphysices* exponemus.

Nihil porro vetat istam *sapientia* definitionem ipsi *Philosophia* jam tribui. Tamen enim sapientia nomine *sublimem quamdam scientiam, sive rerum sublimiorum notitiam* intelligendam velint plurimi post Aristotelem lib. 6. Ethic. cap. 7. certum tamen est, quæ olim dicebatur *sapientia*, nunc *Philosophiam* appellari, ex quo Pythagoras *Philosophi* titulo contentus, *Sapientis* nomen Deo soli reservandum putavit, ut in Præfatione advertimus.

Quapropter *Philosophia* pro rerum divinarum & humanarum notitia sumenda videtur: ac proinde disciplinas omnes, seu scientias comprehendit. Nam is demum Philosophus aut sapiens habendus est, non qui unam tantum *Philosophia* partem seu scientiam possidet; sed qui in omnibus abundè est versatus. Nec unica scientia, putà Logica, vel Ethica, dicenda videtur *Philosophia*; sed tantum *Philosophia* pars; cum *Philosophia* sit *scientia omnis, seu disciplinarum omnium concursus & complexio*. Imò *Philosophia* quinque *mentis habitus*, seu potius *virtutes*, aut perfectiones continet, quas Aristoteles lib. 6. Ethicorum, cap. 3. enumerat; nempe *intelligentiam, sapientiam, scientiam, prudentiam & artem*; ut ex singularum explicatione patebit.

I N T E L L I G E N T I A enim dicitur *notitia primorum principiorum seu axiomatum communium*: quæ non tam est habitus menti succrescens, quàm ipsa mens naturaliter spectata. Mens enim, solâ duce naturâ, communes notiones seu axiomata percipit & amplectitur, cujusmodi sunt, *impossibile est idem simul esse & non esse. Totum est suâ parte majus*, &c. Eaque naturalis perceptio singulis *Philosophia* partibus est necessaria, nec proinde ulla est *Philosophia* pars, quæ intelligentiam non includat.

S A P I E N T I Æ nomen duobus sumitur modis:

nempe vel pro Philosophia ipsa, seu *disciplinarum omnium complexione*, ut modò dictum est; vel pro *notitia rerum altissimarum*, id est, ut vulgò interpretantur, *tum rerum universalium, tum rerum excellentissimarum*. Idque ad solam Metaphysicam, seu primam Philosophiam pertinet, quæ priore sui parte, nimirum *Ontologiâ*, de *rebus universalibus* agit, hoc est, de ente generatim, & communibus illius attributis; posteriore verò, quæ *Pneumatologia* dicitur, de *rebus excellentissimis*, nempe de Deo & Spiritibus creatis differit.

SCIENTIA vulgò definitur, *cognitio vera, certa, & evidens rei cujuslibet necessaria & immutabilis, per veras propriasque causas, propter quas ita est: vel certè propter quas ita esse constanter affirmatur aut negatur*. Cujus definitionis singula vocabula exponi solent hoc ferè modo.

Dicitur primò *cognitio*, sive *notitia*, non quidem *actualis*, ut loquuntur, sed *habitualis*: id est, *facilitas cognoscendi*, non *actus* aut *motus cognoscens*. Nam *scientia rei cujuspiam in homine etiam dormiente, minimèque de ea re cogitante remanet*: si modò antea labore & studio jus illud sibi in eam rem acquisierit, ut cum attendere volet, ipsam percipiat.

Hæc enim, ut diximus, *labori nostro merces à Deo rependitur, ut res, quarum cognitionem operosè sumus assecuti, nobis deinceps, ipso patefaciente, mentesque nostras illuminante, revelentur, ac veluti jure quodam, quoties attendere volumus, mentis nostræ cognitioni subjiciantur*. Per hoc vocabulum *scientia* discrepat, tum ab *ignorantia* quæ dicitur *privationis*, quæque est *privatio, seu carentia ejus cognitionis, quâ quis instructus esse debet*, putà eorum quæ sunt officii sui: tum ab *ignorantia prava dispositionis*, ut vocant, quæ cum errore est conjuncta. Sed

scientia nostra , utpote limitata , non excludit à nobis ignorantiam *pura negationis* , sive *inscientiam* , aut *inſciam* per quam multa nescimus , quæ necesse non est à nobis sciri : sive , quorum nobis à Deo *negata* est cognitio. Exempli causà nemo nostrum scire debet , an numerus arenarum maris par sit , an impar.

Deinde est *cognitio vera* non rei cujuscunque ; sed *rei necessaria* , seu rei , quæ non potest aliter se habere. Sic qui cognoscit eclipsim Lunæ contingere ob interpositionem Terræ Solem inter & Lunam , cognoscit id, quod alio modo sese habere non potest: quoniam fieri nequit ut intercedente Solem inter & lunam opaco Terræ corpore, Luna eclipsim non patiatur. In quo scientia distingui dicitur à *Prudentia* & *Arte*, quæ circa res plerumque contingentes non semper circa necessarias occupantur.

Insuper est *cognitio rei per causas* , seu *rationes propter quas ea res est* : vel certè propter quas ita esse affirmatur aut negatur. Quibus verbis declaratur scientia non esse nuda rei perceptio , sive *apprehensio* , ut scholæ loquuntur , sine affirmatione aut negatione : Sed cognitio ratiocinatione parta , & proinde cum judicio conjuncta , aut etiam multarum perceptionum ac judiciorum complexio. Nam quamvis *scire* , secundum communem loquendi & scribendi rationem apud eruditos quolibet sive veteres , sive recentiores usurpatam, idem sit ac *nosse* , sive notum quid ac perspectum habere : & consequenter *scientia* idem quiddam sit ac *notitia* , sive *perspicientia* : nihilominus ipsa scientia præter intellectus *perceptionem* , quæ passiva est , includit assensum voluntatis seu *judicium* quod est activum. Non enim tantum quidpiam percipimus per scientiam , sed illud præterea tale esse affirmamus quale à nobis percipitur. Quoniam tamen *percipere* est quid primum in scientia , *judicare*

verò seu approbare aut acquiescere, secundarium: usus invaluit apud eruditos ut *scientia*, ceterique mentis habitus, putà *Intelligentia*, *Sapientia*, *Prudentia*, & *Ars* per *cognitionem* seu notitiam, quæ pars est primaria hujusmodi habituum, non verò per *judicium*, quod in iis secundarium est, tanquam per genus explicarentur. Hinc isti habitus *intellectuales* vulgo nominantur, non tantùm quia scholæ tribuere solent *judicium* intellectui, sed maximè quia *cognitio* seu *perspicientia*, quæ pars est præcipua illorum habituum, ad intellectum pertinet. Hinc etiam Cicero lib. 1. de officiis *Prudentiam* in *perspicientia veri* constitutam esse ait: & lib. 4. *Tuscul. quæst.* ex veterum mente docet *sapientiam* esse rerum *divinarum & humanarum scientiam*, *cognitionemque*, qua cujusque rei causa sit.

Verum etiam si recepta dudum apud eruditos & in libris omnibus tum sacris tum profanis ubique abhibita vocabula definiri seu explicari debeant non verò mutari: tamen non desunt recentiores nonnulli, qui magnum quid præstare se arbitrentur, si *scientiam*, non *cognitionem*, sed *judicium* nominent. Hoc verò quid aliud est, nisi usitatum apud nationes omnes loquendi modum sine ullo emolumento turbare? non enim ii novas nobis rerum ideas afferunt, sed nova tantùm subjiçunt vocabula, quibus legentium aut audientium turbantur animi, non erudiuntur. Igitur propter illorum argutias operæ pretium visum est admonere hoc loco *perspicientiam* seu *cognitionem* sumi non oportere pro nuda rei perceptione seu *apprehensione*, quæ est affectio passiva mentis nihil affirmantis aut negantis, sed eam cum *judicio* seu *voluntatis assensu* & *approbatione* esse conjunctam, & *demonstratione* acquisitam.

Deinde cum *scientia* dicitur *cognitio per causas*,

discrimen statuitur inter illam & vulgarem notitiam. Vulgus quippe rem cognoscit ; sed causam , cur ita sit, ignorat. v. g. reciprocum maris æstus intuetur nauta , sed illius causam Philosophis solis inquirendam relinquit. Ubi *causa* nomen latius sumendum videtur , ut jam admonuimus, scilicet pro *omni ratione* , vel *argumento certo* , quo ad aliquid affirmandum vel negandum inducimur. v. g. affirmo omnem circulum esse rotundum , quia in idea clara distinctaque circuli continetur rotunditas : non quòd idea circuli sit rotunditatis causa effectrix ; sed quòd sit idonea ratio , cur circulum omnem rotundum esse asseram. Sic etiam affirmo me existere dum cogito ; non quòd mea cogitatio sit existentiae meae effectrix causa : sed quod in idea cogitantis comprehensam existentis ideam intelligam. Nec ferè aliter causæ nomen in Metaphysica , & Mathematicis disciplinis accipiendum est ; ut eas partes legentibus & addiscentibus palam fiet. Sed in Physica sæpius causa effectrix est afferenda. Præterea scientia est cognitio *vera* , id est , ex veris principiis benè deducta , & consequenter cum re cognita consentiens , veroque iudicio conjuncta. In quo discrepat ab *errore* , qui falsus est , non tamen est *cognitio falsa* , cum sit potius *ignorantia* quàm cognitio : sed est ignorantia *prava dispositionis* , seu ignorantia conjuncta cum prava dispositione , per quam humana mens vel assentitur falso , si sic error *actualis* ; vel assentiri parata est , si *habitualis* sit error : hicque , si versetur in materia fidei , ac fuerit pertinax, vocatur *hæresis*.

Est etiam cognitio *certa* , id est , firma , stabilis, & inconcussa , siue certis ac immobilibus argumentis suffulta : ut distinguatur ab *opinionem* , quæ incerta est , ac in utramque partem vacillans. Quemadmodum inter Physicos definiri vix potest ,

an materia sit in infinitum divisibilis, nec ne.

Denique est cognitio *evidens*, id est, manifesta, & perspicua, sive claris & evidentibus principiis stabilita, ut distinguatur à *fide divina*, quæ vera & certa est sed obscura. Sic verum & certum est in sanctissima Trinitate unicam esse naturam & tres personas, sed illud est obscurum, & solâ Dei revelantis auctoritate, non evidenti ratione cognitum.

Hic autem observant nonnulli voces magis generales minùs generalibus in hac definitione præmitti. Nam *verum* generalius est *certo*, & certum evidente. Quod enim est evidens, id certum; & quod certum, id verum est: sed non vicissim. Id etiam observari potest *veritatem* convenire tum *ideæ* tum *judicio*; *certitudinem* *judicio* meliùs quam *ideæ*; *evidentiam* denique *ideæ* non *judicio* esse tribuendam. Verum hæc tria scientiæ conveniunt eò quòd ipsa intellectûs perceptionem, & *judicium* seu approbationem aut assensum voluntatis includat.

PRUDENTIA non secus ac *sapientia* duobus modis usurpatur: scilicet vel pro *scientia* seu *cognitione generali eorum, quæ ad vitam & mores pertinent*, quæ est *Ethica & Juris prudentia*, seu *Juris scientia*: eaque *prudentia generalis* dicitur; ac in improbos cadere potest. Vel sumitur pro *cognitione practica & efficaci eorum, quæ in quavis occasione à viro probo sunt agenda*: & dicitur *prudentia particularis*, seu *virtus cardinalis*, de qua in *Ethica* dicimus. Hæc in improbos non cadit.

ARS denique est *cognitio practica eorum, quæ industriè possunt effici*. In qua duæ sunt partes. Prima & superior *Artis* pars est *mentis cognitio*: sive ea sit *intelligentia tantum*, sive *scientia*. Secunda & inferior est *executio sive effectio artefacti*.

Differt autem *effectio* ab *actione*, seu *praxi* apud

Aristotelem , lib. 6. Ethic. cap. 4. quòd *praxis* sit *actio moralis*, in qua spectatur *agentis intentio comparatè ad honestatem moralem* : *effectio* verò sit *qualibet operatio* , in qua potissimum *agentis industria consideratur*. Quo quidem sensu bona esse potest *effectio* , quæ mala est *actio* , ut in eo liquet , qui alteri crumenam subtiliter eripit:& vicissim bona esse potest *actio*, quæ mala est *effectio*, ut accidit in matre, quæ filium ab externis injuriis dum studet protegere , suffocat. Juxta hanc acceptionem sola Ethica seu morum scientia dici deberet *practica* ; artes verò omnes essent *effectivæ*, non *practicæ*. Sed tamen *praxis* nomen generalius sumi solet pro qualibet operatione. Unde Geometria suam theoriam & praxim habere dicitur : ut Arithmetica speculativa est simul & practica ; licet neutra circa mores aut actiones voluntatis sit occupata.

Ex eo clarum est Artem , secundum præcipuam sui partem spectatam , aut ab *Intelligentia* , aut à *scientia practica* minimè distingui; dummodo *scientia practica* nomine non ea sola intelligatur disciplina, quæ est de moribus , sed aliæ etiam quælibet , quæ aliquid agendum aut efficiendum docent. Quanquam nihil vetat Ethicam quoque *bene vivendi artem* appellari.

Si verò Ars secundum inferiorem sui partem , nempe secundum executionem , consideretur : alia est *liberalis* , quæ liberum ac nobilem virum decet : alia *servilis* , quæ ad plebeios , servosque homines pertinet. Quæ autem *ars liberalis* , quæ *servilis* habenda sit , plerumque ex hominum ducitur arbitrio. Sic Sculptura , & pingendi , vel citharam aut aliud organum musicum pulsandi ars ad ingenuos spectant : vestes autem , calceos , vel frena faciendi , ad servos & plebeios.

Atque hæ sunt quinque habituum seu virtutum mentis species , secundum Aristotelem , quas om-

nes in se complectitur Philosophia. Ex quo fit ut mirum videri non debeat quod ait Tullius in fragment. de Universo, *hoc bono nullum optabilius, nullum præstantius neque datum esse mortalium generi, neque datum iri.* Et lib. 5. Tusculan. Quæst. Philosophiam ducem vitæ, virtutis indagatricem, expultricem vitiorum esse habendam. Neque aliâ ratione cæteris mortalium præstitisse videtur Salomon, quàm quòd omnium optimè sit philosophatus; qui oblatâ sibi à Deo bonorum omnium optione, Sapientiam, quasi optimum & excellentissimum bonorum, postulavit. Quapropter Deus eum sic alloquitur lib. 3. Regum, cap. 3. v. 12. *Ecce feci tibi secundum sermones tuos, & dedi tibi cor sapiens & intelligens, intantum ut nullus ante te similis tui fuerit, nec post te surrecturus sit.*

Utrum verò extet apud nos Philosophia, sive disciplinarum aut scientiarum omnium complexio, non prius definire licebit, quàm in singulis Philosophiæ partibus fuerimus versati. Quomodo enim stabiliri posset, atque ab adversariorum argumentis vindicari, quod adhuc ignotum est quodque optatur ac quæritur tantum, non possidetur. Interea negari non potest quin adsit nobis scientia quædam seu cognitio certa, quicquid contra sentiant Academici, & Pyrrhonici contra quos sit.

PROPOSITIO.

ALIIQUA extat apud nos scientia. Probatur. Scientia est cognitio vera, certa & evidens rei alicujus necessariæ & immutabilis, per veram quandam rationem aut causam propter quam ita est, aut saltem propter quam ita esse affirmatur vel negatur, ut antea fuit definitum.

Atqui extat apud nos cognitio vera, certa &

evidens rei alicujus necessariae & immutabilis, per veram rationem aut causam, propter quam ita est, aut certè propter quam ita esse affirmatur vel negatur: v. g. extat in nobis cognitio certa existentiae Dei, quæ existentia necessaria est, per veram rationem aut causam, quæ nos movet ut affiramus Deum existere: nempe quia insita est nobis Dei, sive Entis summe perfecti idea, quæ aliunde quàm ab Ente summè perfecto nobis advenire non potuit. Item nobis adest cognitio certa distinctionis mentis nostræ à corpore: quia mens nostra se substantiam esse cogitantem novit, etiamsi de corpore, aut re extensa minimè cogitet; imò nulum extare corpus fingat, ut diximus.

Ergo aliqua apud nos extat scientia.

Quod autem aiunt Academici, omnem humanam cognitionem incerto niti fundamento, nempe *sensuum testimonio*, id penitus negamus. Multa enim à nobis percipiuntur quæ per sensus transire non potuerunt: cujusmodi sunt cogitatio, aut mens, aut ipse Deus, ut fusiùs deinceps probabimus, præsertim in Metaphysica. Quare axioma quoque illud in Scholis Peripateticis vulgò receptum, *Nihil est in intellectu, quod priùs non fuerit in sensu*, à vero alienum esse inferiùs ostendemus. Etenim omnis cognitio nostra, si modò vera ac certa sit, solidiori fundamento, quàm sensuum testimonio nititur, nempe vel *conscientiâ*, seu *intimo animi sensu*: vel *clarâ ac distinctâ perceptione*, quæ est vera assensus seu affirmationis nostræ causa: nam hîc *causa* nomen, quemadmodum non semel annotavimus, latiùs accipiendum est pro omni ratione aut argumento, quo ad aliquid affirmandum vel negandum inducimur. Exempla quidem rerum dumtaxat spiritualium hîc adducimus: sed cum habeamus, quò pedem figamus, nempe *evidentiam*, seu *claram distinctamque perceptionem*, quâ velut
immo

immobili puncto, non sensuum testimonio judicia certa debent inniti: magna nobis spes affulget fore ut non tantum in rebus spiritalibus, quas hinc à nobis certò sciri ostendimus, sed etiam in corporalibus firmam certamque cognitionem adipiscamur: nec solam proinde Logicam, aut Metaphysicam, quæ de spiritalibus, verum & Physicam quoque ac Mathematicas disciplinas, quæ de corporalibus agunt, imò Ethicam ipsam, quæ est de moribus, tandem, aliquando consequamur.

Verum non eadem judicii firmitas, vel, ut Scholæ loquuntur *certitudo* in singulis hisce disciplinis est expetenda. Triplex quippe certitudinis gradus pro tribus diversis rerum generibus vulgò distinguitur: nempe certitudo *moralis*, certitudo *physica*, ac certitudo *metaphysica*.

Certitudo *moralis* est adhæsiō mentis ei rei, quæ quamvis absolutè possit esse aliter ac dicitur, non tamen aliter esse solet: adeo ut de ipsa dubitare communi hominum *more*, ac judicandi consuetudine non liceat. Sic certum mihi est urbem Romam à Gallis Senonibus olim fuisse direptam: quia, quod ab omnibus Scriptoribus proditum est, adeo frequenter est verum, ut factum ab ipsis relatum pro certo haberi debeat.

Certitudo *physica* est adhæsiō mentis illi rei, quæ servato rerum ordine aliter contingere non potest, licet aliter à nobis cogitari, possit. v. g. certum mihi est Solem crastina die has Terræ partes, quas incolimus, esse collustraturum: licet eum ad partes oppositas virtute Divinâ semper contineri posse intelligam.

Certitudo denique *metaphysica* est adhæsiō mentis ei rei, quæ nec aliter quidem à nobis cogitari potest, v. g. adeo mihi certum est totum esse suâ parte majus, ut id à me aliter concipi non possit.

Quamvis autem certitudo propriè sumpta sit affectio mentis alicui rei adhærescentis : nonnunquam tamen à vulgo Philosophorum rebus ipsis tribuitur. Hincque fit ut in Scholis alia dicatur certitudo *subjecti*, alia *objecti*, alia *medii*.

Certitudo *subjecti*, est certitudo propriè dicta, quæ in mente velut in *subjecto* spectatur; sive, est firma ipsius mentis rei cuiusdam perceptæ adhæsiō.

Certitudo *objecti* est immutabilitas, aut constantia rei, quæ à mente percipitur : ut existentia Dei dicitur objectum certum & immutabile; quoniam aliter se habere non potest.

Certitudo *medii* est firmitudo argumenti, seu rationis per quam aliquid verum esse ostenditur : ut, si probare velim existentiam Dei per ideam Entis summè perfecti nobis omnibus ingenitam, hæc idea est *medium* seu argumentum certum, quo existentiam Dei veram esse agnosco.

Cum igitur diversa in singulis Philosophiæ partibus quærenda sit certitudo, quæ tamen in idea clara & distincta, quantum fieri potest, stabiliatur, omnia removenda sunt impedimenta, quæ claritati ac distinctioni idearum obstare possent, unde cumque adveniant. Id autem licet operosum sit ac difficile, vires tamen humanas non excedit : nam omnibus hominibus à natura insita est verum à falso secernendi facultas ; sive mentibus nostris ingenta est idea quædam generalis tum veri tum falsi, quæ per seipsam lucet, quæque in naturalium rerum investigatione non dirigit, ac errores, qui vel ab infantia præjudiciis, vel à sensibus, aut animi affectibus ortum habent, si modò legitimam adhibeamus attentionem, aut prævertit, aut emendat.

Hinc solvi potest Menonis apud Platonem contra scientiæ possibilitatem argumentum, quod in eo Dialogo, qui *Meno* inscribitur, hoc modo proponitur.

Cum discimus, inquit, inquirimus & investigamus aliquid. Ergo vel illud cognoscimus; vel non cognoscimus. Primum dici nequit: quia quod nobis cognitum est, non inquirimus. Sed nec secundum dici potest: quoniam id frustra quæreremus; ac si inveniremus, agnosci à nobis non posset: ideoque inanis foret omnis inquisitio nostra, & proinde omnis disciplina, quæ est quædam inquisitio. Unde nulla extare potest scientia: quandoquidem disciplinâ aut studio comparatur.

Hoc argumentum ut diluat Socrates, confugit ad reminiscentiam. Vetus quippe opinio est Pythagoræ ex umbra quadam veritatis ortum ducens, & à Socrate ac Platone usurpata, mentes hominum in mundo, ut vocant, intelligibili, fuisse à Deo creatas; easque, quod de Lacedæmone ipsiusque affeculis asserimus, malo usu suæ libertatis contra suum auctorem peccasse; nec tamen præcipitatas fuisse in abyssum; sed in corpora tanquam in carceres, lucendorum criminum causâ, fuisse detrusas: ubi rerum quas antea noverant, sint oblitæ, ac illarum notitiam intuitu quorundam signorum recuperare conentur.

Quamobrem scientia Pythagoræis & Platonice nihil aliud esse videtur, quàm quædam *Reminiscencia*. Hinc Plato in eodem Dialogo pusionem inducit, qui à Socrate de Geometria interrogatus, eodem fere modo respondet, ac si fuisset in ea disciplina versatissimus.

Sed hujusmodi fictionem, quæ mentes in mundo intelligibili, antequam corporibus consociarentur, rêvera extitisse & peccasse perhibet, longè amolitur Christiana fides, quæ mentis humanæ tenebras, malasque cupiditates originali peccato, à primo homine in nos transfuso, tanquam causæ tribuit, nec mentem hominis ante creari as-

ferit quàm cum corpore jungatur. Nullum quippe aliud argumentum suadere potest mentes nostras secundum proprias substantias in mundo intelligibili ante sui conjunctionem cum corporibus extitisse & peccasse, quàm quia tales ab optimo conditore prodire non possumus, quales nunc nascimur, nempe cum ignorantia & mala concupiscentia. Unde cum hæc mala debeant originali peccato accepta referri, minimè alleganda sunt peccata in mundo intelligibili commissa quibus attribuantur.

Dicendum igitur argumento Platoniorum nihil aliud effici, quàm quod libenter concedimus, animum nempe nostrum non esse, ut videtur Aristoteli lib.3. de anima cap.5. velut *tabulam rasam* omni planè rerum cognitione destitutam. Sunt enim congenitæ nobis generales saltem ideæ tum entis simpliciter, tum primorum illius attributorum; communiaque principia nobis concessa sunt, quibus, ut jam dictum est, sæpiusque inferiùs ostendetur, verum à falso secernere valeamus. Quod eleganter exprimit Lactantius lib.2. divinarum Institutionum, cap.8. his verbis : *dedit omnibus Deus pro virili portione sapientiam : ut & inaudita investigare possent, & audita perpendere.* Nec quidquam aliud, si recentioribus quibusdam Philosophis credamus, studio & meditatione consequimur, nisi ut ideas nobis innatas paulò longiùs extendamus, aut producamus. Non enim eas notiones à sensibus haurimus; cum potius sensuum testimonia ad ideas naturales, claras scilicet & distinctas, tanquam ad certas quasdam & immutabiles regulas sint exigenda, ut inferiùs, cum de distinctione & claritate idearum dixerimus, liquidò constabit. Unde meritò Socrates apud Platonem in *Theateto* obstetricis officium agere se aiebat : quia magistri & præceptores ideas

nobis non sufficiunt ; sed mentem suis conceptibus naturâ quodammodo gravidam ; velut *obstetricante manu*, ad parturiendum duntaxat adjuvant.

Nonnulla tamen sensuum ministerio indigent, ut percipiantur : qualia sunt facta plurima & experimenta in rebus Physicis , Moralibus , aut Politicis , longâ observatione collecta. Quare si de his rebus interrogatus fuisset puer , quem inducit Plato , non tam facilè respondisset, quàm de Geometria respondisse fingitur. Verùm hæc deinceps clariùs adhuc patebunt.

CAPUT III.

De origine & causis Philosophia.

Philosophiæ origo cælestis est , scilicet à Deo Opt. Max. omnis boni auctore & largitore, juxta illud Epistolæ Catholicæ Divi Jacobi, cap. 1. v. 17, *Omne datum optimum , & omne donum perfectum desursum est , descendens à Patre luminum.* Quare eadem est Philosophiæ ac aliarum rerum causa effectrix , nimirum Deus , qui eam primo hominum parenti infudisse vulgò creditur : nec immeritò quoniam debebar esse filiorum parens & doctor , ut observat sanctus Thomas primâ parte Summæ Theologicæ, quæst. 94. art. 3.

Cùm verò Philosophia circa res illas occupata sit , quæ naturæ vires non superant , certis circumscripta est limitibus, ultra quos ipsi progredi nefas est. Hinc quippe priori parentes , Adamus & Eva, ab ea, quâ ornati fuerant, rerum naturalium scientia exciderunt , quòd nimium creduli malo Genio morem gesserint , sic loquenti Genesios , cap. 3. v. 5. *In quocunque die comederitis ex eo , (fructu*

scilicet vetito) *aperientur oculi vestri, & eritis sicut Dii scientes bonum & malum.* Unde cum ad supernaturalem divinamque scientiam aspirarent, naturalem, sibi que convenientem amiserunt.

Post illud primorum parentum peccatum, quotquot deinceps ex illis progeniti sunt homines, ignorantiae & peccato obnoxii nasci cœpere: nec nisi longo studio & improbo labore amissam recuperare potuerunt Philosophiam. His autem gradibus videntur esse progressi.

Primò, admirati sunt plures effectus: id est, eos attentius & suspensò animo inspexerunt. Est enim *admiratio* hoc loco, *quadam animi suspensio orta ex ignorance causa quorundam effectuum quos percipimus.*

Secundò, ex admiratione orta est *cupiditas*, seu *desiderium causas inveniendi*: quæ ubi fuerunt inventæ, multis postea confirmatæ sunt experimentis. *Experientiam* verò dicimus *multorum singularem observationem, per quam generalis similium effectuum cognitio, tanquam ab eadem aut simili causa prodeuntium confirmatur.*

Unde ignorantia, quæ mater admirationis dicitur, ipsam admirationem peperit, ex qua diligens causarum orta est inquisitio: tum inventio multiplici experientiâ confirmata. Neque id simul eodemque tempore perfectum est; sed pedetentim, & quodam temporis lapsu. Quod enim ab iis qui præcesserunt inventum fuit, id à subsequentibus elaboratum, ac tandem ad perfectionem adductum. Sic Zeno Eleates Logicæ primus auctor dicitur; Thales Milesius Physicæ, Socrates Ethicæ inter Ethnicos primi incubuisse memorantur. Verùm hæc omnes disciplinæ imperfectæ adhuc, posteriorum laboribus magna incrementa ceperunt, ut ad eum statum, in quo illas nacti sumus, perducerentur.

Atque hæc quidem tum de prima Philosophiæ

causa effectrice , scilicet Deo ter maximo; tum de secunda , nempe de Philosophis omnibus, sive antiquis, sive recentioribus : nunc de aliis, ut vocant, Philosophiæ causis pauca sunt adjungenda.

Hæ autem causarum nomen vix promerentur, ut ostendemus in Metaphysica. Nam veræ ac propriæ causæ nomen titulumque sola sibi vindicat effectrix causa : ut Deus solus propriè dici potest Philosophiæ causa, non tantum quia primo parenti eam infudisse vulgò existimatur ; sed etiam maximè quia singulis hominibus unà cum intelligendi vi etiamnum eam tribuit. Alias tamen ipsius causas recensere vulgò solent Philosophi , *finalem* scilicet & *materialem* , nam nec *formalem* propriè, nec *exemplarem* habere videtur.

FINIS igitur , seu *causa finalis* Philosophiæ, nempe *cujus gratiâ hominibus concessa est Philosophia* , nihil aliud est quàm *cognitio veritatis* , & *praxis virtutis* , aut præclara quælibet effectio, comparatè semper ad ultimum finem , seu Deum , ad quem omnes actus humani necessariò sunt dirigendi. Eò quippe tendere debet omnis humana sapientia : alioqui plus noceret quàm proderet Philosophia ; non quidem *per se* & *ex natura sua*, sed *ex accidenti* tantum, & quatenus homines eximio isto munere in propriam perniciem abuterentur. Tametsi enim Philosophia nonnunquam quibusdam esse potuerit noxia , ut colligere licet ex his Apostoli verbis ad Coloss. cap. 2. v. 8. *Videte ne quis vos decipiat per Philosophiam & inanem fallaciam* : id ex solo pravorum hominum abusu , non ex Philosophiæ natura consequitur , quæ ad exornandas ac perficiendas hominum mentes fuit concessa. Idem statuendum de Arte Rhetorica vel Poëtica , &c. quæ benè utentibus bonæ sunt ; male utentibus noxiæ. Propter hunc pravam usum seu abusum in eas invehitur Sanctus Hieronymus

Epist. 146. ad Damasum. *Damonum cibus est carmina Poëtarum, secularis sapientia, rhetoricorum pompa verborum. Hæc suâ omnes suavitæ delectant: & dum aures versibus dulci modulatione currentibus capiunt, animam quoque penetrant, & pectoris interna devinciunt: verum ubi cum summo studio fuerint ac labore perlecta, nihil aliud nisi inanem sonum, & sermonum strepitum suis lectoribus tribuunt: nulla ibi saturitas veritatis, nulla refectio justitiæ reperitur.*

CAUSA materialis, sive materia Philosophiæ, triplex vulgò assignatur. Primò, materia ex qua componitur: scilicet partes illius, putà Logica, Metaphysica, Physica, Mathematica Disciplina, & Ethica. Secundò, materia in qua recipitur, quæ dicitur illius subjectum. Tertiò, materia circa quam versatur, quæ ipsius objectum vulgò nuncupatur.

Subjectum in quo recipitur Philosophia, est ipsa mens: quod quâ ratione intelligendum sit, jam indicavimus cap. 1. & uberius exponemus secundâ parte Metaphysices, ubi de habitibus. Quot verò modis subjecti nomen sumatur, dicemus primâ parte Metaphysices, cap. 3.

Objectum Philosophiæ, ut vulgò loquuntur, sive *materia Philosophiæ subjecta*, sunt res planè omnes: quia de rebus planè omnibus agit aut agere postulat Philosophia.

Duplex autem distinguunt objectum: *materiale* scilicet & *formale*.

Objectum materiale vulgò definiunt, *id circa quod facultas aliqua, vel habitus, vel disciplina versatur*: ut visus circa lumen & colores; Ethica circa mores, ac Philosophia circa res omnes occupatur.

Objectum formale est *ratio vel modus quo facultas, vel habitus, vel disciplina objectum suum ma-*

teriale attingit, & exprimitur his particulis, *quatenus, prout*, &c. Sic Philosophia res omnes speculatur, quatenus lumine naturali cognosci possunt.

Ex objecto materiali & formali simul sumptis exurgit objectum totum, seu *totale*, ut vocant, de quo sæpius postea.

Adverte plures habitus aut disciplinas versari posse circa idem *objectum materiale*: nam. v.g. Logica & Metaphysica cogitationes mentis considerant. Ideoque scientiæ suam non habent speciem seu *specificationem* ab *objecto materiali*, sed ab *objecto formali*; sive, à modo, quo in objectum materiale feruntur. Exempli causa Metaphysica est specie diversa à Logica, quoniam diversum est utriusque objectum formale: si quidem Metaphysica spectat cogitationes mentis, quatenus sunt modi aut affectiones substantiæ spiritualis; Logica verò circa eas occupatur, quatenus ad verum sunt dirigendæ.

Causa *formalis* Philosophiæ nulla est propriè, neque etiam *exemplaris*, ut diximus: quia forma propriè ad res corporales & sensibiles attinet, quæ ad alterius rei similitudinem effingi possunt. Philosophia autem appellari nequit res sensibilis: nec juxta propositum exemplar potest effingi; nisi forè exemplar illud in Mente Divina repositum voveris: quo sensu aliquam esse Philosophiæ causam exemplarem non inficiabimur.

C A P U T · I V.

De divisione seu partibus Philosophiæ.

Philosophia in tres partes à Veteribus, scilicet à Platonis & Stoicis erat distributa, teste Tullio, lib. I. de Oratore: *in natura obscuri-*

tatem ; in differendi subtilitatem ; in vitam atque mores : hoc est , ut interpretantur vulgò , in Philosophiam naturalem , rationalem , & moralem.

Naturalis Philosophiæ nomine intelligenda est Physica , prout ipsa Metaphysicam , quæ generalis quædam est Physica , Medicinam , & Mathematicas disciplinas complectitur.

Per rationalem intelligitur Logica , quæ circa rationem versatur , quæque differendi subtilitatem spectat.

Ad moralem , quæ mores dirigit , Jurisprudentia seu Legum scientia refertur.

Hæc divisio fere eadem est , ac ea , quam Scholæ tradunt ex Aristotele lib.2. Metaphysicorum , cap.1. quâ Philosophia in *speculativam & practicam* distribuitur.

Speculativa , seu theoretica dicitur ea , cujus finis est contemplatio ; sive , quæ in sola veritatis contemplatione quiescit , nec tendit ad opus : quæ triplex ab Aristotele recensetur lib.6. Metaphysicorum cap.1. *Mathematica , Physica , & Theologia naturalis* , quæ *prima Philosophia* , seu *Metaphysica* pars est præcipua.


Practica dicitur ea , cujus finis est praxis , sive , quæ non quiescit in objecti sui contemplatione ; sed aliquid circa illud operatur , aut potius operandum docet : quales dici solent *Logica & Ethica*. Sed *Mathematica* quoque disciplina , quoad aliquam sui partem dici possunt practicæ : nam si Geometria v. g. sit speculativa , quatenus theoremata considerat , practica quoque meritò censenda est , quatenus problemata solvit , ut alibi ostendemus. Idem sentiendum de Arithmetica , de Musica , & cæteris Mathematicarum partibus , quæ partim speculativæ sunt , partim practicæ ; seu quæ theoriam simul habent & praxim.

Hic autem quæri solet , utra præstet alteri ;

speculativa practicæ ; an practica speculativæ. Sed ea quæstio inutilis planè videtur : cùm scientiæ speculativæ & practicæ sese mutuò variis nominibus antecedant ; seu dispare habcant dignitatis & excellentiæ gradus. Nam Metaphysica v. g. quæ speculativa est, quæque circa Deum versatur, Logicam vincit , quæ est practica , objecti , ut vocant , seu subjectæ materiæ dignitate : cùm Deus, qui spectatur à Metaphysica , sit objectum longè excellentius quàm mentis cogitationes , quæ à Logica considerantur. Sed Logica eadem ratione superat Physicam , quæ est speculativa : nam Logica circa res spirituales , putà cogitationes ; Physica circa res corporeas occupatur. Præterea eadem Logica Physicam superat certitudine ; Ethica reliquis præstat utilitate. Unde constat neque speculativas absolutè dici posse nobiliores practicis : nec practicas speculativis : sed eas sibi mutuò diversâ ratione præstare & cedere : ita ut si alia aliam superet objecti dignitate , ab ea nonnunquam vel certitudine , vel utilitate , vel aliâ quolibet ratione superetur.

In iis igitur tractandis solum doctrinæ ordinem servabimus ; & à Logicâ , quæ cæterarum organum est , initium ducemus.





L O G I C A,

SIVE SCIENTIA COGITATIONUM
R E C T R I X.

P R O O E M I U M.

Logica juxta vim nominis disciplinam rationalem significat, sive disciplinam rationis rectoricem, quâ cæteræ omnes Philosophiæ partes velut instrumento quodam utuntur, ut veritatem in proposita quavis materia facilius assequi valeant. Hinc vocari solet *Organum*, id est, instrumentum, seu modus sciendi: quia regulas non tantum inveniendi veri; sed etiam demonstrandi & ordinatè tractandi præscribit. *Dialecticæ* quoque appellant, seu disserendi scientiam: quo tamen nomine ea potius Logicæ pars designatur, quæ de re proposita probabilibus rationibus disserit: hoc enim est officium Dialecticæ juxta mentem Aristotelis cap. ultimo, lib. de sophisticis Elenchis, & alibi.

Cùm autem Logica mentis cogitationes dirigat, hinc etiam *Scientia*, vel *Ars cogitandi*, seu mentis cogitationes ad verum dirigendi nominatur. Quatuor autem numerari solent hujusmodi cogitationum species, quas Logica considerat: quanquam ad duas revocari possunt, ut inferius dicemus.

Prima, est perceptio, vel idea, quæ apprehensio

in Scholis dicitur , per quam quidpiam concipimus tantum ; nihil de eo affirmamus aut negamus : ut cum quis percipit Deum , mentem , solem , &c. Hæc prima cogitationis species nominibus exprimitur, non verbis.

Secunda , *judicium* , dicitur , quâ consentientes ideæ conjunguntur affirmando ; dissentientes negando separantur : vel, quâ unum affirmatur , aut negatur de alio ; ut , si percepi quod hac voce, *Deus* , significatur , & quod istâ , *bonus* ; & quod illâ , *mendax* : possum ideam bonitatis cum idea Dei conjungere , & ideam mendacii remove ; judicando Deum esse bonum ; Deum non esse mendacem.

Judicium non exprimitur nominibus , ut perceptio ; sed verbis : tumque *enuntiatio*, seu *propositio* nuncupatur. Enuntiatio , si quod in re , vel in vocabulo obscurum est , aut ignotum exponat, dicitur *Definitio* ; sive rei , sive nominis : quemadmodum suo loco explicabitur.

In enuntiatione spectari solent *subjectum* , de quo aliquid affirmatur aut negatur ; *attributum*, seu *predicatum* , quod affirmatur vel negatur de alio ; & *copula* , seu verbum , *est* , quod attributum cum subjecto connectit : ut cum dicitur, *Deus est bonus* , subjectum istius propositionis est *Deus* ; attributum, *bonus* ; & copula, verbum *est*.

Subjectum & attributum propositionis dicuntur illius *termini* seu *extrema* : quia propositionem utrinque terminant ; ut in isto exemplo cernere licet , *Deus est bonus*. Quandoque tamen non exprimuntur ; sed subintelliguntur tantum : ut in istis propositionibus , *cogito* , *veni* , *rogabo* : idem quippe est ac si diceretur , ego sum cogitans, ego fui veniens, ego ero rogans.

Tertia cogitationis species , *rationatio* appellatur , per quam unum judicium ex prioribus aliis

infertur judiciis : ut cùm dicitur ; *omnis substantia cogitans est immortalis* : atqui mens hominis est substantia cogitans : ergo mens hominis est immortalis.

Duo quidem necessaria sunt judicia , ut tertium ex illis inferatur. Aliquando tamen unicum exprimitur , ex quo aliud colligitur : ut cùm dicitur ; *mens humana est substantia cogitans* : ergo est immortalis. Et hæc ratiocinatio , quoniam unum judicium in mente retinet , *enthymema* græcè dicitur : in eaque prior propositio dicitur *antecedens* ; posterior *consequens*. Cùm verò ratiocinatio ex tribus propositionibus expressis coalescit , *syllogismus* nuncupatur.

In syllogismo porrò tres necessariò requiruntur termini ; *major, minor, & medius*. Major est attributum conclusionis ; minor est illius subiectum ; medius utrumque conjungit , aut separat, nec unquam ingreditur conclusionem. Probatur autem majus extremum de minori extremo per medium : v. g. in allato exemplo probatur mens hominis esse immortalis , quia est cogitans.

Tres quoque in syllogismo occurrunt propositiones. Prima dicitur *major*, in qua scilicet reperitur majus extremum cum medio. Secunda, *minor*, in qua minus extremum cum eodem medio invenitur. Tertia , *conclusio*, quæ ex duabus prioribus colligitur.

Quarta cogitationis species est *methodus* , quæ definitur , *via & ratio veritatem adhuc latentem inveniendi , & inventam congruo modo explicandi*. Hinc duplex methodus , altera *analytica* , sive resolutionis & inventionis ; altera , *synthetica* , sive compositionis & doctrinæ. Hæc quarta cogitationis species non secus ac ratiocinatio , si stricto jure expendatur , ad judicium revocari debet : cùm ratiocinatio nihil aliud sit , quàm judicium quod-

dam ex duobus saltem aliis prioribus , sive expref-
fis , sive tacitis judiciis illatum : methodus verò ,
judicium , quo certam viam ineundam decerni-
mus , ut veritas latens inveniatur ; vel inventa
aliis explicetur. Cùm tamen ambæ illæ species ju-
dicii d. verfas includant difficultates , ſeorſim à
Logica ſunt ſpectandæ. Adeoque Logica in qua-
tuor partes non malè diſtribuitur , quarum prima
eſt de perceptione vel idea : ſecunda de iudicio :
tertia de ratiocinatione : quarta de methodo.

Atque hæc quidem Logicam pertractandi ratio
ab ea , quam propoſuit Ariſtoteles , nihilò ferè vi-
detur recedere. Ipſe quippe ſexdecim libris Orga-
num Logicæ concinnavit ; quorum ſeriem hic ,
ut in aliis Philoſophiæ partibus , referre non pige-
bit ; quoniam ab iis , quorum eruditio tentatur ad-
gradus in Academia Pariſienſi conſequendos ,
quæri conſuevit.

Primus liber eſt Categoriarum : ad cujus in-
telligentiam præmittitur *introducſtio Porphyrii* : &
hi duo Libri ad perceptionem ſpectant.

Secundus eſt de Interpretatione , ſeu de Enun-
tiatione , quæ id quod mente conceptum eſt , in-
terpretatur : ac iſte liber ad iudicium refertur.

Rèliqui ipſius libri circa ratiocinationem ver-
ſantur. Ac primò occurrunt quatuor Libri Ana-
lyticorum : quorum duo priores de ſyllogiſmo
generatim agunt ; duo poſteriores occupantur
circa demonſtrationem ; quæ ſcilicet perfectiſſi-
ma eſt ratiocinationis ſpecies , per quam quid-
piam inviçtè ac neceſſariò verum , aut falſum eſſe
oſtenditur.

Succedunt octo Libri Topicorum , in quibus de
ſyllogiſmo probabili , ſeu *Locis Dialecticis* agitur.
Tandem opus concludunt duo Libri Elenchorum ,
qui quandoque in unum componuntur : ubi de re-
prehentione Sophiſtarum , ſive , de diſſolvendis So-

phistarum fallaciis præcepta tradit Aristoteles.

Quatuor igitur prædictæ cogitationum species sunt subjecta Logicæ materies : sive , ut Scholæ loquuntur , sunt objectum illius materiale. Namque id objectum materiale alicujus disciplinæ appellatur , quod ab ea disciplina propriè & ratione sui , non ratione alterius , spectatur.

Atqui quatuor mentis cogitationes ratione sui spectantur à Logica , seu scientia cogitationum rectrice : nam ideo tantum instituta est Logica , ut de quatuor illis cogitationum speciebus ad verum dirigendis regulas tradat.

Ergo objectum materiale Logicæ sunt quatuor cogitationum species recensitæ.

Objectum verò formale Logicæ exprimitur his vocabulis , *quatenus ea mentis cogitationes ad verum sunt dirigenda*. Etenim objectum formale alicujus disciplinæ est ratio , vel modus , quo objectum materiale ab ea disciplina consideratur ; & à quo proinde speciem suam desumit ea disciplina , ut superius definitum est.

Atqui modus , quo mentis cogitationes à Logica spectantur , his vocabulis exprimitur , *quatenus ea sunt ad verum dirigenda* , non verò quatenus sunt modi , aut actiones mentis , quo sensu à Metaphysica spectantur.

Ergo objectum formale Logicæ exprimitur his vocabulis , *quatenus mentis cogitationes ad verum sunt dirigenda*.

Denique objectum totum , seu *totale* , ut aiunt , adæquatum & attributionis ipsius Logicæ , sunt quatuor cogitationum species , quatenus ad verum sunt dirigenda.

Objectum enim totum & adæquatum alicujus disciplinæ ex objecto materiali & formali constat , ac ei disciplinæ , à qua spectatur , ita exæquatum est , ut ipsi attribuantur ea omnia , quæ in illa disciplina pertractantur.

Atqui quatuor cogitandi species recensitæ, quatenus ad verum sunt dirigendæ, objectum materiale & formale Logicæ complectuntur, ut attendenti manifestum est. Deinde ipsi Logicæ sunt adæquatæ, id est, tam latè patent, quàm ipsa Logica, ita ut iis attribuantur ea omnia quæ à Logica considerantur. Quæcunque enim tractantur à Logica, ea ad quatuor mentis cogitationes, prout ad verum dirigendas, referuntur; ut ex iis quæ toto hoc opere tradentur, intelligi poterit.

Ergo objectum totum, adæquatum, & attributionis, ut vocant, ipsius Logicæ, sunt quatuor cogitationum species, prout ad verum sunt dirigendæ.

Nec obstat, quod aiunt aliqui, perceptionem non posse ad verum dirigi à Logica; cò quòd non sit falsitatis propriè capax, ut inferiùs ostendemus, nec adeo Logices objectum, seu potius objecti partem haberi debere. Nam licèt perceptio falsa esse nequeat ratione sui, potest tamen esse obscura & confusa, proindeque falsa, ratione subsequentis iudicii; sive potest esse causa, vel potius occasio iudicii falsi. Ex quo fit, ut Logices regulæ quæ de claritate & distinctione idearum traduntur, ipsi minimè sint supervacaneæ.

Regulæ autem, quas tradit Logica, certæ omnino sunt & immutabiles, ac immutabilibus ideis innixæ: v. g. certum est syllogismum debere ex tribus necessariò terminis constare: quia syllogismus est probatio, sive affirmans, sive negans, unius de alio per aliud. Quare Logica dicenda est cognitio certa rei necessariæ, per veram propriamque causam aut rationem, propter quam ea res ita esse tutò pronuntiatur: adeoque scientiæ strictè sumptæ titulo est insignienda.

Est verò scientia practica: quia docet aliquid efficiendum, putà definitionem, syllogismum, &c.

Cumque scientia practica , & ars liberalis , ut ex antè dictis liquet , nullatenus inter se differant : nihil quoque vetat , quominus Ars liberalis appelletur : quia liberis nobilibusque Viris ornamento esse potest. Quamobrem bene definitur *Logica scientia practica, sive ars cogitandi* , hoc est, cogitationes mentis ad verum dirigendi : vel , ut Scholæ loquuntur , est scientia practica, sive ars, occupata circa mentis cogitationes prout ad verum dirigendas. .

Cùm autem in omni arte duæ sint partes , ut antea diximus , scilicet pars superior , quæ scientia quædam est practica : aut certè intelligentia rerum agendarum , vel efficiendarum , à qua præcepta traduntur ; & pars inferior , quæ ista præcepta exequitur : hinc duplicem Scholæ distinguunt Logicam ; alteram *docentem* , quæ præcepta tradit ; alteram *utentem* , quæ illa ad usum applicat. Hæ duæ partes in iis artibus , quæ ad diversas facultates pertinent , omnino diversæ sunt , ut patet in Musica , cujus pars superior , nempe Musica docens , ad mentem pertinet ; utens verò , sive inferior , ad cantandi facultatem , seu vocis organa , quæ difficultatem aliquam in præceptorum executione patiuntur : unde una Musicæ pars sine altera potest obtineri. Sed cùm Logica docens & utens ad eandem facultatem seu mentem pertineant , dubium multis videtur , an dici debeant habitus diversi. Hoc tamen dubium penitus evanescet , si Logicæ utentis nomine , cæteras disciplinas , putà Metaphysicam , Physicam , & Ethicam intelligamus cum sancto Thoma , Læctione 4. in librum quartum Metaphysicorum Aristotelis : tunc enim Logica docens & utens erunt habitus planè diversi , aut diversæ disciplinæ , cùm diversa habeant objecta , diversasque difficultates includant.

Sed paulò operosior hîc quæstio proponitur : an Logica artificialis, seu ars, aut scientia, quam tractamus, sit organum cæteris disciplinis comparandis prorsus necessarium, an utile duntaxat ? Quamquam, si res ex æquo & bono perpendantur, omnibus palam esse debet Logicæ artificialis præcepta, ab ipsa mente, per attentam eorum, quæ in se peraguntur, considerationem fuisse inventa : neque adeo dubitare licebit, quin mens nostra naturaliter ea præcepta in se contineat, cùm illa ex se protulerit. Quare nihil quoque prohibebit, quominus cæteras disciplinas sine Logica artificiali, & per solam Logicam naturalem comparare possit. Hinc est quòd pueri olim mathematicas disciplinas docebantur, tametsi Logicæ præceptis non forent informati : quoniam ad earum assentionem sola Logica naturalis, seu vis ipsius mentis sufficere, nec iis Logica artificialis absolutè necessaria esse videbatur. Quocirca de Logica sentire licet, quod sanctus Augustinus de præceptis eloquentiæ existimat libro 4. de Doctrina christiana num. 4. aliàs capite 3. *In sermonibus, inquit, atque dictionibus eloquentium, impleta reperiuntur præcepta eloquentiæ, de quibus illi ut eloquerentur, vel cùm eloquerentur, non cogitaverunt, sive illa didicissent, sive ne attigissent quidem. Implent quippe illa, quia eloquentes sunt : non adhibent, ut sint eloquentes.*


Et verò cæteræ disciplinæ non sunt ipsâ Logicâ artificiali difficiliores. Atqui tamen solâ naturâ duce Logica artificialis comparatur, cùm non detur Logica Logicæ. Ergo cæteræ quoque disciplinæ sine Logica artificiali per solam naturalem ingenii vim, quæ est Logica naturalis, comparari possunt.

Quòd si quis opponat nos ignorare regulas sciendi, aut cæteras disciplinas comparandi absque

ea disciplina quæ regulas illas tradit , quæque est Logica artificialis : respondendum nos naturaliter eas regulas tenere : naturaliter enim definimus , dividimus , ratiocinamur , & cogitationes nostras certo modo ad veritatem assequendam disponimus ; cum definitiones , divisiones , ratiocinationes , aut cogitationumstrarum ordinationes , quarum regulæ à Logica artificiali præscribuntur , ad rectæ rationis trutinam , claramve & distinctam mentis perceptionem , quæ Logica naturalis est , tanquam ad veram propriamque mensuram sint expendendæ.

Ultrò tamen fatemur nos non tam facile errores , si qui irrepant inter ratiocinandum , deprehendere citra Logicam , quàm si eâ simus instructi : ut , qui Rhetoricæ præcepta non didicere , possunt quidem esse eloquentes : sed tamen orationis vitia non tam facile indicare , aut designare possunt , quàm qui in iis sunt versati. Ex quo efficitur ut , quemadmodum Rhetorices præcepta ad eloquentiam multum juvant , ita Logica cæteris disciplinis in statu perfecto acquirendis , si non omnino necessaria , certè utilissima sit habenda : nec prorsus immerito , (quanquam per aliquam commendationem , potius quàm stricto jure ,) *janua scientiarum* dicatur , quâ apertâ cæteræ aperiuntur , quâ clausâ clauduntur , hoc est , ut interpretamur , ægrè admodum possunt adiri. Quamobrem ei sedulò incumbendum est ; ac sciendi modus toto animo quærendus , ut mens nostra rectius cogitet , id est , percipiat , judicet , ratiocinetur & ordine , cæterasque disciplinas tutius faciliusque consequatur.

Hanc igitur partem breviter quidem , sed quantum fieri poterit accuratè tractabimus : atque ut divisionem nostram sequamur , ab ideis initium faciemus. Sit igitur.



P A R S P R I M A

L O G I C E S.

De Perceptione vel Idea.

Prima cogitationis species, quam Logica considerat, *perceptio*, vel *idea*, vel etiam in Scholis *apprehensio* nominatur: ac definiri solet *prima cogitationis species, quâ quidpiam concipitur tantum, nihil de eo affirmatur, vel negatur.*

De ea autem dicemus sex capitibus.

Primo, quæremus quid sit perceptio, vel idea, & quor modis sumatur.


Secundo, de idearum veritate, ac falsitate dicemus.

Tertio, de illarum universalitate, particularitate, ac singularitate: ubi Porphyrii doctrinam de quinque ideis, aut vocibus universalibus exponemus.

Quarto, de claritate & distinctione idearum verba faciemus, & consequenter.

Quinto capite Aristotelis, ac Recentiorum categorias trademus.

Sexto denique de idearum signis, seu variis quibus exprimuntur nominibus, sermonem habebimus.



C A P U T I.

*Quid sit Perceptio , vel Idea ; & quot modis
sumatur.*

Quid sit perceptio , vel idea , naturaliter omnes intelligunt ; ac facilius ea res intelligi , quàm verbis exprimi , aut definiri potest. Unde placet hoc loco , quod ex Galeno refert Cujacius in præfatione ad titulum Digestorum de jure fisci : *nullum esse definitionum usum , si , etiam antequam ponantur , res ipsa nobis ad liquidum nota & explorata sint : ut quamlibet rem definire velle subtilius , Sophistarum proprium sit.* Id potiùs observandum venit , duplicem nominis ideæ intellectum in usu positum esse. Nam vel pro perceptione , quæ est forma , seu modus , seu dispositio , aut affectio mentis percipientis ; vel pro objecto , seu re ipsâ perceptâ , sumitur. Prior dici solet in Scholis *idea formatilis* ; posterior *idea objectiva* : prior perceptionis nomen retinet ; posterior *idea* potiùs quàm *perceptio* nominatur.

Idea igitur idem quiddam est , ac rei species intellectus exhibita , & ab eo percepta , sive , est objectum ipsum mente conceptum. Perceptio verò est objecti cognitio , vel , ut Scholæ loquuntur , apprehensio , quâ quidpiam concipitur tantum ; nihil de eo affirmatur aut negatur.

Perceptionum autem duæ rursus distinguuntur species. Prima & nobilior est *intellectio pura* , per quam scilicet mens citra phantasmatis , aut speciei corporeæ subsidium quidpiam cognoscit : v.g. cum percipit Deum , seipsam , suas cogitationes & affectiones , putà gaudium , tristitiam , &c. Ubi

observandum eam perceptionem, quâ seipsam suâque cogitationes mens cognoscit, *conscientiam* appellari, quia suarum cogitationum, aut affectuum sibi conscia est, secumque quodammodo scit se cogitare, sive, se cogitantem intimo sensu, aut sensatione percipit.

Altera perceptionis species, eaque ignobilior, dicitur *imaginatio*, per quam nempe mens phantasma quoddam, aut imaginem in phantasia seu facultate imaginatrice, vel potius in cerebro veluti depictam percipit: ut, cum quis Solem, circulum, arborem, aut aliud quidpiam corporeum quasi præsens intuetur, cum id sæpè longissimè absit, imò in rerum natura nonnunquam minimè sit. Posterior hic percipiendi modus omnibus, quotquot sunt, hominibus adeo familiaris est, ut se quidpiam intelligere non existiment plurimi, nisi id sub specie corporea sibi representare possint. Quod quàm absurdum sit, ex dictis in Proœmio Philosophiæ cap. I. liquet, & inferiùs adhuc magis innotescet.

Sed ut hoc loco intellectiōis puræ, & imaginationis discrimen in una eademque re breviter ostendamus, familiare, & omnibus notum adhibere libet exemplum. Si quis igitur imaginari velit, vel unum aliquem hominem, vel duos, vel etiam tres; non ægrè id quidem assequetur: quia id phantasiæ vires non excedit. Verùm si per imaginationem centum homines sibi clarè distinctèque simul repræsentare conetur, aut mille, aut decies, contiēsve mille; nunquam eò pervenire poterit imaginatio; sed confusam tantùm hominum multitudinem, aut acervum repræsentabit: ita ut discrimen, quod inter novem ac decem hominum millia intercedit, nec clarè nec distinctè patefaciat. Intellectus tamen purus accuratissimè discrimen illud novit. Nam si quis

v. g. commeatibus exercituum præfectus sit ; & cibaria tantum in quindecim hominum millia ad certum tempus comparaverit : accedentibus adhuc aliquot millibus ; vel recedentibus ; repente inito calculo comperire poterit , quanta sibi commeatuum accessio , vel diminutio fieri debeat : neque verebitur, ne in ea re ullatenus hallucinetur.

Quocirca intellectus clarè distinctèque percipit id, quod phantasia confusè tantum, obscurèque potest exhibere. Unde inter puram intellectionem, & ipsam imaginationem insignis elucet differentia : cum hæc simulacrum quoddam aut speciem corpoream speculetur, illa non item. Utraque tamen perceptionis nomen obtinet , ut præmonuimus.

Quamobrem in assignanda idearum origine procul absumus ab Epicureis , qui eas non tantum à corporibus oriri aiunt ; sed nec quidquam aliud esse, quam *simulacro* quædam , aut *spectra*, aut *idola* corporeâ fingunt. Quanquam verò hoc argumentum, quod est de idearum origine, sit juris metaphysici ; cum nempe Metaphysica de humana mente, præcipuisque illius facultatibus , & functionibus ex professo disputet : ea tamen hoc loco circa idearum originem prætermittere non possumus , quæ non-nihil lucis ipsi Logicæ sunt allatura.

Epicureis igitur duo sunt tantum rerum principia , materia scilicet , & inane , seu plenum , & vacuum ; nihil est tertium : hoc est , nulla est natura spiritalis , quam nos cogitantem vocamus : sed cogitatio omnis à materia profluit , ac imaginibus quibusdam corporeis continetur. Hinc Lucræti lib. i. de rerum natura, versu 420.

*Omnis ut est igitur per se natura, duabus
Consistit rebus : nam corpora sunt, & inane.*

Et paulò inferiùs hæc habet.

*Præterea nihil est, quod possis dicere ab omni
Corpore sejunctum, secretumque esse ab inani,*

Quod

Quod quasi tertia sit numero natura reperta.

Sed quis Epicureorum deliramenta non miretur, nisi qui eodem ac ipsi animi morbo laboret: nam cogitationem materiæ, seu corporibus affingere, similis amentię est, ac si quis circulo quadraturam; aut triangulo rotunditatem tribueret; vel lapidem ligneum, aut sine valle montem extare affirmaret. In hoc autem negotio, & aliis hujusmodi, interiorem hominum sensum, seu conscientiam appellamus: nec ulla melior nobis ad Epicureos refellendos ratio suppetit, quàm si eos moneamus rogemusque, ut in sese descendant, secumque reputent diligenter, an materiam cogitationis capacem esse intelligant? Si enim seriò id præstiterint, non dabitamus quin ab opinione tam absurda, brevi tempore sint recessuri.

Quod spectat ad Peripateticos, paulò mitior est eorum opinio. Nam, ii mentem humanam spiritalem esse fatentur: quamvis illam per phantasmata tantum corporea intelligere posse existiment: cum Aristotele tum multis locis, tum maximè lib.3. de anima cap.8. ubi sic habet: *nunquam anima intelligit sine phantasmate.*

Iis concinit Gassendus primâ parte institutionis Logicæ Canone 2. his verbis. *Omnis, quæ habetur in mente idea, ortum ducit à sensibus.* Idcirco enim qui est cæcus natus nullam habet ideam coloris, quia sensu visus destituitur, cujus interventu eam habeat; qui surdus natus, nullam soni, quia caret sensu auditus, cujus ope illam acquirat. Adeo proinde ut, si esse posset, qui omni privatus sensu viveret, (sed nempe non potest saltem sine tactu, qui unus animalibus intra uterum competit) is nullius rei ideam haberet, sicque nihil imaginaretur. Huc proinde spectat celebre effatum, *Nihil in intellectu est, quod prius non fuerit in sensu*, spec-

rat, & quod dicunt, intellectum seu mentem esse tabulam rasilem, in qua nihil celatum, depictumve sit. Hactenus Gassendus.

Cartesius denique passim, sed nominatim tertîâ meditatione metaphysicâ num. 11. & sequentibus, quasdam nobis *innatas* esse ideas decernit, alias *adventitias*, alias *fictitias*.

Innata idea dicitur, quæ menti nostræ statim ab ortu divinitus est ingenita: sive quæ nobis à primo vitæ momento ad extremum, quoties attendit animus, semper præsto est: & à solâ primâ causâ, sine corporis aut cujuscumque aliûs causæ secundæ subsidio suam habet originem. Talis est idea entis generatim, seu entis simpliciter, primorumque illius attributorum & modorum; putâ essentiae, existentiae, unitatis, veritatis, bonitatis, perfectionis, pulchritudinis, durationis, ordinis, relationis, proportionis, &c. præcipuarumque illius specierum, spiritualis nempe, & corporeæ; Dei, & creaturæ; Entis perfecti, & imperfecti; substantiæ cogitantis, & extensæ, sive cogitationis, & extensionis. Horum quippe omnium naturales sive à Deo acceptas quotquot sumus communiter habemus ideas; non à sensibus ortas, aut ad libitum confictas: ut contra Peripateticos & ipsum Gassendum rationibus necessariis postea demonstrabimus cum S. Augustino multis locis, & speciatim lib. 10. Confess. cap. 10. 11. 21. &c.

Adventitiæ dicuntur, quæ variarum rerum occasione nobis adveniunt, aut in mente nostra excitantur: quales sunt potissimum ideæ qualitatum sensibilibum, coloris; soni, odoris, saporis & cæterarum: quæ omnes, vi legis inter corporeos motus, & mentis cogitationes à Deo constitutæ, in nobis excitantur. Quanquam, si ideæ nomen ad claram distinctamque rei speciem significandam restringatur, vix dici potest nos ullam

habere qualitatum sensibilibum ideam ; sed tantum perceptionem aut sensum aliquem intimum , seu conscientiam : qua de re agemus in Metaphysica.

Factitiæ denique vocantur, quæ ex illis , quibus mens jam informata est , ideis componuntur : ut cum quis ex idea montis , & idea auri montem aureum effingit. Ad quod quidem determinari debet intellectus , vel per actionem voluntatis , vel per spirituum motionem, ut explicabimus etiam in Metaphysica. Nam licet inveterata sit in Scholis opinio , perceptionem , sive , ut loquuntur , apprehensionem esse intellectus nostri operationem, idque fortasse, quod *percipere* & *intelligere* verba sint activa apud Grammaticos , ut *audire* , *videre* , & omni modo *sentire* : reipsâ tamen intellectum nostrum percipiendo pati , seu recipere existimamus, ut sensus omnes percipiendo patiuntur. Unde minus aptè numerantur quatuor mentis operationes in Scholis Logicis ; scilicet apprehensio , iudicium , ratiocinatio & methodus : nam perceptio, sive apprehensio est affectio passiva , seu modificatio nostræ mentis , non operatio. Ideoque dicendum Logicam versari circa cogitationes mentis, non circa operationes intellectus.

Verum id expressius in Metaphysica definiemus secundâ parte, sectione tertiâ, capite quarto.

C A P U T I I.

De veritate & falsitate Idearum.

HActenus quid sit idea, quæve illius species , & acceptiones , quantum ad capeffenda Logices præcepta necessarium visum est, exposuimus : nunc de idearum proprietatibus , scilicet de veritate &

Defi-
nitio
veri-
tatis.

falsitate : tum de universalitate, particularitate, & singularitate ; ac denique de claritate , & distinctione sigillatim instituenda est tractatio. Atque ut ordiamur à veritate , quanquam nomen istud non uno modo usurpatur , generatim tamen dici potest *convenientia rei, vel modi cum sua regula aut mensura*. Eaque definitio omnibus veritatis speciebus convenit , ut ex singularum enumeratione placitum fiet.

Alia quippe est *veritas entis* , vel *modi entis*, quæ *transcendentalis* , aut metaphysica vulgò dicitur, per quam nempe ens , vel modus entis cum suo exemplari congruit , prout explicabimus primâ parte Metaphysices, cap.2.

Alia est *veritas signi* , quæ est illius consensio cum re significata : qualis est veritas sermonis tam cum rebus quas significat, quàm cum cogitationibus, quas exprimit, congruentis : de qua veritate dicemus inferiùs capite sexto.

Alia denique *veritas cognitionis* vocatur ; quam hîc potissimum spectamus ; quæque definiri solet convenientia cognitionis nostræ cum re cognita. At cognitio nostra vel in idea sola consistit ; vel in relatione , quam ideæ habent inter se, ut conjungantur , vel separentur : in qua conjunctione vel separatione judicii natura sita est. Unde alia est ideæ veritas, alia veritas judicii. Cùmque idea vel simplex sit , vel complexa : alia rursus est ideæ veritas simplex, alia veritas complexa.

Simplicem ideam vocamus , quæ vel rem unicam , vel modum unicum repræsentat ; qualis est idea montis , idea auri , idea rotunditatis , &c. Complexam ideam dicimus , quæ rem exhibet cum aliquo attributo , aut modo ; sive cum aliqua qualitate , quâ afficitur : hujusmodi est idea montis aurei , baculi fracti, lapidis angulati ; &c. Hæc idearum complexio fit in intellectu nostro ;

nimirum, vel occasione actûs nostræ voluntatis ; vel occasione motûs spirituum animalium propter legem à Deo sancitam : sed non fit ab intellectu creato ; cum ipse passivus sit , non activus , ut ostendemus in Metaphysica.

Qualiscunque autem fuerit idea , sive *simplex*, sive *complexa* , illius veritas in sola consensione cum re percepta citra affirmationem aut negationem consistit. Sed veritas iudicii , quæ *compositio- nis* dicitur . in affirmatione aut negatione , sive in idearum conjunctione vel separatione sita est. Atque ita iudicium censetur verum , cum dicit id esse quod reverà est ; vel negat esse , quod non est : falsum verò , si affirmet esse , quod non est , vel neget esse quod est.

Veritati opponitur falsitas , quæ respectu signi, aut cognitionis dici potest *discrepantia cognitionis aut signi* , à *re cognita* , aut *significata*. Nam veritas transcendentalis oppositam non habet falsitatem, ut videbimus in Metaphysica.

Cum autem hoc loco veritatem , ac falsitatem cognitionis humanæ consideremus ; idque vel in idea , vel in iudicio : nemini dubium esse potest, quin iudicio conveniat modò veritas , modò falsitas : nam quod falsum est , nonnunquam affirmatur ut verum , & vicissim , quod verum est , aliquando negatur ut falsum. Ideæ quoque veritatem tribui posse vulgò fatentur omnes : sed utrum ipsi falsitas aliquando accidat , vehementer ambigunt Philosophi. Quocirca , quid nobis ea de re videatur , aliquot propositionibus est aperiendum. Sit igitur.

PROPOSITIO PRIMA.

Preceptio, aut idea, sive simplex, sive complexa, vera esse potest.

C iiij

Probatur. Tunc perceptio, vel idea, dicitur vera, cum est objecto suo consentanea.

Atqui perceptio five simplex, five complexa, potest esse objecto suo consentanea: v. g. perceptio *montis*, quæ est simplex, & perceptio *montis prærupti*, quæ est complexa, consentire possunt cum objectis suis, seu rebus perceptis, ut omnes intelligunt.

Ergo perceptio, aut idea, five simplex, five complexa, potest esse vera.

Quod si quis opponat perceptionem, five simplicem, five complexam, nihil affirmare, aut negare; nec proinde esse veram: respondeo distinguendo consequens. Perceptio, five simplex, five complexa, non est vera veritate compositionis, quæ ad iudicium pertinet, quæque in affirmatione, aut negatione, five in idearum conjunctione vel divisione consistit, concedo consequentiam: non est vera veritate simplici, aut complexa, quæ est veritas perceptionis, cum objecto percepto convenientis: nego consequentiam. Quod quidem novâ explicatione non indiget. Sit igitur.

PROPOSITIO SECUNDA.

Perceptio five simplex, five complexa, propriè loquendo, falsa nunquam dici potest.

Probatur. Perceptio falsa propriè loquendo dicenda foret ea, quæ objecto percepto esset dissentanea.

Atqui perceptio, five simplex, five complexa, dici non potest objecto percepto dissentanea: nam si repræsentat rem perceptam, sicuti est; v. g. *aurum* præsentè auro: tunc objecto consentanea est, ut nemo diffitetur. Quòd si objectum præsens non repræsentet, sed aliquod aliud: v. g. si præsentè *orichalco* aurum exhibeat, vera quidem est auri

perceptio, minimè orichalci: adeoque non est falsa orichalci perceptio, sed nulla; seu minimè est orichalci perceptio.

Ergo perceptio, sive simplex, sive complexa, propriè loquendo, dici non potest falsa.

PROPOSITIO TERTIA.

Perceptio, aut idea, sive simplex, sive complexa, dici potest falsa, *materialiter*, ut aiunt, & occasione subsequētis iudicii.

Probatur. Ut perceptio, vel idea, dici possit falsa *materialiter*, & occasione subsequētis iudicii, satis est eam esse posse materiam, & occasionem iudicii falsi.

Atqui perceptio vel idea, sive simplex, sive complexa, maximè autem complexa, esse potest materia & occasio subsequētis iudicii falsi: v. g. perceptio *auri* præsente *orichalco*, esse potest occasio, cur iudicet aliquis aurum esse id, quòd tantum est orichalcum: sic perceptio baculi ut fracti, dum mediâ sui parte in aquam demergitur, cum tamen rectus sit, in causa est cur baculus, qui rectus est, iudicetur fractus, aut inflexus.

Ergo perceptio vel idea, sive simplex, sive complexa, sed maximè complexa, dici potest falsa *materialiter*, & occasione subsequētis falsi iudicii.

Corollarium.

Priusquam iudicium de re aliqua feratur, hæc Regula constanter tenenda est, ut perceptio quam diligentissimè expendatur, nec unquam ulli rei intra naturalem ordinem constituta prabeatur assensus, nisi clarè, distinctèque fuerit percepta.

Responsiones ad objecta.

OBJICIES primò. Si simplex perceptio falsa esse nequeat, nec vera quoque est futura : nam utrobique par ratio est.

Respondeo negando propositionem. Quamvis enim perceptio, vel idea, non sit objecto præsen-
ti & repræsentando consentanea, non idcirco dici potest falsa, sed nulla : ut diximus. At verò consentanea est semper objecto repræsentato, & percepto : quare semper vera est ; nunquam falsa ratione sui.

, Objicies secundò. Illa idea etiam propriè & ratione sui falsa dici potest, quæ non repræsentat objectum sicuti est.

Atqui idea auri, præsentè orichalco, non repræsentat objectum sicuti est.

Ergo est falsa, etiam ratione sui.

Respondeo distinguendo minorem. Non repræsentat, sicuti est, objectum, quod est præsens, & quod repræsentandum foret, concedo : non repræsentat objectum perceptum, sicuti est, nego. Quare nego consequentiam. Idea quidem auri, præsentè orichalco, non repræsentat objectum quod præsens est, & quod repræsentari deberet : nempe non repræsentat orichalcum, sed aurum quod percipitur : non tamen idcirco falsa dici potest propriè, & ratione sui. Nam vera auri perceptio, non est falsa perceptio orichalci, sed minimè est orichalci perceptio. Atqui perceptio auri est vera auri perceptio. Ergo minimè est perceptio orichalci : adeoque non est falsa, saltem ratione sui, licèt falsa sit ratione subsequentis judicii : quia judicio falso præbet occasionem.

Objicies tertio. Perceptio complexa æquivaleret judicio : sive est verum judicium.

Sed judicium potest esse falsum : siquidem affirmat & negat.

Ergo perceptio complexa potest etiam esse falsa.

Respondeo negando majorem. Perceptio quippe nihil affirmat neque negat , sive simplex sit , sive complexa. Ergo non æquivalet judicio.

Instabis. Illa cogitationis species æquivalet judicio , sive est verum judicium , quæ quidpiam alicui subjecto tribuit , aut ab eo detrahit.

Atqui perceptio complexa , v. g. *montis aurei*, vel *baculi fracti* , tribuit aliquid *monti* nempe *esse aureum* , & detrahit *baculo* rectitudinem , dum ipsi *fracturam* attribuit.

Ergo perceptio complexa æquivalet judicio.

Respondeo distinguendo majorem. Illa cogitationis species æquivalet judicio, seu verum est judicium , quæ quidpiam alicui subjecto tribuit , aut ab eo detrahit per affirmationem aut negationem, concedo : per conceptionem tantum subjecti simul cum attributo sine affirmatione , aut negatione , nego. Simili modo distinguo minorem, & nego consequentiam. Perceptio porro complexa tribuit tantum aliquid alicui subjecto , quatenus subjectum unà cum attributo concipitur, putà cum concipitur *mons aureus* , vel *baculus fractus* : minime autem tribuit unum alteri per affirmationem aut negationem : quia nec affirmat , nec negat , vel montem aliquem esse aureum , vel baculum esse fractum : quod ad judicium requiritur.



CAPUT III.

De universalitate, particularitate, & singularitate idearum : ubi de quinque ideis universalibus Porphyrii.

QUæcumque in rebus existunt, ea omnia singularia esse fatendum est, nullum universale, sive multis ita commune, ut in iis idem omnino recipiatur. Idea tamen aliqua dicitur universalis, alia particularis, alia singularis; ut nomen aliud dicitur universale, aliud particulare, aliud singulare: quod & *idea* multa repræsentare, & *nomen* multa significare possit.

Ideam igitur universalem vocamus, quæ singularis quidem in se est; multa tamen exhibere potest singularia, sive ipsa actu existant, sive sint tantum possibile: ut, cum concipitur circulus generatim, quatenus præcisè est figura plana & rotunda: vel cum homo intelligitur tanquam substantia quædam ex corpore & mente physice conjunctis constans: utraque idea universalis dicitur: nam illa omnes & singulos circulos; hæc omnes & singulos homines exhibet.

Particularis idea dicitur, quæ rem singularem quidem menti repræsentat; sed incertam & indeterminatam: ut si ex aliquo loco confusam hominis vocem, aut gemitum audiam; idea quidem alicujus hominis dolentis in me excitatur; sed quis ille sit, mihi non constat.

Singularis idea illa est, quæ rem aliquam singularem, certam & determinatam, v. g. Aristotelem, Gassendum, aut Cartesium exprimit.

Idea porro singularis vel particularis, nihil

aliud est quàm ideæ universalis vel circumscriptio, vel circumscripta portio. Etenim res generatim intelligimus, non quia ideas universales à singularibus exprimimus, ut volunt Peripatetici, qui aiunt, *nihil esse in intellectu, quod prius non fuerit in sensu*: sed quia tum entis generatim, tum modi entis ingenita nobis est idea, in cujus extensione omnia entium, & modorum entis genera, species, & individua continentur. Ut explicabimus in Metaphysica.

Quocirca cùm idea universalis à singularibus *præscindere*, seu *abstrahere* in significatione *neutro-passiva*, id est, præcisa, seu abstracta esse dicitur; id hoc tantum sensu verum est, quòd idea universalis omnibus singularibus sit communis: singulaque pariter exhibere possit; adeoque à singulis avulsa & separata, vel, ut Scholæ loquuntur, *abstracta* & *præcisa* sit: abstrahere enim unum ab alio hic, est concipere unum sine alio. Qua in re mens nostra non decipitur: quia dum concipit unum sine alio, non idcirco iudicat id sine alio consistere. Unde vulgò dicunt, *abstrahentium non esse mendacium*, seu mentem abstrahentem non errare. Abtractio autem dupbus præcipuè fit modis.

Primò, cùm attributum aliquod à subjecto per mentem abstrahitur, sive, cùm seorsim ab illo concipitur: quo casu generalis habetur idea, quæ pluribus, sive actu existentibus, sive possibilibus tantum convenire intelligitur: v. g. mens non tantum se substantiam cogitantem concipit; verum etiam spectare potest hoc attributum, *cogitans*, tanquam quid omnibus substantiis cogitantibus, sive actu existentibus, sive possibilibus commune. Simili modo dum se *ens* esse, aut *substantiam* cognoscit, facillè hoc attributum singulis entibus, seu substantiis tum spirita-

libus, tum corporeis, imò tertio entium generi, si à Deo crearetur, convenire posse intelligit. Siquidem res singulares ideo pronuntiamus esse entia, quia ideam entis generatim, quæ nobis naturaliter indita est, iis convenire videmus.

Secundo modo fit cognitio per abstractionem, cum spectatur modus sine re, cujus modus est: vel unus modus sine alio modo: ut cum consideratur dulcedo vel candor sine lacte, quod dulce & candidum est; vel cum spectatur longitudo corporis sine latitudine, aut longitudo & latitudo sine profunditate.

In idea autem abstracta & universali duo sunt diligenter observanda, scilicet, *comprehensio* illius, & *extensio*.

Per *comprehensionem* ideæ intelliguntur ea attributa, qua in rei cujusdam idea sic continentur, ut sine illis stare non possit istius rei idea: v. g. esse compositum ex mente & corpore, sic continetur in hominis idea, ut aliter homo intelligi non possit. Sic esse rotundum in ideâ circuli ita includitur, ut sine hoc attributa comprehendere nequeat circulus.

Per *extensionem* ideæ intelliguntur subjecta quibus ista idea convenire potest, ut idea hominis competit Socrati, Aristoteli, & cæteris; idea circuli, cuilibet circulo; idea trianguli, cuilibet triangulo potest aptari. Cumque idea illa non tantum singularibus existentibus, sed etiam possibilibus conveniat, illius extensio potest sine universalitatis detrimento imminui: v. g. etiamsi duo vel tres duntaxat residui forent homines, generalis tamen hominis idea pluribus possibilibus communis in mente salva & integra remaneret.

Hujusmodi autem idea communis, quæ attributum aliquod universale comprehendit, quintuplicis & rationis, juxta doctrinam Porphyrii in

Ifagoge, seu introductione ad Categorías Aristotelis. Nam vel genus exhibet, vel speciem, vel differentiam, vel proprium vel accidens. Unde introductio illa Porphyrii, *de quinque ideis aut vocibus universalibus*, vulgò inscribitur: in qua quidem nihil admodum rarum, aut exquisitum reperiēs: sed nonnulla offēdes à vera ratione & Christiana fide abhorrentia; v. g. hominem esse *animal rationale mortale*; Deum verò *animal rationale immortale*. Verum id non miraberis scriptum à Religionis Christianæ desertore & hoste. Fuit enim Porphyrius natione Judæus, Tyro oriundus, unde laudatissima purpura. *Malchus* primum, id est, linguâ patriâ *Rex*; deinde, *Porphyrius*, quasi *purpureum* dicerēs, à vestis purpureæ usu cognominatus. Christianæ Religionis nomen dederat, à qua postea descivit. Professionē fuit Philosophus, sectâ Platonicus, Plotini discipulus, Origenis condiscipulus, Præceptor Iamblici. Scripsit verò hanc *Ifagogen* in gratiam adolescentis Romani nomine Chrysaorii, falsorum numinum cultoris, circa Diocletiani tempora. In eo tamen laudandus videtur, quòd ab inutilibus veterum Sophistarum quæstionibus; putà *utrum genera & species consistant in rerum natura, an in solis nudis animi notionibus posita sint*, omnino abstinentium duxerit, ut ex ipsius Præfatione compertum est. Breviter igitur cum illo quinque voces, seu ideæ universales nobis sunt explicandæ.

Genus.

GENUS definiri potest *attributum universale, quod multis speciebus convenit ad quæstionem factam, quid res est, tanquam pars essentie communior*. Exempli causâ, animal convenit homini & belluæ ad quæstionem factam *quid res est*: nam

si quærat^{ur} quid sit homo , respondetur esse animal , quod est illius genus , & pars essentia^e communior , quâ cum bellua convenit : bellua quippe non secûs ac homo , est animal. Si quærat^{ur} quid sit triangulum , respondetur esse figuram , quæ est pars illius natura^e seu essentia^e communior , per quam cum circulo & aliis figuris convenit.

Ut autem tota rei alicujus essentia seu natura explicetur , non tantum pars illius communior afferenda est , per quam cum multis convenit ; sed etiam pars illius specialior , per quam ab iis discrepat. Exempli causâ , ut explicetur natura hominis , non tantum dici debet *animal* , in quo cum belluis convenit ; sed addendum , *rationis particeps* : in quo ab illis discrepat. Sic triangulum non tantum est *figura* : sed *figura tribus lineis contenta*. Hæc autem pars specialior , quæ cum genere speciem constituit , *differentia* vocatur , de qua postmodum.

Hinc liquet genus continere *sub se* species , iisque posse attribui. Exempli gratiâ , animal continet sub se hominem , leonem , &c. ita ut illis attribui possit. Quod autem multa sub se continet , ut genus multas species , & species multa singularia , id totum *potentiale* , seu universale in Scholis vocatur , & à Latinis dicitur *omne* : partes vero sub eo contentæ ; v. g. species respectu generis ; & singularia respectu speciei , dicuntur *partes subjectivæ* , sive *inferiora*.

Species.

S P E C I E S est *attributum* , quod multis individuis , sive singularibus convenit , ad questionem factam quid res est , tanquam tota rei essentia. Verbi causâ , homo est attributum quod Socrati , Platoni , Aristoteli , & cæteris singularibus seu individuis convenit , tanquam tota eorum essentia. Si

enim quærat^{ur} quid sit Aristoteles? respondendum, esse hominem, id est, compositum quoddam ex mente & corpore physicè conjunctis: sive, ut vulgatam definitionem adhibeamus, *animal rationis particeps*: in quo tota illius essentia continetur.

Itaque si genus continet *sub se* speciem, quatenus nimirum ei attribui potest, ac respectu illius, est totum *potentiale*: vicissim species continet genus, non quidem *sub se*; sed *in se*: estque totum *actuale* respectu generis; & genus est pars illius actualis.

Ita quidem speciei nomen sumitur in Scholis Philosophicis ex Porphyrio. Quanquam existimant multi speciem universalem, quæ nempe *sub se* continet individua, generis potius, quàm speciei habere rationem: nam quidquid inferioribus *sub se* contentis convenit, iisque attribuitur, id *genus* esse intelligitur. Hinc Juris Interpretes *speciem* illam generalem, appellant *genus*; & individuum, *speciem*: v. g. hominem, equum, bovem dicunt esse genera; Aristotelem verò & Buccephalum vocant species. Unde individua vocare licet *species physicas*, hoc est, naturas quasdam completas, ex genere & differentia constantes; sed dici nequeunt *species logica* & universales, quæ à Jurisconsultis appellantur *genera*; quæque nihil aliud sunt, nisi ideæ quædam generales multis individuis communes.

Individuum, seu *singulare* dicitur, quod *sub specie contentum* dividi nequit in plura talia quale ipsum est. Ut Plato non potest in duos Platones secari, licet dividi possit in partes. Quare est *individuum*, seu singularis, non indivisibilis.

Differentia.

DIFFERENTIA generatim est *id*, quo

unum differt ab alio. Discrimen autem unius ab alio petitur, vel ab attributo essentiali & primario, quod *differentia essentialis & specifica* vocatur; vel ab attributo essentiali quidem, sed secundario, quod dicitur proprietas; vel denique ab aliquo accidentario. Unde triplex differentiarum ratio: prima dicitur essentialis; secunda propria; tertia accidentalis.

Differentia essentialis & specifica, de qua hinc agimus, definitur *attributum essentialis & primum*, quo una species ab alia sejungitur; sive quod respondetur ad questionem factam quale est quid essentialiter. Exempli causa, si quaeratur, *qualis sit homo essentialiter*, respondetur eum esse rationalem, quæ est differentia quæ à belluis specificè distinguitur. Nam primò quaeri potest quid sit homo, & respondetur esse *animal*, quod genus est tum ipsi, tum belluis commune. Deinde quaeri potest *quale animal*, & respondetur *rationale*, quæ est differentia, per quam à belluis essentialiter secernitur.

Differentia igitur specifica duos habet respectus; alterum quidem ad genus, quod dividit; alterum ad speciem, quam constituit. Sic *rationale & irrationale* dividunt *animal*: tum rationale constituit *hominem*; irrationale verò, *belluam*. Unde differentia specifica in Scholis dicitur *divisiva generis, & constitutiva speciei*.

Hinc liquet differentiam addere aliquid generi, sive positivum, sive negativum: ad dici posse *id quo species superat genus*, ut à Porphyrio describitur. Nam *rationale* v. g. aliquid addit positivum *animali*, estque id, quo homo animal superat: sed *irrationale* addit tantum negationem rationis in *bellua*; ita ut *animal* generatim non excludat rationem, sed *bellua* excludat: potest enim animal generatim esse vel rationale, vel rationis expers; sed bellua est animal ratione destitutum.

Observandum autem non unicam semper sufficere differentiam, ut una species ab alia secernatur, sed aliquando plures esse congerendas : ut *circulus* dicitur *figura plana & rotunda* : si enim tantum *rotunda* diceretur, minimè discreparet à *sphœra*, quæ etiam *rotunda* est : sed cum dicitur *plana & rotunda*, ab omnibus aliis figuris scernitur. In rebus physicis multò plures adhibendæ sunt differentiæ, ut videbimus : v. g. si quæratur quid sit aurum, definiendum erit metallum gravissimum, durissimum, quod in scorias, reliquorum metallorum more, non facessit ; quod Lydio lapide potest explorari, &c.

Proprium.

PROPRIUM meritò dicitur *attributum essentiale secundarium*, quod alicui speciei omni & soli semper convenit : ut *habere sermocinandi facultatem* est attributum hominis, non primum, quod nempe propriè & simpliciter *essentiale* vocatur, sed secundarium. Siquidem *habere sermocinandi facultatem* non primariò in idea completa hominis concipitur ; sed secundariò tantum, quatenus omni & soli humanæ speciei, & semper convenit.

Proprium tamen quatuor modis dicitur apud Porphyrium cap. 4. Isagoges. Primò, *Quod soli alicui speciei accidit, non omni* : ut soli homini accidit esse medicum, non omni. Secundò, *Quod omni speciei accidit, non soli* : ut omni homini convenit duos habere pedes, non soli ; cum id etiam avibus sit commune. Tertiò, *Quod omni & soli speciei convenit, sed non semper* : ut omni & soli homini convenit *canescere*, inquit Porphyrius, non quidem semper, at in senectute tantum. Quod quidem exemplum minùs ad rem appositum est ; cum alia etiam animalia præter hominem in se-

rectute canescant. Quartò , *Quod convenit omni & soli alicui speciei , & semper* : ut omni & soli homini , & semper convenit esse *risivum* , ut idem Porphyrius ait. Sed hoc exemplum nihilò convenientius est priore : nam quædam etiam animalia , ut simiæ , canes , &c. inconditos sonos edere , ut in risu fieri solet , & in ipsa facie habitum ridentium exhibere videntur.

Melius itaque dicitur *sermocinari seu colloqui actu* esse proprium tertio modo ; quod nempe omni & soli homini aliquando tantum , non semper convenit : *habere autem sermocinandi , seu colloquendi facultatem* esse proprium quarto modo , quod omni & soli homini , & semper convenit , tanquam attributum illius essentialia , non quidem primum , sed saltem secundarium : nam in hominis idea , si non primariò , certè secundariò continetur. *Hoc enim uno præstamus vel maximè feris , quòd colloquimur inter nos , & quòd exprimere dicendo sensa possumus* , inquit Cicero lib. i. de orat.

Accidens.

ACCIDENS definitur à Porphyrio cap. 5. *Ifagoges , id quod adest & abest sine subjecti , quod afficit , & cui inhaeret , corruptione* : v. g. figura rotunda potest adesse ceræ , aut ab ea abesse , sine illius corruptione. Cogitatio aliqua , putà perceptio , vel recordatio potest adesse menti ; aut ab ea abesse sine ipsius interitu. Corpus quidem consistere nequit sine aliqua figura generatim ; ut mens absque aliqua cogitatione stare posse non videtur : sed quemadmodum corpus sine hac vel illa figura , ita mens absque hac vel illa cogitatione rectè consistit.

Sunt tamen aliqua accidentia corporea , quæ non possunt , nisi per mentem , à suis subjectis se-

parari : cuiusmodi sunt candor respectu cycni ; nigredo respectu corvi , vel Æthiopis. Hæc autem accidentia, *qua inseparabilia* vocantur, in hæc à proprietate secernuntur , quòd non tantum separari queant per mentem à suis subjectis , sed etiam de iis negari ; proprium autem separari tantum possit , non negari. v. g. nigredo separari potest per mentem ab homine Æthiope , & de eo negari, salvâ illius essentiâ : quamvis enim nigredo ab eo abesset ; non tamen desineret esse homo. Sed sermocinandi vis , quæ est hominis proprietas , separari tantum potest ab homine per mentem , dum nempe homo sine huiusmodi facultate intelligitur ; sed non potest de eo negari , cum nullus sit homo cui sermocinandi facultas necessario conveniat. Quinetiam sunt quædam accidentia , quæ licet à corpore generatim per mentem separari possint, non possunt tamen à tali corpore , ne per mentem quidem , sejungi : cuiusmodi sunt mobilitas partium respectu flammæ ; candor respectu nivis , & alia id genus : tamque non sunt accidentia respectu talis corporis ; sed ad illius essentiam pertinent , ut videoimus in Physica.

Porro accidens non tantum dividitur in accidens separabile , & accidens inseparabile : sed etiam in extrinsecum & intrinsecum.

Extrinsecum illud est , quod extrinsecus subjectum denominat , & ideo in Scholis *denominatio externa* nominatur ; ut paries dicitur *visus* à visione, quæ est ipsi extrinseca ; homo dicitur *amatus* ab amore , qui ipsi extrinsecus est.

Intrinsecum illud dicitur , quod in ipsa re vel subjecto recipitur : illudque vel *Physicum* est , si subjectum physicè afficit , cuiusmodi sunt *recordatio, amor, &c.* respectu mentis ; certa magnitudo , motus , quies , situs & figura respectu corpo-

ris: vel est *Metaphysicum*, si subiectum denominat tantum, non philicè afficit, qualis est relatio, oppositio, &c.

Atque hinc tertia sequitur divisio accidentis in *absolutum*, quod pertinet ad subiectum aliquod absolutè spectatum, five quatenus *ab* omni alio *solutum* est; qualis est motus vel situs, respectu corporis; & in *relativum*, quod ad subiectum quoddam pertinet comparatè ad aliud, ut similitudo, æqualitas, &c. nam aliquid est simile alteri, æquale alteri, &c.

Neque id prætereundum, substantiam alteri circumpositam dici posse *accidentariam* respectu illius, non tamen accidens aut modum: v. g. vestis *accidentaria* est homini: nam ad illius naturam aut essentiam non pertinet; non tamen est modus hominis. Verùm status hominis vestiti dici potest illius modus: etenim diverso modo se habet cùm nudus est, & cùm vestibus est indutus.

Ex his omnibus constat accidens, aut modum esse *attributum aliquod universale*, quod multis subiectis contingenter convenire potest, non necessariò: ut rotunditas marmori, ligno, ceræ aliisque corporibus accidit contingenter, non necessariò: atque ita hoc attributum inrer universales ideas rectè est à Porphyrio recensitum.

CAPUT IV.

De claritate & distinctione idearum.

N I H I L majori studio in ideis quærit Logica, quàm claritatem & distinctionem, sine qua judicia nostra aut ratiocinationes cespitare omnino, ac titubare necesse est. Si enim obscu-

ras tantum, confusasque rerum ideas habuerimus, quomodo à falsis judiciis cavere poterimus, hoc est, à jungendis simul dissentaneis ideis, & iis, quæ consentaneæ sunt, separandis? quapropter omni curâ & diligentia ideæ claræ & distinctæ ab obscuris & confusis sunt secerndæ.

Ideam *claram* appellant Philosophi cum Cartesio primâ parte principiorum, num. 45. eam *qua lucet per se se, ac solâ mentis attentione innotescit*: quales sunt idea entis generatim, præcipuorumque illius attributorum; idea extensionis, &c. *distinctam* verò nominant, *qua quidpiam ab omnibus aliis ita sejunctum exhibet, ut minimè cum iis confundi possit*. Nam aliqua secundum eundem Cartesium, potest esse idea clara, quæ tamen non sit distincta: ut idea caloris (secundum Cartesium loquor) quam quis habet, dum uritur, clara est & vivida; non tamen est distincta: cum sæpè contingat, ut calor, qui percipitur, cum eo qui flammæ inest confundatur; cum tamen uterque calor sit prorsus absimilis. Sed idea extensionis dicitur distincta, quoniam extensionem ab omnibus planè vel rebus vel modis ita secernit, ut minimè cum iis confundi possit.

Diversa ratione idea *obscura* dici potest ea, *qua menti attendenti non statim liquido apparet*: ut idea modi, quo corpus & mens inter se in homine junguntur, non statim menti nostræ conspicua est: nam non statim percipimus quo pacto fieri possit, ut occasione motuum corporis humani, quædam in mente cogitationes excitentur; & vicissim aliquas mentis cogitationes certi corporis motus excipiant. Hanc tamen conjunctionem Deo possibilem fuisse facilè intelligimus, & ab eo factam esse experientia quotidiana comperimus.

Confusa demum idea dicitur , , *que multa simul permiscet* : cujusmodi sunt ideæ qualitatuum sensibilium, si modò ideæ possint appellari ; putà ideæ , seu potius perceptiones caloris & frigoris , cùm eas qualitates omnino similes in subjectis sensibilibus , ut in nobis putamus esse , quamvis utrobique sint planè dissimiles.

Hæc quidem videtur esse mens Cartesii. Sed qui præcipuam inter Cartesianos adepti sunt gloriam, ii duplicem percipiendi rationem distinguendam volunt : scilicet *per ideam* , & *per sensum intimum*, seu *conscientiam*. Mens nostra , inquiunt , per ideam cognoscit , quæcunque clarè & distinctè ipsi exhibentur : quâ ratione cognoscit Deum , quatenus ipsi præsens est , ipsamque illuminat ; extensionem generatim , & illius affectiones , putà figuram , motum , &c. At per sensum duntaxat intimum ac confusum, & se & suas modificationes, putà suum dolorem , suum gaudium, &c. percipit. Etenim ignorat , aut certè clarè non videt , quo pacto in seipsa disponi debeat , ut hoc vel illo modo , putà dolore vel gaudio afficiatur : sed tantùm intimo sensu sibi conscia est se dolere , gaudere , &c.

Quamobrem omnis idea clara , juxta hanc sententiam , est distincta ; nulla confusa , aut obscura : claritas enim omni ideæ convenit , & oritur ab illius distinctione : obscuritas verò in sensu confuso reperitur.

Aliis tamen magno quoque ingenio viris , & Cartesianæ Philosophiæ amantissimis mens nostra claram, & distinctam sui ipsius , suarumque affectionum ideam aut perceptionem habere videtur , dummodo nihil extraneum iis admisceat. Sic dum percipitur calor , perceptio formalis , inquiunt , seu sensio vel sensatio caloris clara est ; quoniam est distincta , & ab omnibus aliis sensationibus se-

creta : perceptio verò objectiva potest esse obscura. Nam cum quidpiam in igne concipitur ejusdem rationis atque in sensu nostro , id obscurum est : ideò verò obscurum , quia confusum. De iis omnibus expressius in Metaphysica.

Interim quærendum nobis hoc loco , quænam ideæ sint distinctæ ; quænam confusæ : nam quæ distinctæ, eadem sunt claræ ; quæ confusæ obscuræ. Quod quidem exemplis facilius , quàm aliâ quâvis ratione consequi possumus.

Itaque recensendæ sunt ideæ , quæ claræ & distinctæ ab omnibus meritò habentur : tum quædam ex confusis proferendæ , ut satis accuratè præstitisse videtur Cartesius prima parte principiorum , num. 48. & sequentibus.

Primò igitur , Idea quam mens habet sui ipsius tanquam substantiæ cogitantis, clara & distincta videtur Cartesio , contra ac sentit Auctor operis *de Inquisitione veritatis* lib. 3. cap. 1. & alibi. Item idea omnium cogitationis specierum , putà perceptionis, judicii , ratiocinationis , desiderii , amoris , &c. eidem Cartesio clara est & distincta. Similiter extensionem , seu corpus generatim , tanquam substantiam naturaliter extensam ; ipsiusque affectiones , magnitudinem , motum , quietem , situm & figuram , nemo est qui clarè ac distinctè non percipiat.

Insuper ens generatim , essentiam , existentiam , durationem , ordinem , relationem , proportionem , numerum , & cætera tum *entis* , tum *modi entis* attributa generalia clarè ac distinctè novimus : dummodò durationem , seu tempus ; ordinem , relationem , & numerum à rebus ipsis , quasi quædam entia , vel entitates , non secernamus : duratio quippe nihil aliud est , quàm res ipsa , quæ permanet & durat. Idem de aliis est cogitandum.

Quin etiam Dei notio , licèt imperfecta , clara

est & distincta, cum eum cognoscimus tanquam *Ens summè perfectum*: nam in ista notione, ea continentur attributa, quæ soli Deo, non aliis possunt convenire: nempe esse *infinitum*, *æternum*, *omnipotens*, & alia quibus Deus clarè & distinctè percipi potest, non tamen perfectè cognosci, aut comprehendere: quia infinitas Dei perfectiones mens, quæ finita est, comprehendere nequit.

Aliud est igitur, *clarè & distinctè percipere*, aliud *perfectè cognoscere*, seu *comprehendere*. Tum quidpiam clarè & distinctè percipitur, cum illius notio ea continet attributa, quæ illi soli conveniunt, & ad ipsum cognoscendum sufficiunt. Exempli causâ, clarè distinctèque percipitur triangulum, cum intelligitur esse figura tribus lineis clausa, licet omnes trianguli proprietates in ista notione clarè & distinctè non cernantur: v. g. non cernitur æqualitas ipsius angulorum duobus rectis, nec aliæ proprietates, quas Geometræ persequuntur. Tum verò aliquid perfectè cognoscitur, & comprehenditur, cum tantum cognoscitur, quantum cognosci potest: quo sensu solus Deus seipsum novit: nam solus infinitas suas perfectiones infinito suo intellectu sic percipit, ut nulla ipsum lateat.

Non solum autem hæ, & aliæ hujusmodi nobis insunt ideæ distinctæ: sed earum etiam inter se relationes clarè percipimus: ita ut alias aliis consentaneas, alias dissentaneas, mediocri attentione cognoscamus. Hæcque est communis regula affirmationis & negationis, seu judiciorum omnium, *ut quicquid clarè ac distinctè percipimus in rei alicujus idea contineri, id de ea re affirmemus*, v. g. *eum omnem qui cogitat, existere; impossibile esse ut aliquid simul sit, & non sit; nihili nullam esse vim; & cætera hujusmodi pronunciata*, quorum evidentia per se lucet: unde *communes sententia, primæ notiones*

notiones, & *axiomata* vocantur. Horum quidem numerum definire difficillimum est, sed præcipua referemus primâ parte Metaphysices, cap. 4.

Quod spectat ad ideas confusas & obscuras, in earum præcipuè censum referuntur à Cartesio ideæ (sic enim eas appellat) qualitatum sensibilibum, coloris, soni, odoris, saporis, caloris, frigoris, gravitatis, & aliarum hujusmodi qualitatum, quas vulgus tales omnino rebus inesse existimat, qualis earum in nobis perceptio, aut sensatio excitatur; cùm tamen diversa omnino sit coloris, v. g. soni, & aliarum qualitatum in objectis, ac in sensibus nostris ratio: ut in Physica demonstrabitur.

Præterea varii appetitus, quos in nobis experimur, ut fames, sitis, nausea, & si quæ sint hujusmodi; tum varii doloris, vel titillationis sensus; ea demum ferè omnia, quæ in organis corporeis excitantur, seu per sensuum duntaxat ministerium percipiuntur, obscure admodum & confusè cognosci solent, multosque in errores inducunt.

Quòd enim calor, v. g. tum in igne, tum in sensibus nostris, omnino similis à vulgari plebe concipitur, id in causa fuit, cur multi etiam è Philosophorum familia, qualitates illas veluti quasdam *entitates*, seu *entia* tenuissima rebus in hærentia commenti sint. Præ cæteris autem accusantur Arabes Aristotelis Interpretes, quasi hujusmodi fictitiarum entitatum inventores, aut patroni: cùm nullæ tamen sint qualitates corporeæ, quæ ad magnitudinem, figuram, motum, quietem; ac situm partium non possint revocari.

Magnitudo autem, figura, motus, quies, & situs partium, saltem quatuor posteriores, non sunt *entitates* aliquæ; sed ipsius corporis, seu substantiæ corporeæ modi: quemadmodum va-

riæ cogitationum species , modi sunt mentis.

Modi enim nomine intelligunt vulgò qualitatem aliquam , vel attributum , cujus natura in eo solo consistit , quòd subjectum aliquod , seu substantiam afficiat , sine qua naturaliter existere non pòtest. Quare licèt concipi possit modus sine subjecto , non tamen concipi potest sine quadam relatione ad subjectum : v. g. rotunditas est modus aliquis corporis : nam corpus certâ ratione afficit , nec potest sine corpore naturaliter subsistere. Unde licèt rotunditas spectari possit sine determinato aliquo subjecto : non potest tamen sine quodam ad subjectum aliquod generatim quodcumque sit, ordine intelligi. Idem de quavis figura , de modo , seu mensura magnitudinis , de motu, de quiete, de situ partium est sentiendum.

Substantia verò, sive spiritalis sit, sive corporea, *per se* subsistere intelligitur , seu non egere aliâ substantiâ creatâ , cui inhæreat , ut mox in categoriis est exponendum. Nam ad claritatem & distinctionem idearum institutæ sunt categoriæ , ne scilicet *ens* cum *modo entis* mens confunderet ; vel res spirituales imaginari ; vel rebus corporeis affectus spirituales, ut in Physica satis obvium est , perperam tribuere vellet. Cùmque duplex sit categoriarum typus , Aristotelis videlicet, & aliorum Philosophorum , præsertim recentiorum , utrumque breviter exponendum putamus. Sit igitur.



CAPUT V.

De Categoriis tum Aristotelis , tum aliorum
Philosophorum.

CATEGORIÆ nomen attributionem , aut predicationem , sive , ut vertit Boëtius, *pradicamentum* significat. Unde vulgò definiuntur Categoriæ, *suprema quadam genera, seu classes, aut capita, in quibus omnia substantia singularis attributa, seu predicata continentur, & ad quæ proinde, quæcumque mente concipi, aut verbis exprimi possunt, referuntur.*

Aristotelis Categoria.

QUICQUID autem in mente concipitur, si fides adhibeatur Aristoteli (nam Aristotelem libri categoriarum ipsius nomine inscripti, auctorem cum pluribus agnoscimus : licet aliqui hoc ipsum in dubium revocent ; eumque librum Archytæ Tarentino , aut alii vetustiori attribuant) vel substantia est, vel quantitas, vel qualitas, vel relatio, vel actio, vel passio, aut ubi, aut quando, aut situs, vel habitus : adeoque decem omnino sunt categoriæ, quæ hoc disticho solent includi.

Arbor sex servos ardore refrigerat ustos :

Ruri cras stabo ; sed tunicatus ero.

Arbor significat substantiam : *sex, quantitatem* : *servos relationem* : nam servus ad herum refertur. *Ardore* denotat qualitatem : nam si quærat^r qualis, v. g. sit sol, vel ignis ? respondetur, ardens. *Refrigerat* est actio : *ustos, passio* : *ruri, ubi* : *cras, quando* : *stabo, situs* : *tunicatus, habitus.*

D ij

Substantia.

SUBSTANTIA est *ens per se subsistens*, ea-que vel corporea est, vel incorporea. Corporea constituit corpus; incorporea repugnat corpori. Tum corpus vel animatum est, vel inanimatum, &c. ut videri potest tabulâ primâ, in eo schemate, quod vulgò *Arboris Porphyriana* nomine designatur. Quanquam in eo schemate nonnulla Porphyrii doctrinæ adjecta sunt à Scholasticis, nonnulla etiam detracta. Incipiunt enim ab *ente*, quod vel est *per se subsistens*, & constituit substantiam; vel *in alio inharens*, & repugnat substantiæ, sive est accidens, &c. Porphyrius verò cap. 2. Isagoges, incipit seriem categoricam à substantia, quam solam propriè *ens* esse existimat post Aristotelem: nam uterque negat ens esse univocum, seu synonymum respectu substantiæ & accidentium. Deinde addit Porphyrius in fine, seu infima parte suæ arboris, *animal rationale* vel esse *immortale*, quod est Deus; vel esse *mortale*, quod est homo: idque meritò subductum est à Scholasticis.

Utrumque illud sit, tres in eo schemate occurrunt lineæ, seu columnæ. Prima est media, quæ *directa* dicitur, in qua genera, species & individua continentur: scilicet ens, substantia, corpus, vivens, animal, homo, Petrus, Paulus, &c. Dux aliæ utrimque positæ, dicuntur *collaterales* & *indirectæ*; in quibus collocantur differentiæ: putà *per se subsistens*, *in alio inharens*; *corporea*, *incorporea*, &c.

In linea directâ ad verticem occurrit genus supremum, sive, ut aiunt, *generalissimum*, quod scilicet nullum aliud agnoscit supra se genus, nempe *ens*. In ima verò parte est species infima, quæ nimirum nullam habet sub se speciem; seu

cui immediatè subjiciuntur individua , scilicet *homo* , cui subjacent Petrus , Paulus , &c. Intra genus supremum , & speciem infimam , intersunt genera subalterna , seu species subalternæ , quæ nimirum sub uno respectu sunt genera , sub altero species : v. g. corpus respectu *entis* aut *substantia* , quæ sunt illius *superiora* , est species ; sed respectu *viventis* , aut *animalis* , quæ sunt ipsius *inferiora* , est genus. Addam *animal* esse genus proximum respectu *hominis* ; *vivens* verò , vel *corpus* esse genus remotum : quæ omnia neminem possunt morari.

In lineis itidem collateralibus , alia est differentia *superior* , quæ nempe superiori loco ; alia *inferior* , quæ loco inferiori collocatur : alia est *generica* , quæ constituit genus , ut *sensitivum* constituit animal ; alia *specificæ* , quæ constituit speciem , ut *rationale* constituit hominem.

His quæ ad naturam entis , seu substantiæ spectant , constitutis , sex substantiæ proprietates recenset Aristoteles , quarum præcipuæ sunt hæ duæ.

Substantia non suscipit magis & minus , seu nomen substantivum , ut Grammatici aiunt , non habet comparativum , aut superlativum gradum : v. g. non potest dici *homo* , *magis homo* , & *maximè homo* ; sed tantum dici potest *major* , & *maximus* homo. Sic *Goliath* non erat magis homo , quàm *David* , sed tantum major ; nec *David* erat minus homo , quàm *Goliath* , sed minor.

Deinde *substantia* , propriè & ratione sui , nempe quatenus est substantia , non est alteri substantia contraria , sed tantum ratione suarum qualitatum , aut accidentium , id est , quatenus est talis substantia : ut aqua dicitur igni contraria ratione suarum qualitatum , non ratione sui.

Reliquas proprietates , quas Aristoteles substantiæ tribuit , præmitto ; cum nihil quemquam doceant , nec ullius aliundè sint usûs.

D iij

Quantitas.

QUANTITAS est *mensura substantia*, seu *modus magnitudinis*, sive id quod responderetur ad quæstionem factam, quanta, vel quotuplex sit res. Pro ipsa tamen magnitudine vulgò sumitur: ac dividi solet in *continuum*, cujus partes sunt conjunctæ, quæ est *extensio*; & in *discretam* cujus partes sunt sejunctæ, quæ est *numerus*, seu multitudo. Addit Aristoteles orationem: sed cur oratio ad quantitatem discretam pertineat, non satis liquet.

Rursus *continua* tribui solet in *successivam* & *permanentem*. Successivam vocant, cujus partes sunt in perpetuo fluxu; eaque spectatur tum in *motu*, tum in *tempore*: imò tempus & motus inter species quantitatis recensentur ab Aristotele, licet forrè, minùs aptè.

Motus enim est potiùs *qualitas*, quàm *quantitas*, cum denomet corpus *quale*, non *quantum*. Deinde motus ipse suam habet quantitatem à *velocitate*, & *mole corporis* petitam, ut in *Physicis* ostendemus: adeoque minus rectè dicitur *quantitas*.

Tempus verò nihil aliud est quàm rerum *duratio*, quæ non est *modus*, aut *entitas successiva* à rebus ipsis distincta; sed res ipsæ, quatenus & fuerunt, & sunt, & futuræ sunt. Unde licet in *duratione* per mentem abstracta distinguantur *præteritum*, *præsens*, & *futurum*: ea tamen nihil aliud sunt nisi res, quatenus extiterunt, existunt, & futuræ sunt.

Quamobrem, si temporis, seu *durationis* *quantitas* spectetur prout à *subjecto*, seu re durante distincta, ad *imaginationem* potiùs, quàm ad rem pertinet. Huc adde quòd tempus non sit *mensura*,

seu numerus, aut quantitas motus, ut censuit Aristoteles; sed potius motus sit temporis mensura, ut in *Physicis* demonstrabimus.

Quantitas, sive extensio *permanens*, est ea cujus partes simul, non successivè existunt: & triplex est, scilicet, *linea*, *superficies* & *solidum*. Additur *locus* ab Aristotele: sed si de loco externo agatur, ad superficiem revocandus est; si de loco interno, ad solidum pertinet, ut ex dicendis in *Physica* constabit.

Linea est *extensio in longum tantum*: non quòd exeat aliqua longitudo sine latitudine, & profunditate; sed quòd spectari possit longitudo corporis absque illius latitudine, & profunditate: ut metiri quis potest altitudinem turris alicujus, nullâ habitâ ratione ipsius latitudinis, aut profunditatis.

Superficies est *extensio in longum, & latum tantum*: nam spectari potest longitudo, & latitudo corporis, separatim à profunditate, ut agri mensor longitudinem & latitudinem agri considerat; profunditatem negligit.

Solidum est *extensio in longum, latum, & profundum*, nullâ habitâ ratione qualitaturn *physicarum*, & *sensibilium*, quæ corpori insunt: ut cùm quis dolij capacitatem metitur, nullâ habitâ ratione *materiæ sensibilis* in eo contentæ; ita ut minimè curet an aëre, an aqua, an oleo, vel vino sit plenum.

Qualitas.

QUALITAS id omne suo ambitu continet, quod respondetur ad questionem factam qualis si res: sive est id *quo* res quælibet est talis aut essentialiter aut accidentariò. Verbi causâ mens dicitur spiritalis per spiritalitatem; nix alba per albe-

dinem. *Spiritualitas* verò & *albedo*, sunt tales per se ; non verò per alias formas , seu qualitates : quia nempe *quod est tale ut Q U O , non eget alio Q U O fiat tale* , ut in Scholis dicitur. Itaque qualitas non tantum omnia accidentia , seu modos , nisi fortè Quantitatem exceperis , complectitur : sed ad essentiam quoque rei spectat. Nam si quærat, v. g. qualis sit Deus ? responderetur omnipotens , necessariò existens , &c. Si quærat qualis sit homo ? responderetur rationis particeps ; qualis circulus ? rotundus : quæ sunt attributa Deo , homini , & circulo essentialia.

Hic autem ab Aristotele sumitur , quatenus aliquid rei accidentarium significat : eâque ratione continet in se *relationem, actionem, passionem, situm, motum* , & si qui sint alii id genus modi. Cur ergo spectatur in Categoria ab iis distincta ? nempe quia sic statuit Aristoteles , à quo ipsa in quatuor species bimembres distribuitur : scilicet in *habitu* & *dispositionem* : *naturalem potentiam* , & *impotentiam* : *patibilem qualitatem* , & *passionem* ; *formam* , & *figuram*.

Habitus est *facilitas quadam seu propensio ad aliquid agendum* , usu & exercitatione comparata : unde illud effatum , *habitus est altera natura*. In motu autem , situ & aliis affectionibus corporeis consistere habitus naturales , alibi constabit. Si habitus parum sit confirmatus , vocatur ab Aristotele *dispositio*.

Naturalis potentia est *vis à natura rebus insita ad agendum , vel patiendum* , v. g. ad intelligendum & volendum. Unde alia est potentia *activa* , ut voluntas ; alia *passiva* , ut intellectus creatus. Si potentia fuerit infirma , ab eodem Aristotele dicitur *impotentia*, id est, *imbecillitas* : ut visus , quoniam in juvene vegetus est , vocatur potentia ; quia verò debilior est in sene , *impotentia* secun-

dùm ipsum debet appellari , id est , minor potentia seu imbecillitas.

Patibilis qualitas est *dispositio in re qualibet posita* , *qua sensum aliquem potest afficere* : cuiusmodi sunt dulcedo in melle , calor in igne , &c. Passio verò hoc loco est *affectio* , *aut dispositio* , cità transiens , *quam patibilis qualitas in nobis efficit* : cuiusmodi sunt dolor ex ictu , pallor ex metu , rubor ex pudore.

Figura est *externus corporis terminus*. In hoc à Boëtio & Scholasticis distingui dicitur à forma , quòd *figura* ad res artificiales pertineat , v. g. ad pileum & cathedram ; *forma* verò ad naturales , putà ad hominem , arborem , &c. Sed cavendum ne discrimen istud perperam ac ridiculè adhibeatur : cùm sæpè figura de rebus naturalibus , forma de artefactis dicatur. Itaque habenda est usûs ratio , & cum peritis loquendum ; ac modò formæ , modò figuræ nomine cum cæteris utendum.

Relatio , actio , passio , &c.

RELATIONIS nomen omnibus adeo notum est , ut non possit nisi per aliquod synonymum explicari : nempe dicitur *ordo* , vel *respectus unius ad aliud*. Nullum verò est *ens* neque *modus entis* , in quo non sit , aut esse possit aliquis ordo , vel respectus ad aliquid aliud. Quare *relatio* est potius *terminus transcendens* , quàm categoria quædam à cæteris distincta , ut primâ Parte Metaphysices cap. 2. ostendere conabimur.

Actio & passio clarioribus terminis , explicari vix possunt. Definitur tamen actio in Scholis , *actus agentis quatenus est agens* : passio, *actus agentis in patiente receptus* : ut calefactio respectu ignis calefacientis , dicitur *actio* , & respectu manus calefactæ , *passio* : quæ passio in hoc discrepat ab æ-

quam inter species qualitatis tertio loco recenset Aristoteles, quod illa citò transeat, hæc diutius daret.

Ubi est relatio rei locata ad locum. Quando est relatio rei durantis ad tempus : non verò sunt modi physici à rebus locatis & durantibus distincti.

Situs est dispositio partium corporis, ut *jacere*, *stare*, &c.

Habitus est *corpus quoddam alteri corpori circumpositum* ; ut toga, pileus, calceus, omniaque vestimenta aut ornamenta. Unde habitus inter accidentia physica accensendus non est, sed inter substantias, licet accidentarius dici possit respectu hominis, quoniam ad illius essentiam non pertinet, ut antea diximus, ubi de accidente.

Categoria Recentiorum.

RECENTIORES Philosophi, ii præsertim, qui Platonis doctrinam nostris temporibus denuò exsuscitavunt, septem vulgò categorias agnoscunt, his duobus versiculis comprehensas.

*Mens, mensura, quies, motus, positura, figura,
Sunt cum materia cunctarum exordia rerum.*

Nam, inquiunt, quicquid animo percipimus, id vel est *ens*, vel *modus*, seu qualitas, aut affectio entis : quæ sunt duo suprema genera, aut supremæ categoriæ.

Series entium.

ENS autem, five res, five substantia (nam hæc tria idem omnino apud ipsos significant) vel est res cogitans, & dicitur mens, seu spiritus; vel est res extensa, & corpus vocatur.

Rursus spiritus, vel est summè perfectus, & proinde increatus, & est Deus. (si tamen Deus

cum reliquis spiritibus vel entibus recenseri possit ; cum non minùs differat à cæteris entibus , quàm homo ab umbra hominis , ut alibi dicemus) vel est creatus , nec summè perfectus : tumque aut corpori non est destinatus , & est Angelus ; aut corpori destinatus est , & est mens humana : quæ vel non est juncta corpori , ut anima post mortem ; vel juncta est corpori , & hominem constituit.

Idem corpus vel vitæ expers est , ut cælum & elementa ; vel est vitâ præditum : quod iterum , vel progrediendi vim non habet , ut planta ; vel progrediendi vim habet , ut animal. Animal autem vel ratione destitutum est , & dicitur bellua ; vel rationis est particeps , & efficit hominem.

Quæ omnia digessimus *Tabulâ 2.* in novâ figurâ seu arbore seriem entium exhibente. In qua id observare licet, quod in Arbore Porphyriana minimè expressum est, scilicet utramque naturam, & spiritalem, & corpoream ad hominem , tanquam ad aliquod medium, quod ex utraquæ natura constat, terminari ; nec ullum propriè genus esse proximum respectu hominis, sed ipsum definiri debere, *substantiam constantem ex corpore & mente physicè copulatam*, id est , eâ lege, ut mentis cogitationes & motus corporis sibi mutuò occasionem præbeant. Cum dicitur *constans ex corpore* , assignatur illius differentia ab Angelis ; cum additur *ex mente* , discrimen ipsius à corporibus stabilitur. Nam cum *corpus* dicitur esse illius genus , id quidem concedi potest, si comparetur cum reliquis corporibus ; sed per hoc ipsum à spiritibus discrepat. Vicissim , si *mens* appelletur , id ipsi cum spiritibus commune est ; sed per hoc differt à rebus planè corporeis. Unde nullum ipsi genus propriè attribui potest præter *substantiam* , quâ cum omnibus omnino entibus convenit. Nulla quoque ei assi-

gnari potest differentia completa, quâ ab omnibus prorsus entibus tum corporeis, tum spiritalibus fecernatur, nisi utramque naturam tum spiritallem, tum corpoream participare affirmetur: ut optimè Tullius lib. 5. de finibus bonorum & malorum, *Perspicuum est*, inquit, *hominem ex corpore animoque constare, cum prima sint animi partes, secunda corporis.*

In hoc igitur Porphyrius à Platonico reprehenderetur, non tantum quod nullam rerum spiritalium in suo *schemate*, seu arbore mentionem faciat; ac differentias ex una tantum parte positivas, ex altera verò negativas & indeterminatas afferat, cujusmodi sunt *incorporeum*, *insensitivum*, &c. verum etiam maxime, quod hominem sub corpore, tanquam sub genere collocet; cum perinde contineri possit sub mente, nec minori jure dicatur mens, quàm corpus. Hinc est quod Socrates apud Platonem in *Alcibiade primo*, hominem dicat, *nihil aliud quàm animum esse qui corpore utitur.* Ex quo loco Cicero lib. 1. Tusculan. Quæst. hæc ait: *Est illud quidem vel maximum animo ipso animum videre.* Et nimirum hanc habet vim præceptum Apollinis, quo monet ut se quisque noscat. Non enim, credo, id præcipit, ut membra nostra, aut staturam, figuramve noscamus: neque nos corpora sumus, neque ego tibi dicens hoc corpori tuo dico. Cum igitur, nosce te, dicit: hoc discit, nosce animum tuum; nam corpus quidem quasi vas est, aut aliquod animi receptaculum: ab animo tuo quicquid agitur, id agitur à te. & lib. 6. de Republ. scilicet in summo Scipionis. Tu verò enitere, & sic habeto, te non esse mortalem, sed corpus hoc: nec enim is es, quem forma ista declarat: sed mens cujusque, is est quisque; non ea figura, qua digito demonstrari potest. Quod autem aiunt Plato & Cicero corpus esse vas animi, non abhorret ab Apostoli

Sententia. Ep. 1. ad Thessal. cap. 4. v. 4. testificantis, hanc esse voluntatem Dei, *ut sciat unusquisque vas suum possidere in sanctificatione & honore.*

Series modorum.

Jam quod ad modos attinet, ii similiter vel spirituales sunt, vel corporei: illi ad substantiam spiritalem, hi ad corpoream referuntur.

Modi substantiæ spiritualis sunt variæ cogitationum species, puræ variæ perceptiones, vel sensationes intimæ intellectûs; & variæ inclinationes voluntatis, ut amor, odium, &c.

Modi corporis sunt quintuplicis generis, scilicet quantitas seu determinata magnitudo, figura, motus, quies, & situs partium.

Primò, quantitas, seu determinata magnitudo corporis, est modus seu mensura ipsius substantiæ corporeæ: quia remanente eadem illius specie, aut naturâ, mutari potest quantitas, sive magnitudinis modus: v. g. eadem aquæ natura remanet, sive spectetur in oceano, sive in palude, aut in stagno, aut in exiguo vase.

Secundò, figura, sive exterior corporis terminus variari potest, salvâ & incolumi remanente rei essentiâ, ut patet in cera, quæ sine essentiali mutatione varias induere potest figuras. Intima tamen tenuissimarum corporis particularum dispositio, quæ *configuratio* dicitur, ad corporum naturam, seu statum naturalem spectat: v. g. cera naturaliter quamdam requirit intimam particularum configurationem, ut ceræ speciem tueatur.

Tertiò, motus, seu translatio corporis à loco in locum, est accidens, aut modus corporis, sine quo remanere potest corpus. Est tamen aliquis motus certis quibusdam corporibus essentialis, v. g. igni: nam ignis sine partium motu esse non potest.

Quartò , quies , sive corporis permansio in eodem loco, est corpori accidentalis : quia corpus, quod quiescit, potest ad motum excitari.

Quintò denique , situs aliquis partium est corpori accidentarius , ut accidentarium est animali jacere , stare , &c. Nihilominus tenuissimarum particularum situs, aut textura , sive intima dispositio essentialis est certo & determinato corpori : v. g. certus partium situs requiritur in cera ut cera sit , & ab aliis corporibus secernatur : si enim in fumum solvatur cera , jam non amplius cera futura est, sed aliquid aliud.

His categoriis tanquam supremis generibus, includi aiunt recentiores Philosophi, juxta doctrinam Platonis, quicquid mente concipi potest, sive sit ens , sive modus entis. Entia enim spiritalia, sive res spirituales continentur sub spiritu ; res corporeæ sub corpore , & inter se vel specie , vel si mavis genere (nam species subalternæ , cujusmodi sunt spiritus & corpus , dici etiam possunt genera subalterna) dirimuntur. Item modi spirituales , nempe cogitationes , à modis corporeis scilicet à magnitudine, figura , motu , &c. genere differunt. Figura quoque diversum est genus à motu, motus à quiete , &c. Sed quæ sub eodem genere proximo continentur , & per differentias específicas constituuntur, specie inter se distinguuntur, ut circulus & triangulum. Quanquam diversæ adhuc sunt triangulorum species, ut alibi dicemus.

Cùm verò difficillimum sit in rebus physicis invenire attributum specificum , quo una res specie ab alia secernatur ; ea in physicis , *specie differre dicenda sunt , in quibus insignis apparet differentia comparatè ad scientiam naturalem* : ita ut, quod de uno probatum fuit , non continuò alteri attribui possit : v. g. difficile dictu est , quænam propriè sit partium configuratio , quæ lignum à ferro &

lapide discriminat : sed tanta tamen in iis apparet diversitas , ut quod de uno affirmatum est , non continuo alteri convenire videatur. Etenim ferrum ductile est, non lignum : item lignum inflammabile est , non lapis. Itaque ferrum , lapis , & lignum specie diversa pronuntiari possunt.

Non autem *specie infimâ* , sed *specie subalternâ* differunt , cum multæ sint ferri , ligni , & lapidis species : unde rectè quoque , imò rectius dici possunt *genere subalterno* discrepare. Neque adeo mirum est , si quæ specie secerni à quibusdam dicuntur in physicis , ea ab aliis genere distingui perhibeantur : nam id sæpè ex variâ quâ spectantur ratione pendet , ut multis exemplis intelligi poterit in Physica.

CAPUT VI.

De idearum signis.

SIGNUM , quatenus tale est , ad relationem spectinet : est enim rei *signata signum*. Quamobrem definitur à sancto Augustino lib.2. de Doctrina Christiana , num.1. aliàs cap.1. *res præter speciem , quam ingerit sensibus , aliud aliquid ex se faciens in cogitationem venire*. Ideoque si cum re significata consentiat , verum dicitur , secùs , est falsum. Veritas enim signi est illius convenientia cum re significata ; ut falsitas est illius discrepancia à re quam significat.

Duplicis autem generis distingui solet signum : alterum physicum , sive naturale ; alterum theticum , sive positivum , sive arbitrarium.

Signum naturale illud dicitur , quod naturaliter quidpiam significat : ut lamentatio dolorem

denotat. Signum arbitrarium illud est, quod significat aliquid ex hominum duntaxat instituto, ut hedera ad fores appensa, vinum venale denotat: vel, ut exemplum argumento, quod tractamus, accommodatius adhibeatur, voces, sive scriptæ, sive ore prolatae, cogitationes nostras, & res ipsas ex instituto significant.

Equidem vocis nomen generatim sumptum juxta mentem Aristotelis libro secundo de anima cap.8. significat *sonum ex animalis ore prodeuntem, & per appulsionem aëris è pulmonibus in fauces incurrentis, & allisi formatum*. Sed vox hoc loco specialiter sumitur pro vocabulo, seu dictione, quæ ab homine solo ad significandam cogitationem profertur. Unde definiri solet in Scholis *sonus articulatus ab homine prolatus, ad exprimendas animi cogitationes institutus*. Dicitur *sonus articulatus*: id est, per syllabas, quasi per articulos distinctus; ut à confusis animalium vocibus, v. g. mugituum, balatu ovium, latratu canum, &c. distinguatur. Additur *ad exprimendas animi cogitationes institutus*: ut à vocibus psittacorum, vel picarum temerè vocabula, seu dictiones effundentium secernatur.

Octo dictionum, seu vocabulorum genera distinguunt Grammatici, quibus humana locutio, seu sermocinatio continetur; scilicet, nomen, pronomen, verbum, participium, adverbium, præpositionem, conjunctionem, interjectionem. Sed præsertim nomen & verbum cogitationes nostras; nomen quidem, perceptiones; verbum verò judicia exprimunt.

Nomen igitur est *dicti instituta ad exprimendas ideas*, seu idearum objecta: cujusmodi sunt, *Deus, Angelus, Calum, &c.* Nominis loco sæpè usurpatur pronomen, ut *ego, tu, &c.* quod etiam ideam significat. Idem de participio, quod

nempe verum est nomen, ut *amans*, *amatus* : idem pariter de *adverbio* sentiendum. Nam, v.g. hoc adverbium *prudenter*, significat cum prudentia ; *sobriè*, cum sobrietate, &c.

Definitur nomen ab Aristotele lib. de Interpret. cap.2. *Vox ex instituto significans sine tempore* : v. g. hæc nomina *Deus*, *Angelus*, *homo* significant *ex hominum instituto* ; non *naturaliter* : cum non eadem sint apud quaslibet nationes aut populos voces. Deinde nullum denotant tempus adjectum, ut clarum est. Verum hæc Aristotelis definitio non convenit participiis, quæ tamen cum affirmationem minimè significant, vera censeri debent nomina, ut diximus. Etenim aliud est participium præsentis temporis, ut *amans* ; aliud præteriti, ut *amatus* ; aliud futuri, ut *amaturus*.

Verbum est *vocabulum ad exprimenda judicia, sive ad significandam affirmationem primariò institutum*, ut *amo*, *video*. Dico primariò institutum : nam cum verbum varios habeat modos, in solo *indicativo* propriè affirmationem seu iudicium exprimit. In aliis verò modis varios mentis affectus aut motus indicat, ut in *imperativo*, imperium ; in *optativo*, votum seu desiderium. In *subiunctivo* quidem affirmationem significat, sed conditionalem, & alteri subiectam ; non simplicem & absolutam, ut *indicativo*. *Infinitivus* modus vel retinet affirmationem, ut cum dicitur *scio malum esse fugiendum*, & tunc verè est verbum ; vel non retinet affirmationem, & evadit nomen, ut cum dicitur, *scire tuum nihil est*. *Gerundia* sunt nomina substantiva, quæ nihil addunt infinitivo, nisi necessitatem aliquid *gerendi*, unde *gerundii* nomen ductum : v. g. cum dicitur, *amandum est*, idem prorsus est, ac si diceretur, *oportet amare*. *Supina* quoque sunt nomina substantiva, quæ loco infinitivi ponuntur, ut *veni*

pransum , idem est ac veni prandere : *mirum dictu* , idem est ac mirum dici.

Definitur verbum ab Aristotele lib. de Interpret. cap.3. *vox ex instituto significans cum tempore* ; ut si dicam , *lego* , idem est ac si dicerem , *ego nunc sum legens*. Sed , ut advertimus , participium significat quoque cum tempore , quamvis verum sit nomen , cum nullatenus affirmationem significet. Quocirca *significare tempus* , aut *numerus aut personam* non est primum verbi attributum ; sed *significare affirmationem*. Dico *affirmationem* : nam nullum verbum per se *negationem* significat ; sed tantum adjectâ particulâ *non*. Si quis tamen accidentia verbi cum eo , quod ipsi essentialia est , conjungere velit , definiri poterit verbum , *vox significans affirmationem cum designatione persona , numeri , & temporis*. Nam si dicam , *video* , idem est ac si dicerem , *ego , qui sum prima persona , & singularis , nunc seu presenti tempore , sum videns*.

Cæteræ partes orationis , nempe *propositio* , *conjunctio* , & *interjectio* cogitationis potius accidentia seu modos , quàm cogitationes exprimunt.

Verum summo studio advertere oportet ipsis etiam nominibus & verbis non tantum cogitationem , sed aliquos nonnunquam cogitationis modos ex usu contineri. Sunt enim quædam nomina & verba , ut sapienter observatum est in Arte cogitandi , cap. ultimo primæ partis , quæ præter significationem *primariam* , seu principalem , aliam habent adjunctam , quàm *accessoriam* appellare possis : v. g. si quis dicat alteri , *mentiris* , nihil primario per hanc vocem significatur , quàm *dicis aliter ac sentis*, sive , is contra mentem. Sed si accessoria spectetur significatio , aliquis contemptus , aut lædendi affectatio in ea includitur : unde fit ut hac voce , *mentiris* , quisque

offendi soleat ; non istâ oratione , *dicatur aliter ac sentis.*

Hinc liquet , cur aliquæ voces obscœnæ aut impudentes ; aliæ honestæ & verecundæ haberi debeant, contra æ visum est Stoicis , qui , referente Cicerone lib.9. Epist. ad Familiares, Epist.22. ad Papirium Pætum , *nihil esse obscœnum , nihil turpe dictu* existimabant. Nullam quippe in rebus ipsis esse obscœnitatem , cùm aliis vocibus citra turpitudinem exprimi possint : multò minùs in vocibus. Si enim , quod voce significatur, turpe non est , vox quæ id significat , turpis esse non potest. Atque ita rem quamque suo nomine appellandam esse contendebant.

Sed obscœnæ voces (quod non satis attendebant Stoici) dicuntur , non quòd rem turpem significant : obscœnum quippe non est rem turpem exprimere , modò id verecundè, & selectis vocabulis fiat : verùm idcirco obscœnæ dicuntur, & impudentes , quòd præter rem turpem , quam significant , impudentiam & pròtervitatem aliquam ex usu adjunctam habeant. Ex quo fit ut quædam voces certis temporibus honestæ fuerint , quæ postea accessoriam illam obscœnitatis, aut inverecundiæ , aut contemptûs significationem ex usu receperint : idque rum nominibus , tum verbis accidere potest : sed sola nomina nunc spectamus ; quoniam iis solis idæ aut perceptiones , ut verbis judicia exprimuntur.

Nomen porrò , quatenus propositum nostrum respicit , aut *substantivum* est, seu *absolutum* , aut *adjectivum* , seu *cennotativum*.

Nomen substantivum propriè dicendum foret quod rem , seu substantiam solam significat : cuiusmodi sunt *Deus , Angelus , homo , lapis*. Sed ipsi etiam modi entis nomine substantivo exprimuntur : *prudentia , iustitia , rotunditas , curvi-*

tas. Id autem nominibus substantivis proprium est, quod comparativum & superlativum gradum non suscipiant : quod Aristoteles aliis verbis exprimit, dum ait *substantiam non suscipere magis & minus.*

Nomen adjectivum, seu connotativum esto illud, quod substantiam significat certo modo, seu qualitate affectam : sive quod substantiam significat in *recto*, seu *nominativo* casu ; modum verò, vel qualitatem connotat in *obliquo* : v. g. *album* idem est, ac substantia, seu subjectum habens albedinem.

Quamvis autem solis nominibus adjectivis id conveniat, ut subjectum simul & modum significant, plerumque tamen nomina etiam substantiva spectantur, quasi subjectum & modum aliquem essentialem, seu attributum significantia : ut *homo*, significare videtur subjectum habens *humanitatem*. Hincque oritur divisio nominis in *abstractum* & *concretum*.

Concretum illud dicitur, quod rem significat cum aliquo adjuncto, sive, ut Scholæ loquuntur, quod significat subjectum cum forma, seu qualitate adjuncta, & propriè est nomen adjectivum : v. g. *rotundum* significat *subjectum*, putà marmor, vel argentum, cum *forma* aut *qualitate*, nempe cum rotunditate adjuncta. Nihilominus substantivum nomen dicitur etiam aliquando concretum ; ut homo concipitur tanquam subjectum habens humanitatem.

Abstractum est illud quod solam qualitatem, aut modum, aut formam significat, cujusmodi sunt *albedo*, *humanitas*, &c. Ex quo intelligi potest cur id, quod abstracto nomine exprimitur, *inesse* dicatur subjecto, quod verò concreto nomine effertur, de subjecto *pradicetur*, secundum illud Scholarum axioma, *abstractorum est inesse, concre-*

torum predicari : nam modus aut qualitas est in subiecto ; v. g. rotunditas est in ligno : sed subiectum de seipso dicitur ; v. g. lignum est rotundum, id est, *subiectum habens rotunditatem* : humanitas est in Aristotele , & Aristoteles est homo ; id est, subiectum habens humanitatem; non quod humanitas sit modus hominis propriè dictus , cum sit hominis essentia , non accidens : sed quòd instar modi concipiatur.

Illud autem discrimen est inter verum modum , seu accidens , & id quod tantum instar modi concipitur ; quod subiectum concipi non possit sine eo, quod instar modi tantum intelligitur : v. g. spiritus concipi non potest sine spiritualitate ; homo sine humanitate : sed substantia clarè, distincteque concipi possit sine vero modo seu accidente : v. g. clarè , distincteque concipi potest lignum sine rotunditate ; paries sine albedine , &c. modus tamen intelligi non potest sine quodam ordine aut relatione ad aliquod subiectum : v. g. rotunditas intelligi nequit sine aliquo saltem ordine , seu relatione ad lignum , vel aliquod aliud subiectum, quod per eam afficiatur & denominetur.

Hinc ista adjectiva etiam *paronyma* , sive denominativa vocantur ab Aristotele in *Antepredicamentis* , quòd per ea subiectum denominetur ob qualitatem seu modum , aut accidens quo afficitur, ut aliquis denominatur *prudens* à *prudèntia* , *albus* ab *albedine*. At cum homo dicitur subiectum habens humanitatem , spectari non debet ut subiectum certo quodam modo, seu qualitate accidentaria affectum , quia non potest intelligi homo sine humanitate ; nec proinde humanitas est hominis modus , vel qualitas accidentaria , à qua denominetur ; sed aliquid essentiale instar modi conceptum.

Rursus nomen , sive concretum , sive abstrac-

tum , vel commune est , vel particulare , vel singulare.

Commune dicitur, quod multa significat ; ut *homo* , omnes homines significat ; sive de omnibus simul & *collectivè* sumptis dicitur in plurali numero ; & de singulis seorsim ac *distributivè* acceptis in numero singulari. *Particulare* est , quod aliquid unum significat , sed indeterminatum : nempe, cùm nomini communi præponitur pronomen indefinitum *aliquis*, vel *quidam*, ut *quidam homo*, *Singulare* est , quod aliquid unum significat & determinatum ; sive nomen proprium sit , ut *Aristoteles* : sive nomen commune ; sed demonstrativo articulo affectum , ut , *hic homo* ; sive alicui individuo per antonomasiam , ut Rhetores aiunt , nomen commune tribuatur , ut cùm Christiani *Apostolum* nominant , Divum Paulum intelligunt ; cùm Galli nomen *Regis* proferunt , non Hispaniæ, vel Angliæ , sed Galliarum Regem Christianissimum intelligunt.

Tertiò , Nomen commune , vel synonymum seu univocum est , vel homonymum , seu æquivocum , vel analogum.

Synonymum seu univocum est illud , quod *eamdem habet significationem in multis* , v. g. *homo*, eandem habet significationem in Socrate , Platone, Aristotele , & cæteris. Unde nomen univocum est universale *in significando* , ut idea , quam exprimit, est universalis *in representando*.

Sin igitur nomen illud univocum , substantivum sit : tum genus aut speciem exprimit , ut *animal*, *homo* , &c. Si adjectivum fuerit, differentiam , proprium , vel accidens denotat , ut *rationale* , *sermocinationis capax*, *album*. Nam ex quinque universalibus attributis Porphyrii , duo priora, nempe *genus* & *species* nominibus substantivis cferuntur ; tria posteriora , scilicet *differentia* , *pro-*

prium & *accidens* nominibus adjectivis , ut quisque attendendo potest agnoscere.

Homonymum sive æquivocum , aut ambiguum , est illud *quod diversam habet significationem in multis* , ut vox ista *taurus* , respectu quadrupedis , syderis , & montis : nam de iis omnibus dicitur , sed *diversum* in illis significat.

Ambiguitas autem vocabuli vel à casu est, vel à consilio.

Æquivocum à casu dicitur , cùm citra ullam rationem idem nomen diversis planè rebus impositum est : v. g. cùm animali & monti idem *tauri* nomen fuit inditum, &c.

Æquivocum verò à consilio fit , cùm idem nomen aliqua de causa multis imponitur , cujusmodi sunt omnia nomina metaphorica , seu translata : v. g. *ardens* dicitur de igne , & de homine irato, propter agitationem aliquam , quæ in irato homine, ferè ut in accenso corpore cernitur.

Hanc verò de nominibus univocis & æquivocis accipe regulam. *Univocum nomen prius definiendum , quàm dividendum : æquivocum verò prius dividi debet quàm definiri.*

Analogum ab Aristotele prætermisum fuit in antepredicamentis ; quoniam illud fortasse cum æquivoco confundendum existimavit.

Quamvis autem *analogia* apud Græcos *proportionem* significet ; ac *analogum* , à Geometris *proportionale* reddatur ; duplicis tamen generis distinguuntur analogia in Scholis Philosophicis , scilicet , analogia *attributionis*, & analogia *proportionis*.

Analogia *attributionis* dicuntur ea *qua idem habent attributum* , sed *diverso modo illud participant* ; ut *animal*, *color* qui in vultu apparet, ac *ambulatio*, dicuntur *sana* : sed *sanitatem* diversâ ratione participant. Hinc etiam definiuntur ea *qua diversam habent relationem ad eundem terminum* , scilicet

ad suum *attributum* , putà ad sanitatem. Nam animal relationem habet ad sanitatem , tanquam *subjectum* illius ; color vultûs , tanquam ipsius *signum* ; & ambulatio tanquam illius *causa*. Ut verum fatear , hoc nomen *sanum* , dici potest æquivocum respectu animalis , ambulationis & coloris ; quoniam diversum quid in iis significat .

Analogia *proportionis* dicuntur *ea qua eandem habent relationem ad diversos terminos*. Ut *pes hominis* , *pes montis* , *pes scamni* eodem modo referuntur ad hominem , ad montem , ad scamnum , tanquam ad diversos terminos : si quidem ut se habet *pes hominis* ad hominem ; ita *pes montis* aut *scamni* ad montem , aut scamnum ; & quemadmodum *pes hominis* sustentat hominem , ita *pes montis* aut *scamni* montem aut scamnum sustentat. De analogia accuratiùs dicemus in Geometria.

Quartò nomen vel *categorematicum* est , seu prædicabile , vel *syncategorematicum* , seu prædicabile.

Categorematicum dicitur , quod solum , & sine ullo *addito* potest de alio prædicari , ut *homo* de Aristotele ; *figura* de triangulo ; *infinitum* de Deo : v. g. *Aristoteles est homo* , *triangulum est figura* , *Deus est infinitus*.

Syncategorematicum est , quod solum , & sine aliquo *addito* , non potest de alio enuntiari ; cuiusmodi sunt , vel *omnis* , vel *nullus* , vel *aliquis* : nam dici nequeunt sine aliquo nomine *addito*. Simili modo nomen istud , *infinitus* , solitariè sumptum dici non potest de numero , vel de ulla re creata : nam dici non potest simpliciter , *numerus est infinitus* ; sed tantum aliquid addendo ; scilicet est infinitus *potestate* , id est , augeri potest sine fine ; quia nullus est numerus tantus , quin ipsi semper aliquid addi possit. Hinc isti modi loquen-

di in Scholis usitati : *Deus solus est infinitus categorematicè : cetera tantum syncategorematicè dici possunt infinita*, scilicet numerus, & divisibilitas materiæ apud Peripateticos.

Quintò, aliquod nomen dicitur *categoricum*, aliud *transcendentale*.

Categoricum illud est, quod significat aliquod *ens*, aut *modum entis* in aliqua categoria dumtaxat contentum : cujuscumque sunt, *Angelus*, *homo*, *lapis*, *circulus*, &c.

Transcendentale significat aliquid *transcendens omnes categorias*, sive aliquid, quod tum ad *ens*, tum ad *modum entis* generatim pertinet, nec in una magis, quàm in alia categoria continetur : ut sunt *essentia*, *existentia*, *unitas*, *veritas*, *bonitas*, *duratio*, *ordo*, *relatio*, *oppositio*, & quæcumque tum *enti*, tum *entis modo* conveniunt. Nam *ens* omne absolutè, & in se spectatum est *existens*, *unum*, *verum*, *bonum*, *durans*, &c. *Relative* verò, est *ordinatum*, *relatum*, *oppositum*, &c. Simili ratione, *omnis modus entis* est *existens*, *unus*, *verus*, *bonus*, &c. *relatus*, *oppositus*, &c.

Sextò, hinc sequitur alia divisio nominis in *absolutum* ; quod rem aliquam *absolutam*, sive ab omni alia *resolutam* significat ; adeo ut sine relatione, aut ordine ad ullam aliam rem spectetur ; cujuscumque sunt *homo*, *domus*, *scannum* ; & in *relativum*, quod nempe rem exprimit, cum ordine ad aliud ; qualia sunt ista nomina, *pater*, *filius*, *dominus*, *servus* : *pater* enim est filii *pater* ; *dominus* est servi *dominus*, & vicissim.

Sed, dum varias nominum divisiones recensemus, id committendum non est, ut ipsa nominum nomina, vel appellationes prætermittamus. Quare,

Septimò, & ultimo loco, alia sunt no-

mina prima : alia nomina *secunda intentionis*.

Nomina *prima intentionis* dicuntur , quæ tum ad res ipsas significandas , tum ad primarias nostras cogitationes exprimendas sunt inventa , qualia sunt ista , *Deus* , *Angelus* , *homo* , *dominus* , &c.

Nomina *secunda intentionis* vocantur ea , quæ vel ipsa rerum nomina , vel cogitationes nostras secundarias & reflexas significant. Quod ut explicatius fiat , advertendum *intentionis* nomen , quod ab intendendo dicitur , nihil aliud sibi velle hoc loco , quàm *cogitationem mentis ad aliquid percipiendum intentam* : unde illud ,

Pluribus intentus , minor est ad singula sensus.

Intentio porrò illa duplex , scilicet prima & secunda.


Intentio prima est ea , quâ res ipsas percipimus , ut si quis dicat *ambos Scipiones fuisse duo belli fulmina* , intelligam statim nobiles illos Romanos fuisse claros bellatores , ut quilibet easdem voces percipiens intelliget.

Intentio secunda est secundaria , & veluti reflexa cognitio , quâ in priorem cogitationem reddit animus , nomenque iis vocibus , quibus expressa est , attribuit : v. g. in allata propositione , spectare possum *ambos Scipiones* , quasi *subjectum propositionis* & *fulmina belli* tanquam *attributum* : vel *Scipiones* , tanquam *nomen substantivum* ; *ambos* tanquam *adjectivum* : vel attributum istud , *belli fulmina* , veluti tropum , seu metaphoram , non quasi propriam & naturalem appellationem.

Res igitur , quæ per primam intentionem cognoscuntur , dicuntur in Scholis primò *intentionaliter* cognitæ : cogitationes verò , vel nomina , quæ reflexa & secundariâ cognitione percipiuntur , se-

cundo intentionaliter, cognosci perhibentur. Ac ne istæ secundariæ perceptiones in mente inutiles remanerent, inventæ sunt artes aliquæ, seu disciplinæ *instrumentales*, quæ nomina iis imponerent, putà, *Grammatica*, *Rhetorica* & *Logica*. Nam Grammatica prodidit nomina *declinationis*, *conjugationis*, *generis*, *casûs*, &c. Rhetorica, nomina *tropi*, *figura*, *orationis*, *exordii*, &c. Logica, nomina *subiecti*, *attributi*, *definitionis*, *demonstrationis*, &c. Quibus omnibus Grammatica congruè, Rhetorica ornatè, Logica rectè loquendi præcepta tradit; omnesque simul ad cæterarum disciplinarum adaptionem, quasi ministræ quædam inserviunt. Hactenus de ideis.





P A R S S E C U N D A

L O G I C E S.

De judicio.

C U M plures ideas affirmando conjungimus, vel negando separamus, tum *judicare* dicimur ; sive , hujusmodi species cogitationis, *judicium* appellatur.

Judicium autem , si vocibus exprimatur , *enuntiatio*, aut *propositio* dicitur , & ab Aristotele *interpretatio* ; quòd enuntiatio exterior sit judicii interioris interpres.

Ut ea igitur quæ ad judicium spectant , breviter exequamur , duplici sectione nobis agendum erit.

Primâ quidem , de judicio, prout in mente existit , spectato.

Secundâ , de judicio extra mentem prolato ; sive de enuntiatione.

S E C T I O P R I M A.

De judicio , prout in mente existit , spectato.

T R I A circa judicium , prout in mente spectatur , inquirenda sunt.

Primum , quæ sit illius natura.

Secundum , qui sint præcipui illius defectus.

Tertium , quæ iis adhibenda remedia.

CAPUT I.

De natura judicii.

JUDICIUM vulgò definitur, *secunda cogitationis species, quâ consentientes ideas per affirmationem conjungimus, repugnantes verò per negationem sejungimus.* Sic ubi percepit aliquis id, quod istis vocibus, *spiritus, & corpus*, significatur; & quod illis, *cogitans, & extensum*, potest cogitationem de spiritu, & extensionem de corpore affirmare; vicissimque extensionem de spiritu, & cogitationem de corpore negare; affirmando spiritum cogitantem, & corpus extensum esse; negando spiritum esse extensum, & corpus cogitans.

Hæc proinde cogitationis species à perceptione diversa est, cum perceptio nihil affirmet aut neget: unde licet perceptio passiva omnino sit respectu nostræ mentis, nihilominus judicium verè dici potest mentis humanæ actio. Sit igitur.

PROPOSITIO PRIMA.

JUDICIUM est mentis actio. Probatur. Judicium est secunda cogitationis species, quæ ideas consentientes unâ componit affirmando, dissentientes verò removet negando.

Atqui hujusmodi cogitatio est actio mentis: nam conjungere ideas affirmando, vel eas separare negando, est agere, ut intelligunt omnes, qui attentum animum volunt adhibere.

Ergo judicium est mentis actio.

Corollarium.

CUM mens humana percipiendo non agat ; nec intellectus noster dici debeat activus ; sed unica sit animæ rationalis facultas activa , nempe voluntas ut dictum est antea : hinc sequitur compositionem , vel divisionem idearum , sive assensum aut dissensum , vel uno verbo *judicium* , ad voluntatem , non ad intellectum pertinere , ut demonstrabimus in Metaphysica , 2. parte sectione 3. cap. 5.

Sed cum *judicium* sit mentis actio ; videndum nunc , utrum ea sit simplex , an verò quiddam ex pluribus ideis compositum. Qua de re sit.

P R O P O S I T I O S E C U N D A.

JUDICIUM est simplex mentis actus , non verò quiddam ex pluribus ideis compositum.

Probatur. *Judicium* propriè est assensus , vel dissensus mentis ideas per affirmationem conjungentis , vel per negationem dividantis.

Atqui hujusmodi assensus vel dissensus simplex est , non verò quiddam ex pluribus ideis compositum possunt enim esse multæ perceptiones subjecti , attributi & copulæ , tametsi nullum interveniat *judicium* ; nullus assensus aut dissensus : sic percipere possumus hanc propositionem , *arena maris sunt numero pari* , & *judicium* nostrum sustinere ; seu , nec assentiri nec etiam dissentire.

Ergo *judicium* est simplex mentis actus , non verò quiddam ex pluribus ideis compositum.

Responsiones ad objecta.

OBJICES primò, Quòd componitur ex pluribus ideis, est compositum.

Atqui judicium, ex pluribus ideis componitur; nimirum ex ideis subjecti, attributi, & copulæ.

Ergo est compositum.

Respondeo negando minorem. Actus enim mentis affirmantis, vel negantis, sive ideas conjungentis aut dividētis, ex ideis non componitur. Atqui judicium est actus mentis componētis, vel dividētis ideas, ut modò dictum est. Ergo judicium ex ideis non componitur.

Instabis. Non fit judicium nisi ex ideis.

Ergo judicium componitur ex ideis.

Respondeo distinguendo antecedens. Judicium non fit nisi ex ideis prærequisitis, ut mens eas componat, vel dividat, concedo: ut ex iis judicium ipsum componatur, nego: quare nego consequentiam.

Sed inquires. Unaquæque res fit ex sua materia.

Atqui ideæ sunt materia judicii.

Ergo judicium fit ex ideis.

Respondeo distinguendo minorem. Ideæ sunt materia judicii: id est, materia *circa quam* versatur judicium, concedo: id est, *ex qua* componitur, nego: quare nego consequentiam. Ideæ igitur propriè sunt materia, circa quam judicium versatur, non materia ex qua componitur. Nam judicium est actus mentis affirmantis, vel negantis: sed actus ille mentis non componitur ex ideis, tametsi circa eas conjungendas vel separandas occupetur. Ergo judicium ex ideis non componitur.

Objicies secundò. Nullum judicium fieri potest sine perceptione subjecti, attributi & copulæ.

Ergo judicium non est quid simplex.

E iiij

Respondeo negando consequentiam. Quamvis enim iudicium exigat perceptiones subjecti; attributi & copulæ, non tamen ex iis componitur; sed est earum compositio aut divisio, sive est affirmatio aut negatio attributi de subjecto.

Instabis idea quædam est composita.


Ergo à fortiori iudicium est compositum.

Respondeo, dato antecedente, negando consequentiam. Idea enim potest multa simul exhibere, putà rem cum modo, seu affectione: unde dici potest complexa, aut si mavis composita ratione objecti quod exhibet: tametsi ratione sui sit simplex, si de idea formali, seu mentis perceptione sit sermo. Sed iudicium est semper actus mentis assentientis vel dissentientis: ideoque semper simplex est, quamvis circa multiplex objectum occupetur.

Objicies tertio. Propositio exterior est quid compositum ex terminis.

Ergo iudicium constat ex ideis.

Respondeo negando consequentiam. Iudicium quippe in mente spectatum assensu vel dissensu, seu affirmatione aut negatione continetur, quibus nihil est simplicius; sed ista affirmatio aut negatio, tametsi simplex, non potest nisi plurimis vocabulis exprimi: unde licet affirmatio & negatio ideas tantum subjecti & attributi postulent, ut eas componant vel dividant, non verò ut eas propriè in se includant; propositio tamen, non tantum includit verbum, *est*, quo affirmatio exprimitur, aut etiam negatio, cum additur particula *non*: verum etiam subjectum & attributum complectitur: ex quo fit, ut par utrobique non sit ratio.



CAPUT II.

De præcipuis errorum in judiciis nostris occurrentium fontibus.

OMNES judiciorum nostrorum defectus ex duobus præsertim capitibus oriuntur. Primò, scilicet, ex præjudicatis infantia opinionibus. Secundò, ex nimium properatâ ac præcipiti mentis festinatione, quâ, rebus non satis exploratis, judicium temerè interponimus. His addi potest prava & ambigua hominum loquendi ratio, ideasque nostras vocabulis quasi rebus alligandi consuetudo. Quæ singula breviter attingemus.

Præjudicium.

PRÆJUDICIUM seu præjudicatam opinionem vocamus, *anticipatum quoddam judicium, ex sensuum præsertim impressionibus ortum.* Cum enim priùs infantes fuerimus, quàm in viros perfectos conformati; mirum est, quàm multis, variisque modis externa objecta in teneros artus, debiliaque sensuum organa incurrentia mentibus nostris illuserint. Nam eâ potissimùm ætate corporis motibus afficitur humana mens; cum nempe & tenerum est corpus, & à circumstantibus aliis corporibus, vel leviter agitatis, validè circumquaque percellitur. Quocirca mens tunc temporis ad nullas fere ideas attendere potest, præter eas, quæ ipsi objectorum sensibilibus occasione adveniunt. Hinc in varios errores abducitur, dum res externas tales omnino esse decernit, quales eas sensuum ministerio percipit. Si puer lucentem flammam

videat , quoniam eâ vehementer delectatur , ipsam statim in se talem esse , qualem ipsam sentit , scilicet gratissimam judicat. Sed si manum ei admoveat , ac tantisper ab ea lædatur , tum illam noxiam , & malam apud seipsum statuit.

Præterea , ubi aliquo caloris sensu illius occasione afficitur , non tantum vim aliquam ipsi tribuit , quâ sensus iste excitetur ; sed aliquid suæ perceptioni , aut sensationi omnino simile in ea fingit. Unde calorem in igne , candorem in lacte , frigus in glacie , & cæteras qualitates in singulis corporibus , suis perceptionibus prorsus consimiles reponit.

Simili modo gravia , densaque corpora , ut aurum , vel lapis , plus ipsi substantiæ solidæ & corporeæ continere videntur , quàm levia & rara ejusdem voluminis , putà aqua vel aër. Neque hæc præjudicata opinio infantia soli peculiaris est ; sed ad provectiorem etiam ætatem extenditur. Videmus enim homines non paucos ; qui totum hoc expansum inter Solem & nos interjectum *vacuum* omnino , aut *inane* existiment , quòd nullâ sensibili materiâ percipiatur plenum. Hinc fortè *vacui* imaginatio sumpsit exordium. Cum enim homines extensionem inter corpora remota facile animadvertant , quam nullo sensibili corpore occupatam vident , duplicis generis extensionem fingere cœperunt : alteram *plenam* , alteram *vacuam* , ex quibus integram hanc mundi compaginem constare docuerunt ; tametsi *nihil* nullam esse extensionem fateantur ii omnes , qui mentem ad id advertere voluerint.

Sed aliqui ulteriùs sunt progressi : nam tenuia , raraque corpora puriora longè , & ad spiritalem naturam magis accidentia , quàm crassa , duraque crediderunt : ita ut mentem nostram nihil aliud esse opinati sint , quàm subtilem quandam mobi-

lemque substantiam, quæ suâ tenuitate & subtilitate in spiritalem naturam esset conversa, & spiritalium functionum, putà cogitationum, particeps effecta. Quâ opinione nihil fingi potest absurdius: materia quippe sive crassa, sive tenuis, semper materia est; nec magis atomus minutissima cogitationis fit capax, quàm ingens moles, aut hoc universum mundi syntagma.

Longum esset excurrere per singula: nam latè fusa est materies; nec ulla fere sunt prava judicia, quæ in infantia præjudiciis ortum non habeant: putà, Solem non esse disco, seu paropside majorem; stellas faculis æquales; antipodas inverso capite ac sublati pedibus incedere; aliaque innumera, quæ prætermittimus: nam præcipuos tantùm errorum nostrorum fontes indicamus; ac primo loco præjudicium ponimus; secundo mentis præcipitationem; de qua nunc est agendum.

Præcipitatio mentis.

P RÆ C I P I T A T I O mentis est *præceps & inconsideratum de re ignota, vel non satis explorata judicium*: quo mentis vitio, nullum frequentius apud homines occurrit, ut innumera judicia temeraria, sive in disciplinis humanis, sive in vita civili persuadere faciliè possunt. Si quis lapidem, nullo sensibili corpore impellente, cadentem cernat, repente, absque ullo examine, vim quamdam in lapide collocat, per quam hunc deorsum ferri autumat. Eadem est aliarum qualitatum ratio, putà vis ferri attractricis in magnete; vis purgatricis in rhabarbaro, prunis, aliisque hujusmodi purgantibus remediis, quæ in medendi arte adhibentur.

Verùm hæc, quantumvis contemnenda non sunt, aut negligenda in disciplinis humanis, mul-

tò tamen graviora sunt in vita civili, in qua de fortuna & fama hominum, de vita & morte agitur. Nihil autem familiarius est, quàm ex levi & ambiguo plerumque indicio homines accusare, vel excusare; laudibus extollere, vel vituperare. Horum exempla non desunt neque in sacris, neque in profanis scripturis. Sic Christus Dominus cum apud Simonem Phariseum aliquando vesceretur, ut legimus Lucæ cap. 7. v. 36. & sequentibus, mulier quædam peccatrix ad eum accessisse dicitur, quæ & lachrymis pedes illius cœpit irrigare, & capillis suis eos abstergere, & unguento ipsum ungere. Quod cum vidisset Phariseus, temerario apud se iudicio pronuntiasse fertur: *Hic, si esset Propheta, sciret utique, quæ & qualis est mulier, quæ tangit eum: quia peccatrix est.* Sed si Phariseus ad summam Christi pietatem intendisset animum, eumque tanquam medicum reputasset, non ad sanos sed ad ægrotos missum scilicet *ad salvandas animas quæ perierant ex domo Israel,* nunquam tale de ipso iudicium fuisset habiturus.

Eâdem iniquitate utimur adversus homines plurimos, dum eos ex verbo, vel facto aliquo, quasi improbos, aut pravis opinionibus imbutos, aut proborum contemptores judicamus, licet dicta illa, aut facta in viros vitæ integros, scelerisque omnis expertes cadere possint, & sæpissimè in bonam partem ab æquis rerum æstimatoribus accipiantur.

Aliud est præcipitationis iudicii genus, dum ex uno aut altero facto propositionem universalem astruimus. Sic quoniam semel aut iterum casu aliquo lapsus est quidam; vel in re aliqua singulari, & insolitâ parum feliciter se gessit, hunc ad omne vel instituti, vel artis, aut negotii genus tractandum ineptissimum, nec nisi errandi peritum pronuntiamus. Contrario planè modo si quid

rectè factum sit à nonnullis, eò dumtaxat mentem quandoque intendimus, errata verò ipsorum non advertimus. Hinc est quòd multi pauca quædam ab Astrologis casu prænuntiata admirentur; quæ verò falsa prædicta sunt, dissimulent, ut ex eo laudandæ artis occasionem fumant.

Denique si quis animo attento judicia hominum considerare velit, ea magna ex parte vel ex præcipatione mentis, vel ex diversi generis præjudiciis, quæ tum ex sensibus sive internis sive externis, tum ex *philantia*, ut aiunt, sive proprio cuiuslibet sui ipsius amore; tum ex cupiditate aliqua, vel affectu; tum ex partium quarundam studio, vel utilitatis spe, vel amicorum gratiâ, vel necessitudinis aut societatis vinculo ducuntur, non ex clara distinctaque perceptione, non ex ponderatis utrinque rationum momentis, orta comperiet. Quod quidem selectis exemplis è scriptura sacra petitis à S. Bernardo graphicè depingitur, Tractatu de gradibus humilitatis, capite 4. ubi ostendit judicia nostra corrumpi vel amore, vel odio, vel metu, vel alio quovis affectu. *Amor verò, inquit, sicut nec odium, veritatis iudicium nescit. Vis iudicium veritatis audire? Sicut audio, sic iudico.* Quasi dicat S. Bernardus, si quis iudicare velit secundum veritatem, imitetur Christum Dominum, qui est ipsa veritas, quique sic loquitur Johan. cap. 5. v. 30. *sicut audio, iudico.* Id est, sicut à Patre audio judicandum, sic iudico. *Non sicut odi, non sicut amo, non sicut timeo. Est iudicium odii, sive quoddam iudicium ex odio nascitur, ut illud Judæorum, Johan. c. 19. v. 7. Nos legem habemus, & secundum legem nostram debet mori, nempe Jesus Christus. Est & timoris, ut illud etiam Judæorum, Johan. cap. 11. v. 48. Si dimittimus eum sic, omnes credent in eum: & venient Romani, & tollent nostrum locum & gentem. Judi-*

cium verò amoris fit , ut , cum David de filio par-
ricida , parcite , inquit , puero Absalon : sive ut le-
gitur lib. 2. Reg. cap. 18. v. 5. *servate mihi pue-
rum Absalon*. Obliviscitur enim David defectio-
nem & rebellionem filii sui , paternoque dumtaxat
amori obtemperat. Ideoque , inquit D. Bernar-
dus , & *legibus humanis* (scilicet lege decimâ ,
quæ incipit per hæc vocabula , *Qui Jurisdictioni* ,
lib. 2. Digestorum , Titulo *de Jurisdictione* , qui
primus est hujus libri) *statutum* , & *in causis tam
Ecclesiasticis quàm secularibus servatum* scio : *spe-
ciales amicos causantium* , id est litigantium , non
*debere admitti ad judicium : ne vel fallant vel fal-
lantur amore suorum*. Hæc notat divus Bernardus.

Quædam etiam perversa judicia ex vitiatâ lo-
quendi ratione manant , vel ex prava ideas voca-
bulis , tanquam rebus , astringendi consuetudine ,
de qua nunc tandem pauca sunt adjicienda.

*Vitiosa hominum locutio , & sermonis
ambiguitas.*

Non tantùm sensûs & imaginationis , affec-
tumque , seu animi perturbationum præjudicia ,
ac mentis præcipitatio in varios errores nos indu-
eunt : sed ipsa etiam , quæ in usu sunt , vocabula
ipsum confirmat , sive quòd ambigua sunt , seu
diversæ significationis ; sive quòd iis , tanquam
rebus , ideas suas adjungere consuevit animus.
Sæpè amoris , vel odii nomen rerum corporearum
affectibus tribuitur ; sæpè vites montosis , salices
aquosis locis delectari ; eadem vites ulmis amicæ ,
nucibus inimicæ creduntur : sic ignem voracem ,
mare insidum , prata ridentia , noctem silentem ,
hiemem tristem vocitamus. Sic Deum viventem ;
hominem , equum , & plantam viventes ; flam-
mam , aut aquam vivam appellare solemus , tamen-

si inter hæc omnia viventia nihil, aut ferè nihil conveniat. Quin etiam in omnibus non modò viventibus; sed in aliis quoque rebus sensu & vitâ destitutis, appetitum aliquem, vel nîsum, tanquam entitatem quamdam, seu vim naturalem ex nominum plerumque occasione fingunt aliqui: putà, si flamma sursum eluctari dicatur, lapis deorsum moveri; huic inclinationem, seu pro-
pensionem ad partes infimas, illi ad supremas concessam esse aiunt.

Neque ad illud aniles nugæ nutricum, & ipsorum Poëtarum fabulæ parum conferunt: dum *echo* exempli causâ, quasi virgunculam in rupibus latentem, & missas ad se voces regerentem exhibent: cùm fortunam, invidiam, famem, occasionem, veluti deas mortalibus amicas, aut infensas: eùm *fatum*, quasi quoddam virtutis insuperabilis numen describunt. Refert Claubergius in *Logicæ Prolegomenis*, cap. 3. num. 85. novisse se adolescentes, qui cùm prima ætate *Æsopi* fabulas trivissent, persuasum inde habuerant, mutas animantes olim rationis fuisse participes, & sermocinationis capaces.

Quare sapienter quidam à Romulo provisum fuerat, referente ac laudante Dionysio Halicarnassæo lib. 2. antiquit. Roman. ne quis ridiculas Græcorum fabulas de natura & gestis deorum; in suam civitatem inveheret, quòd eæ, tametsi ad delectandum utiles, & ad docendum aptæ judicari possint, præjudicatam tamen opinionem naturæ divinæ planè dissonam in mente relinquerent, ex qua periculum erat ne, aut Deus, quod impium est, omnino existere negaretur; aut indecorâ & absurdâ specie, quod indignum est, & blasphemum, fingeretur. Nam, ut rectè advertit Cicero lib. 1. de natura deorum, *quæ Poëtarum vocibus fusa, ipsâ suavitate nocuerunt, qui*

Et irâ inflammatos & libidine furentes induxerunt deos.

Ex quibus omnibus intelligere quilibet potest, nos cum lacte simul errorem iungere cœpisse; eundem nobiscum inter nutricum & matricularum complexus adolevisse; ac tandem intra hominum societatem, agendique, & loquendi rationem fuisse confirmatum.

Sed indicatis præcipuis errorum fontibus, ad eorum remedia veniendum.

C A P U T I I I .

*Quæ sint iudiciorum nostrorum erroribus
adhibenda remedia.*

CUM singulos casus in quibus erramus, minutim persequi non liceat, generalia tantum erroribus nostris remedia proponemus: cumque ii ad tria summa capita revocari possint: scilicet ad præiudicium, ad præcipitationem mentis, & ad pravam loquendi, ideasque nostras vocibus, tanquam rebus alligandi consuetudinem, in iis dumtaxat curandis operam collocabimus. Si igitur.

Præceptum primum.

P R Æ I U D I C A T I S opinionibus unicum afferri posse videtur remedium; scilicet, si mens illis exuatur, nec ullam deinceps, quasi veram admittat, quæ non maturo prius examini fuerit subiecta. Quandiu enim anticipatæ opiniones vigent, tandiu iudicia nostra ab omni erroris periculo libera esse nequeunt. Unde Cicero lib. I. de

natura deorum: *Qui requirunt*, inquit, *quid quâque de re ipsi sentiamus*, curiosius id faciunt; quàm necesse est: non enim tam auctores in disputando, quàm rationis momenta quarenda sunt. Quinetiam obest plerumque iis, qui discere volunt, auctoritas eorum, qui se docere profitentur: desinunt enim suum iudicium adhibere: id habent ratum, quod ab eo quem probant, iudicatum vident. Nec verò probare soleo id, quod de Pythagoricis accepimus, quos ferunt, si quid affirmarent in disputando, cum ex iis quareretur, quare ita esset, respondere solitos, ipse dixit: ipse autem erat Pythagoras. Tantum præjudicata opinio poterat, ut etiam sine ratione valeret auctoritas.

Hinc est, quòd Cartesius à dubitatione, seu iudicii suspensione inchoandum esse Philosophiæ studium voluit, scilicet primâ meditatione Metaphysicâ, primâ parte Principiorum, & alibi. Qua in re de consilio suo, & proposito ab aliis quoque Philosophis, & sibi adversariis, laudem promeritus est. *Comprobo*, inquit Gassendus, in objectionibus adversus primam illius meditationem, *institutum*, quo mentem tuam exuere omni præiudicio voluisti. Ac re quidem verâ, ubi mens à præiudiciis soluta est, nullâ perceptione, nisi clarâ, distinctâque imbuitur; nihilque certò affirmat, nisi quòd rectè priùs intellexit. *Qui autem quod novit loquitur*, ut ait Sapiens Proverb. 12. v. 17. *iudex iustitia est*.

Multa verò sunt præiudicia, quæ non faciliè eradicari ex animo queant, qualia sunt, quæ nobiscum quodam modo nata, sensim quoque incrementa in animo cepere: nam ut ait Poëta Tragicus in Troade.

Dediscit animus serò, quod didicit diu.

Atque id in causa est, cur senes pertinaciùs præiudicia sua tueantur, nec à junioribus crudi-

*Vel quia nil rectum , nisi quod placuit sibi ,
 ducunt;*

*Vel quia turpe putant parere minoribus , & qua
 Imberbes didicere , senes perdenda fateri.*

Sit atmen adhibenda fides Lactantio , libro secundo divinarum Institutionum , cap. 8. *Cum sapere , id est veritatem quarere omnibus sit innatum , sapientiam sibi adimunt , qui sine ullo iudicio inventa majorum probant , & ab aliis pecudum more ducuntur. Sed hoc eos fallit , quod majorum nomine posito , non putant fieri posse , ut aut ipsi plus sapiant , quia minores vocantur , aut illi desipuerint , quia majores nominantur.*

Rectè igitur in ea re Plinius junior lib. 6. Epist. 15. *Sum , inquit , ex iis qui mirer antiquos , non tamen , ut quidam , temporum nostrorum ingenia despicio : neque enim quasi lassa & effœta natura nihil jam laudabile parit.*

Quamobrem totis viribus in id incumbendum , ut ab omni opinione , quam citra justam rationem hausimus , mens expurgetur : idque non aliter fieri posse videtur , quàm si assensum nostrum circa ea omnia , de quibus meritò dubitari potest , tandiu sustineamus , donec illa recognoverimus , & accuratè ac sedulò perpenderimus. Neque enim probare possumus sterilem illam Academicorum & Pyrrhonicorum dubitationem , quæ sine consilio fiebat , & omni carebat emolumento. Nam ii de rebus planè omnibus dubitabant; nec ullo alio fine , aut commodo ad dubitandum movebantur , quàm ut perpetuò dubitarent , & assensum circa res omnes cohiberent. Sed alia est dubitatio utilis , per quam tandiu inhibetur assensus , donec id , de quo judicandum est , æquâ lance fuerit examinatum , longâque , & attentâ meditatione

LOGICÆ. SECT. I. CAP. III. 115
perpensum : ex quo fit ut iudicium , quod deinde
intervenit , maturius feratur , & ab omni erro-
re , quantum per humanam diligentiam caveri
potest , vindicetur.

Quoniam verò præcipites sunt , & fluxæ rerum
agendarum occasiones , cæque cùm præterierint ,
non ad vota nostra revertuntur , non est hæc re-
gula ad praxim rerum , quæ celeritatem postu-
lant , producenda : sed in iis quæ ad vitæ usum ,
aut negotiorum gestionem pertinent , solâ verifi-
militudine contenti esse debemus ; nec rationes ad
amissum semper sunt exigendæ , nisi ubi in mate-
ria , vel speculationi Philosophicæ subjecta , vel
dilationis patiente versari nos contigerit : in a-
liis , multa sunt in omnem eventum permittenda ,
dummodo tamen temeritati , & præcipitationi ni-
hil concedamus.

Præceptum secundum.

PRÆCIPITATIONI iudicii, cunctatione,
& diligenti ad ideas attentione , medendum : si
enim *contraria contrariis curentur*, ut Medici aiunt,
nihil efficacius subitam & inconsideratam affir-
mandi , aut negandi proclivitatem emendare po-
test , quàm longa , circumspectaque cunctatio ,
per quam sustinetur assensus , donec res quæ sub
iudicium cadit , diligenti examine fuerit explo-
rata. Hoc enim præcipuè vitium vitandum præ-
cipit Tullius , lib. 1. de Officiis , *ne incognita pro
cognitis habeamus , hisque temerè assentiamus. Quod
vitium effugere qui volet (omnes autem velle de-
bent) adhibebit , ad considerandas res , & tempus ,
& diligentiam.*

Cùm tamen diversi sint certitudinis & eviden-
tiæ gradus , pro diversa rerum , de quibus judi-
candum est , conditione , ut antea monuimus, om-

nino habenda ratio est materiæ quæ tractatur. Sic in rebus quæ fidei divinæ subjiciuntur, minimè postulanda est evidentia, minimè demonstratio per argumenta naturalia quærenda. Cùm enim nostram intelligendi vim longo intervallo superent, Dei revelantis auctoritati parendum, qui plura longè perficere potest, quàm intelligentia nostra capere valeat. *In talibus igitur rebus*, ut inquit Sanctus Augustinus epist. 137. aliàs 3. quæ est ad Volusianum num. 8. aliàs cap. 3. *tota ratio facti est potentia facientis.*

Similiter in quæstionibus facti, aut iis quæ ad historiam pertinent, frustrà metaphysicam, aut geometricam certitudinem requireret aliquis: cùm sola certitudo moralis sufficiat, id est, ea certitudo, quæ secundùm vivendi morem in publica hominum societate usurpatum, admitti solet. Eaque non ex nudo facto, aut ex possibilitate tantùm alicujus rei, vel ex una, aut altera, quæ hujus affertur ratione; sed ex omnibus circumstantiis; aut ex omnibus rationibus simul sumptis est dijudicanda. Tametsi enim singulæ rationes, quæ de facto aliquo afferuntur, probabiles tantùm, sint, non demonstrantes, omnes tamen simul sumptæ, & ad circumstantias illius facti comparatæ, vim demonstrationis habere possunt.

In Physica quoque, seu rerum naturalium scientia, versimilitudine tantùm, & probabilitate plerumque ducimur: nec malè nobiscum actum putamus, si probabilem cuidam effectui causam assignare possimus.

Sed in rebus metaphysicis, aut geometricis, vel iis, quæ cum Metaphysica, aut Geometria nec essariam habent connexionem, accuratis, evidentibusque demonstrationibus est opus, ut mentis nostræ assensus obtineatur: summâque adhibenda

est cautio , ne fortè nobis rei species & umbra pro veritate obrepāt.

Ut autem res quælibet attento animo considerari possit , multa videntur necessaria , Primùm quidem , ipsi meditationi dudum assuefaciendus est animus , id est , longo usu & studio efficiendum , ut se ipse colligere queat : nam qui exteriùs semper dissipantur , ii attentam rebus considerationem præbere non possunt. Secundò , societas quoque hominum , quibuscum degimus , fovere potest , vel turbare attentionem. Tertiò , locus etiam idoneus requiritur , scilicet à turba & strepitu hominum remotus : hinc Musæ desertos montes , & solitudines incolere à Poëtis finguntur. Quartò , tempus quoddam meditationi aptum eligendum , nempe illud quo mens nec nimio labore defatigata , nec multiplici rerum consideratione distracta , liberiùs meditationi vacare potest , quale est tempus matutinum. Unde cœlestis sapientia Proverb. cap. 8. v. 17. Ego , inquit , *diligentes me diligo : & qui manè vigilant ad me invenient me.* Quod notatum fuit ab Erasmo in Colloquio , quod *Diluculum* inscribitur.

Præceptum tertium.

Ut erroribus ex vitiosa hominum loquendi ratione exortis occurramus , singulæ voces , quibus utimur , sunt definiendæ , & ab iis , quibuscum agimus , ut idem præstent , nobis est postulandum. Nam si semel constet quid qualibet voce intelligi oporteat , nulla amplius in illius usu errandi suberit occasio. Exempli causâ , inter diversæ sectæ Philosophos dissidium est non leve , utrum in igne reponendus sit calor ; affirmantibus aliis , aliis negantibus. Tota ramen ea concertatio nominis ambiguitate continetur. Si enim

caloris nomine certus quidam intelligatur partium motus, quo sensus calor in nobis excitatur, quis dubitet quin ignis reverà calidus sit habendus? Sed si quid simile in igne, ac in sensibus nostris significari velint calor vocabulo, non utique magis calidus ignis, quàm sentiens est cogitandus.

Simili ratione, cùm inter se disputant, utrum animam & sensum belluis attribuire oporteat; in ambiguis sæpè nominibus laborant. Nam si per animam & sensum, mentem ipsam, & cogitandi vim intelligendam velint, omnem à belluis animam, & sensum abesse liquet; cùm nec mente præditæ sint, nec ad cogitandum ullo modo sint comparatæ. Sed si animæ nomine spiritus animales intelligantur, qui functionum animalium in corpore organico sint principia: nec anima, nec sentiendi vis belluis est deneganda, cùm suo modo sentiant, videant, audiant, olfaciant, &c.

Alia subjici possent exempla hujusmodi ambiguitatis vocabulorum, quæ ex singulis Philosophiæ partibus depromi queunt: sed hæc impræsentiarum sufficere videntur.

SECTIO SECUNDA.

De enuntiatione.

QUEMADMODUM idæ nominibus, ita judicia *verbis*, tanquam signis, exprimuntur: hæcque verba *enuntiationes*, aut *propositiones* judicii interpretes continent. Hinc *de interpretatione* inscribitur Aristotelis liber, quo de propositione, seu de enuntiatione differit. Quatuor autem circa enuntiationem nobis sunt explicanda.

Primò, quæ sit enuntiationis, seu propositionis natura.

Secundò , quæ sint illus proprietates.

Tertiò , quæ species.

Quartò denique agendum speciatim de definitione & divisione , quæ præcipuè sunt enuntiationis species à Logica spectandæ.

CAPUT I.

De natura enuntiationis , seu propositionis.

ENUNTIATIO , seu propositio est *oratio ab hominibus instituta ad exprimendum iudicium*. In qua definitione *oratio* est genus: cætera locum tenent differentiæ.

Oratio quippe est quælibet vocabulorum , seu dictionum compositio ad significandam quamdam animi cogitationem aut cogitationis modum instituta. In cogitatione quippe distingui possunt, tum ipsa cogitatio , tum cogitationis modus. Cogitatio est vel perceptio , vel iudicium. Utriusque objectum sunt res vel rerum modi , seu attributa. Nam perceptio & iudicium circa res dumtaxat & rerum modos occupantur; cum eo discrimine , quod mens percipiendo cognoscat tantum objecta; iudicando verò alterum de altero affirmet aut neget. Hinc perceptio nominibus, iudicium verbis exprimitur. Modus cognitionis est quælibet mentis affectio , quæ cogitationem, nempe perceptionem & iudicium comitatur : quales sunt admiratio , iussio , excitatio, & aliæ affectiones , quæ tum variis verborum inflexionibus , tum conjunctionibus & interjectionibus exprimiuntur. Unde alia est oratio *admirativa*, & truncata , ut *Deus bone !* alia *imperativa* , ut *sta sol* : alia *optativa* , ut *salvus sis*, &c. Præcipua autem orationis species est

enuntiatio , seu propositio , quæ ab hominibus instituta est ad significandum iudicium.

Cùm autem iudicium in compositione , vel divisione idearum , sive in affirmatione aut negatione unius ideæ de altera consistat : propositio quæ illius interpret est , duo semper complectitur nomina , quorum alterum de altero affirmatur aut negatur ; suntque illius *subjectum* , & *attributum* , quæ illius *materia* , seu *termini* vocantur.

Terminus igitur , seu materia propositionis definitur hoc loco , *id ex quo propositio constat , & in quod resolvitur , tanquam in subjectum , vel attributum , seu predicatum.*

Subjectum propositionis est terminus de quo alius affirmatur , aut negatur. Attributum est terminus qui de alio affirmatur aut negatur. Exempli causâ in ista propositione , *terra est rotunda* : nomen , *terra* , est subjectum ; *rotunda* , est attributum ; & ambo simul vocantur *termini* , seu *extrema* propositionis ; quoniam ex utraque parte propositionem terminant. Verbum verò substantivum , *est* , dicitur utriusque *copula* , vel vinculum , sine quo nullum foret iudicium. Etenim solum verbum est dictio ab hominibus instituta ad exprimendum iudicium : sive sit verbum substantivum , sive sit adjectivum.

Verbum substantivum dicitur verbum , *sum* , *es* , *est* , quatenus solum iudicium , sive solam connexionem attributi cum subjecto , non actualement rei existentiam significat ; ac vocatur *copula* subjecti & attributi : ut cùm dicitur , *Virgilius est Poëta* , sensus non est Virgilium existere , & esse Poëtam , sed tantùm hoc attributum Virgilio convenire.

Verbum adjectivum est illud , quod , præter iudicium , seu præter connexionem attributi cum subjecto , significat personam , numerum , ac
tempus,

tempus , & insuper actum , vel modum , vel aliquid aliud , quod nomine aliquo exprimi possit. Verbi causâ , cùm dico , *scribo* , non tantum significo iudicium meum , meam personam , numerum singularem , & tempus præsens ; sed insuper quamdam exercitationem quâ characteres in charta delineo.

Omnia igitur verba , excepto verbo , *sum* , *es* , *est* , quatenus solum iudicium significat , sunt adjectiva : imò ipsum verbum , *sum* , *es* , *est* , quatenus actualem existentiam exprimit , dici potest adjectivum : nam cùm dico , *sum* , idem est , ac si dicerem , ego sum existens.

Hinc necesse non est , ut in omni propositione , subjectum , attributum , & copula semper exprimantur ; sed satis est , si verbo contenta intelligantur : nam propositio , ut in Scholis tradi consuevit , vel est *de primo* , vel *de secundo* , vel *de tertio adjacente*.

Propositio de tertio adjacente est ea , inter cuius subjectum & prædicatum exprimitur verbum substantivum , *sum* , *es* , *est* : qualis est ista propositio , *ego sum cogitans*. Dicitur autem *de tertio adjacente* , quia tribus constat vocabulis , quorum tertium , scilicet attributum , duobus prioribus , nempe subjecto & copulæ adjacet.

Propositio de secundo adjacente ea dicitur , in cuius verbo vel subjectum , vel attributum continetur : subjectum quidem , ut , *sum cogitans* ; attributum verò , ut , *mens cogitat*. In quibus propositionibus priori vocabulo alterum adjacet ; nempe vel attributum verbo , ut in priori exemplo ; vel verbum subjecto , ut in exemplo posteriori.

Propositionem de primo adjacente appellant Scholæ eam , in cuius verbo subjectum & attributum inclusa latent , qualis est ista , *cogito* , id est , *ego sum cogitans* : vel , *veni* , *vidi* , *vici* : id est ,

ego fui veniens, videns, & vincens : idque ab hominibus brevitatis causâ institutum est , qui cùm moræ impatientes sint , suamque aliis cogitationem quamprimum innotescere cupiant , sermoni quantum possunt contrahendo studere solent.

Malè autem hujusmodi propositio *de primo adjacente* dicitur : quia verbum, *adjacere*, duo saltem significat , quorum alterum alteri adiaceat. Unde apud Aristotelem libro *de interpretatione* , cap.10. ubi de propositionibus secundi & tertii adjacentis agitur, minimè mentio fit propositionum *de primo adjacente*, quia ubi unicum est vocabulum, ibi unum alteri non adjacet. Sed quod usus obtinuit , non potest facilè rescindi.

Satius est observare attributum propositionis affirmantis *identificari* , ut aiunt, cum subjecto ; sive fieri quid idem ac subjectum : ut cùm dicitur , *Socrates est homo , est Philosophus, &c.* Sensus est Socratem esse hunc hominem , hunc Philosophum , &c. Non tamen idcirco omnis propositio affirmans dici debet *identica* ; sed ea tantum , in qua attributum est quid *idem* ac subjectum , quamvis in illius idea præcisè non contineatur. Exempli causâ , cùm dicitur , *miserericordia Dei est ejus justitia*, fit propositio *identica* : siquidem *miserericordia Dei* est quid idem ac *ejus justitia* ; cùm utraque sit ipse Deus : idea tamen *justitiæ* in idea quam habemus *miserericordiæ* præcisè non continetur : Sed cùm dicitur , *circulus est figura* , idea attributi in idea subjecti clarè & distinctè comprehenditur : unde identificatur quidem attributum cum subjecto ; sed tamen propositio non est *identica*. Nominant insuper propositionem *identicam* & *negatoriam* eam , in qua idem de seipso affirmatur eodem nomine , ut cùm dicitur , *ens est ens, homo est homo, &c.*

CAPUT II.

*De proprietatibus enuntiationis, seu
propositionis.*

PROPRIETATES enuntiationis vocantur attributa quædam secundaria, quæ ipsi conveniunt, & ex illius essentia, seu primario essentiæ attributo descendunt: æque duplicis generis vulgò distinguuntur, *simplices* nimirum, & *complexæ*.

Simplices sunt eæ, quæ uni soli propositioni seorsim spectatæ conveniunt: suntque ipsius *quantitas* & *qualitas*. Complexæ sunt, quæ non possunt nisi pluribus simul sumptis competere: suntque *oppositio*, *aquipollentia*, & *conversio*.

Quantitas propositionis.

QUANTITAS propositionis est ejus *universalitas*, *particularitas*, & *singularitas*, quæ ex propositionis subjecto semper repetitur.

Universalis propositio est ea, cujus subjectum *universaliter* sumitur, hoc est, secundum totam suam extensionem; quod fit cum ei præfigitur una ex his particulis, *omnis*, vel *nullus*: ut, *omnis homo est mortalis*: *nulla res creata est infinita*.

Adverte diligenter id quod præceptum est, nempe universalitatem propositionis ex solo illius subjecto desumi. Nam attributum propositionis universalis affirmantis particulariter semper accipitur, eique particula, *aliquis*, *quidam*, aut alia similis præfixa semper intelligitur. v. g. cum dicitur, *omnis homo est animal*, minimè significatur omnis homo esse omne animal, sed tantum aliquod animal.

Ratio est quia subjectum universale hujusmodi, propositionis, putà, *omnis homo*, sumitur *distributivè*, & pro quolibet homine, non verò *collectivè*, & pro tota hominum collectione: adeo ut sensus illius sit *quemlibet* hominem esse *quoddam* animal.

Idque verum est, non tantum cum genus, quod est universalius specie, de ipsa specie affirmatur, ut in exemplo modo proposito: sed etiam cum subjectum & attributum æqualis sunt extensionis: ut cum definitio de re definita prædicatur. Cum enim dicitur v. g. *omnis homo est animal rationale*, idem est ac si dicatur, *quolibet* homo seorsim acceptus est *quoddam* animal ratione præditum. Nisi fortè quis significare velit totam hominum multitudinem esse totam multitudinem animalium ratione præditorum: quo casu non erit propositio universalis, sed singularis. Tota quippe hominum collectio tanquam quiddam singulare collectivum ab omni alio singulari colectivo secretum concipietur.

In propositione tamen universali negante, aliter se res habet. Nam illius attributum de omni subjecto universaliter ac distributivè sumpto negari non potest, quin generaliter & secundum totam suam extensionem negetur, eique universalitatis nota semper intelligatur præposita. Nam cum dicitur v. g. *nullus homo est lapis*, rectè dici potest nullus homo est ullus lapis: Sive non est ullus homo qui sit ullus lapis. Hinc est quod propositio *negans* in scholis dicitur, *malignantis naturæ*: quoniam attributam generaliter & secundum totam suam *extensionem* removeret à subjecto, licet non secundum totam suam *comprehensionem*. Sed attributum propositionis universalis affirmantis; tametsi secundum totam suam *comprehensionem*, non tamen secundum totam suam *extensionem* de subjecto affirmatur, at secundum extensionem

duntaxat subjecti, quo cum *identificatur*, ut loqui solent Scholæ, seu quo cum fit quid idem.

Particularis propositio est ea, cujus subjectum *particulare* est, seu limitatum his particulis, *aliquis*, *quidam*, & similibus: ut *aliquis homo est dives*: *quidam homo non est sanus*.

Singularis propositio est ea, cujus subjectum est *singulare*, hoc est, ad unum tantum, & determinatum individuum pertinet; ut cum dicitur, *Cicero est Oratorum Princeps*.

His accedit propositio *indefinita*, quæ nempe subjectum habet universale, sed nullâ universalitatis, particularitatis, aut singularitatis notâ affectum; qualis est ista: *homo natus est ad laborem*: non enim dicitur, aut *omnis* homo, aut *aliquis* homo, aut *hic* homo: sed indefinite dicitur homo.

De hac ultima, non secus ac de singulari, quaeritur, utrum ad universalem, an ad particularem revocari debeant? Et quidem vulgaris Scholarum doctrina est, propositionem singularem, ad particularem esse referendam: propositionem verò indefinitam, in materia necessariâ, hoc est, cum attributum necessario convenit subjecto, esse universalem; in materia verò contingenti, particularem. Adversus utramque opinionem sit.

PROPOSITIO PRIMA.

PROPOSITIO singularis revocari debet ad universalem potius, quam ad particularem.

Probat. Ea propositio ad universalem potius, quam ad particularem revocari debet, cujus subjectum secundum totam suam extensionem sumitur.

Atqui subjectum propositionis singularis secundum totam suam extensionem sumitur, cum non possit larius, quam pro uno accipi.

F . iij

Ergo propositio singularis ad universalem potius, quàm ad particularem est revocanda.

Verùm, inquires, propositio singularis majorem habet affinitatem cum particulari, quæ de uno, quàm cum universali, quæ de pluribus dicitur.

Respondeo negando propositionem. Licet enim propositio singularis de uno tantùm dicatur subiecto, ad universalem tamen potius, quàm ad particularem est referenda, quoniam illius subiectum secundùm totam suam extensionem sumitur: unde quamvis ex duabus propositionibus particularibus nihil concludatur in *Syllogistica*, ex duabus tamen singularibus, loco universalium positis, concludi potest in omni figura, ut inferiùs videbimus.

PROPOSITIO SECUNDA.

PROPOSITIO indefinita, non tantùm in materia necessaria, sed etiam in materia contingenti, universalis est, saltem *moraliter*, nisi ubi factum aliquod narratur.

Probatur. Si propositio indefinita esset tantùm universalis in materia necessaria, non verò in materia contingenti, veræ essent istæ propositiones, *homines sunt nigri: ursi sunt albi: Parisini sunt nobiles*: nam aliqui homines sunt nigri, scilicet in Æthiopia; aliqui ursi sunt albi, ut in nova Zembla; & aliqui Parisini sunt nobiles.

Atqui tamen istæ propositiones pro falsis vulgò habentur, quamvis sint in materia contingenti; seu, quamvis earum attributum contingenter tantùm subiecto conveniat.

Ergo propositiones indefinitæ, sive in materia necessaria, sive in materia contingenti sunt universales.

In materia tamen contingenti sufficit ipsis uni-

verſalitas *moralis* ; quæ univerſalitas , quamvis exceptionem aliquam patiat , pro *more* tamen , & conſuetudine hominum , ut talis ab omnibus admitti ſolet. Nam in moralibus requiritur tantum res , ut plurimum , eſſe tales. Unde iſtæ propoſitiones pro veris habentur : *juvenes ſunt inſtantes : mulieres ſunt garrulæ : ſenes ſunt queruli* : quia juvenes , ut plurimum , ſunt inſtantes ; mulieres garrulæ ; ſenes queruli.

Adhiberi tamen poteſt ea diſtinctio , quæ proponitur in Arte cogitandi 2. part. cap. 10. ſcilicet propoſitiones indefinitas , in materia , ut aiunt , *doctrinali* , ſive ubi de doctrina agitur , eſſe univerſales , qualis eſt iſta : *Angeli ſunt incorporei* : eaſdem verò particulares eſſe , ubi factum aliquod narratur ; ut cùm de militibus dicitur Matth. 27. v. 29. *Et plectentes coronam de ſpinis poſuerunt ſuper caput ejus* ; nempe Chriſti Domini. Clarum quippe eſt id non de omnibus , ſed de quibuſdam tantum militibus intelligi oportere.

Qualitas propoſitionis.

Primarium propoſitionis attributum , ſeu differentia ſpecifica ; quæ eſt *qualitas eſſentialis* , quæ reſpondetur quærenti *qualis* ſit propoſitio *eſſentialiter* , eſt ejus affirmatio aut negatio : unde ſequitur illius veritas aut falſitas , quæ qualitas eſt ſecundaria & propria.

Affirmatio aut negatio propoſitionum.

PROPOSITIO affirmans eſt ea , quæ unum de alio enuntiat : negans , quæ unum ab alio removet.

Ex quantitate autem propoſitionum , unâ cum affirmatione , vel negatione , conjunctâ , quadruplex naſcitur propoſitionum genus : ſcilicet *uni-*

versalis affirmans, quæ exprimitur litterâ A ; *universalis negans* , quæ denotatur litterâ E ; *particularis affirmans*, quam exhibet litterâ I ; & *particularis negans* , quam littera O demonstrat , secundum hos versus.

Afferit A, negat E ; verum generaliter amba :

Afferit I, negat O ; sed particulariter ambo.

A..... Omnis homo est justus.

E..... Nullus homo est justus.

I..... Aliquis homo est justus.

O..... Aliquis homo non est justus.

Atque hinc oritur propositionum oppositio, quæ prima est inter proprietates complexas.

Oppositio propositionum.

OPPOSITIO propositionum est earum pugna, vel secundum quantitatem solam, vel secundum qualitatem solam, vel secundum utramque simul, modò idem subiectum habeant, & attributum.


Quæ pugnant secundum quantitatem solam, dicuntur *subalterna* : ut A, & I ; vel E, & O.

Quæ secundum qualitatem solam opponuntur ; vel ambæ sunt universales, & dicuntur *contraria* : ut A, & E : vel ambæ sunt particulares, & dicuntur *subcontraria* : ut I, & O.

Denique quæ pugnant secundum quantitatem, & qualitatem, dicuntur *contradictoriae*, ut A, & O : vel E, & I.

Contradictoriae quoque dicuntur propositiones singulares, quarum una negat, quod affirmat altera : v. g. *Aristoteles est Philosophorum Princeps : Aristoteles non est Philosophorum Princeps*. Contradictio enim, ut vulgò definiunt, est *affirmatio & negatio ejusdem de eodem secundum eadem omnia*.

Schema Oppositionum est hujusmodi.



Legatur ars cogitandi, secundâ parte cap. I. & 2.

Æquipollentia.

ÆQUIPOLLENTIA propositionum est reductio oppositarum propositionum ad eundem sensum, ope particulæ, *non*, quæ proponitur subjecto contradictoriæ; postponitur subjecto contrariæ; præ, & postponitur subjecto subalternæ secundum hunc versiculum.

Pra contradic : post contra : præpostque subaltern.

Itaque A, sive *omnis homo est justus*, reducitur ad sensum contradictoriæ, O, sive, *aliquis homo non est justus*, si præponatur particula, *non*, illius subjecto, hoc modo : *non omnis homo est justus*. Si enim non omnis homo est justus : certè aliquis homo non est justus.

Simili modo, E, sive, *nullus homo est justus*, reducitur ad A, *omnis homo est justus*, postponendo particulam, *non*, ipsius subjecto; putà, *nullus homo*

F v

non est justus, id est, *omnis homo est justus*. Hæ regulæ in Lingua Gallica locum habere non possunt.

Conversio.

CONVERSIO propositionum est mutatio subjecti in attributum, & attributi in subjectum, remanente semper propositionis veritate, sed mutata nonnunquam illius extensione. Hinc duplex est propositionis conversio: altera dicitur *conversio simplex*; alia *conversio per accidens*.

Conversio simplex est ea in qua remanet eadem propositionis quantitas, seu extensio; ut accidit, cum propositio est vel universalis negans, vel particularis affirmans; E, vel, I.

E..... *Nulla materia est res cogitans. Nulla res cogitans est materia.*

I..... *Aliquis homo est justus. Aliquis justus est homo.*

Conversio per accidens est ea, in qua non remanet eadem propositionis quantitas, ut sit cum propositio est A, sive universalis affirmans: quamvis hæc conversio etiam propositioni, E, sive universali neganti convenire possit.

A..... *Omnis homo est animal. Aliquod animal est homo.*

Discrimen verò illud, quod intercedit inter conversionem propositionis universalis affirmantis, & conversionem propositionis universalis negantis, ex eo petitur, quòd attributum propositionis universalis affirmantis non secundum totam suam extensionem affirmetur, sed tantum secundum extensionem subjecti, cui *identificatur*; attributum verò negantis, secundum totam suam extensionem negetur: v. g. cum dicitur, *omnis homo est animal*, sensus non est omnem hominem esse omne animal, sed aliquod animal. Unde converti tantum potest in propositionem particularem: scilicet, *aliquod animal est homo*. Sed cum dicitur, *nullus homo est lapis*, rectè dici potest, *nullus homo est ullus lapis*: unde etiam reciproce

converti potest, *nullus lapis est, nullus homo.*

Observandum tamen, si subjectum & attributum propositionis universalis affirmantis æqualem omnino habeant extensionem, ut cum definitio de re definita prædicatur: tum propositionem converti posse simpliciter: v. g. cum dicitur, *omnis circulus est figura plana & rotunda*, è converso dici potest, *omnis figura plana & rotunda est circulus*. Idque fit, non quod attributum in ea propositione non sumatur particulariter: nam, ut antea dictum est, sensus illius est *quemlibet circulum esse quamdam figuram planam & rotundam*. Sed illud ideo fit, quod attributum hujusmodi secundum se, seu secundum propriam suam significationem, spectatum, non verò quatenus attributum est, tam latè pateat quam subjectum. Unde si desinat esse attributum & evadat subjectum, universaliter sumetur; ut vicissim subjectum quod secundum totam suam extensionem accipiebatur, incipiet sumi particulariter post conversionem, cum evadet attributum.

Tertia est conversionis species admodum impropria, quæ dicitur *per contrapositionem*: cum nempe termini ex *finitis* evadunt *infiniti*, ut loquitur Aristoteles libro de interpretatione, cap. 10. Sive potius *indefiniti*, scilicet per adjectionem particulæ, *non*. Eaque conversionis species propositioni particulari neganti convenit, vel etiam universali affirmanti.

O..... *Aliquis homo non est justus. Aliquis non justus non est non homo.*

Hæ conversionis leges hoc disticho comprehenduntur.

E, I, simpliciter convertitur: E, A, per accid.

A, O, per contrap. sic fit conversio tota.

Quæ omnia doctè simul & dilucidè explicat Ars cogitandi secundâ parte, cap. 13. & sequentibus.

Veritas & falsitas propositionum.

VERA dicitur propositio, quæ dicit quidpiam

F vj

esse, quod est; aut negat esse, quod non est: falsa verò, qua dicit aliquid esse, quod non est; vel negat esse, quod est.

Ut autem veritas vel falsitas propositionis accuratè percipiatur, investigandus est illius sensus, qui partim ex terminorum *suppositione*, ut loqui solent, seu acceptione; partim etiam ex eorum connexionè desumitur. Aliquando enim terminus *supponit*, sive accipitur *materialiter*, id est, pro seipso. Nam hîc *supponere* in significatione neutropassivâ, barbaro Scholarum stylo, idem est, ac poni seu accipi: ut cùm dicitur, *Deus* est vocabulum dissyllabum: vox, *Deus*, supponit materialiter, id est, pro seipsa usurpatur.

Sæpius tamen termini sumuntur *formaliter*, nempe pro formâ animo conceptâ, seu pro rebus significatis & mente perceptis. Idque adhuc multis accidit modis.

Primò enim propositio intelligi potest *literali*, ut vocant & *obvio sensu*, quem nempe verba, sive, *proprie*, sive *metaphoricè*, & per translationem usurpata præ se ferunt: *proprie* quidem, ut cùm dixit Christus Johan. c. 10. v. 30. *Ego & Pater unum sumus*: *metaphoricè* verò, ut cùm dixit idem Salyator Johan. c. 15. v. 5. *Ego sum vitis, vos palmites.*

Secundò intelligi potest sensu mystico & spirituali præsertim in Scripturis Sacris: ut cùm dicitur Deuteronom. cap. 25. v. 4. *Non ligabis os bovis terentis in area fruges tuas.* Sensus literalis & obvius is est, quem verba exprimunt: sensus verò mysticus sive spiritualis, est ille, qui à Spiritu sancto ulterius & præcipuè intenditur, quo significat Pastoribus & sancti Evangelii Præconibus necessarium victum esse præbendum: ut ininterpretatur D. Paulus Epist. 1. ad Corinth. cap. 9. v. 9. Hic sensus spiritualis maximè spectandus est in Scripturis sa-

cris, præsertim Veteris Testamenti, nam propriè & primariò sub typis & figuris à Spiritu sancto nobis ingeritur. Est autem vel *allegoricus*, vel *tropologicus*, vel *anagogicus*. Primus spectat Christum & Ecclesiam militantem: secundus mores: tertius cælestem patriam; sive primus est de rebus credendis, secundus de agendis, tertius de sperandis. De his adi Scripturæ sacræ Interpretes.

3. Sensus litteralis, proprius, & naturalis subtiliùs adhuc dividitur in eum qui vocatur *realis*, aut *identicus*; & in eum qui specialiori ac strictiori modo *formalis* appellatur. Exempli causâ, hæc propositio, *justitia Dei est ejus misericordia*, vera est in sensu *reali* & *identico*: quia revera justitia Dei est quid idem ac ipsius misericordia, nempe est Deus ipse. Sed vera non est propositio in sensu *formali* præcisè & strictè accepto. Etenim justitia præcisè & *formaliter*; sive secundum conceptum ipsius præcisum & separatum ab omni alia forma seu conceptu spectata: vel ut alii loquuntur, justitia, *ut sic*; sive, ut est talis: sive, justitia *reduplicativè* sumpta, nempe reduplicatâ & repetitâ voce, *justitia*, per particulam, *quatenus*, hoc modo: *justitia quatenus justitia*: sive, justitia *quatenus* pœnas infligit: (sic enim accipitur justitia divina cùm misericordiæ opponitur) justitia, inquam, sub hac ratione considerata, non est misericordia etiam *præcisè*, *formaliter*, & *reduplicativè* accepta, nempe *quatenus* parcit. Alius enim est conceptus Dei punientis, alius Dei miserentis, & parcentis.

4. Aliquando vera est propositio in sensu *composito*, & falsa in sensu *diviso*, aut vice versâ. Sensus compositus, sive sensus compositionis est ille quo conjungitur unus actus cum negatione sui, vel cum actu opposito: sensus verò divisionis est quo unus actus dividitur aut separatur à sui negatione,

vel ab actu opposito, & componitur seu conjungitur tantum cum potentia ad aliquid oppositum. Exempli causâ, hæ propositiones : *Qui loquitur non potest non loqui* : *Qui amat, non potest odisse* : hæ, inquam, veræ sunt in sensu composito : quia non potest simul *componi* actus loquentis cum negatione locutionis; vel actus amoris cum actu odii opposito; vel demum una hypothesis cum alia hypothesis prorsus contraria. Sed falsæ sunt *in sensu diviso*, quo nempe *dividitur* negatio actus ab actu; vel unus actus ab actu opposito; aut hypothesis ab alia hypothesis contraria. Nam qui loquitur, etiam dum loquitur, retinet potentiam non loquendi. Qui odit; etiam dum odit, amandi potentiam conservat. Unde actus aliquis stare potest cum potentia ad aliquid oppositum : nempe vel ad sui negationem, vel ad actum contrarium, licet simul cum sui negatione, vel cum actu contrario poni nequeat.

Huc pertinet *distractio* terminorum, per quam nimirum referuntur termini ad aliud tempus, quàm quod per verbum importatur. Exempli causâ, in hac Christi propositione, Matth. cap. XI. v. 5. *cæci vident*, subjectum, *cæci*, distrahitur à tempore præsentis ad præteritum : nam hic est sensus propositionis, qui modò cæci erant, nunc vident.

§. Propositio potest esse vera *in sensu colectivo*, & falsa *in sensu distributivo*, aut vicissim. Verbi gratiâ, quod dicit Horatius Epist. 2. lib. 1. *Nos numerus sumus*, id verum est in sensu duntaxat colectivo : id est, nos, omnes simul & collectivè sumpti, non singuli seorsim & distributivè accepti, sumus numerus, seu turba. E contrariò, quod ait Dido apud Virgilium lib. 4. *Æneid. Omnibus umbra locis adero*, intelligi debet in sensu distributivo, scilicet singulis locis seorsim & dis-

tributivè, in quibus futurus esset Æneas; non verò de omnibus locis simul & collectivè spectatis nam umbra omnibus simul locis adesse non potest.

6. Cùm terminus in propositione fumitur *universaliter*, seu *distributivè*, necesse est aliquando ad veritatem propositionis, ut secundùm *distributionem commodam*, sive rei de qua fit sermo, *accommodatam*, & convenientem accipiatur; non verò secundùm distributionem integram & perfectam, quæ omnem limitationem aut restrictionem excludat. Hujus rei exemplum affert S. Augustinus, lib. de Prædestin. Sanctorum; num. 14. aliàs cap. 8. his verbis. *De aliquo literarum magistro, qui in Civitate solus est, dicimus, omnes iste hinc literas docet, non quia omnes discunt sed quia nemo, nisi ab illo discit, quacumque ibi literas discit.* Similiter cùm omnia per verbum facta dicuntur, intelligenda sunt omnia, quæ facta sunt, non ipsum verbum, quod factum non est, ut explicat idem S. Augustinus Tract. 1. in Johannis Evangel. num. 11.

Item necesse est quandoque ut terminus communis intelligatur tantùm *de generibus singulorum*; non verò *de singulis generum*. Quod etiã ostendit idem S. Doctor in Enchiridio de Fide, Spe & Charitate num. 27. aliàs cap. 103. hoc Christi sermone ad Phariseos converso, Luc. 11. v. 42. *decimatis mentham & rutam & omne olus*: non enim Pharisei singula omnis generis olerum individua decimabant; sed ex omni olerum genere decimas persolvebant.

Hæc & alia hujusmodi observanda sunt à Logicis, ut de propositionum veritate & falsitate ferant judicium.

De terminorum connexionione; ex qua etiã propositionum veritas aut falsitas pendet, dicemus capite sequenti.

Nunc autem quæritur, utrum, omnis planè propositio sit vera, vel falsa, qua de re sit.

P R O P O S I T I O T E R T I A.

OMNIS planè propositio Logica, sollicitæ quæ judicium aliquod exprimit, vera est aut falsa.

Probatur. Omnis propositio Logica, vel consentanea est objecto, quod significat, & cognitioni, cujus est interpret; vel utique est dissentanea.

At si objecto & cogitationi consentanea sit, est vera, si dissentanea, est falsa.

Ergo omnis planè propositio Logica, vera est, aut falsa.

Responsiones ad objecta.

OBJICIES primò, *propositiones practicas*, quæ scilicet operari dicuntur id, quod significant, cujusmodi sunt propositiones sacramentales, nec veras esse nec falsas, Primò quidem non sunt veræ, quia nullum, antequam proferantur, habent objectum. Secundò, non sunt falsæ, quia objectum suum operantur: adeoque non omnis propositio vera est aut falsa.

Respondeo propositiones practicas esse veras: quia non prius sunt propositiones propriè dictæ, quàm cum sunt prolatae: nec prius ultima earum syllaba prolata est, quàm veritatem suam consequuntur, & cum re significata congruunt.

Objicies secundò, propositiones quæ dicuntur *insolubiles*, nec veras esse, nec falsas: nam sunt ejusmodi, ut ex earum veritate falsitas consequatur, & vicissim: unde vocantur propositiones *se-ipsas falsificantes*. Sic si repentè dixerim, *mentior*, cum antea locutus non fuerim: si vera est ista pro-

positio , tum simul est falsa , non enim mentior , cum verum dicam : si falsa est ; tum simul est vera ; nam verum est me mentiri.

Respondeo hujusmodi propositiones , quæ insolubile dicuntur , esse potiùs *Grammaticas* quàm *Logicas* : quia syllabis & dictionibus constant ; sed nullum propriè judicium exprimunt. Etenim quis potest esse sensus istius propositionis , *mentior* , nisi priùs aliqua verba protulerim ? Idem de aliquot aliis , quas vulgò circumferunt , non magni certè momenti , sentiendum.

Major difficultas occurrit circa propositiones singulares sibi contradicentes de futuro contingenti , quales sunt ex , *Petrus cras disputabit* ; *Petrus cras non disputabit* : utrum scilicet earum altera definitè vera sit , altera falsa.

Agitur de propositionibus singularibus : nam si ambæ universales fuerint , cum sint de contingenti falsæ meritò erunt habendæ : v. g. *omnis homo cras curret* , *nullus homo cras curret* : aliqui enim current ; aliqui non current. Unde si ambæ propositiones particulares sint ; ambæ futuræ sunt veræ : ut *aliquis homo cras curret* : *aliquis homo cras non curret*.

Item si propositiones singulares sint de præterito aut de præsentii. v. g. *Petrus heri disputavit* : *Petrus heri non disputavit* : vel , *Petrus nunc disputat* , *Petrus nunc non disputat* ; minimè dubium est quin earum altera determinatè vera sit , altera falsa.

Imò si ambæ sint de futuro necessario , non de contingenti : v. g. *Petrus cras eam habebit sortem : quam Deus voluerit* ? *Petrus cras non habebit eam sortem , quam Deus voluerit* : prior quoque definitè vera est , posterior falsa : nam fieri non potest , ut Petrus cras eam non habeat sortem , quam Deus voluerit.

Igitur quæstio est de propositionibus singularibus sibi contradicentibus circa futurum contingens : cui quæstioni ut satisfaciamus , sit.

PROPOSITIO QUARTA.

EX duabus propositionibus singularibus sibi contradicentibus de futuro contingenti , neutra definitè vera est , neutra definitè falsa , comparatè ad scientiam seu cognitionem nostram spectata.

Probatur. Earum propositionum neutra definitè vera est , neutra definitè falsa , comparatè ad cognitionem nostram , quarum neutra determinatè à nobis pronuntiari potest vera , aut falsa.

Atqui duarum propositionum singularium sibi contradicentium de futuro contingenti neutra determinatè pronuntiari potest à nobis vera , neutra falsa ; cum utriusque veritas aut falsitas nos lateat.

Ergo ex duabus propositionibus singularibus sibi contradicentibus de futuro contingenti , neutra definitè vera est , aut falsa , comparatè ad cognitionem nostram.

PROPOSITIO QUINTA.

GENERATIM tamen pronuntiare possumus alterutram earum propositionum esse veram , alterutram falsam.

Probatur. Earum quippe propositionum alterutra vera est , alterutra falsa , quæ nec ambæ simul veræ , nec ambæ simul falsæ esse possunt.

Atqui duæ propositiones singulares sibi contradicentes de futuro contingenti , nec ambæ simul veræ esse possunt , nec ambæ simul falsæ : quia duo contradictoria simul vera aut falsa esse ne-

queunt , alioqui non impossibile foret idem simul esse , & non esse : quod absurdum est.

Ergo generatim pronuntiare possumus ex duabus propositionibus singularibus sibi contradicentibus de futuro contingenti , alterutram esse veram , alterutram falsam ; licet utra vera sit , utra falsa definiri à nobis non possit.

PROPOSITIO SEXTA.

EX duabus propositionibus singularibus sibi contradicentibus de futuro contingenti altera in se definitè vera est , altera definitè falsa.

Probatur. Earum propositionum altera in se definitè vera est , altera definitè falsa , quarum altera est consentiens cum objecto suo , altera dissentiens.

Atqui duarum propositionum singularium sibi contradicentium de futuro contingenti , altera consentiens est cum objecto suo , altera dissentiens : v. g. cum dicitur , *Petrus cras disputabit ; Petrus cras non disputabit* : prima propositio est consentiens cum objecto suo , si Petrus sit cras disputaturus ; est verò dissentiens , si non sit disputaturus. Idem de secunda propositione statuendum.

Ergo ex duabus propositionibus singularibus sibi contradicentibus de futuro contingenti , altera in se definitè vera est , altera definite falsa.

Et sanè cum Christus dixit Petro , Matth. cap. 26. *ter me negabis* , & respondit Petrus , *non te negabo* , propositio Christi erat determinatè vera ; quia consentiens erat cum objecto futuro , nempe cum negatione prævisa : propositio verò Petri erat falsa , quoniam eidem objecto erat dissentiens. Similiter Prophetæ multa per revelationem divintam cognita , multò antequam acciderent , certò & determinatè annuntiaverunt ; & vetus

Testamentum est novi Testamenti signum : quandoquidem, ut ait Apostolus Epist. 1. ad Corinth. cap. 10. v. 11. *Omnia in figura contingebant illis*. Atque ita duarum propositionum singularium sibi contradicentium de futuro contingenti, altera in se definitè vera est, altera definitè falsa.

Responsiones ad objecta.

O P P O N E S auctoritatem Aristotelis aientis cap. 9. libri de interpretatione, duarum propositionum singularium sibi contradicentium de futuro contingenti, neutram esse definitè veram, neutram falsam.

Respondeo explicando textum Aristotelis Neutra ex istis propositionibus est determinatè vera, neutra falsa comparatè ad cognitionem nostram ; quia definire non possumus utra vera sit, utra falsa, concedo : neutra determinatè vera est, aut falsa in se ipsâ, seu ratione objecti futuri, vel non futuri, nego.

Verùm, inquires, illa propositio non potest dici determinatè vera, aut falsa, etiam in se ipsâ, quæ non habet objectum determinatum.

Atqui propositio singularis de futuro contingenti non habet objectum determinatum : v. g. cum dicitur, *Petrus cras disputabit* ; objectum istius propositionis non est determinatum ; hoc est, disputatio Petri determinata non est ; neque in seipsâ, cum nondum fiat ; neque in suâ causâ, nempe in voluntate Petri, cum Petrus se ad disputandum, vel non disputandum nondum ; determinaverit.

Ergo propositio illa non potest dici determinatè vera, aut falsa, etiam in seipsâ.

Respondeo distinguendo maiorem. Illa propositio non potest dici determinatè vera, aut falsa,

etiam in seipsâ , quæ non habet objectum determinatum , si propositio sit de præterito , aut præsentis tempore , concedo : si sit de futuro , nego. Quare concessâ minore , nego consequentiam. Quippe ad veritatem propositionum de futuro , minimè requiritur , ut objectum sit determinatum : sed satis est illud esse determinandum , aut determinatè futurum. Est autem determinatè futurum tum in se , nempe si reverâ exiturum est ; tum in suâ causâ , licèt nunc indifferenti , si tandem aliquando ad id se determinatura sit.

Quod enim dicunt Thomistæ , tum demum eam propositionem , *Petrus cras disputabit* , fore veram , cùm Petrus actu disputabit , hoc sanè nihil est : tum enim vera non erit ista propositio , *Petrus cras disputabit* : sed hæc , *Petrus disputat*.

Respondent alii distinguendo minorem , & ejus probationem ; hoc modo. Propositiones singulares de futuro contingenti non habent objectum determinatum *in actu exercito* , & pro tempore præsentis , concedunt : *in actu signato* , seu pro tempore futuro , quod per verbum designatur , negant : quare negant consequentiam.

Igitur inquirunt , propositio singularis de futuro contingenti , quâ Petrus v. g. dicitur cras disputaturus , non habet objectum determinatum *in actu exercito* , & pro tempore præsentis , quia Petrus non exercet hodie actum disputationis , cùm dicitur cras disputaturus : sed habet objectum determinatum *in actu signato* , & pro tempore futuro , quod tempus per verbum signatur , seu significatur , & denotatur : nam quamvis voluntas Petri sit causa libera , & proinde nunc indifferens ad disputandum vel non disputandum , ipsa tamen alterutrum crastina die electura est ; ac videt Deus quàm in partem sese sit inflexura.

Instabis. Si objectum propositionis de futuro

contingenti sit certò ac determinatè futurum, certè necessariò est futurum, non contingenter, quod absurdum est.

Respondeo negando propositionem. Aliud enim est aliquid *certò ac determinatè* esse futurum ; aliud *necessariò* esse futurum.

Illud *necessariò* futurum dicitur , quod ita futurum est , ut non possit non esse futurum. Illud autem *certò ac determinatè* est futurum , quod reverà quidem futurum est ; sed tamen potest non esse futurum. Exempli causâ , nunc scribo ; & heri pronuntiare quis poterat *certò ac determinatè* me hodiernâ die esse scripturum : non tamen necessariò nunc scribo : nam potui , antequam scriberem, abstinere à scribendo ; & nunc dum scribo, penès me retineo non scribendi potestatem.

Igitur quod *certò ac determinatè* futurum est, non semper *necessariò* est futurum.

Cætera, quæ ulterius objici solent , ex scientiâ Divinâ repetuntur : & propterea convenientius explicabuntur in Metaphysica , ubi de scientiâ Dei disputabimus.

C A P U T I I I .

De variis propositionum speciebus.

N O N repetimus hoc loco propositionum divisionem , tum ratione *quantitatis* , nempe in *universalem* , *particularem* , *singularem* , & *indefinitam* : tum ratione *qualitatis* , scilicet in *affirmantem* , & *negantem* ; *veram* & *falsam* : de quibus actum est capite superiori : sed earum duntaxat materiam & formam spectamus, ut præcipuas illarum species hinc ducamus.

Propositio igitur ratione *materiae* seu *terminorum*, alia est *simplex*, alia *complexa*, alia *composita*.

Propositio *simplex* ea dicitur, quæ ex simplicibus, seu incomplexis terminis constat, ut *Deus est perfectus*.

Complexa est ea, cujus alteruter, vel uterque terminorum est complexus, seu plures ideas complectitur: ut cum dicitur, *homo, qui Deum diligit, legem implet*: subjectum istius propositionis, nempe, *homo qui Deum diligit*, est complexum, & includit in se aliam propositionem, quæ vocatur *incidens*, scilicet, *qui Deum diligit*, cujus propositionis subjectum est relativum, *qui, quæ, quod*: dicitur autem *incidens*, quod in aliam incidat propositionem, quæ vocatur *primaria*, seu *principalis*, scilicet, *homo qui Deum diligit, legem implevit*. Aliquando etiam solum attributum est complexum, aliquando uterque terminus complexus est.

Nota propositionem incidentem esse vel *explicativam*, vel *determinativam*. Tunc explicativa est, cum id tantum explicat, quod in idea generali ipsius subjecti, vel attributi continetur. Exempli causâ, cum dicitur, *homo, qui propter Deum creatus est, debet indefinenter in Deum tendere*: hæc propositio incidens, *qui propter Deum creatus est*, explicat tantum id quod homini generatim sumpto, seu cuilibet homini necessario convenit. Unde quamvis è propositione *principali* subduceretur, nihil tamen ex ipsius veritate decederet. Nam vera est hæc propositio, *homo debet indefinenter in Deum tendere*. At *determinativa* est, si quem afficit, terminum restringat: ut cum dicitur, *homo, qui Deum diligit, legem implet*: hæc propositio, *qui Deum diligit*, determinat hominis significationem, & eam restringit ad solos homines qui Deum diligunt. Unde non remaneret propositio-

nis principalis veritas , si propositio incidens ex ea removeretur : siquidem vera non est hæc propositio , *homo legem implet.*

Non est onittendum complexionem propositionis, non in subjectum duntaxat vel attributum ; sed aliquando etiam in affirmationem aut negationem incidere : scilicet cum affirmatio aut negatio aliquo additamento fulcitur : ut si dicam , *certum est terram esse rotundam* , non simpliciter affirmo rotunditatem de terra , sed insuper addo id certum esse. Similes sunt ex propositiones : *contendo mentem humanam esse immortalem : sapientes docent Deum esse colendum : fieri non potest ut peccata sint impunita* : & omnes demum propositiones modales, quas mox attingemus. In iis quippe omnibus aliquid ponitur tanquam fultura quædam affirmationis aut negationis, ut clarum est.

Verum accidit quandoque ut propositio principalis ab incidente in huiusmodi enuntiationibus vix discerni queat. Exempli causâ , si hanc propositionem proferam , *omnes Philosophi Scholastici docent gravia corpora in terram sponte, ac nullo impellente decidere* : scopus meus est , vel affirmare *gravia corpora sponte deorsum ferri* : & tunc prior pars scilicet , *omnes Philosophi scholastici docent*, erit propositio incidens : vel asserere tantum hanc esse sententiam Philosophorum scholasticorum ; & tunc secunda pars , nempe *gravia corpora sponte deorsum ferri* , erit pars attributi propositionis principalis. Quod quidem ex antecedentibus & consequentibus est dijudicandum.

Circa complexas propositiones adeatur Ars cogitandi , secundâ parte , capitibus 3. 4. 5. & 6. ubi multa scitu dignissima præcipiuntur.

Propositio *composita* est ea quæ ex multiplici subjecto , vel ex multiplici attributo constat ; vel simul multiplex habet subjectum , & attributum ;
 eaque

eaque duplicis est generis: vel enim illius compositio omnibus patet, & ideo *explicita* vocatur; vel ista compositio paulò est obscurior; unde dicitur in Scholis propositio *exponibilis*, melius diceretur *explicabilis* & *implicita*.

Explicitæ propositionis sex sunt species: scilicet *copulativa*, *disiunctiva*, *conditionalis*, *causalis*, *relativa*, *discretiva*.

Copulativa dicitur, quæ plura habet subjecta, vel plura attributa, per copulam affirmantem, &, vel negantem, nec, connexa: ut *vita, & mors in manibus lingua*.

Disiunctiva vocatur ea, cujus membra per particulas disiunctivas, *vel*, *aut*, &c. colligantur: v. g. *aut amat, aut odit mulier, nihil est tertium*.

Conditionalis est ea, quæ duas habet partes per particulam conditionalem, *si*, conjunctas: ut cum dico, *si mens hominis spiritalis sit, est immortalis*. Prima pars in qua conditio, *si*, collocatur, dicitur, *antecedens*, aut *prius*: secunda dicitur *consequens*, aut *posterius*, aut *sequela*.

Causalis est ea, quæ duas habet propositiones per particulam causalem, *quia*, *ut*, &c. colligatas: ut cum dicitur, *va vobis divitibus, quia mercedem vestram accepistis*.

Relativa est ea, quæ quamdam relationem, aut respectum includit: v. g. *ubi est thesaurus tuus, ibi est & cor tuum*.

Discretiva denique est ea, quæ diversa iudicia exprimit per particulas, *sed tamen*, aut similes distincta: v. g. *veritas fatigari potest; non tamen vinci potest*. Legatur Ars cogitandi, secundâ parte cap. 7.

Implicitæ quoque propositionis quinque species numerantur, *exclusiva*, *exceptiva*, *comparativa*, *inceptiva*, *desitiva*.

Exclusiva est ea, quæ attributum convenire ait alicui subjecto, exclusis omnibus aliis per dictiones

exclusivas, *duntaxat, solum tantummodo, &c.* v. g. *nobilitas sola est, atque unica virtus*; id est, virtus est nobilitas; nec ulla alia præter ipsam extat nobilitas. Unde hæc propositio composita est, & duo complectitur judicia, licet ipsius compositio cuilibet non sit obvia.

Exceptiva est, cum attributum affirmatur, aut negatur de subjecto secundum totam suam extensionem, exceptis quibusdam istius subjecti inferioribus, per particulas, *nisi, præter*; &c. ut cum dicitur, *omnes, nisi poenitentiam egeritis, peribitis.*

Comparativa est ea, quæ comparisonem unius cum alio exprimit: ut cum dicitur, *potius mori quam fœdari.* Ut autem fiat comparatio inter duos, non semper necesse est positivum ipsius comparativi utrique comparisonis membro convenire: v. g. ut aliquid dicatur alio melius, non semper opus est illa duo esse bona: nam rectè dicitur Ecclesiastici cap. 40. v. 29. *melius est mori quam indigere*, licet utrumque tanquam malum haberi possit. Plerumque tamen non instituuntur comparationes nisi inter ea, quæ positivum gradum participant: v. g. nix dici non solet candidior attramento, quoniam attramentum candorem non participat.

Inceptiva aliquid tum primum esse denotat: ut cum dicitur, *advesperascit*: vel cum Vespasianus irridens apotheosin, quæ post obitum decorari solebant Imperatores, *primâ morbi accessione* dixisse fertur, apud Suetonium, in ejus vita, cap. 23. *ut puto, Deus fio*: id est, jam jam incipiam vocari Deus.

Desitiva ostendit aliquid tum primum non esse, ut cum de impio exaltato ait Propheta Rex Ps. 36. v. 36. *transivi, & ecce non erat*, id est, repente esse desierat. De his omnibus consuli potest Ars cogitandi, secundâ parte, cap. 8.

Verum hujusmodi propositiones tametsi obscuræ, possunt tamen in mediocri labore vel indoctis ex-

plicari : Sed occurrunt aliæ nonnullæ , quarum
 sensum longe difficilius est assequi. Nam ut omit-
 tam ænigmata , & propositiones omnes ambiguas
 ac dolose implicitas , easque ; quæ vulgò *insolubi-*
les vocantur , de quibus mentionem fecimus : Si
 quis legat in Bullis Pontificiis multas proposi-
 tiones , quæ prius enumeratæ fuerint , damnatas esse
 generatim , & *in globo* , ut loquuntur , tanquam hæ-
 reticas , erroneas , suspectas , temerarias , scandalosas ,
 & *in pias aures offensionem immittentes respectivè*.
 Cum hoc vocabulum , *respectivè* , quo primus usus
 fuisse dicitur Leo Papa X. contra errores Lutheri ,
 significet notas illas seu censuras , vel ut loquuntur ,
qualificationes , scilicet *hæresis* , *erroris* , *temeritatis* , &c.
 quasdam tantùm ex iis propositionibus *respicere* ,
 non omnes ; adeo ut non possint omnes & singulæ
 dici seu *qualificari* hæreticæ , vel erroneæ , &c. Sed
 aliquæ duntaxat , *hæretica* , aliæ *erroneæ* , aliæ *teme-*
raria , &c. Certè , si habeatur tantùm ratio verbo-
 rum in Bullis contentorum , non potest lector af-
 firmare quænam sint hæreticæ , quænam erroneæ ,
 vel suspectæ aut temerariæ , &c. Cum id à Ponti-
 ficibus non sit declaratum. Unde in hujusmodi
 damnationibus tutius est nihil asserere , præter id
 quod est expressum.

Jam verò , si enuntiatio , seu propositio spec-
 tetur ratione formæ , id est , ratione connexionis
 attributi cum subjecto , dividitur in *necessariam* ,
contingentem , *possibilem* , & *impossibilem*.

Necessaria est ea , cujus termini sunt necessa-
 riò conjuncti , sive , cujus attributum in idea cla-
 ra & distincta subjecti continetur : ut , *circulus est*
rotundus : non potest enim rotunditas à circulo se-
 parari , alioqui non esset circulus.

Contingens est ea , cujus termini sunt tantùm
 contingenter cohærentes , & possunt non esse con-
 juncti : ut *aliquis homo est medicus* : potest enim ho-
 mo sine medicina stare.

Possibilis dicitur ea , cujus termini possunt simul consistere : ut , *Petrus erit doctus*.

Impossibilis vocatur , cujus termini nunquam conjungi possunt : ut , *mens hominis est corporea* : id enim neque esse, neque concipi potest.

Istæ autem enuntiationes vel sunt *absoluta* , vel *modales*.

Absoluta est ea , in qua non exprimitur modus, quo attributum convenit subjecto : ut cum dicitur, *circulus est rotundus* : non enim exprimitur an *necessario* , an *contingenter* tantum sit rotundus.

Modalis dicitur , in qua exprimitur modus, quo attributum affirmatur vel negatur de subjecto : ut cum dicitur, *necesse est circulum esse rotundum*. Hæc propositionum species inter complexas est referenda ut modò dictum est.

Ii verò modi numerari solent quatuor, scilicet, *necesse*, *contingens* , *possibile*, & *impossibile* : de quibus vide Artem cogitandi, secundà parte, cap.6.

C A P U T I V.

De definitione & divisione , qua præcipua sunt orationis , seu enuntiationis species à Logicis spectanda.

EX omnibus enuntiationum speciebus , quas Logica considerat , nullæ ad comparandas disciplinas majoris sunt usûs , quàm *definitio* & *divisio* , quas quidam non *propositiones* , sed *orationes* nominandas volunt. Oratio enim, inquit, est quælibet dictionum , seu vocabulorum compositio, ad significandam quandam mentis cogitationem instituta : propositio verò est oratio , quæ judicium aliquod significat. Verùm hoc dissidium,

quod tanti non est , solâ ambigui sermonis explanatione evanescit. Etenim si definitio , & divisio seorsim à subjecto definito , & divisio spectentur , sunt quidem orationes potius ideam ipsius subjecti definiti , & divisi pluribus vocabulis exprimentes , quàm propositiones verum judicium enuntiantes : v. g. cum dicitur , *animal rationis particeps* , non fit judicium , sed exprimitur perceptio complexa , pluribus vocabulis exposita. Idem de divisione est cogitandum. Sed si definitio , ac divisio cum re definitâ & divisâ jungantur per verbum , est , ut conjungi solent ; v. g. si dicatur , *homo est animal rationis particeps* : vel , *omnis substantia est spiritalis* , aut *corporea* , minimè dubium est , quin fiat propositio , cum tunc aliquod exprimat judicium. His prænotatis , dicendum primo loco.

De definitione.

DEFINITIO generatim spectata , est oratio quæ quod in re , vel in nomine obscurum est , exponit : unde alia est definitio rei , alia definitio nominis.

Definitio nominis est ea , quâ determinat aliquis quid per nomen aliquod intelligat : ut si dicam per hanc vocem , *elaterium* , intelligo vim quâ corpus pressum , putà arcus tensus resilit , sive in pristinum statum restituitur ; parùm sollicitus , in quo virtutis istius essentia seu natura consistat , de qua dicemus in Physica.

Hæc definitio nominis magni sanè est usûs , & extra omnem controversiam posita : unde principii loco à Mathematicis sumitur , & ab iis omnibus , qui curam demonstrationum habent. Nam , ut observavimus , vanæ sapiens contentiones ex vocum *homonymia* , seu ambiguitate nascuntur , nisi ex sic antea fuerint definitæ , ut nulla in ip-

sis ambiguitas relinquatur, & quæstionis status clarè ac distinctè percipiatur. Quamobrem Tullius lib. 1. de Officiis, *omnis, inquit, quæ à ratione suscipitur de aliqua re institutio, debet à definitione proficisci, ut intelligatur quid sit id, de quo disputatur.* Hoc autem de nominis, non de rei definitione intelligendum, cum hæc in contentionem vocari possit, non illa.

Definitio quippe rei, est *oratio explicans naturam rei*: qualis est definitio temporis, ab Aristotele allata lib. 4. Physic. cap. 16. quæ tempus dicitur *numerus, seu mensura motûs.* Potest autem hæc definitio controversi, imò falsa redargui: ostendimus enim in Physica motum esse mensuram temporis non vicissim.

Hæc rei definitio duplex distinguitur; altera essentialis, altera accidentaria, quæ & *descriptio* vocatur.

Definitio essentialis est ea, quæ fit per principia rei essentialia, nempe per genus & differentiam: species enim physica, seu natura completa, genere & differentiâ continetur, ut superius explicatum est. Sic si definiatur triangulum, *figura tribus lineis contenta*, hæc definitio totam illius naturam comprehendet: nam quod *figura* dicitur, hoc illius est genus; quod *tribus lineis contenta*, ad differentiam illius pertinet: hæcque definitio & rei & nominis est, ut omnibus passim mathematicis definitionibus usu venit.

At definitiones Physicæ rarò nominis simul & rei definitiones dici possunt: imò nullæ propemodum sunt accuratæ rerum physicarum definitiones, cum genus proximum, & differentia specifica rei physicæ sæpius nos fugiant; ac multiplex plerumque sit, non unicâ rei physicæ differentia: proindeque multæ illius proprietates sunt congerendæ, ut ab aliis rebus secernatur. Quis autem omnes

illas differentias , aut proprietates certò sibi perspectas esse affirmabit ? Quòd si una tantùm affectatur , ut factum videmus in celebri illa hominis definitione , quâ homo *animal rationale* definitur , multò incertius erit , an ea differentia specifica sit & reciproca cum re definita. Verbi gratiâ , quis certò affirmabit *rationale* sic converti cum homine , ut ambo de se mutuò secundùm totam suam extensionem dicantur : putâ , *omnis homo est rationalis : & omne rationale est homo*. Ea enim simpliciter converti , seu reciproca esse diximus , quæ de se mutuò universaliter , seu secundùm totam suam extensionem affirmantur , ut *omnis mens est cogitans* , & reciprocè , *omne cogitans est mens*.

Porro si per *rationalē* , seu rationis particeps , intelligatur substantia cogitans ; certè non solus homo est rationalis , sed Deus quoque , & Angelus sunt rationales , cùm sint substantiæ cogitantes ; neque adeo rationale erit differentia quâ homo à Deo & Angelo secernatur , sed potius erit quid genericum omnibus spiritibus , Deo , Angelo , & humanæ menti commune. Quare Boëtius lib. de persona & natura , ubi definit personam *rationalis natura individuum substantiam* , hoc nomen convenire ait Deo , Angelo , & homini ; quoniam Deus , Angelus , & homo sunt rationales , id est , spirituales , seu cogitantes. Deinde si rationalitas sumatur pro principio , ut vocant , *discurrendi* , seu colligendi unum ex alio , non adhuc soli homini , sed Angelis quoque tribui poterit , cùm ii ratiocinentur , seu unum ex alio concludant : nam vulgò docent Theologi cacodæmonem idcirco ad Christum tentandum accessisse , Matth. cap. 4. ut ex ipsius responsis colligeret verusne esset Messias , nec-ne. Itaque ut rationale cum homine convertatur ; id est , ut *omnis homo dicatur rationalis* , & è converso *omne rationale sit homo* ,

necesse omnino est , ut quemadmodum Scholæ loquuntur , rationalitas pro principio ratiocinandi *dependentè à sensibus* sumatur : quæ sanè acceptio cum principiis à nobis constitutis consistere non potest , cum multa sint ratiocinationi nostræ subiecta , quæ per sensus nunquam transiere , ac ratiocinandi principium etiam circa res ipsas corporeas , non à sensibus , aut organis corporeis oriatur , sed à mente sola.

In homine igitur , qui partim spiritalis est , partim corporeus , non aliud propriè quærendum videtur genus , quàm *substantia* , ut superius dictum est : non alia differentia , quàm quòd *ex corpore & mente physicè connexis constet*. Etenim si *spiritalis* dicatur esse illius genus , id quidem verum est , ubi cum rebus spiritalibus confertur , nam in natura spiritali cum iis convenit : at per eandem naturam à rebus merè corporeis secernitur. Si verò *corpus* , aut *animal* , genus illius esse perhibeatur , & *rationalè* , illius differentia ; id etiam verum est , si comparetur cum rebus corporeis , non si cum spiritalibus componatur : nam in eo à rebus merè spiritalibus distinguitur , quòd corporeus sit , seu corpore organico , ut alia quævis animalia , donatus.

In cæteris verò rebus physicis differentiam ex certâ potiùs accidentium , aut proprietatum congerie ducere oportet , quàm irritò labore formam aliquam simplicem , seu differentiam specificam ac reciprocam , quæ vel nulla est , vel detegi non potest , inquirere. Nam etiamsi fortè congeries accidentium , & proprietatum intimam rei corporeæ naturam non semper exprimat , rem tamen menti exhibet , & ab omnibus aliis rebus distinguit. Definitionem illam accidentariam , seu descriptionem potissimum adhibent Botanici , dum

plantas per varia accidentia , aut proprietates describere solent.

Jam ut rectè fiat definitio ; tres præscribuntur leges.

Prima , ut definitio sit clarior re definitâ : alio qui per eam res obscurarentur magis , quàm illustrarentur. Unde quæ per se sunt notissima & apertissima , ea non egent definitione , ut jam admonuimus.

Secunda lex in eo posita est , ut definitio sit brevis, nihilque in ea redundet. Adversus utramque hanc legem peccant multæ Aristotelis definitiones, quæ nec claræ sunt , nec breves : qualis est definitio naturæ , vel motûs , vel animæ , & similes , de quibus in Physica.

Tertia lex est , ut definitio sit reciproca cum re quæ definitur : hinc illa usu trita axiomata, *cui convenit definitio ; convenit & definitum : cui repugnat definitum , repugnat definitio*. Contra hanc legem peccant caloris & frigoris definitiones Aristotelicæ , quia non sunt cum rebus definitis reciprocae, ut in Physica liquebit. Nunc pauca sunt adjicienda.

De divisione.

DIVISIO est totius in suas partes distributio : quod quidem totum , si sit *potentiale* , seu universale , quod à Latinis dicitur *omne* ; nempe quod partes habet *sub se* , quæ *subjectiva* dicuntur , ut genus habet sub se species , & species habeat individua ; illius divisio retinet nomen genericum divisionis : sed si totum sit *actuale* , & singulare , quod scilicet habet partes *in se* , quæ dicuntur *actuales* , ex quibus constat ; rursus ex partes vel sunt essentielles, ut corpus & mens respectu hominis , & divisio totius in illas , nomen adhuc

genericum conservat ; vel istæ partes sunt *integrantes*, sive ut loquuntur, *entitativa*, nimirum sine quibus tota aliqua entitas integra esse non potest ; & divisio ista *partitio* dicitur, ut partitio corporis humani in caput, truncum, & artus.

De divisione totius potentialis agunt præsertim Logici, illiusque quatuor species numerant.

Prima est, quâ distribuitur genus in suas species : v. g. substantia in *mentem*, & *corpus*.

Secunda, quâ genus per differentias suas dividitur : ut cum dicitur, omne animal est, vel *rationis particeps*, vel *ratione destitutum*.

Tertia, cum subjectum commune dividitur per varia accidentia, quæ seorsim suscipere potest : ut cum dicitur, omne corpus vel movetur vel quiescit.

Quarta, cum accidens per varia subjecta, quibus inesse potest, distribuitur : ut cum dicitur, omne bonum, vel est corporis, vel animi.


Tres sunt pariter divisionis leges.


Prima, ut partes divisionis adæquant totum divisum, nec excedant, aut deficient.

Secunda ut membra divisionis sint opposita, & quantum fieri potest, immediata, id est, ut inter totum & illa, nullum sit aliud membrum intermedium : ut cum dicitur, omnis numerus vel est par, vel impar, nullum aliud divisionis membrum præcedere debet. Sed si animal divideretur in hominem, leonem, equum, &c. prius dividi posset in hominem & belluam : tum bellua in leonem, equum, &c.

Cæterum in omnibus habenda est claritatis & distinctionis ratio : ac modo immediatâ divisione, scilicet in partes proximas & immediatas ; modo mediatâ, & in partes remotiores, prout res postulat, utendum.

Tertia , ut ista membra , nec nimis multa sint , quia confusionem parerent , cujus vitandæ gratiâ instituta est divisio ; nec unum in alio contineatur : v. g. malè divideretur corpus humanum in caput , truncum , artus , manus , & pedes : nam manus & pedes in artubus comprehenduntur. Quod si fortè tamen una pars aliquando in altera contineatur , certè non debet hæc de illa posse prædicari : sic linea continetur quidem in superficie , sed tamen superficies de linea nequit affirmari.





P A R S T E R T I A

L O G I C E S.

De ratiocinatione.

R A T I O C I N A T I O est tertia cogitationis species, quâ judicium aliquod ex prioribus aliis infertur: v. g. ex eo quòd vitrum transluceat, ipsum occultis foraminibus patens esse colligitur: quoniam omne, quod translucet, exiguis saltem foraminibus pertusum esse debet, ut luminis transitum præbeat. Si ratiocinatio verbis exprimitur, dicitur *argumentatio*, quæ definitur, *oratio ad exprimendam ratiocinationem instituta*: eaque totuplex est, quotuplex ratiocinatio.

Quamobrem de ratiocinationis natura primo loco nobis dicendum est: tum quid sit, & quotuplex argumentatio; ac simul quæcumque ad eam pertinent, suo ordine exponemus.

C A P U T I.

De ratiocinationis natura.

C U M ratiocinatio sit cogitatio mentis, quâ unum judicium ex aliis antecedentibus judiciis deducitur, ut omnes definiunt, obscura esse non potest illius natura. Artamen utrum species quædam judicii dicenda sit, an cogitatio aliqua à judicio distincta, controversi solet in Scholis: quæ de re, ut sententiam nostram aperiamus, sit.

PROPOSITIO PRIMA.

RATIOCINATIO est quædam species
judicii.

Probatur. Actus mentis aliquid affirmantis ,
aut negantis , ex eo quòd alia affirmaverit , aut
negaverit , est species quædam judicii , ut ex su-
perius traditâ judicii definitione manifestum est.

Atqui ratiocinatio est actus mentis aliquid af-
firmantis , aut negantis , ex eo quòd alia affirma-
verit , aut negaverit. Verbi gratiâ , ex eo quòd
quis affirmaverit mentem hominis esse substan-
tiam spiritalem , asserit eam esse immortalem :
quia omnis substantia spiritalis est immortalis.
Ex eo quòd negaverit materiam cogitare , ipsam
beatitudinis capacem esse negat : quoniam ad bea-
titudinem necessaria est cogitatio.

Ergo ratiocinatio est species quædam judicii.

Id autem peculiare est huic judicii speciei ,
quòd unam ideam cum alterâ non jungat , aut
ab alterâ non separet ; nisi prius utraque cum ali-
quâ tertiâ præviis judiciis fuerit comparata : v. g.
in sequenti ratiocinatione non prius conjungitur
idea *substantia immortalis* cum ideâ *mentis* , quàm
utraque cum ideâ *substantia spiritalis* fuerit com-
parata hoc modo.

Omnis substantia spiritalis est immortalis:

Atqui mens hominis est substantia spiritalis :

Ergo mens hominis est immortalis.

Hujus rei ratio est , quòd ubi connexio , vel
separatio attributi & subjecti alicujus *questionis*
per se ipsam non innotescit , tertiâ quâdam ideâ
opus sit , per quam ista connexio , aut separatio
discerni possit , quæ tertia idea *argumentum* , seu
medium solet appellari. Verbi gratia , si quis du-
bitet , an attributum istius questionis , seu propo-

sitionis , *mens hominis est immortalis* , cum subiecto conveniat , tertiam adhibet ideam , nempe *substantia spiritalis* , quam cum subiecto , & attributo sigillatim componit ; tumque eam immortalem esse apprehendit.

Quòd si conjunctio , aut separatio terminorum propositionis alicujus per se nota sit , tum nullo argumento opus est , ut ipsius veritas , vel falsitas demonstretur : cujusmodi sunt propositiones per se notæ , quæ axiomata vocantur : v. g. *omne totum est majus sua parte* , &c.

Ex quo intelligi potest , in omni ratiocinatione duo saltem præmitti oportere judicia , quorum altero contineatur , altero contentum ostendatur tertium ex iis ductum , quòd modò conclusio , aut complexio ; modò quæstio , aut propositio vocatur. Quæstio enim , seu propositio non differt à conclusione , seu complexione , nisi quòd conclusio argumento aliquo fuit confirmata ; quæstio verò proposita tantum est , non probata.

Dico primò , conclusioni saltem duo præmitti oportere judicia : nam ex uno tantum antecedente judicio nihil concluditur , nisi aliud judicium cum illo antecedente conjunctum intelligatur : v. g. cum dico , *cogito : ergo sum* : posterius judicium ex antecedente non colligerem , nisi aliud mente conceptum haberem , nempe , *omne quod cogitat , est ; seu existit* , unde subsumo , atqui cogito : ergo sum.

Dico secundò , conclusionem altero præmissorum judiciorum contineri ; altero contentam declarari ; v. g. hæc conclusio , *ergo mens hominis est immortalis* , in isto judicio continetur , *omnis substantia spiritalis est immortalis* ; idque declarat secundum illud judicium , *atqui mens hominis est substantia spiritalis* : nam si mens sit substantia spiritalis , certè in hac propositione continetur ,

omnis substantia spiritalis est immortalis : adeoque ipsa immortalis est habenda.

Hinc liquet ex hypothesi absurda , & impossibili malè colligi rei cuiuspiam possibilitatem aut existentiam in rerum natura : siquidem hypothesis impossibilis possibilitatem vel existentiam rei aulatenus in se continet , ut manifestum est.

Neque huic obstat quod Mathematici falsas , imò , & quandoque impossibiles admittunt hypotheses , ut ex iis occasionem sumant latentem aliquam veritatem detegendi : ut patet tum in regulis falsæ positionis ad inveniendum verum in Arithmetica & Algebra ; tum in quantitatibus , quæ ut indivisibiles spectantur in Geometria , ad magnitudinum mensuram cognoscendam. Etenim hypotheses illas impossibiles & falsæ includunt in se seu exprimunt respectus veros , sive relationes omnino similes illis relationibus quæ in conclusione ex ipsis deducendâ reperiuntur : v. g. si fingas chimæras quasdam , puta spiritus bicornes in spatiis imaginariis inter se coniscantes : erit hypothesis absurda & impossibilis : quia substantiæ merè spirituales cornua non habent : spatia quoque imaginaria nihil sunt nec proinde possunt extare ; ut dicemus in Physica , ubi de vacuo Epicureorum disputabimus. Attamen vera est relatio numeri spirituum illorum ad numerum cornuum : ex qua confici potest vel hoc vel simile argumentum. Eadem est ratio numeri spirituum bicornium ad numerum cornuum quibus armari dicuntur , quæ est numeri animalium bipedum reverà existentium ad pedes quibus instruuntur. Atqui numerus spirituum est dimidium numeri cornuum. Ergo numerus animalium est dimidium numeri pedum. Ubi vides conclusionem veram deduci ex hypothesi absurda & impossibili , non quia absurda est & impossibilis : sed quia includit in se veram re-

lationem , quâ continetur aut exprimitur alia relationem , quæ reperitur in conclusione , quemadmodum propositio minor declarat.

Ex dictis item solvi potest alia Scholarum quaestio circa naturam ratiocinationis , scilicet, utrum ratiocinatio sit simplex mentis actus ; an quidpiam compositum : de qua sit.

P R O P O S I T I O S E C U N D A .

R A T I O C I N A T I O est simplex mentis actus , non quidpiam compositum.

Probatur. Judicium est simplex mentis actus , ut superius demonstravimus.

Atqui ratiocinatio est judicium aliquod , ut modo probatum est.

Ergo est simplex mentis actus & ad voluntatem præcipue pertinet.

Oppones ratiocinationem continere multa judicia , nec proinde esse simplicem mentis actum.

Respondeo negando propositionem. Quamvis enim ratiocinatio duo saltem exigat judicia , ut tertium ex iis inferat , non tamen ex multis judiciis componitur , uti nec judicium ex multis ideis constat , licet eas conjungat aut dividat.

Instabit. Argumentatio multas continet propositiones.

Ergo ratiocinatio multa continet judicia.

Respondeo ratiocinationem non continere multa judicia , etiamsi argumentatio multas propositiones complectatur , quia ratiocinatio est simplicior argumentatione cum ratiocinatio sit actus mentis unum judicium ex aliis saltem duobus colligentis , hoc est , aliquid affirmantis aut negantis , ex eo quod alia quædam affirmaverit aut negaverit ; argumentatio verò sit oratio aliqua ex multis partibus , seu propositionibus composita.

Quod quanquam verum sit, non tamen diffi-
tendum ratiocinationem, communi loquendi
usu, cum argumentatione, promiscuè accipi:
unde dicitur *longa ratiocinatio*, *brevis ratiocinatio*:
sed tamen si ratiocinatio strictè sumatur, nempe
pro actu mentis, unum iudicium ex aliis saltem
duobus præcedentibus inferentis, certè simplicior est
argumentatione. Non est omittendum ratiocina-
tionem, quæ falso nititur argumento, *Sophisma*
dici; quæ probabili, *Opinationem*; quæ certâ &
evidenti ratione sustinetur, *Demonstrationem* no-
minari. Ex his sophisma parit errorem; ratio pro-
babilis, opinionem; demonstratio, scientiam:
Auctoritas Dei mysteria revelantis fidem divinam;
hominum testimonium, fidem humanam.

CAPUT II.

De argumentatione, & variis illius speciebus.

ARGUMENTATIONIS nomen ab argu-
mento ductum dicitur, hoc est, ut Scholæ
loquuntur, à *medio*, quo propositio seu quæstio,
quæ dubia erat, comprobatur. Cum enim propo-
sitionis termini non ita inter se cohererent, ut eo-
rum connexio liquidò statim omnibus appareat,
tunc opus est *argumento*, seu medio quodam ter-
mino, quo ista connexio manifesta fiat; tumque
propositio, quæ *quæstio* dicebatur, *conclusio*, aut
complexio incipit appellari.

Definitur argumentatio; *oratio quâ unum judi-
cium ex prioribus iudiciis illatum distinctis propositio-
nibus exprimitur*. Quamobrem in argumentatione
est aliquid *antecedens*, est aliquid *consequens*, &

præterea est connexio consequentis cum antecedente, quæ vulgò, *consequentia*, nominatur.

Antecedens est *id*, ex quo aliquid inferitur, ac duo saltem judicia includit, ut diximus; sive ea expressa sint duabus propositionibus, sive alterum eorum sit tacitum.

Consequens est *id*, quod ex alio consequitur, sive, est propositio aliqua collecta ex duabus saltem aliis antecedentibus propositionibus, quarum altera nonnunquam suppressa est.

Consequentia denique definiri solet *connexio consequentis cum antecedente*, quæ quandoque bona est, etiam si consequens sit falsum: v. g. si præmittatur falsum istud antecedens, *materia est cogitans*, rectè inferetur hoc falsum consequens, *ergo materia potest esse beata*: quia, quicquid cogitat; esse potest beatum. Vicissim potest esse verum consequens, & mala consequentia: ut si dicatur, *Circulus est rotundus*: *ergo discrepat à sphæra*. Non enim idcirco differt circulus à sphæra, quòd rotundus sit: sed quòd sit planus, sphæra verò solida.

Verùm etiam si consequens, & consequentia hoc modo distingui solèant in Scholis, aliunde tamen *consequens*, *consecutarium*, *connexum*, *consequentia* & *consecutio*, promiscuè apud Auctores latinè loquentes usurpantur, ut norunt omnes eruditi.

Omnis autem argumentatio *inductione*, & *sylogismo* præsertim continetur. Sed inductioni adiungitur *exemplum*; syllogismo verò consociantur tum *sorites*, & *dilemma*, quæ multos syllogismos virtute continent; tum *enthymema*, quod est syllogismus truncatus; tum *epichierema*, quod est syllogismus, cujus alterutri, vel utrique præmissarum propositionum sua probatio adnectitur. Unde septem numerari possunt argumentationis species, nimirum, *inductio exemplum*: *sorites*, *dilemma*.

sylogismus, *enthymema*, & *epichereima*.

Inductio est argumentatio, quâ ex omnium, siue generum, siue specierum, siue individuum enumeratione, aliquid iis omnibus commune, & universale concluditur: v. g. si quis dicat, aurum liquari potest, argentum liquari potest, cuprum, stannum, plumbum, & ferrum liquari possunt, rectè concludet, igitur omne metallum potest liquari. Hæc argumentationis species invictissima est, si integra sit & perfecta rerum enumeratio: alioquin est manca, & roboris expers.

Exemplum est argumentatio, quâ ex uno aliquo singulari, aliud singulare simile colligitur: ut puta, si ex eo quod integrum anni spatium insumpsi in re aliqua discenda, colligat tantumdem temporis alteri requiri, ut ejusdem rei cognitionem assequatur. Quæ argumentationis species cautè admodum est adhibenda: nam in iis, quæ similia videntur, aliqua sæpè occurrunt discrimina, quæ justam unius ex alio consecutionem impediant. Non enim v. g. tantum fortasse temporis alteri opus est, ut aliquid addiscat, quantum mihi. Unde nunquam frequentius homines errare contingit, quàm ubi ab exemplo argumenta petunt. Non autem errabimus, si ex eo quod quis probè se gerat, colligamus ita nobis esse vivendum: vel ex eo quod malè agendo famæ jacturam fecerit, à simili vivendi ratione nobis abstinendum inferamus. Legatur Horatius satirâ 4. libri 1. versu 105. & sequentibus.

Ad exemplum pertinent *parabola*, & *Apologus*.

Parabola hoc loco est similitudo vel collatio petita ex re fictâ, ad suadendum id quod intendimus, comparata: cujusmodi est, quam Natham Propheta Davidi proposuit. 2. Reg. cap. 12. quales etiam adhibuit Christus Dominus de Patrefamilias qui operarios conduxit, ut eos in vineam

suam mitteret. Matth. 20. de fatore boni feminis. Matth. 13. &c.

Apologus est fabula, quâ vel homines cum belluis vel belluæ aut etiam res sensûs expertes, inter se colloquentes ad nostri institutionem finguntur: qualis legitur de cedro & carduo lib. 4. Reg. cap. 14. v. 9. cujusmodi etiam sunt Æsopi, vel Phædri fabulæ. Vide Aristot. lib. 2. Rhet. cap. 20.

Sorites, seu gradatio, est *argumentatio*, quæ ex pluribus propositionibus sic coalescit, ut attributum præcedentis sit subjectum consequentis, donec primæ propositionis subjectum, cum ultima attributo componatur: ut si velim probare, avaros esse miseros, ita per gradationem id efficere poterò.

Avari multa desiderant:

Qui multa desiderant, multis egent:

Qui multis egent, sunt miseri:

Ergo avari sunt miseri.

Dilemma est *argumentatio composita*, incommodum undequaque inferens, in qua post divisionem totius in suas partes, id concluditur de toto, quod de quamvis parte conclusum fuerat: ut si velim probare omnes homines in hac vita miseros esse, ad illud consequendum utar sequenti dilemmate.

Quisquis hanc vitam vivit, ille vel cupiditatibus servit, vel obsistit.

Si servit, miser est: nam eas explere nunquam poterit.

Si obsistit, miser quoque est: nam sibi perpetuò repugnare cogitur.

Ergo quisquis mortalem hanc vitam vivit, miser est.

Concluseram eum, qui cupiditatibus servit esse miserum; eum item, qui illis obsistit, miserum esse; quæ duæ propositiones erant veluti divisionis partes: & exinde concludo generatim, omnem hominem esse miserum.

Syllogismus definitur ab Aristotele lib. 1. priorum Analyticorum cap. 1. *Oratio in qua quibusdam positis, aliud quiddam diversum ab his, quæ posita sunt, necessario sequitur, ex eo quòd hæc sint: id est, oratio quædam in qua duabus propositionibus positis, quarum altera major, altera minor vocatur, quædam propositio, scilicet conclusio, sequitur necessario, ex eo quòd veræ sint duæ priores, quæ præmissæ vocantur, quia conclusioni in syllogismo præmittuntur, ut cum dicitur,*

Omne quòd cogitat, existit:

Atqui ego cogito:

Ergo existo.

Per quam definitionem duabus quæstionibus in Scholâ Peripateticâ proponi solitis, breviter responderi potest.

Prima est, in quo posita sit syllogismi natura: an in tribus propositionibus? an in conclusione tantum? Cum enim syllogismus sit oratio ex duabus præmissis, & conclusione constans, ut definit Aristoteles, dubium esse non potest, quin illius natura in tribus hisce propositionibus sit constituta. Ratiocinatio quidem in solâ conclusione, seu illatione unius ex alio collocata est, ut superiori capite ostendimus: quia ratiocinatio simplicior est argumentatione, & in solo mentis actu consistit, argumentatio verò est oratio ex propositionibus composita.

Secunda quæstio est, utrum admissis præmissis teneatur quis assentiri, conclusioni: quod etiam ex definitione certum videtur. Nam si conclusio necessario sequitur ex præmissis, admitti non possunt præmissæ, quin debeat assensus conclusioni. Atqui conclusio ex præmissis necessario sequitur, ut definit Aristoteles. Ergo non potest quis assentiri præmissis, quin etiam conclusioni acquiescere teneatur.

Enthymema est *sylogismus truncatus*, *cujus aliqua propositio reticetur, & in mente retinetur*, prout græcum enthymematis nomen sonat: unde *enthymema in ore*, ut aiunt, *est sylogismus in mente*: v. g. *cogito: ergo existo*.

Epicherema denique est *sylogismus cujus alterutri, vel utrique præmissarum sua probatio adjungitur* hoc modo.

Omne quod cogitat existit: fieri enim non potest, ut quod non existit, cogitet.

Atqui ego cogito: nam percipio, judico, dubito, volo, &c.

Ergo existo.

Cætera argumentationis species præter syllogismum morari nos non debent. Etenim, quæ ad inductionem & exemplum spectant, uno verbo indicavimus. Sorites quoque & dilemma longiorem explicationem non requirunt. Enthymema denique, & Epicherema reipsâ sunt syllogismi. Quamobrem de syllogismo solo dicendum nobis incumbit. Cùmque duplicis præsertim generis distinguitur syllogismus, scilicet *simplex*, & *conjunctivus*: de utroque seorsim habenda est tractatio.

C A P U T I I I.

De syllogismo simplici.

SYLOGISMUS simplex dicitur is, cujus medium cum utroque quæstionis, seu conclusionis termino seorsim conjungitur. Quæ definitio ut clarior evadat, materiam & formam ipsius syllogismi explicare necesse est.

Materia syllogismi est *id ex quo componitur syllogismus*: & duplex est; nempe materia *remota*,

seu termini ; & *proxima*, seu propositiones.

Termini sunt numero tres : scilicet , *major*, *minor* , & *medius* : sive, *majus extremum* , *minus extremum* , & *medium*.

Majus extremum est attributum conclusionis *directæ* : quod ideo dicitur *majus* , quia ut plurimum universalius est *minore* extremo.

Voco conclusionem *directam* , eam in qua naturalis ordo terminorum servatur , ita ut id verè attributum sit , quod debet esse attributum ; & verè subjectum quod debet esse subjectum , habitâ præmissarum ratione.

Minus extremum est subjectum conclusionis itidem *directæ*.

Medium , seu argumentum est terminus , qui sumitur ad probandam connexionem , vel repugnantiam majoris , & minoris extremi. Ideo autem vocatur *medium* , quia plerumque inter majus & minus extremum interjacet , ac utriusque est vinculum.

Propositiones syllogismi sunt *major* , & *minor*, quæ *premissæ* vocantur ; & *conclusio*.

Major propositio , quæ nonnunquam propositio simpliciter , vel thesis dicitur , est ea , quæ constat ex majore extremo, & medio : *minor* , quæ etiam *assumptio* vel hypothesis vocatur , ex majore extremo & medio : conclusio denique , quæ à sancto Augustino *summa* dicitur , ex majore & minore extremo componitur : nam medium nunquam ingreditur conclusionem. Sit igitur iste syllogismus simplex.

Omne cogitans est spiritale ,

Omnis mens est cogitans :

Ergo omnis mens est spiritalis.

Mens , est minus extremum ; quia est subjectum conclusionis : *spiritalis* , est majus extremum ; quia est ejusdem conclusionis attributum : denique

cogitans , est terminus medius , qui seorsim cum utroque extremo conjungitur ; nempe cum majori extremo , in majore propositione ; & cum minori extremo, in minore.

Forma syllogismi est *dispositio materia syllogismi*, quæ itidem duplex est ; nempe vel materiæ remotæ , & dicitur *figura* : vel materiæ proximæ , & *modus* vocatur.

Figura syllogismi est *apta medii cum extremis ad concludendum dispositio* , quæ quidem dispositio exigit.

Primò , *ut tres tantum sint termini* in syllogismo : quia syllogismus est probatio , sive affirmans, sive negans, unius, de alio , per aliud ; nempe majoris extremi , de minore extremo , per medium. Omnis quippe ars syllogistica , saltem quoad syllogismos affirmantes , hoc principio nititur ; *quæ sunt eadem uni tertio , sunt eadem inter se* : adeo ut, si majus , & minus extremum , sint quid idem ac medium, ea pariter sint quid idem inter se.

Secundò , *ut termini non sumantur generalius in conclusione , quàm in præmissis* : quandoquidem à particulari ad universale non est legitima conclusio.

Tertiò , *ut medium nunquam ingrediatur conclusionem* : nam medium sumitur tantum ad probandam connexionem , vel repugnantiam majoris & minoris extremi , ex quibus conclusio constat ; nec proinde potest in ea medium reperiri.

Quartò , *ut medium saltem semel universaliter, seu distributivè sumatur* : hoc est , secundum totam suam extensionem , & quatenus omnibus suis inferioribus simul in plurali numero ; & singulis seorsim ac distributivè spectatis , in singulari numero convenit. Si enim bis particulariter sumeretur, conjungere non posset duo extrema : nam non unus foret idemque terminus , sed alius & alius :

alius : v. g. vitiosus est hic syllogismus.

Quidam homo est sanctus :

Quidam homo est fur :

Ergo quidam fur est sanctus.

Siquidem medius terminus in maiore & minore particulariter sumitur : nec proinde pro uno eodemque homine ; sed pro diversis accipitur.

Est autem quadruplex figura. Vel enim medius terminus subicitur in maiore , & prædicatur in minore ; & est prima figura : vel prædicatur in maiore & minore , & est secunda figura : vel subicitur in utraque , & est tertia figura : vel denique prædicatur in maiore , & subicitur in minore , & est quarta figura, secundum hunc versiculum.

Sub præ : tum præ præ : tum sub sub : denique præ sub.

Observandum porrò quartam figuram esse minus naturalem : sed eam tamen cæteris annumerandam liquet ex Arte cogitandi tertiâ parte, capitibus 4. & 8. Eam vulgò *Galenicam* vocant , quòd à Galeno præsertim propugnata perhibeatur.

Quòd si qui objiciant ipsam minimè differre à prima , propterea quòd ex inversione propositionum primæ figuræ fiat : respondendum id ipsi cum secundâ & tertiâ figurâ esse commune , quæ à primâ eodem modo derivantur ; cum ad primam per transpositionem aut conversionem propositionum possint revocari, licet cæ figuræ distingui soleant à primâ , quæ sola perfecta est , ut inferius dicemus, & in quâ conclusio est vel A, vel E , vel I, vel O : hoc est, vel universalis affirmans , vel universalis negans ; vel particularis affirmans, vel particularis negans : cum conclusio in secunda figura sit semper negans & in tertia semper particularis.

Si verò addant *medium* non posse prædicari de majori extremo in maiore propositione , & subijci minori extremo in minore : quia quòd prædica-

tur, generalius est ; & quod subijcitur , est angustius ; unde fieret ut medium generalius foret majore extremo , & angustius minore , quod absurdum est : respondendum *attributum* secundum propriam significationem spectatam , non esse semper *subjecto* universalius, sed quandoque ipsi æquale, ut cum dicitur *homo est quid compositum ex mente & corpore*. Deinde cum subjectum propositionis ratione sui universalius est , quàm prædicatum, tunc restringitur particulis *quidam, aliquis, &c.* alioqui non posset unquam medium prædicari de majore extremo in secunda figura ; nec subijci minori extremo in tertia , quoniam ratione sui latius foret minore extremo , & angustius majore. Et tamen secunda ac tertia figura secerni dicuntur à primâ. Unde nihil vetat hanc quoque quartam figuram ab aliis distinctam propugnari , licet minùs naturalis sit.

Modus est *apta præmissarum secundum quantitatem, & qualitatem ad concludendum dispositio* , quæ requirit,

Primò, *ut præmissarum alterutra in omni figura sit universalis* , aut certè *singularis* : nam *ex duabus propositionibus particularibus nihil concluditur* , quòd in iis medius terminus pro diversis sumatur, quemadmodum in quarta regula fundamentali terminorum adnotavimus.

Secundò , *ut alterutra ex præmissis sit affirmans* ; quia *ex duabus negantibus nihil concluditur*. In præmissis quippe negantibus extrema separantur à medio. Quod autem duo à tertio sejuncta sint, non sequitur ea inter se vel conjuncta esse , vel sejuncta : quemadmodum ex eo quòd duo non sint tertio æqualia , concludi non potest ea esse inter se æqualia , vel inæqualia. Unde fit, ut ex duabus negantibus nec affirmans, nec negans deduci possit conclusio.

Tertiò , *ut conclusio sequatur debiliorem partem* : id est , ut conclusio sit *negans* , si alterutra ex præmissis fuerit *negans* ; item , ut sit *particularis* , si alterutra ex præmissis fuerit *particularis*. Nam extrema nec generalius , nec arctius conjungi debent in conclusione , quàm fuerunt in præmissis cum medio connexa.

Quartò , *ut ex duabus præmissis affirmantibus conclusio nunquam sequatur negans* : quæ regula per se notissima est.

Igitur octo sunt fundamentales syllogismorum simplicium regulæ , de quibus consuli potest Ars cogitandi , tertiâ parte cap.3. Harum duæ spectant extrema : duæ medium : præmissas duæ : conclusionem itidem duæ : ac sequentibus versiculis comprehenduntur.

Terminus est triplex : major, mediusque, minorque :

Latus hunc, quàm præmissa, conclusio non vult.

Nequaquam medium capiat conclusio oportet.

Aut semel aut iterum medium generaliter esto.

Nil sequitur geminis ex particularibus unquam.

Utraque si præmissa neget, nihil inde sequetur.

Amba affirmantes nequeunt generare negantem.

Est parti similis conclusio deteriori.

Modi quatuor figurarum directi & simplices sunt tantùm novemdecim , qui totidem vocabulis artificiosis expressi , quatuor hisce versiculis continentur.

Barbara, celarent, darii, ferio. Bamalipton,

Camentes, dimatis, fesapno, fesi somorum.

Cesare, camestres, festino, baroco, Darapti,

Felapton, disamis, datisi, bocardo, ferison.

Quatuor primi modi ad primam figuram pertinent ; quinque sequentes ad quartam ; quatuor deinceps ad secundam ; sex denique postremi ad tertiam.

Adverte nos quartæ figuræ secundum in iis ver-

sibus dedisse locum ; tum quia hæc primæ figuræ directè opponitur ; tum quia congruum erat , ut illius modi , quos Logici passim , *indirectos primæ figuræ modos* vocant , statutum jamdiu inter modos syllogisticos servarent ordinem : nec ullam paterentur in metro ; sed aliquam tantum in literis mutationem , quâ possent per regulas in Scholis tradi solitas ad modos perfectos reduci.

Magnos utique usus habent hujusmodi voces artificiosæ : duos tantum hoc loco notabimus.

Primò igitur , unumquodque vocabulum tribus constat syllabis , quarum prima designat majorem , secunda minorem , tertia conclusionem. Si plures sint , quàm tres syllabæ , ex additæ sunt metri causâ , ut in *bamalipton*, & *fresismorum*.

Secundò , vocales A, E, I, O, quæ in istis syllabis occurrunt , quantitatem & qualitatem propositionum denotant ; scilicet A , universalem vel singularem affirmantem ; E , universalem vel singularem negantem ; I , particularem affirmantem ; O , particularem negantem , ut superiùs indicatum est.

Ut verò novemdecim tantum , nec plures , nec pauciores syllogismorum simplicium modi extare demonstrantur , hæc ineunda est ratio quæ legitur in Arte cogitandi tertiâ parte , cap.4.

Ex combinationum doctrina quatuor termini , quales sunt A, E, I, O, si eorum tres simul sumantur , non pluribus quam 64. sequentibus modis possunt disponi.



16	16	16	16
AAA	— EAA	— IAA	— OAA
¶ AAE	EAE	¶ IAE	— OAE
AAI	— EAI	IAI	— OAI
¶ AAO	EAO	¶ IAO	OOA
— AEA	** EEA	— IEA	** OEA
AEE	** EEE	— IEE	** OEE
— AEI	** EEI	— IEI	** OEI
* AEO	** EEO	† IEO	** OEO
— AIA	— EIA	** IIA	** OIA
¶ AIE	— EIE	** IIE	** OIE
AII	— EII	** III	** OII
¶ AIO	EIO	** IIO	** OIO
— AOA	** EOA	** IOA	** OOA
— AOE	** EOE	** IOE	** OOE
— AOI	** EOI	** IOI	** OOI
AOO	** EOO	** IOO	** OOO

Jam verò ex isto numero per regulas generales quæ docent nihil concludi ex duabus negantibus, aut ex duabus particularibus, excluduntur 28. notati hoc modo, **

Deinde per regulam, quæ docet conclusionem sequi debiliorem partem, excluduntur 18. signati hac notâ—

Tum per regulam, quæ docet ex duabus affirmantibus conclusionem negantem deduci non posse, sex excluduntur hoc signo affecti. ¶

Præterea per regulam, quâ dicitur non posse generalius sumi terminus in conclusione quàm in præmissis, modus I E O, ita signatus, † expungendus est: quia majus extremum in conclusione, O sumeretur *universaliter*; in majore verò I *particulariter* tantum, ut secundâ parte ostendimus, ubi de propositionum conversione.

Denique quia concludi non potest O post A E,

H iiij

quin etiam concludatur E, modus A E O, notatus hoc signo *, est removendus, quia continetur in A E E.

Atque ita ex 64. modis, quibus disponi possunt quatuor termini A, E, I, O, dum terni sumuntur, removeri debent 54. Et proinde residui sunt tantum 10. Horum quatuor sunt affirmantes, id est, qui conclusionem habent affirmantem: & quatuor negantes, in quibus negans est conclusio.

Sed ii propter diversam medii dispositionem singulis figuris propriam, novemdecim modis ad concludendum aptis ordinari possunt. Etenim

Quatuor modi affirmantes septies in quatuor figuris occurrunt.

A A A, *barbara*.

A I I, *darii*, *darisi*.

A A I, *darapti*, *bamalip*.

I A I, *disamis* *dimatis*.

Sex negantes duodecies in iisdem quatuor figuris variantur.

E A E, *celarent*, *cesare*.

A E E, *camestres*, *camentes*.

E A O, *felapton*, *fesapmo*.

A O O, *baroco*.

O A O, *bocardo*.

E I O, *ferio*, *festino*, *ferison*, *fresison*.

C A P U T I V.

De singulis syllogismorum simplicium figuris.

IAM explicandæ sunt seorsim singulæ syllogismorum simplicium figuræ, & subijcienda singulorum modorum exempla.

De prima figura.

DUÆ sunt regulæ primæ figuræ.

Prima est, *ut minor sit affirmans* : quia , si foret negans, conclusio quoque deberet esse negans, cum sequi debeat deteriorem partem , & major deberet esse affirmans , quoniam ex duabus negantibus nihil concluditur : quare conclusionis , utpote negantis , attributum sumeretur universaliter , cum tamen particulare foret in majore, quæ esset affirmans ; quod est contra secundam regulam generalem.

Secunda regula est , *ut major sit universalis* : quia , si foret particularis , medium , quod est illius subjectum, foret tantum particulare : cumque sit attributum minoris , quæ debet esse affirmans, in ea quoque particulare foret : adeoque bis particulariter sumeretur , contra quartam regulam generalem. Hæ duæ regulæ hoc versiculo continentur.

Sit minor affirmans, major verò generalis.

Exinde colligi potest quatuor tantum esse modos primæ figuræ. Nam ex decem modis ad concludendum aptis excluduntur *a e e*, & *a o o* per primam regulam. Tum *i a i*, & *o a o* per secundam. Denique quia non potest concludi *i* post *a a* in hac figura , in qua minor terminus est subjectum minoris , quin pariter concludatur *a* : neque *o* post *e a*, quin etiam concludatur *e* : quia minor terminus tam latè in conclusione sumi potest , quam in minore fuit acceptus : hinc removentur *a a i* & *e a o*. Atque ita supersunt tantum quatuor modi, scilicet *a a a*, *e a e*, *a i i*, *a i o* : *barbara*, *celarent*, *darii*, *ferio*.

Bar..... Omne animal est mortale :

ba..... omnis leo est animal :

H iij

ra.... ergo omnis leo est mortalis,

Idem observatur in propositionibus singularibus.

a.... Filius Dei est redemptor omnium :

a.... Christus est Filius Dei :

a.... ergo Christus est redemptor omnium.

Ce.... Nullum creatum est infinitum :

la.... omnis Angelus est creatus :

rent... ergo nullus Angelus est infinitus.

Da.... Omnis indigens est miser :

ri.... sed quidam dives est indigens :

i.... ergo quidam dives est miser.

Fe.... Nullum turpe est expetendum :

ri.... aliquod lucrum est turpe :

e.... ergo aliquod lucrum non est expetendum.

Duplici principio nititur hæc figura , scilicet,
dici de omni , & dici de nullo.

Primum ex istis principiis ad modos affirmantes pertinet , & hoc modo effertur : *quicquid dicitur de aliquo subiecto secundum totam suam extensionem spectato , dicitur de omni eo , quod sub illo subiecto continetur* : vel brevius , *quicquid dicitur de superiori , dicitur de inferiori* : si majus extremum dicatur de medio , dici quoque debet de minore extremo , quod sub medio continetur : si animal dicatur de homine , dicitur de Aristotele , qui sub homine continetur.

Secundum spectat ad modos negantes , nempe *quod repugnat superiori , repugnat inferiori* : v. g. si repugnat animali non posse progredi , repugnat homini. Advertendum solam primam figuram , perfectam esse , propterea quod in eâ solâ naturalis ordo terminorum servatur. Nam *majus extremum* in hac solâ figurâ prædicatur de *medio* in majore propositione , & *medium* de *minore extremo* in minore propositione. Cum enim attributum debeat latius patere quàm subiectum : necesse est ut majus extremum quod est maximè universale de

medio tanquam minis universalis, & medium de minore extremo prædicetur. Quod accidit in solâ primâ figurâ, non in aliis.

De secunda figura.

DUÆ sunt pariter regulæ secundæ figuræ.

Prima est, *ut una ex præmissis sit negans*: quia cum medium in utraque sit attributum, si ambæ forent affirmantes, bis particulariter sumeretur, contra quartam regulam generalem.

Secunda, *ut major sit universalis*: nam si particularis foret, majus extremum, quod est illius subiectum, particulariter tantum in ea acciperetur, cum tamen universaliter sumatur in conclusione negante, cujus est attributum; quod absurdum foret, & contra secundam regulam generalem. Itaque ex præmissis in hac figura

Una negans esto, nec major sit specialis.

Hinc colligere licet, quatuor tantum esse modos secundæ figuræ. Nam ex decem modis ad concludendum aptis, excluduntur quatuor affirmantes per primam regulam: scilicet *a a a*, *a i i*, *a a i*, *i a i*. Tum removeretur *o a o* per secundam regulam. Denique cum minus extremum tam latè accipi possit in conclusione quàm in præmissis: excluditur modus *e a o*, ut in prima figura: quia minor terminus utrobique subiectum est minoris. Igitur supersunt tantum quatuor modi, scilicet *e a e*, *a e e*, *e i o*, *a o o*. *Cesare*, *Camestris*, &c.

Ces... Nulla virtus est præceptus:

a..... omnis temeritas est præceptus:

re..... ergo nulla temeritas est virtus.

Idem evenit in propositionibus singularibus.

e..... Philosophia Aristotelis non est Christiana;

a..... Philosophia novi Testamenti est Christiana:

e..... ergo Philosophia novi Testamenti non est
Aristotelis Philosophia.

Cam..... Omne bonum est munus Dei :

es..... nullum litigium est munus Dei :

tres..... ergo nullum litigium est bonum.

Fes..... Nullum peccatum est licitum :

ti..... sed aliqua oblectatio est licita :

no..... ergo aliqua oblectatio non est peccatum.

Bar..... Omnis virtus est prudens ,

oc..... sed aliquis zelus non est prudens :

o..... ergo aliquis zelus non est virtus.

Unicò ferè principio suffulta est hæc figura ;
scilicet , *duo non sunt quid idem , cùm uni aliquid
convenit , quod alteri repugnat.* Vide artem cogi-
tandi , tertiâ parte , cap. 6.

De tertia figura.

D U A S quoque regulas habet tertia figura.

Prima est , *ut minor sit affirmans* , non secus ac
in prima figura , propter eandem rationem.

Secunda , *ut conclusio sit particularis* : quia cùm
minor sit affirmans , minus extremum quod est
illius attributum , sumitur in ipsa particulariter ;
ideoque , ut sumatur etiam particulariter in con-
clusionem , ejus est subjectum , debet conclusio esse
particularis. Unde versiculus.

Sit minor affirmans , conclusio particularis.

Hinc colligi possunt sex illius modi. Nam
ex decem modis ad concludendum aptis , *a e e*
& *a o o* , per primam regulam excluduntur :
a a a , & *e a e* , per secundam : ergo supersunt
sex sequentes *a a i* , *e a o* , *i a i* , *a i i* , *o a o* ,
& *i o i*. *Darapti felapton* ; &c.

Dar..... Omne mysterium est obscurum :

ap..... omne mysterium est certum :

ti..... ergo aliquod certum est obscurum :

Vel in propositionibus singularibus.

a..... Anacharxis fuit Scythia :

a..... Anacharxis fuit Philosophus :

i..... ergo aliquis Philosophus fuit Scythia.

Fel..... Nullum violentum est durable :

ap..... omne violentum est præter naturam :

ton..... ergo aliquid præter naturam non est durable.

Dis..... Aliquis dives est improbus ;

am..... sed omnis dives est honoratus :

is....., ergo aliquis honoratus est improbus.

Dat..... Omnis Dei servus est Rex :

is..... sed aliquis Dei servus est pauper :

i..... ergo aliquis pauper est Rex.

Boc..... Quædam ira non est peccatum :

ar..... omnis ira est affectus animi ?

do..... ergo aliquis affectus animi non est peccatum.

Fer..... Nullum honestum est negligendum :

is..... aliquid honestum est arduum :

on..... ergo aliquid arduum non est negligendum.

Duo sint principia : quibus tertiæ figuræ modi nituntur.

Primum pertinet ad modos affirmantes ; scilicet , si duo attributa eidem subiecto conveniant : inter se quoque aliquando conveniunt : v- g. si omne mysterium est obscurum & certum , aliquid certum aliquando est obscurum.

Secundum principium ad modos negantes refertur ; nimirum , si ex duobus attributis , unum alicui subiecto conveniat , cui non convenit alterum , ista attributa aliquando inter se non conveniunt : v. g. si nulli violento conveniat esse durable , & omni violento conveniat esse præter naturam , fieri potest ut aliquid , quod est præter naturam , non sit durable.

De quarta figura.

Tres sunt regulæ in quarta figura.

Prima, *Si major sit affirmans, minor est universalis.* Nam medium in hac figura sumitur particulariter in majore affirmante, cum sit illius attributum. Ergo per quartam regulam generalem sumi debet universaliter in minore, & eam reddere universalem, cum sit illius subjectum.

Secunda. *Cum minor est affirmans; conclusio debet esse particularis.* Etenim minus extremum, quod est attributum minoris, sumitur in ea particulariter. Ergo sumi etiam debet particulariter in conclusione, cujus est subjectum; & consequenter eam reddit particularem.

Tertia. *Cum modus est negans, major debet esse generalis.* Quia major terminus sumitur universaliter in conclusione negante, cujus est attributum. Ergo ut etiam sumatur universaliter in majore, cujus est subjectum, eam reddit universalem, ut in secunda figura.

Major ubi affirmat, generalem sume minorem.

Si minor affirmet, conclusio sit specialis.

Cumque negans modus est, major generalis habetur.

Quare ex decem modis ad concludendum utilis, *a i i*, & *a o o*, excluduntur per primam regulam: *a a a*, & *e a e*, per secundam: *o a o*, per tertiam: unde supersunt quinque modi *a a i*, *a e e*, &c. *b a m a l i p*, *e a m e n t e s*, &c.

B a m..... Omnis Angelus est spiritus :

a l..... omnis spiritus est substantia :

i p..... ergo aliqua substantia est Angelus.

Idem in singularibus contingit.

a..... Auctor Algebrae novæ est Vieta :

a..... sed Vieta fuit Gallus nobilis :

i..... ergo quidam Gallus nobilis fuit auctor
Algebræ novæ.

Cam..... Omnis superbia est peccatum :

en..... nullum peccatum est opus Dei :

tes..... ergo nullum opus Dei est superbia.

Dim..... Quidam ignarus est verax :

at..... sed omnis verax est audiendus :

is..... ergo aliquis audiendus est ignarus.

Fes..... Nulla materia est cogitans :

ap..... sed omne cogitans est beatitudinis ca-
pax :

no..... ergo quoddam beatitudinis capax non
est materia.

Fres..... Nullus ignavus est aptus bello :

is..... sed aliquis aptus bello est nobilis :

o..... ergo aliquis nobilis non est ignavus.

De modis indirectis.

In horum quinque modorum quartæ figuræ
locum substitui solent in Scholis quinque modi
indirecti primæ figuræ , id est , quorum indirecta
est conclusio, eosque his vocabulis exprimunt.

..... *Baralipon* ,

Celantes , *dabitis* , *fapesmo* , *frisesomorum*.

Sed quemadmodum in prima figura oriuntur
modi indirecti ex conversione conclusionis modo-
rum directorum ; ita etiam in aliis figuris id con-
tingere potest.

Si enim syllogismus iste in *Barbara* ,

Bar..... Omne animal est vivens:

ba... .. omnis homo est animal :

ra..... ergo omnis homo est vivens.

Si inquam , iste syllogismus converti possit in
baralip , per solam conversionem conclusionis ,
hoc modo :

Ergo aliquod vivens est homo ,

Consimili prorsus ratione syllogismus in *Cesare* in secunda figura ,

Ces..... Nullum infinitum augeri potest :

a..... omnis numerus augeri potest :

re..... ergo nullus numerus est infinitus ,
converti potest in modum indirectum *cesaro*.

Ergo aliquod infinitum non est numerus.

Idem accidit in modis tertiæ & quartæ figuræ ,
ut experiri cuilibet facillimum est : adeo ut rationi non satis obtemperantes videantur ii , qui neglectis aliarum figurarum modis indirectis , quinque duntaxat , qui occurrunt in prima figura , recensent ; eorumque gratiâ quinque modos directos quartæ figuræ expungunt.

C A P U T V.

De syllogismo conjunctivo , & illius speciebus.

SYLLOGISMUM divisimus in *simplicem* & conjunctum , seu *conjunctivum*. Simplicem vocavimus, in quo medium cum utroque quæstionis , seu conclusionis termino seorsum conjungitur : qualis est iste ,

Omne extensum est corpus :

Omne spatium est extensum :

Ergo omne spatium est corpus.

Ad syllogismum simplicem accedit syllogismus complexus , cujus nempe complexa est conclusio. In hujusmodi autem syllogismo pars tantum aliqua subjecti , vel prædicati conclusionis conjungitur cum medio in una ex præmissis ; altera vero pars cum eodem medio in altera præmissa consociatur. v. g.

Pecunia est res inanimata :

Sed plerique homines serviunt pecunia ,

Ergo plerique homines serviunt rei inanimata.

Ubi liquet attributum conclusionis , *serviunt rei inanimata*, ita dividi in præmissis, ut una illius pars, scilicet , *res inanimata*, posita sit in majore ; altera , scilicet *serviunt* , in minore reperiatur. Vide artem cogitandi , tertiâ parte , cap. 9.

Syllogismus conjunctivus ille est , cujus major propositio est *conjunctiva* , seu composita , & integram conclusionem complectitur : isque vel est *conditionalis* , vel *copulativus* , vel *disjunctivus*.

Syllogismus conditionalis ille dicitur , cujus major propositio conditionalis est , id est , duas habet partes per particulam conditionalem , *si* , connexas , & in se totam conclusionem continet.

v. g.

Si avarus multa cupit , multorum est indigens :

Atqui avarus multa cupit :

Ergo multorum est indigens :

Quo in syllogismo tota conclusio continetur in majore , quæ duas habet partes , antecedentem , scilicet , *si avarus multa cupit* , & consequentem , nempe , *multorum est indigens*.

Duplex autem est hujusmodi syllogismorum figura.

Prima quidem , cum antecedens majoris propositionis affirmatur in minore , ut ejusdem consequens affirmetur in conclusione, secundum hanc regulam , *posito antecedente , ponitur & consequens* : vel , *verum prius : ergo & posterius*. Idque in exemplo modo allato cernitur.

Secunda , cum tollitur consequens , ut tollatur antecedens , secundum alteram regulam , *sublata consequente , tollitur antecedens* : vel , *falsum consequens : ergo & antecedens*. v. g.

Si quis extra Ecclesiam sit salvandus, fallit nos Ecclesia :

Sed Ecclesia nos non fallit :

Ergo nullus extra Ecclesiam est salvandus.

Tota vis hujusmodi syllogismorum in justa connexionione partium majoris propositionis consistit , & in legitima unius ex alio collectione.

Duobus verò modis vitiosa esse potest ista conclusio.

Primò, cum ex consequente infertur antecedens, v. g.

Si divites nihil cupiunt , sunt felices :

Atqui divites sunt felices :

Ergo nihil cupiunt.

Secundò , cum ex negatione antecedentis , infertur negatio consequentis , v. g.

Si Titius est fur , est improbus :

Atqui non est fur :

Ergo non est improbus.

Conclusio non est ritè deducta, quia etiamsi Titius non sit fur, potest adhuc esse improbus : siquidem major propositio non est *exclusiva*, nec ait Titium tunc duntaxat fore improbum, si fur extiterit.

Syllogismus copulativus ille est , cujus major propositio ex copulativa negans , illiusque una pars in minore assumitur , ut altera in conclusione tollatur , v. g.

Non potest homo servire Deo, & mammona :

Sed avarus servit mammona :

Ergo non potest servire Deo.

Syllogismus disjunctivus dicitur , cujus major propositio est disjunctiva , v. g.

Falleris, aut fallor : non fallor : falleris ergo,

Syllogismus ille vitiosus est , cum accurata non est divisio , & membra propositionis disjunctivæ medium aliquod patiuntur, v. g.

Vel est obediendum Regibus contra legem Dei, vel in eos rebellandum :

Atqui non est in eos rebellandum :

Ergo iis contra Dei legem est obtemperandum.

Aut aliter assumendo.

Atqui non est iis contra Dei legem obtemperandum :

Ergo contra eos est rebellandum.

Vitiosus, inquam, est iste syllogismus, quia nec rebellandum est in Reges; nec iis contra Dei legem obtemperandum; sed omnia patienter ferenda potius quam vel in Deum, vel in Reges peccetur.

Isti omnes, non secus ac simplices syllogismi, celebri divisione distribui solent in demonstrativos, topicos, & sophisticos: quanquam hæc divisio argumentationem potius generatim, quam syllogismum speciatim respicit.

Syllogismus demonstrativus est ille, qui constat ex præmissis necessario veris, hoc est, vel *per se evidentibus*, vel *per alias propositiones jam probatis*, ex quibus necessario vera educitur conclusio.

Syllogismus topicus, sive *dialecticus*, est syllogismus constans ex probabilibus propositionibus, & opinionem tantum pariens. Topicus vocatur, id est, *localis*, quod ex locis dialecticis desumatur, de quibus agemus cap. 7.

Syllogismus sophisticus est syllogismus constans ex falsis propositionibus, sed apparenter veris, & errorem pariens; qui, si demonstrationem mentiatur, *paralogismus* nominari consuevit: quanquam omnis falsa ratiocinatio, quæcumque sit, sive syllogismus, sive sorites, &c. si demonstrationis specie quempiam deludat, *paralogismus* appellatur.

CAPUT VI.

De reductione syllogismorum imperfectorum ad perfectos.

REGULÆ, quæ vulgò traduntur in Scholis de reductione syllogismorum imperfectorum ad perfectos, solis simplicibus syllogismis applicari solent, non aliis. Unde vel efficiendum prius, ut complexi & compositi syllogismi in simplices transformentur; vel aliâ methodo ac ratione eos expendere necesse est.

Ex quatuor autem syllogismorum simplicium figuris; prima sola, si strictè loquamur, naturalem terminorum servat ordinem; reliquæ nonnihil ab eo deflectunt: ideoque si earum modi minùs evidenter concludere aliquando videantur, eos Logici ad primæ figuræ modos suarum regularum ope reducunt, ut judicare possint an bene vel malè concludant.

Quocirca hujusmodi reductio definiri potest, *syllogismi minùs perfecti in perfectiorem evidentia causâ transformatio*: eaque duplicis est generis, scilicet *directa*, quam etiam *ostensivam* vocant, & *indirecta*, quæ dicitur reductio *ad incommodum*, sive *ad impossibile*.

Reductio *directa*, sive *ostensiva* est ea, quâ syllogismus imperfectus ad perfectum revocatur per transpositionem, aut conversionem alicujus vel aliquarum ex ipsius propositionibus. Qua in re advertendum primò, modos, qui incipiunt à litera B, ut *Bamalipton*, revocari debere ad *Barbara*; qui incipiunt à litera C, ut *Cesare*, ad *Celarent*; qui à litera D, ut *Darapti*, ad *Darii*; denique

qui ab F , ut *Festino* , ad *Ferio* , reduci oportere.

Secundò observandæ sunt quatuor literæ , S, P, M, C, quotiescunque occurrunt in fine syllabarum cujusque artificiosi vocabuli : nam S, significat propositionem *simpliciter* esse convertendam ; P , *per accidens* ; M, eam loco *movendam* , seu transponendam ; denique C, denorat modum in quo est , *cavere* reductione directâ ; sed tantum ad impossibile esse reducendum , ut sunt *Baroco* , & *Bocardo* : idquæ exprimitur sequenti disticho.

S, vult simpliciter verti , P , verò per accid.

M , vult transponi , C, per impossibile duci.

Proponatur igitur syllogismus in *Cesare*.

Ces..... Nullum extensum est spiritus :

a..... omnis Angelus est spiritus :

re..... ergo nullus Angelus est extensus.

Primò , modus iste incipit à litera C : quare ad *Celarent* est revocandus.

Secundò , in fine primæ syllabæ , *Ces* , occurrit litera S , quæ ostendit majorem esse *simpliciter* convertendam , ut syllogismus qui est in *Cesare* , fiat in *Celarent* , hoc modo.

Ce..... Nullus spiritus est extensus :

la..... omnis Angelus est spiritus :

rent..... ergo nullus Angelus est extensus.

Similiter syllogismus in *Festino* revocabitur ad *Ferio* , conversâ *simpliciter* majori propositione ; quoniam occurrit S , in fine primæ syllabæ vocabuli *Festino*.

Fes..... Nullum peccatum est licitum :

ti..... aliqua oblectatio est licita :

no..... ergo aliqua oblectatio non est peccatum.

Fe..... Nullum licitum est peccatum :

ri..... aliqua oblectatio est licita:

o..... ergo aliqua oblectatio non est peccatum.

Sit tertius syllogismus in *Darapti* : is revocandus erit ad *Darii*, convertendo *per accidens* minorem illius propositionem, quod litera P. occurrat in fine secundæ syllabæ vocabuli *Darapti*.

Da..... Omnis Angelus est spiritus :

rap..... omnis Angelus est creatura :

ti..... ergo aliqua creatura est spiritus.

Da..... Omnis Angelus est spiritus :

ri..... aliqua creatura est Angelus :

i..... ergo aliqua creatura est spiritus.

Denique si sit syllogismus in *Bamalip*, reducetur ad *Barbara* : sed major illius propositio erit loco *movenda*, seu in locum minoris transponenda, propter consonam *m*, quæ occurrit in fine primæ syllabæ *bam* ; & conclusio *per accidens* erit convertenda propter literam *p*, quæ occurrit in fine ultimæ syllabæ *lip*.

Bam..... Omnis virtus est bona qualitas :

a..... omnis bona qualitas est optanda :

lip..... ergo aliquod optandum est virtus.

Bar..... Omnis bona qualitas est optanda :

ba..... omnis virtus est bona qualitas :

ra..... ergo omnis virtus est optanda.

Simili ratione reduci possunt cæteri modi imperfecti ad perfectos, exceptis tantum duobus, scilicet *Baroco* & *Bocardo*, qui *ad incommodum* duntaxat, seu *impossibile* reducuntur.

Primò enim *baroco* directè reduci non potest ad primam figuram. Etenim si majorem illius convertas *per accidens*, ut tantum converti potest ; utraque illius præmissa erit particularis, contra regulam quintam generalem syllogismorum : si verò eam transposueris, tum major erit particularis, contra secundam regulam primæ figuræ.

Secundò, *bocardo* quoque non potest. Nam vel ipsius minor convertetur *per accidens*, ut solummodò converti potest ; & tunc duæ illius præmis-

fæ erunt particulares , contra quintam regulam generalem : vel si transpositione utaris , minor erit negans contra primam regulam primæ figuræ.

Supereſt igitur ut ambo iſti modi *ad impoſſibile* reducantur , id eſt , ut adverſarius vel legitimam eſſe fateatur eorum concluſionem admiſſis præmiſſis , vel concedat *aliquid ſimul eſſe & non eſſe* , contra principium illud omnibus notum, *impoſſibile eſt idem ſimul eſſe & non eſſe*.

Ut autem ea reductio peragatur , accipienda eſt propoſitio contradicens concluſioni , quam adverſarius , admiſſis præmiſſis , negavit : hanc contradicentem concedere tenebitur adverſarius , alioqui duo contradictoria ſimul falſa eſſe fateretur , quod abſurdum eſt.

Deinde iſta propoſitio contradicens fieri debet minor , ſervatâ eâdem majore in modo *baroco*; ſed debet fieri major , ſervatâ eâdem minore in modo *bocardo*, ut conficiatur ſyllogiſmus in *barbara* , ſecundum hos verſus ,

*Servat majorem , mutatque baroco minorem :
Majorem mutat , retinetque bocardo minorem.*
Exempla rem totam illuſtrabunt.

*Bar..... Omnis virtus eſt prudens :
oc..... aliquis zelus non eſt prudens :
o..... ergo aliquis zelus non eſt virtus.*

Si quis , admiſſis præmiſſis , concluſionem neget, ſumenda eſt hujus concluſionis contradictoria, nempe *omnis Zelus eſt virtus* , quæ fiet minor ſyllogiſmini in *barbara* , retentâ eâdem majore ſuperioris ſyllogiſmini in *baroco* , hoc modo.

*Bar..... Omnis virtus eſt prudens :
ba..... omnis zelus eſt virtus :
ra..... ergo omnis zelus eſt prudens.*

Hanc poſtremam concluſionem negare non poteſt adverſarius admiſſis præmiſſis : & tamen in priori ſyllogiſmo conceſſerat *aliquem Zelum non*

esse prudentem : quamobrem , vel duo contradictoria tenetur admittere contra principium illud , *impossibile* , &c. vel negatæ conclusioni acquiescere.

Sit jam Syllogismus in *bocardo*.

Boc..... Quædam ira non est peccatum :

ar..... omnis ira est affectus animi :

do..... ergo aliquis affectus animi non est peccatum.

Si quis admissis præmissis neget conclusionem , fumenda erit contradictoria hujus conclusionis , nempe , *omnis affectus animi est peccatum* , eaque fieri debet major , retentâ eâdem minore : tumque deducetur conclusio in modo *barbara* , quæ contradicet majori concessæ , hoc modo.

Bar..... Omnis affectus animi est peccatum :

ba..... omnis ira est affectus animi :

ra..... ergo omnis ira est peccatum.

Utraque hæc reducendorum syllogismorum ratio , sive directa , sive indirecta in praxi operosissima est , solisque simplicibus syllogismis non complexis aut compositis convenit , ut diximus.

Itaque , ut facilius , & tutius de quolibet syllogismo , tam simplici , quàm composito , imò de qualibet ratiocinationis specie judicium ferre possimus , & quid valeat , expendere ; in memoriam revocandum est principium illud generale Syllogisticæ , quod jam à nobis fuit præmissum , quo quidem principio *conclusionem in una præmissarum contineri debere* , idque per alteram indicari oportere tradidimus. Est enim in omni syllogismo propositio , in qua conclusio continetur , ideoque vocatur *continens* ; sed ut ea conclusionem continere ostendatur , altera ipsi applicanda est propositio , quæ ideo *applicata* , vel *indicativa* nominatur.

In syllogismis affirmantibus , nihil planè inte-

recte, an maiorem, an minorem dicamus esse continentem, vel applicatam; quia utraque aliquo modo conclusionem continet; utraque etiam ostendit illam in altera contineri: quoniam tamen major propositio est universalior, ipsa sæpius pro continente accipitur, & minor pro applicata.

In syllogismis autem negantibus præmissa negans est semper propositio continens, & affirmans est applicata: quia, cum conclusio sit negans, æquius est, ut in præmissa negante contineri dicatur, quàm in affirmante. Si quis igitur dubitet an sequens syllogismus rectè concludat, nec-ne; hujus regulæ beneficio id expendere poterit.

Lex divina præcipit ut seculari magistratui obediamus.

Sed Episcopi non sunt magistratus seculares:

Ergo lex divina non præcipit ut Episcopis obediamus.

Perpicuum est enim ex nostro principio hunc syllogismum malè concludere, cum neutra præmissarum conclusionem contineat. Major enim propositio præcipi quidem ait, ut seculari magistratui morem geramus; sed minimè excludit obsequium aliis personis in aliqua dignitate, sive ecclesiastica, sive civili, sive militari constitutis debitum. Quocirca dum minor propositio ostendit Episcopos non comprehendi sub magistratu seculari, non potest inde inferri *legem divinam non præcipere, ut Episcopis obediamus*: quoniam ea conclusio maiorem *exclusivam* postularet, quâ diceretur *lex divina præcipere, ut solis magistratibus secularibus obsequium præstaremus, non aliis*.

At eodem principio manifestum est sequentem syllogismum esse legitimum: quia major continet conclusionem, ut minor evidenter ostendit.

Lex divina præcipit, ut Reges colantur.

Atqui Ludovicus X I V. est Rex :

Ergo lex divina precipit , ut colatur Lud. X I V.

Etenim conclusio hujus syllogismi est complexa , cujus prior pars , nempe , *lex divina precipit* , est propositio incidens , quæ affirmationem afficit : quippe illius sensus est , *Ludovicus X I V. est colendus , ut lex Divina precipit*. Ipsam igitur in majore , quæ pariter complexa est , contineri minor indicat. Sic ergo exprimendus est syllogismus , qui revera est primæ figuræ in modo , *Barbara* , quoniam minor illius , quæ singularis est , æquivalet universali.

Reges sunt colendi , ut lex Divina precipit :

Atqui Ludovicus XIV. est Rex :

Ergo Lud. X I V. est colendus , ut lex divina precipit.

Eâdem ratione quòd conclusio in majore contineatur , idque minor patefaciat , sequens syllogismus est optimus.

Id quod non habet partes , interire non potest per dissolutionem partium :

Atqui mens hominis non habet partes :

Ergo mens hominis perire non potest per dissolutionem partium.

Hic inquam , syllogismus optimè concludit. Sed dum eo , aliisque similibus utuntur nonnulli , ut ex puris negantibus rectè concludi posse demonstrent , non satis animadvertunt minorem hujus , similiumque syllogismorum , verbis duntaxat *negantem* , sed sensu *affirmantem* esse : siquidem , cum constet eum esse in prima figura , necesse est ut medius ejus terminus sit subjectum majoris propositionis , & attributum minoris : subjectum autem majoris est , *id quod non habet partes* : unde quamvis minor dicat tantum , *atqui mens hominis non habet partes* , quæ propositio videtur negans , sensus tamen illius est , *atqui mens hominis*

hominis est id, seu, est res qua non habet partes : quæ propositio est affirmans, licet ipsius attributum propositionem incidentem negantem contineat, nempe, *quod non habet partes*.

Similia passim occurrunt exempla in prima syllogismorum figura. v. g.

Is qui non laborat non debet manducare :

Atqui Stichus non laborat ;

Ergo Stichus non debet manducare.

Id est, *atqui Stichus est is, qui non laborat* : quæ propositio citra dubium est affirmans, Idem de cæteris similibus est sentiendum.

In quibus omnibus syllogismis, & aliis, quicumque sunt legitimi, patet justam conclusionem in una præmissarum semper contineri ; idque per alteram declarari.

CAPUT VII.

De inventione medii, seu de locis dialecticis.

UT omnibus ac singulis quæstiones proponere in proclivi est, ita eas argumentis probare sæpius difficillimum. Hinc factum est, ut locos quosdam communes excogitarint Dialectici, quos non soli Dialecticæ, sed Arti etiam suæ Rhetores utilissimos judicarunt. Hos locos, *argumentorum sedes* appellant ; quoniam ex iis argumenta, sive, ut loquuntur, *media*, desumunt Dialectici, & Rhetores ad quæstiones suas probandas.

Quæstio autem, seu propositio vel est *thesis*, seu *assertio*, seu *sententia*, quam quis demonstrare & defendere, discussis adversariorum rationibus, paratus est ; vel est tantum *problema*, id est, propositio quædam communis & obvia, in quacumque

materia, sive physica, sive morali, de qua in utramque partem disputari potest. Circa hujusmodi præsertim quæstiones occupatur ea Logicæ pars, quæ *Dialectica* vocatur; quæque probabilibus tantum argumentis utitur.

Hanc partem fusè pertractavit Aristoteles totis octo libris Topicorum, in quibus videlicet plurimos proponit locos, seu instrumenta, quibus problemata dialectica in utramque partem probari queant.

Quadruplex verò est apud ipsum problematum, seu propositionum problematicarum genus, pro quadruplici diverso earum attributo, scilicet *definitione*, *genere*, *proprio*, & *accidente*: ubi definitionis nomine species ipsa, quæ ex genere constat & differentia, continetur. Quocirca quatuor illa attributa cum quinque vulgatis Porphyrii universalibus attributis ferè coincidunt. Igitur aliud est *problema generis*, aliud *accidentis*, &c. ut lib. 1. Topicorum cap. 4. docet Aristoteles, qui ad illorum omnium probationem magnum locorum apparatus hisce Topicorum libris disponit.

Sed cum earum rerum tractationem non planè inutilem judicemus; sic tantos ex ea colligi fructus non arbitramur, quin vel mediocris illius cognitio tyrõnibus sufficiat. Quapropter in eam fusiùs cum Aristotele non excurreremus: sed satis esse putamus, si brevem illius synopsis ex Claubergio secundâ parte Logices, cap. ultimo exhibeamus.

Loci igitur Dialectici petuntur, vel ex *Grammatica* vel ex *Logica*, vel ex *Metaphysica*: unde alii sunt Grammatici, alii Logici, alii Metaphysici.

Loci Grammatici præsertim ducuntur ab etymologia, & à conjugatis.

Regulæ loci *ab etymologia*, id est, ab ipsius no-

minis & appellationis ratione , hæ sunt. Prima quidem , *de quo affirmatur etymologia nominis , de eo etiam affirmatur nomen , & vicissim.* Secunda, *de quo negatur etymologia nominis , de eo nomen negatur.* Verbi gratia , Consul est : ergo consulere debet Reipublicæ. Vel, non consulit Reipublicæ : ergo non est Consul.

Regulæ loci à conjugatis , id est , à vocibus ; significatione & literis convenientibus , terminatione autem discrepantibus totidem sunt. Prima, *affirmato uno conjugatorum, affirmatur & alterum.* Verbi gratiâ , justus est : ergo justitiam colit. Secunda, *negato uno conjugatorum, negatur & alterum.* Verbi gratiâ , nihil scribit : ergo non est scriptor.

Loci Logici petuntur ab attributis universalibus putâ, genere, specie , &c. à definitione , à divisione, &c. ac singuli suas habent peculiares leges.

Et quidem regulæ loci ab attributis universalibus hæ sunt. Prima, *Quod de genere universè affirmatur aut negatur , id etiam de speciebus affirmari aut negari potest :* sive quicquid prædicatur de superiori, prædicatur etiam de inferiori : quod fundamentum est syllogismorum affirmantium primæ figuræ, ut diximus. Secunda , *Sublato genere , tollitur species.* Verbi gratiâ , Si quid non sit spiritus, non est Angelus. Tertia , *Positâ specie, ponitur genus ,* ut , Angelus est : ergo spiritus. Quarta. *Sublatis omnibus speciebus tollitur genus.* Quinta. *Quod de omnibus speciebus affirmatur vel negatur , id etiam de genere affirmandum vel negandum.* Sexta. *De quo affirmatur, vel negatur differentia specifica & completa , de eo species affirmari vel negari potest.* Verbi gratiâ , si quid planum sit ; & rotundum, rectè circulus dicitur. Septima. *De quo affirmatur vel negatur proprium , id est , attributum essenziale secundarium , de eo essentia affirmatur vel negatur.* Verbi gratiâ , Bellua non est fermocinationis ca-

pax : ergo non est rationis particeps.

Suos quoque canones habet locus à definitione. Primus est. *De quo affirmatur vel negatur definitio, de eo affirmatur vel negatur definitum.* Secundus. *Quod affirmatur, vel negatur de definitione, id etiam de definito affirmatur aut negatur.*

Denique locus à divisione his regitur legibus. Prima. *Cùm integra est & perfecta divisio, si nulla ipsius pars alicui rei conveniat, ipsi totum divisum non conveniet.* Verbi gratiâ, si dicatur; ens omne, vel spiritus est, vel corpus : sed spatium nec spiritus est, nec corpus : rectè colligetur, ergo *spatium non est ens.* Secunda. *Cui convenit divisum, ei pars aliqua dividens convenire debet.* Verbi gratiâ, omnis substantia, vel spiritus est, vel corpus. Atqui mens hominis est substantia. Ergo vel spiritus est vel corpus. Non autem est corpus : ergo spiritus.

Loci Metaphysici sumuntur à communibus notionibus, à causis, ab effectis, ab antecedentibus, à consequentibus, à toto, à parte, ab oppositis, & similibus, de quibus primâ parte Metaphysices. Ex iis petuntur argumenta non probabilia tantum, sed etiam demonstrativa; præsertim ea, quæ à *causa effectrice* sunt desumpta, nimirum, ubi res physica in quæstionem deducta est : nam si materia sit moralis, præcipuus *fini* tribuendus est honor ; cùm finis in moralibus primo loco sit spectandus : unde illud *CASSIANUM* apud Ciceronem Orat. pro Milone, & Philipp. 2. *Cui bono?* Quod adeo verum est ut, quemadmodum videbimus in Ethicâ, eadem actio pro diverso fine bona sit aut mala, ipsumque martyrium ex fine bonitatem ducat, *cum martyrem non faciat pœna sed causa,* ut ait S. Augustin. Ep. 204. aliàs 7. num. 4.

Ab *antecedentibus* quoque & *consequentibus* peti possunt argumenta ad veri notitiam ducentia. Hinc est quòd Christus Dominus Phariseis objurgat

Matth. cap. 16. v. 2. & sequentibus, quòd nollent ipsius missionis tempus ex iis quæ patrabat signis & miraculis, velut ex consequentibus, agnoscere: cum tamen ex cœli facit tanquam ex aliquo antecedente futuram tempestatem prænuntiarent. *Facto vespere*, inquit, *dicitis Serenum erit: rubicundum est enim cœlum; & manè: hodie tempestas, rutilat enim triste cœlum. Faciem ergo cœli dijudicare nostis: signa autem temporum non potestis scire?*

Denique ab oppositis & similibus argumentari fas est: ut cum Horatius, adductis à Patre proborum & improborum exemplis, ad virtutem excitabatur, prout refert, Sat. 4. lib. 1.

..... sic me
Formabat puerum dictis, & sive jubebat
Ut facerem quid, habes auctorem quo facias hoc,
Unum ex judicibus selectis objiciebat.
Sive vetabat; an hoc in honestum & inutile
factu
Nec ne sit addubites, flagret rumore malo quum
Hic atque ille?

MONITUM I.

In rebus moralibus exempla proferre licet, non tantum ex iis quæ vera sunt, & in rerum naturâ consistunt; sed etiam ex rebus fictis & falsis, dummodò communi hominum sermone usurpentur. Nam in exemplis non requiritur veritas, sed tantum manifestatio veritatis, ut vulgò dicitur. Unde Propheta rex ex vulgari opinione, quâ fertur aspis alteram ex auribus terræ allidere, alteram caudâ obturare ne incantantium voces audiat, comparationem ducit Psalm. 57. v. 4. His verbis: *Furor illis (inimicis meis secundum similitudinem serpentis, sicut aspidis surda, & obturantis aures suas.* Nam ii quoque aures suas occluserant ne verita-

tem audirent. Similiter quamvis fabulosa sint, quæ de phœnice ave Arabiæ narrant Plinius lib. 10. Natural. hist. cap. 2. Corn. Tacit. lib. 6. Annal. & alii : tamen quia communia sunt & hominum sermonibus trita , idcirco illa , sive ad corporum nostrorum resurrectionem non probandam quidem sed adumbrandam , eò quod Phœnix è cineribus suis renasci perhibeatur , sive ad aliam veritatem declarandam , possunt à Religionis Christianæ doctoribus , citra errorem aut impietatem adhiberi , ut adhibita sunt à D. Clemente in Epistola quam scripsit ad Cōrinthios. Idem dicendum de Poëtarum fabulis ; de Apologis Æsopi ac Phædri , quibus tantus honos & à veteribus habitus est , & à nostris etiamnum habetur. Quocirca S. Augustinus lib. de gestis Pelagii num. 18. aliàs cap. 6. hæc sapienter tradit. *Non etiamsi quisquam , verbi gratiâ , dixerit aquilarum pullos paterno ungue suspensos , & radiis Solis oblatos , si oculis palpitaverint , tanquam adulterinos in terram , luce quodammodo convincente , dimitti , si fortè hoc falsum est , hæreticus judicandus est. Et hoc quia in hominum doctorum litteris invenitur , famâque vulgatum est , nec stultè dici putandum est , etiamsi verum non est. Non tamen ex hujusmodi rebus falsis probatur veritas , sed tantum illustratur. Loci autem dialectici tum ad probandam , tum etiam ad illustrandam veritatem fuerunt inventi.*

MONITUM II.

Regulariter pars negans problematis probari non debet ; sed pars affirmans. Sive , ut loquitur Jurisconsultus Paulus lib. 22. Digestorum , tit. 3. leg. 2. *Ei incumbit probatio , qui dicit , non qui negat.* Exempli causâ. Si quid certi apud homines extare contendam ; tu verò neges : meum est af-

sertionis meæ rationes afferre ; tu verò à probanda parte negativa omninò es immunis.

At si propositionem quamdam , quæ vel *ius*, vel *factum* contineat , idoneis argumentis proba- vero , nec tu iis te dedere , sed partem negantem mordicùs tenere velis : tuum erit argumenta mea refellere ; & negationis, si quam habes , rationem reddere : alioqui nullus esset probandi finis ; quan- doquidem , ut vulgò aiunt ; *plus negaret asinus, quàm probaret Philosophus.*

CAPUT VIII.

De Sophistarum fallaciis.

SOPHISTÆ nomen initio perhonorificum fuit, non secus ac Magi , Astrologi , Tyranni , & alia hujusmodi , quæ solo hominum quibus con- cessa sunt , vitio , in malam partem postea sumi cœpere. Sophistes enim à sapientia , quam profi- tebatur , fuit denominatus : sed multi sapientis nomine ad fucum aliis faciendum abusi , artem illam omnium odio & despectui exposuere.

Adversùs Sophistas disputat Aristoteles libro de *Elenchis*, id est , de reprehensionibus Sophistarum : qui liber à quibusdam in duos dividitur. *Elenchum* autem , seu reprehensionem vocat cap. i. ejusdem libri, *sylogismum contradicentem conclusioni , quæ ab adversario posita est* ; & alium quidem ejusmodi elenchum ait esse verum, alium falsum ; hunc So- phistarum ; illum sapientum esse proprium. So- phistam quippe eum esse qui ex fucatâ , falsâque sapientiâ quæstum capret , & malit sapiens videri, quàm esse ; sapientem contrà , veritatis studio te- neri , eam defendere ; nec tantum non mentiri ;

sed aliorum etiam mendacia, & fallacias detegere, ac refellere.

Omnis porro cavillatio, vel fallacia Sophistarum, aut in dictionibus posita est, aut in cogitationibus: prior dicitur Grammatica, posterior Logica vocari potest.

Grammatica fallacia, vel in æquivoco, seu ambiguo vocabulo sita est; ut si dicatur, *aliquod sy-
dus est leo: ergo rugire potest*; vel in ambiguo sermone, sive, ut Græci aiunt, *amphibolia*, ut istud oraculi responsum;

Crasus Halin penetrans magnam pervertet opum vim.

Incertum enim, quæ sit hinc ducenda conclusio; an ista, ergo *Crasus fluvium Halin superans hostium opes subvertet*; an illa, *Crasus propriarum opum jacturam faciet*: utrumque enim oraculi responso perinde continetur.

Ad ambiguitatem quoque pertinet interrogatio multiplex, cui simplici responsione fieri non potest satis. Ut si quis quærat, an Aristoteles sit Philosophus, & Philosophorum Princeps? Etenim aliud est quærare, utrum sit Philosophus, de quo nulla est controversia; an Philosophorum princeps, de quo potest esse dubium.

Magis adhuc ineptæ sunt cavillationes, quæ in accentu, aut genere dictionis consistunt: ut si quis v. g. vitiliritiget circa hanc vocem, *populus*, quæ cum fœmini generis est, & primam syllabam habet longam, tunc arborem significat; cum verò primam habet brevem, ac masculini est generis, hominum multitudinem denotat.

Fallaciæ Logicæ ad aliquot capita reduci solent.

Prima est *ignoratio elenchi*, seu ignoratio ejus quod in adversario est reprehendendum: ut cum probatur contra Adversarium id quod ab eo non negatur; nec ad quæstionem pertinet. Hoc vitio laborare aiunt Aristotelem initio libri primi Phy-

ficorum , ubi Parmenidem & Melissum arguit, quòd unum duntaxat compositionis principium agnoverint in corpore naturali , cùm ii , vel de materiâ solâ omnibus corporibus communi , non excludendo formam , seu dispositionem materiæ ; vel de principio efficiente , seu primâ causâ sint intelligendi. Ignoravit igitur statum quæstionis Aristoteles, aut ignorare se finxit.

Secunda dicitur *petitio principii* : cùm nempe id, quod in quæstionem venit : ac *principio* seu initio quæsitum est , *petitur* , sive assumitur tamquam certum. v. g. si quis probare velit inesse lapidi principium intrinsecum , quo in terram feratur; quia nullo impellente in eam decidit , certè petet principium : nam id ipsum est , quod quæritur , an impellatur ab aliquo necne.

Tertia fallacia est , à *non causa* , pro *causa* : cùm scilicet id causæ loco affertur , quod tamen causa non est : ut cùm cometa , aut aliud quodvis cælestæ phænomenon causa dicitur subsequæ pestilentie , sterilitatis , aut aliarum calamitatum , quæ in genus humanum ingruunt : sic enim ratiocinari solent homines, *post hoc : ergo propter hoc*.

Quarta est ab *imperfecta enumeratione*. Ut, si quis dicat ; *Titius capite damnatus est , vel suâ culpâ, vel pravitate iudicium* : imperfecta est enumeratio: nam id etiam falso , sed invicto improborum hominum scripto, seu testimonio, aut aliis modis potest accidere.

Quinta est *fallacia accidentis* : cùm nempe alicui rei simpliciter & absolute tribuitur , quod ipsi tantum per accidens convenit : ut si quis stibium, seu antimonium idcirco à medendi arte amandari velit, quasi noxium ; quòd aliquando imperitè porrectum quibusdam nocuerit.

Sexta est *fallacia compositionis* , & *fallacia divisionis* : ut si id quod *sensu composito* intelligendum est,

sensu diviso explicetur, aut vicissim. Exempli causa dicit S. Augustinus lib. de corrept. & grat. n. 23. aliàs cap. 9. electos perire omnino non posse. *Quicumque ergo in Dei providentissimâ dispositione præsciti, prædestinati, vocati, justificati, glorificati sunt, non dico etiam nondum renati, sed etiam nondum nati, jam filii Dei sunt, & omnino perire non possunt.* Si quis hanc propositionem in sensu diviso interpretatus contendat prædestinatos, quamvis perituri non sint, absolutè tamen posse perire; cum potentiam malè agendi, proindeque in æternam damnationem incurrendi, retineant; nec ulla iis bene agendi necessitas imponatur: is sanè à S. Augustini mente omnino erit alienus; ac ineptè prorsus illius doctrinam undequaque solidissimam, ac tutissimam, vellicare conabitur. Non enim inficiatur S. Augustinus malè agendi facultatem inesse sanctis omnibus, quamdiu in hac vitâ, ærumnis plenâ, militant: sed si revera prædestinati sint, quamvis absolutè, & in sensu diviso possint malè agere, pœnasque sempiternas mereri, non suo sic dimittentur desiderio ut in finem usque malè agant: quoniam hæc duo componi non possunt, ut quis ad æternam gloriam sit prædestinatus, & simul inferorum ignibus æternum cruciandus tradatur. Absit autem, inquit idem S. Doctor lib. de gestis Pelagii num. 7. aliàs cap. 3. *ut ii qui secundum propositum vocati sunt, quos præscivit & prædestinavit conformes imaginis filii sui, suo, ut pereant, desiderio dimittantur.* Hoc enim patiuntur vasa ira, quæ perfecta sunt ad perditionem: in quorum etiam ipsa perditione notas fecit Deus divitiâs gloriæ suæ in vasa misericordiæ suæ. Manifestum est igitur sancti Augustini propositionem in sensu composito, qui obvius est, accipere oportere, non in sensu diviso, qui rarim in mentem non venit. Similiter in sensu composito intelligendum est quod scribitur D. Jo-

hannis Epist. 1. cap. 3. v. 9. *Omnis qui natus est ex Deo, peccatum non facit & non potest peccare quoniam ex Deo natus est* : id est, quoniam se gerit tanquam ex Deo natus, & Dei Spiritu movetur, à peccato semper abhorret.


Septima est à dicto simpliciter ad dictum secundum quid, aut vicissim. Exempli causâ, si quis ex eo quod præcepta Dei solis naturæ viribus Divinâ gratiâ destitutis impleri non possunt, illa simpliciter & absolutè impossibilia pronuntiet, in vitium quod reprehendimus, incidet : quoniam argumentabitur à dicto secundum quid, sive ab eo quod secundum aliquem duntaxat modum verum est, ad dictum simpliciter. E contrario si quis dicatur *bonus cum addito*, v. g. *bonus pictor*, ex eo quod sit *bonus simpliciter* : mala quoque futura est consequentia : siquidem ducetur à dicto simpliciter ad dictum secundum aliquem modum. Ubi notandum, cum homo dicitur *bonus simpliciter*, attributum *bonus*, eadere in subjectum *homo* : sed cum dicitur *bonus pictor*, vox *bonus*, non afficit subjectum, *homo*, sed attributum, *pictor*.


Octava est transitio à genere in genus : ut si ad ea quæ naturalia sunt, probanda, mysterium aliquod adhibeamus : aut vicissim. Item cum Mathematici à statu ideali & mathematico ad realem & physicum transeunt. Exempli causâ demonstrant lineam perpendicularem, per extremum diametri circuli punctum ductam, in hoc solo puncto circulum tangere : idque mathematicè verum est, ut videri potest in nostris Geometriæ Elementis lib. 3. Theorem. 2. Sed si hinc colligantur existere puncta seu indivisibilia physica, omnis planè extensionis expertia, minimè justa erit consequentia, ut observabimus in Physica : quoniam fiet transitus à genere in genus. E contratio adhibent lineas omnis soliditatis expertes, quas infinito numero ex

aliquo puncto duci, ac finitam aliquam lineam infinitis locis per eas secari contendunt, ut hinc divisibilitatem materiæ in infinitum colligant: qua in re & hypothesim physicè impossibilem usurpant, & ex ordine Mathematico in ordinem physicum transeunt, ac consequenter à veris rationationis legibus recedunt: ut etiam in Physica notabimus, ubi de materiæ divisibilitate fiet sermo.

Solvuntur autem sophismata. Primò, cum fallacia detegitur: id est, cum explicatur sermonis ambiguitas, multiplexve sensus distinguitur. Secundo, cum sophisma irridetur & contemnitur. Tertiò, cum quæstio aliò detorquetur, & adversarius ad novam quæstionem expendendam ex occasione traducitur. Sed prima duntaxat solvendi sophismatis ratio vero sapienti convenit; nec posterioribus, nisi rarò, & cum aliter Sophistæ pervicacia vinci non potest, utendum. Nam ad eas quoque artes ipsi Sophistæ, ac malæ fidei homines sæpe confugiunt, qui cum validis adversariorum rationibus urgeri se undequaque sentiunt, quæstionem propositam declinant; novasque & prorsus extraneas difficultates substituunt; aut ambages quærent; vel contemptu tantum aliquo, seu irrisione, additis quandoque dictis respondet, ut ipsi inter imperitos triumphent, & adversarios in contempnitionem adducant; aut si fieri potest, ad iracundiam provocent: quia tunc sui minùs compotes effecti rationum suarum obliviscuntur, aut earum vim minùs percipiunt: namque

Impedit ira animum, ne possit cernere verum.





PARS QUARTA LOGICES.

De Methodo.

SUPEREST nobis explicanda Methodus, quæ in cogitationum ordinatione consistit, sive ut dicamus proprio Marte, & indagemus id, quod nos latet; sive, ut alios doceamus, quod jam à nobis fuit reiectum. Hujus partis tractatio magnæ profectò utilitatis censeretur debet; cum sine certo ordine ad veritatem contendere vix liceat; omniaque præcepta Logices eò collineent, ut tuta nobis atque expedita ad veritatis assecutionem via & ratio aperiat. Quamobrem de methodo saltem breviter agendum.

CAPUT I.

Quid sit methodus generatim.

METHODUS generatim est *via & ratio inquirendi veri, quod adhuc latet, & illius explicandi, cum jam inventum est*: vel, est actus mentis, ideas suas, judicia, & ratiocinationes ordinantis, sive ad discendum quod ignotum est; sive, ad id, quod est compertum, exponendum. Hinc duplex methodus; altera *analytica*, seu resolutionis, & inventionis; altera *synthetica*, seu compositionis, & doctrinæ.

Hic verò quæritur in Scholis, an ea cogita-

tionum nostrarum ordinatio sit actio mentis à cæteris distincta ; an verò ad iudicium aut ratiocinationem sit referenda : cui quæstioni ut fiat satis , sit

PROPOSITIO PRIMA.

DUÆ sunt tantum cogitandi rationes , si propriè & strictè loquamur ; nempe perceptio, & iudicium.

Probatur. Duæ sunt tantum cogitandi rationes , si ad perceptionem & iudicium reliquæ revocentur.

Atqui ad perceptionem & iudicium cæteræ revocantur.

Etenim ad perceptionem pertinent , *intellectio* quâ res citra speciem corpoream cognoscuntur , *imaginatio* , quâ per imagines corporeas percipiuntur ; & *conscientia* per quam mens sui ipsius , suarumque cogitationum & affectionum sibi proximè est conscia , ita ut nemine mortalium docente , intimo quodam sensu , & se , & cogitationes suas , affectionesve percipiat.

Ad iudicium verò referuntur , *ratiocinatio* , quæ est iudicium quoddam ex aliis antecedentibus iudiciis ductum , & *methodus* , sive cogitationum nostrarum ordinatio , quæ pariter species quædam est iudicii , quâ quædam veritas certo modo inquirenda , vel certâ ratione aliis exponenda decernitur.

Ergo duæ sunt tantum cogitandi rationes , si propriè & strictè loquamur , nempe perceptio ac iudicium.

PROPOSITIO SECUNDA.

TAM methodus postulat seorsim tractari à Logica , quàm ratiocinatio.

Probatur. Peculiaris quædam judicii species tam postulat seorsim tractari à Logica, quàm ratiocinatio: siquidem ratiocinatio nihil aliud est quàm quædam judicii species, ut suprà ostendimus.

Atqui methodus, sive, cogitationum nostrarum ordinatio tum ad inveniendum, tum ad exponendum verum, est etiam peculiaris judicii species; eùm circa definitam aliquam, propriamque materiam sit occupata, & specialem difficultatem includat, quæ in aliis judiciis non occurrit.

Ergo tam methodus seorsim tractari postulat, quàm ratiocinatio.

Quamobrem, ut de ratiocinatione separatim tertiâ Logices parte disputatum fuit; sic quarta pars methodo soli est attribuenda, sine qua propositum sibi finem consequi non posset Logica, quæ est *ars cogitandi*, sive cogitationes ad verum dirigendi. Quid enim prodesset percipere, judicare, & ratiocinari, nisi hæc ordinatè fierent, & ita componerentur inter se, ut eorum ope veritas latens inveniri, aut inventa aliis posset explicari? Videndum igitur primò, quâ ratione veritas investigetur: tum quo pacto aliis exponatur, apertius.

CAPUT II.

De methodo analyticâ, seu resolutionis, & inventionis.

A Nalytis græcè resolutionem latine significat: & hoc nomen duplici ratione usurpatur.

Prima est communis, quâ nempe *Analysis* dicitur esse rei cujuscumque in suas causas aut principia, aut partes reductio: ut cum corpus Physicum &

mixtum in sua principia seu elementa, vel cum opus quoddam, puta dissertatio, vel oratio in suas partes aut membra, ex quibus coalescit, resolvitur. Juxta hanc acceptionem quatuor Aristotelis libri, in quibus de syllogismo, & de demonstratione disputat, *Analytici* sunt nominati: quoniam syllogismum in sua principia; nempe in materiam & formam; itemque demonstrationem in partes, ex quibus constat, reducunt.

Secundo modo sumitur *Analysis*, seu methodus *Analytica* à Philosophis, quatenus nimirum est *ratio inveniendi veri, seu proposita questionis solvenda*. De *Analysi* hoc posteriore sensu accepta hic disputamus. Hæc autem methodus adhibetur, non in scientia aliqua integra pertractanda: sed tantum in questione peculiari solvenda; quæ ubi jam soluta fuerit, ad eam disciplinam, cujus est propria, referenda est; & syntheticâ methodo exponenda.

Quæstiones autem quæ proponuntur; vel circa vocabula: vel circa res versantur.

Quæstiones circa vocabula ex sunt, non quidem per quas vocabula quærimus, sed per quas ex vocabulis res quasdam exsculpere molimur: nempe, cum vel ænigmatis solutionem assequi; vel Auctoris alicujus sensum expiscari; vel libri aut scripti verum Auctorem invenire; vel loci corrupti in libro restitutionem eruere contendimus.

Quæstiones circa res propositæ in quatuor species tribuuntur.

Prima, cum ex effectibus causa quæritur, sive rei natura ex proprietatibus aut functionibus: v. g. cum æstus maritimi causa; vel cum aquæ aut rei alterius natura ex ipsius proprietatibus inquiritur. Hic enim *causa* & *effectus* nomina latius accipienda sunt, ut alibi sæpè.

Secunda, cum ex causâ, effectus; ex naturâ,

proprietas indagatur : v.g. cum ab omni ævo apud homines constiterit magnam esse ventorum & aquarum vim, ad alia corpora movenda, hinc quibusdam in mentem venit hujusmodi causas, ad effectus plurimos, hominum societati perutiles, adhibere; idque tum aliàs, tum maxime præstiterunt in pistrinis, quorum molæ ventorum vel aquarum vi, cum magno humani laboris levamine, versantur.

Tertia quæstionum species est, cum à partibus ad totum fit progressus, ut videre est in ea operatione Arithmetica, quæ *additio*, vel in ea, quæ *multiplicatio* dicitur : in illa multarum partium *summa*; in hac *productum* ex multis colligitur.

Quarta, cum ex toto & parte aliquâ quæritur altera pars, ut fit in altera Arithmetices operatione, quæ *substractio*; aut in ea quæ *divisio* vocatur. *Partis* autem nomine etiam attributum, vel modus, aut affectio rei hoc loco intelligi debet.

Itaque, si quæstio sit de vocabulis, ut per ea sensus aliquis reconditus, vel ænigmatis, vel alterius propositionis, aut sententiæ difficilis exquiratur : Primò necesse est ad ea vocabula diligenter attendere, ut illorum vis, quantum fieri potest, clarè percipiatur. Secundò, videndum quo animo fuerint ab Auctore adhibita; an nativâ significatione, seu literali, ut vocant, sensu; an metaphorico & translato sint accipienda; quis sit Auctoris scopus; ad quos orationem convertat; quo tempore, quibus circumstantiis scripserit : diversis enim temporibus, diversæ quandoque ejusdem Auctoris sunt sententiæ : nec alia frequentior est *antimonias* conciliandi ratio apud Jurisconsultos, quam, quæ ex temporum distinctione repetitur. Eadem etiam sæpius usu venit apud Scripturæ sacre Interpretes, præsertim in veteri testamento : unde illud sancti Augustini sermone 82. aliàs 16. de verbis Domini,

num. 10. aliàs cap. 7. *Distribuite tempora : & concordat Scriptura.*

Si de Auctoris doctrina dubium proponatur , adeunda sunt loca , quibus eam diligentius exprefsit , & ex professo tradidit : nec ex uno aut altero testimonio difperfo , fed ex univerfo ipsius systemate , constitutisque principiis , de illius mente iudicandum. Neque versionibus , seu translationibus ita fides adhibenda est , quin exemplar authenticum nativâ Auctoris linguâ scriptum consulatur. Si varix sint lectiones , iis adhærendum , quæ constantius in libris manuscriptis , & emendationibus editionibus occurrunt , dummodo cum Auctoris principiis apertissimè non pugnent. Ita se gerebat olim Ecclesiâ Catholica , teste sancto Aug. lib. 11. contra Faustum Manichæum cap. 2. *Vides , inquit , in hac re quid Ecclesiâ Catholica valeat auctoritas , quæ ab ipsis fundatissimis sedibus Apostolorum usque ad hodiernum diem succedentium sibi met Episcoporum serie , & tot populorum consensione formatur. Itaque si de fide exemplarium quæstio verteretur , sicut in nonnullis , quæ & pauca sunt , & sacrarum literarum studiosis notissima sententiarum varietates ; vel ex aliarum regionum codicibus , unde ipsa doctrina comearvit , nostra dubitatio dijudicaretur ; vel si ibi quoque codices variarent , plures paucioribus , aut vetustiores recentioribus præferrentur : & si adhuc esset incerta varietas , præcedens lingua , unde illud interpretatum est , consuleretur. Vide primam partem Decreti Gratiani distinct. 11. can. 9.*

Iisdem ferè regulis utuntur Critici , ut suppositios quosdam libros suis Auctoribus reddant , vel aliis abjudicent , aut loca depravata restituant , aut operis seriem emendent. Ii enim & tempora , & temporum mores expendunt ; Auctoris consilium , doctrinam , scribendi rationem exquirunt ; coævus , aut suppare alicujus nominis scriptores

in testimonium advocant; eaque omnia & quæ his adjuncta sunt inter se conferendo, id quod intendunt, assequuntur.

Quod si de asserenda vel propugnanda historiæ veritate agatur: ubi quis sententiam suam vel quoad integrum systema, vel quoad facta nonnulla, quæ ad rem propriè, & intrinsecus pertinent, validis probationibus communivit; si quid ipsi extrinsecus petatum ab adversariis objiciatur, satis est quod probabilibus responsionibus, & possibilibus conjecturis hoc refellat: non enim ab eo singularum responsionum demonstrationes requiri debent, cum res, quas propugnat, certissimis aliunde constant argumentis. Exempli causâ, dum nostri temporis heterodoxi contendunt Apostolorum Principem Petrum nunquam se Romam contulisse, idque levibus argumentis persuadere conantur, ejusmodi est illud, quod S. Paulus in Epistolis, quas scripsit Romæ, nullatenus D. Petri meminerit: iis meritò responderetur fieri potuisse, ut D. Petrus ab Urbe tunc abesset, & aliò ad propagandum Christi Evangelium esset profectus; ipsi verò prorsus immeritò absentiam istam probari postulant. Nam cum aliunde certissimis veterum testimoniis, putà Papiæ, S. Irenæi, Tertulliani, & aliorum nullo prorsus excepto, constet D. Petrum Romæ aliquandiu moratum fuisse, tamen aliò fortasse nonnunquam diverteret, alienum à ratione videtur ipsius absentiae probationes postulare ab iis, qui rem aliunde certissimam affirmant: sed potius eorum est, qui contra historiæ fidem notissimum factum inficiantur, asserere rationes, si quas habent, cur omnium historicorum auctoritati refragentur. Vide monitum 2. superius datum 3. parte cap. 7. in fine. Vide etiam Artem cogitandi, quæ hæc omnia pulchrè admodum evolvit postremis capitibus ultimæ partis, ubi *hermeneutices*, seu artis interpretæ-

tatricis , & *critices* , seu judicatricis fundamenta jact.

Si de rebus instituaturs quæstio ; ut si causa ex effectu , vel natura ex proprietate , aut functione investigetur , vel vicissim : Primò, enitendum est , ut sensus quæstionis accuratè percipiatur , rejectis omnibus , quæ ad rem non pertinent , conditionibus. Secundò , singulæ quæstionis partes, aut conditiones ita sunt inspiciendæ , & inter se sigillatim conferendæ , ut omnes illius facies & habitus , seu relationes innotescant. Tertiò , à speciali ejus , quod in quæstione notum est, examine, ad id quod est ignotum , pedetentim progredi oportet. Nam in omni quæstione quædam sunt cognita ; alia incognita : quæ autem ignota sunt, ea ex quibusdam signis aut conditionibus appositis sunt detegenda. Quartò igitur, si à notis ad ignota pedetentim procedendo, tandem ad aliquid notissimum perveniaturs , à quo istius quæstionis solutio pendeat ; in eo erit sistendum , & alterâ methodo , quæ *synthetica* est , ad illius expositionem erit utendum. Sed si ad absurdum quidpiam , vel impossibile terminetur inquisitio ; id etiam , quod quæsitum est , impossibile, vel absurdum , est judicandum. Hac ratione se gerunt qui Geometricas , vel Algebraïcas quæstiones per analyfin resolvunt : sed notiora nobis exempla sunt proferenda.

Quæritur v. g. in Scholis, an scientia , fides , & opinio simul consistere possint in eadem mente de eadem re : quæ quæstio ut solvaturs juxta constitutas analyticæ methodi leges, expendendum.

Primò, quid sibi velint termini, seu nomina *scientia*, *fidei* , & *opinionis* ; ac statim considerandum , scientiam esse cognitionem certam , & evidentem; quia nempe *argumentis* , seu *motivis* , ut loquunturs , vel *mediis* claris , & firmis sustineturs : fidem, obscuram , quoniam solâ Dei revelantis auctorita-

te, quæ claritatem non inducit, innititur: ac demum opinionem, incertam; utpote quæ ratione duntaxat probabili, quæ dubium non tollit, est suffulta.

Secundò, videndum an cognitio, quæ & certa est, & evidens, stare possit cum cognitione vel incerta, vel obscura: & attendenti manifestum erit cognitionem, quæ certa est & evidens, remove omnino, tum obscuritatem, quam non amolitur fides; tum dubitandi rationem, quam relinquit opinio: & consequenter inferre licebit, etiam si quis *argumenta*, sive *motiva*, aut *media* scientiæ, fidei & opinionis simul animo retinere possit, cum tamen solis scientiæ argumentis tunc debere affici, fidemque & opinionem ipsi fieri omnino inutiles. Quod quidem Samaritanis olim accidisse videtur; circa Christum Dominum Johannis cap. 4. v. 42. cum dicebant mulieri, *Quia jam non propter tuam loquelam credimus: ipsi enim audivimus & scimus, quia hic est verè Salvator mundi.*

Non tamen scientia tollit fidei meritum, circa ea quæ clarè cognoscuntur: dummodò quis ita sit affectus, ut iis, quæ per scientiam novit, assensum dare, propter solam revelantis auctoritatem, sit paratus, si abesset scientia; ut iis, quæ clarè non novit, assentitur.

Duo sunt autem, quæ simul scientiæ, fidei, & opinioni subjecta esse possunt, scilicet existentia Dei, & humanæ mentis immortalitas. Imò existentia Dei ad fidem propriè non pertinet: cum cognitio existentia Dei fidem divinam antecedit. Quippe revelatis credimus propter Dei jam cogniti auctoritatem. Aliunde ratio naturalis, dummodò ad ideas, quas habet, sit attenta, non potest invictè Deum ignorare. Hinc est quod legimus quidem patrata fuisse miracula: ut de fidei nostræ mysteriis convincerentur increduli; non verò ut

Deus existere probaretur : si quidem totius naturæ cursus & administratio perpetuum est miraculum , quod supremum rerum omnium auctorem ac Dominum prædicat.

Simili modo si proponatur quæstio, an mens humana sit immortalis : statim termini quæstionis erunt accuratè perspicendi ; & quid sit *mens*, quid *immortalitas*, erit dispiciendum. Cùmque mentis nomine intelligatur substantia quædam, sive, ens cogitationis particeps, quod à corporis natura prorsus alienum est ; inde colligere licebit mentem diversi planè ordinis à corpore censendam esse ; adeoque ab ipso solutam permanere, sicut corpus sine ipsa superstes est. Id tamen discriminis erit in iis statuendum, quod corpus, utpote extensum, & ex partibus compositum, alterari possit, novamque formam induere: cùm mens, quæ simplex est, non tantùm remaneat ; sed integra semper & illibata conservetur. Insuper mentis vita in cogitatione est posita : unde vivens quoque erit dicenda, seu iumortalis ; & incorruptibilis : quod in quæstione fuit positum.

Quòd si hoc ipsum aliis exponere libuerit, syntheticam methodum adhibere oportebit, & ab eo exordiendum, quod in hac inquisitione postremo loco fuit inventum : nempe fundamenti instar statuendum erit, generale illud principium, *substantiam cogitantem & spirititalem corruptionis omnis esse expertem* : atque ita contrariâ viâ ad ipsam mentem erit descendendum, quæ immortalis, & incorruptibilis erit asserenda.

Utrâque methodo utuntur tum Advocati, qui de jure respondent, & causas agunt ; tum Theologi morales, qui de *casibus*, ut vocant conscientiæ ; tum etiam Medici, qui de morbis consuluntur. Nam ii statim accedentes ad se circa singula rei propositæ capita sigillatim interrogant ; & ab

his, quæ sciscitando sunt expiscati, ad ea quæ minus nota sunt, pergunt; ut tandem ad principia generalia, sive Moralis scientiæ, sive Jurisprudentiæ, sive Medicinæ perveniant; ac rem, quæ in quæstionem venit, ad hoc vel illud genus pertinere intelligant.

Si verò vel Theologus in sacra concione, vel Advocatus in foro, vel Medicus in pulpito, rem, de qua consultus est, explicare velit, contrariâ viâ regredietur; ac initio ducto à generalibus effectis seu principiis, ad id, quod specialiter propositum est, descendet.

Hinc liquet *regressum* in demonstrando vitiosum non esse, licet *circulus* excusari non possit.

Tunc enim fit *regressus*, cum diversa est demonstrandi ratio, nempe analytica, & synthetica. Prior à speciali rei consideratione ad notiones communes ascendit: posterior à notionibus communibus ad ea, quæ sunt specialia, descendit, in quo nullum occurrit vitium.

Sed *circulus* fit, cum idem est demonstrationis genus, v. g. si quis juxta falsam Aristotelis opinionem lib. 2. de Cælo cap. 8. stellas scintillare affirmaret, quòd nimium à nobis distent; & vicissim eas longè distare concluderet, quòd scintillent, is *circulum*, in demonstrando admitteret, quo ratiocinatio vitiosa meritò diceretur.

In eundem errorem, quamvis in diversa materia lapsum esse Cartesium ostendit Auctor quartarum objectionum adversus ipsius meditationes metaphysicas. Nam probat Cartesius Deum existere, ex eo quòd in clara distinctaque illius idea. quæ nos non fallit, existentia necessaria contineatur; & vicissim omnem ideæ claræ ac distinctæ certitudinem ex ipsius Dei cognitione repetendam docet: siquidem nulli nos ideæ claræ ac distinctæ fidem debere putat, nisi prius certò Deum existere teneamus. Sed

quid ea de re sentiendum sit, pluribus dicemus in Metaphysicâ, ubi de primâ veritatis regulâ & criterio verba faciemus.

CAPUT. III.

De methodo synthetica.

SYNTHESES five methodus synthetica, aut methodus compositionis, est ea quâ veritas inventa congruo modo & ordine aliis exponitur; vel materia quædam seu argumentum pertractatur: in qua quidem methodo non secus ac in analysi fit semper à notioribus ad minùs nota progressus: sed in analysi res primò speciatim expenditur, ut ad communes notiones fiat progressus; in synthesi verò generatim primùm, deinde speciatim res considerantur. Si enim de speciebus sermo haberetur, priusquam esset de genere disputatum: cùm speciei natura citra generis notitiam intelligi nequeat, sæpiùs de eadem re, nempe de genere foret dicendum, quod molestiam, & confusionem pareret, & ei, quem adeo quærimus, ordini prorsus adversaretur. Quamobrem à simplicioribus & communioribus initium semper ducendum est: tum ad specialia, magisque composita veniendum.

Verùm ut perfectum exemplar syntheticæ methodi ob oculos ponatur, id à Geometris est repetendum: nam nullibi res majori ordine pertractantur, nec accuratioribus demonstrationibus muniuntur, quàm in Geometrarum libris.

Tria verò præstare solent Geometræ, ut assensum obtineant.

Primò, vocabula omnia, quibus utuntur, definiunt, ne ulla in ipsis ambiguitas relinquantur.

Secundò

Secundò , quædam axiomata seu notiones communes , quas nemo in dubium revocare possit, adhibent.

Tertiò , propositiones omnes demonstrant , vel ope definitionum & axiomatum , quæ solo lumine naturali percipiuntur ; vel aliarum propositionum, quæ per istas definitiones & axiomata fuerunt comprobata : ex quibus sæpè consectaria , seu collaria , ut vocant , deducunt.

His proinde tribus continetur perfectissima demonstrandi ratio. Demonstratio enim , ut vulgò definiunt , est *ratiocinatio vel ratiocinationum series constans ex præmissis necessario veris, hoc est, vel per se evidentibus, vel per alias propositiones jam probatis, ex quibus necessario vera infertur conclusio.*

Est , inquam , *ratiocinatio, vel ratiocinationum series* : nam rarò admodum contingit ut ea unicâ ratiocinatione , aut syllogismo absolvatur. Deinde constat *ex præmissis necessario veris*, id est , quarum veritas vel lucet per sese , ut in axiomatis ; vel per alias priores jam probata est , ut in aliis propositionibus cernitur : ex quibus necessario vera deducitur conclusio.

Duplex autem præsertim distingui solet demonstrationis species : altera *à priori* , & per causam ; altera *à posteriori*, & per effectum.

Demonstratio *à priori* est ea, quâ effectus per causam; proprietas per essentiam , seu naturam ; denique consequens per antecedens clarè ostenditur.

Demonstratio *à posteriori* est ea , quâ causa per effectum , natura per proprietates aut functiones : antecedens demum probatur per id quod ex ipso consequitur. Ad hanc speciem demonstrationis revocari potest demonstratio *per absurdum* , seu *impossibile*, de qua postea.

Ut igitur argumentum aliquod , seu materia, vel scientia accuratè , & secundum syntheticæ metho-

di leges pertractetur , observandæ sunt octo sequentes regulæ ; quarum prima & secunda definitionibus conveniunt ; tertia & quarta axiomatis ; quinta & sexta argumentationi sunt propriæ ; septima & octava ad methodum ipsam referuntur.

Regula definitionum.

P R I M A , *ut nullus terminus relinquatur obscurus , aut ambiguus : sed quilibet definiatur.*

Secunda , *ut termini , qui in definitionibus adhibentur , sint omnibus noti ; vel prius explicati.*

Mirum est quàm multæ inanes , & tamen pertinacissimæ Philosophorum , præsertim Scholasticorum , disputationes solâ nominum seu terminorum definitione sopiri possint , ut controversias scholasticas exploranti evidentissimè patebit. Quare has duas definitionum regulas altè animo infigere meminerint , qui cavillationes omnes studebunt declinare.

Regula axiomatum.

T E R T I A , *ut nullum adhibeatur axioma , quod non sit evidentissimum.*

Quarta , *ut illud evidens habeatur , quod mediocri attentione verum esse agnoscitur.*

Axioma , vel *essatum* , seu *pronuntiatum* , aut *sententiam* , *notionemve communem* vocant , *propositionem aliquam cuilibet attendenti manifestam* : v. g. *impossibile est ut idem simul sit & non sit ; omne totum est majus sua parte* , &c. Dummodo enim harum propositionum terminos intelligat aliquis , minime iis assensum denegare potest : quia in idea clara distinctaque subjecti sic comprehensum videt attributum , ut hoc ab illo divelli nulla ratione queat. Sed cavendum diligenter , ne multa , quæ

vulgò tanquam certa circumferuntur, axiomata paulò levius admittantur: cujusmodi sunt illa vulgò trita in Scholis: *Nihil est, in intellectu, quod prius non fuerit in sensu. A privatione ad habitum non datur regressus*, &c. Hæc enim & alia ejusdem generis non pauca, citra novum examen non sunt accipienda.

Regula demonstrationum.

QUINTA, ut omnes propositiones, quæ aliquid obscuritatis involvunt, accuratè probentur ope definitionum, quæ præcesserunt; aut axiomatum, quæ concessa sunt; aut propositionum, quæ jam antea fuerint demonstrata.

Sexta, ne quis ambiguitate terminorum abutatur: sed definitionibus, per quas explicantur, semper inhaereat.

Dum hæ demonstrationum regulæ observantur, non tantum convincitur ipsa mens; sed etiam quodammodo illuminatur: id est; non tantum certò rem esse; sed etiam, cur ita sit, clarè ac distinctè intelligit.

Sunt enim aliquæ demonstrationes, quæ mentem quidem sic convincunt, ut iis resistere non possit: quales sunt eæ, quæ vel ex alienis, non propriis materiæ subjectæ argumentis, aut rationibus petuntur; vel ex aliquo impossibili aut absurdo, quod sequeretur, si res aliter foret, ac esse statuitur. Sed eæ demonstrationes animum non illustrent: nec omnino quietum ac tranquillum reddunt. Nam quòd videat aliquis rem quampiam aliter esse non posse, ac nunc est, non planè sedatur sciendi cupiditas, quæ tenetur; sed aliquid ultra expetit, *claritatem* nempe, quâ norit cur res ita sit: hicque esse debet scientiæ, ac demonstrationis scopus præcipuus.

Regula methodi.

S E P T I M A, ut res, quantum fieri potest, ordine naturali pertractentur, sumpto semper à generalioribus, & simplicioribus exordio, & expositâ prius generis naturâ, quàm ad singulas species descendatur.

O C T A V A, ut unumquodque genus in suas species, quodlibet totum in suas partes, & quavis difficultas in omnes suos casus, quantum id obtineri potest, distribuatur.

Hiscæ postremis duabus regulis inserta sunt hæc verba, *quantum fieri potest*: nam aliquando accidit, ut, vel propter humanæ mentis angustias; vel ob præscriptos ei, quæ tractatur, disciplinæ limites, summo jure observari nequeant. Sic tamen eas quisque sibi ante oculos ponere debet, ut nunquam ab illis nisi necessitate summâ, aut majori emolumento ductus discedat: siquidem earum observatione id semper consequimur, ut quæ aliunde fastidium ac molestiam allatura essent, sine tædio, summaque cum jucunditate ac facilitate addiscantur.

Atque has quidem regulas præscribit Logica iis omnibus, qui disciplinis duntaxat naturalibus dant operam: sed in eorum gratiam, qui sacre Theologiæ studio tenentur, ac sese ad tractanda Christianæ fidei mysteria comparant, pauca insuper, quæ sequuntur, axiomata subjicere placet, ut eorum subsidio qui sint Philosophiæ, ac Theologiæ limites, quid alterutri proprium sit, quid utrique commune, facilius intelligere valeant.

Axioma primum.

Finita mentis non est infinitum posse comprehendere.

Aliud est quidpiam cognoscere; aliud compre-

hendere , ut jam exposuimus antea. Omnis comprehensio , cognitio est , non vice versâ , Cognitionem dicimus , quâ quidpiam novimus: nosse autem possumus , etiam clarè & distinctè , id quod non omnino comprehendimus. v. g. norunt omnes triangulum esse figuram tribus lineis clausam ; Deum esse ens infinitè perfectum : eaque , sive Dei , sive trianguli cognitio, clara est & distincta, quia , & Deum , & triangulum ab omnibus aliis rebus sic secernit, ut minimè cum aliis confundi possint. Qui tamen Geometriæ ignarus est, omnes trianguli proprietates, v. g. æqualitatem ipsius angulorum duobus rectis, hac clara distinctaque perceptione non intelligit : quare triangulum omnino non comprehendit. Imo nullus forsitan homo rem ullam etiam finitam dici potest comprehendere ; cùm nullius fortasse rei proprietates prorsus omnes percipiat, aut percipere se sciat.

Per comprehensionem enim res cognoscitur quantum cognosci potest : nec quidquam prorsus comprehenditur , nisi cùm *nihil ejus latet videntem*, ut loquitur S. Augustinus Epist. 147. aliàs 312. num. 21. aliàs cap. 9. quomodo solus Deus seipsum , & alia omnia cognoscit : nam solus infinitas suas perfectiones ita videt , ut nulla eum lateat ? mens verò creata nunquam tot ex iis perfectionibus percipere potest , quin plures adhuc in infinitum per totam æternitatem ipsi supersint cognoscendæ ; cùm ne omnes quidem trianguli , aut alterius rei finitæ proprietates capere se certò sciat. Igitur ex natura mentis finitæ est ut infinitum comprehendere nequeat , licèt infinitum clarè & distinctè percipiat ; ut ostendemus in Metaphysica.

Axioma secundum.

Non ideo perspicua neganda sunt, quod obscuro animo comprehendere nequeant.

Hoc pronuntiatum est, sancti Augustini lib. de dono perseverantiæ num. 37. aliàs cap. 14. in fine, ubi sic loquitur: *Numquid ideo negandum est, quod apertum est, quia comprehendere non potest, quod occultum est?* v. g. nemo inter Logicos negat istud principium, quo syllogistica omnis in rebus naturalibus innititur, scilicet. *Quæ sunt eadem uni tertio*, seu quæ non distinguuntur ab aliquo tertio, *sunt eadem inter se*, sive inter se non distinguuntur licet eum iis, quæ de sanctissima Trinitate credenda proponit Ecclesia, conciliari à nobis clarè non possit. Etenim Pater, & Filius in Deo non distinguuntur à natura, seu essentia divina; & tamen Pater ac Filius inter se distinguuntur. Similiter ratione naturali non concipimus quomodo integrum Christi Corpus sub minima Hostiæ particula contineatur: neque id cum insita nobis corporis naturalis idea conciliare possumus: sed certum nobis esse debet, plura fieri posse à Deo, quam mens nostra comprehendere queat. Unde cum ratio petitur à nobis mysteriorum divinorum, quæ intelligentiam nostram superant, nihil aliud respondendum, quam ita nobis à Deo fuisse revelatum, cujus viæ & cogitationes immensum distant à viis & cogitationibus nostris, quemadmodum ipse nos docet Isaïæ cap. 55. v. 8. Neque proinde ea scrutari fas est, quæ Deus alto consilio nobis occultare voluit. Nam ut habetur Proverb. cap. 25. v. 27. *Qui scrutator est majestatis opprimitur à gloria.*

Id adeo persuasum fuit sanctis Ecclesiæ Patribus, ut hoc uno fundamento nixi inanes Ethnico-

rum sapientum argutias depulerint , ac Fideles in accepta à Christo & Apostolis ejus doctrina confirmaverint. Quod pluribus quidem testimoniis declaratur tom. 3. Operis *De perpetuitate fidei Catholica circa sacram Eucharistiam* , lib. 7. cap. 8. Sed pauca referre sufficiet.

Consultus olim fuit S. Augustinus à Volusiano viro illustri circa virtutem divinam , quâ Christus Dominus illasâ Virginis Matris integritate natus , & ad Apostolos januis clausis ingressus est : cui sic respondet Epist. 137. aliàs 3. num. 8. aliàs cap. 2. *Ipsa virtus per inviolata Matris Virgineâ viscera membra Infantis eduxit , quâ postea per clausa ostia membra juvenis introduxit. Hic si ratio quaritur , non erit mirabile : si exemplum poscitur , non erit singulare. Demus Deum aliquid posse , quod nos fateamur investigare non posse. In talibus rebus tota ratio facti est potentia facientis.*

Eadem de ingressu Christi ad Apostolos tradit S. Hilarius lib. 3. de Trinitate num. 20. Et circa finem ejusdem libri , scilicet num. 26. ita scribit. *Nihil igitur in Divinis effectibus humana mentis opinione tractandum est ; neque de Creatore suo opificii ipsius materia decernat... Cum hoc solum de Deo bene credi intelligamus , ad quod de se credendum , ipse sibi nobiscum & testis & auctor existit.*

Sanctus Chrysostomus Homiliam secundam in Epist. 2. ad Timoth. sic orditur. *Nihil esse acrius potest , quàm velle divinas res humanâ ratione discernere , atque metiri : ita enim ex fidei fundamento quisquis decedit..... Si Martionem , & Manetem , & Valentinum , & ceteros , qui impias hareses , perniciosaque dogmata Ecclesia Dei invexerunt , consideres humanis rationibus Divina mensos : ita demum eos divina Incarnationis dispensationisque mysterium erubuisse comperies.*

Huic consentit S. Ephræm Tractatu de natura Dei curiosè non scrutanda , circa finem. Quid ergo inscrutabilia scrutaris , ac impervestigabilia vestigas ? Si enim ista curiosè rimaris , non jam Fidebis nuncupaberis , sed curiosus. Participa immaculatum Corpus & Sanguinem Domini tui fide plenissimâ , certus quòd agnum ipsum integrè comedas. Ignis immortalis sunt mysteria Christi : Cave ea temerè scrutaris , ne in ipsorum participatione comburaris.

Denique S. Cyrillus Alexandrinus lib.4. in Joannis Evangelium ad versum 53. capitis 6. quo quærunt Judæi Capharnaitæ , quomodò Christus dare possit carnem suam ad manducandum , totis viribus illud , Quomodo Capharnaiticum , à fide nostra remove conatur , his verbis. Magnum quaso à peccatis aliorum (Judæorum) profectum faciamus , & firmam fidem mysteriis adhibentes , nunquam in tam sublimibus rebus illud , QUOMODO , aut cogitemus , aut proferamus. Judaicum enim hoc verbum est , & extremi supplicii causa Aliorum igitur , ut diximus , culpâ perdocti , cum Deus operetur , non quæramus QUOMODO : sed operis sui viam atque scientiam illi soli concedamus.

His & aliis , quæ referri possent , testimonis constar , sanctos Patres de rebus naturalibus secundum naturales ideas fuisse locutos : neque hinc quidquam detrimenti in mysteria divina , quæ humanis ideis metienda non sunt , vergere arbitratos. Sic enim affirmarunt perspicua , ut obscuris fidem non denegaverint.

Axioma tertium.

In iis rebus quæ rationem humanam superant , intellectum nostrum auctoritati divina subicere nos aequissimum est : idque ratio ipsa naturalis persuadet. Nam , ut observat S. Augustinus Epist. 120. aliàs 222. num.3. aliàs cap.1. fidem ipsam semper ali-

qua antecedit ratio, aut clara distinctaque perceptio. Neque enim Deo revelanti assensum præberemus in iis, quæ rationem superant, nisi ipsa ratio id æquum esse suaderet; tum quia Deus plura longè potest efficere, quàm nos mente capere valeamus; tum quia adeo bonus est, & perfectus, ut nec fallere nos possit, nec falli. Quare meritò ipsius auctoritati mentem nostram in iis, quæ attingi à nobis non possunt, subicimus: idque ita à nobis fieri debere naturalis ostendit ratio, quæ non secus ac revelatio supernaturalis Deum solum agnoscit auctorem. Unde quemadmodum revelatio supernaturalis certissima est, ita & ratio naturalis, dummodò ideis claris & distinctis innitatur. Nam si alterutra falleret, prima erroris causa in Deum refundenda videretur.

Quanam autem res sint à Deo revelatæ, dignoscere & proponere fidelibus absque errandi periculo divinitus concessum est Ecclesiæ Catholicæ à Christo Domino fundatæ, quæ doctrinam ipsis proponendam ex duplici primario fonte depromit.

Primò quidem ex sacris tum veteris, tum præcipue novi Testamenti scripturis, quas divino Spiritu afflati seu inspirati homines exararunt. *Inspiratio* autem est; *Divina quadam & ordinis supernaturalis motio ad aliquid certum certo tempore & loco dicendum vel scribendum determinans ac impellens, sive id quod dicendum aut scribendum est notum prius fuerit, sive non fuerit.* In quo *Inspiratio* differt à *Revelatione*, quæ est, *Rei ignota facta divinitus manifestatio.* Utraque discrepat ab *Assistentia*, quæ est *speciale quoddam ac supernaturale auxilium, quo qui loquitur aut scribit, dirigitur quidem ut non erret in iis quæ sponte scribit vel eloquitur, sed ad illa scribenda vel eloquenda supernaturali motione non impellitur.* Scriptores porro sacri non indiguerunt *revelatione*, ut, quæ viderant vel audierant, libris

fuis referrent , sed tantum ut res sibi prius ignotas eloquerentur. Non iis tamen suffecisset sola supernaturalis *assistencia* in rebus etiam notis referendis. Nam fecisset illa quidem ut scribendo non errassent ; attamen quod scripsissent , cum non fuisset inspiratum à Deo , sed ab iis propriâ sponte & naturaliter exoratum , minimè foret Verbum Divinum : ut Ecclesiæ definitiones , tametsi speciali Dei assistentiâ substinentur in Concilijs generalibus , non tamen sunt verbum divinum , sed tantum declarant aliquid ad verbum divinum sive scriptum sive traditum pertinere. Omnis autem scriptura sive veteris , sive novi testamenti divinitus est inspirata , & verbum divinum certissimè pronuntiatur.

Secundò. Ex sacra traditione à Christo per Apostolos eorumque successores ac discipulos ad nos transmissa , quæ est *verbum divinum non scriptum* , doctrinam suam haurit Ecclesia Catholica , in quâ , ut scribit Vincentius Lirinensis Commonitorio 1. cap. 3. *Magnopere curandum est , ut id teneamus quod ubique , quod semper , quod ab omnibus creditum est*. Nam , ut ait S. Augustinus lib. 4. de Baptismo contra Donatistas num. 31. aliàs cap. 24. *Quod universa tenet Ecclesia , nec Conciliis institutum , sed semper retentum est , non nisi auctoritate Apostolicâ traditum rectissimè creditur*. Hæc fuit constans regula Patrum & Concilliorum in fidei definitionibus , quâ inconcussa stetit hæctenus , stabitque semper Ecclesiæ , cui auxilium speciale promisit ipse Christus , ut in errorem nunquam labatur ; sed sit *columna & firmamentum veritatis* , quemadmodum illam vocat D. Paulus Epist. 1. ad Timoth. cap. 3. v. 15. Sic enim Salvator Apostolos suos , & in eorum persona omnes ipsorum Successores alloquitur , Matth. cap. ultimo in fine : *Ecce ego vobiscum sum omnibus diebus , usque ad consummationem sæculi*. Et cap. 16. v. 18. ad Simonem Petrum ait :

Tu es Petrus, & super hanc Petram adificabo Ecclesiam meam; & porta inferi non prevalebunt adversus eam. Item Luc. cap. 22. vers. 32. Rogavi pro te, ut non deficiat fides tua. Et Johan. 14.v.16. Ego rogabo Patrem: & alium Paracletum dabit vobis, ut maneat vobiscum in aeternum, Spiritum veritatis.

Ecclesia ergo quæ sponsa Christi est, ipsius Spiritu regitur, nec proinde errare potest in fide: sed quicquid circa fidem definit, non quidem novos fidei articulos condendo, verum constitutos magis explicando, id tanquam certæ & inconcussæ veritatis oraculum est habendum.

Axioma quartum.

Articulus divina fidei est sententia, aut propositio divinitus revelata.

Hoc axioma reperimus ex Scoto in librum primum Magistri Sententiarum distinctione 26. questione unicâ, numero 30. edit. Antuerpiensis anni 1620. in responsione ad tertiam objectionem, ubi ostendit, si quod antecedens sit de fide, non tamen id quod aliquis ex eo clarè colligere se putat, pari ratione ad fidem pertinere.

Oportet igitur, inquit, habere majorem auctoritatem, ad hoc, ut aliquid teneatur esse de fide, quam quod Sanctus aliquis sic arguat.

Exemplum attulerat paulò superiùs de sanctissima Personarum divinarum Trinitate, quam Judæi, quibus explicitè, non erat tradita, potuissent forsitan negare hoc argumento, quòd unum esse Deum in naturâ, ad fidem pertineat; unde collegissent esse pariter unum in personâ: quoniam hoc quod in conclusione deducitur, tunc ipsis visum esset magis consonum verbis articuli eis traditi, quàm oppositum; scilicet quàm esse trinum in Personis, & tamen fuisset falsum & impium. Sicut igitur illi, inquit, tunc neutram partem debuerunt asserere esse necessariò tenendam; sed utrâque parte positâ, necessariò tenendum esse illud quod in generali fuit eis traditum: ita videtur

quòd circa articulos nobis in universali traditos , non debeamus asserere, sine declaratione Ecclesie, necessariò hoc speciale , vel illud esse tenendum , cum quorum utroque possunt articuli stare , ut traditi sunt. Non enim Deus qui scit in speciali istam veritatem , sine causa tantum secundum intellectum universalem tenendam de fide tradidit , & nec ad hunc modum specialem , nec ad illum , tanquam ex fide tenendum arctavit. Huc usque Scotus.

Idem axioma ex eo adhuc confirmari potest , quòd consequentiæ , quas nonnulli clarè ex articulis fidei deductas existimant , ab aliis meritò rejiciantur , ut pulchrè inter cæteros advertit illustrissimus Jacobus Benignus Bossuetus Divionæus , Doctor Theologus Parisiensis, Meldensium Episcopus , in Expositione doctrinæ Catholicæ, numero 2. *Unus enim Deus*, ut fides Christiana docet per Apostolum Paulum , 1. ad Timoth. cap. 2. v. 5. *Unus & mediator Dei & hominum homo Christus Jesus , qui dedit redemptionem semetipsum pro omnibus.* Sed dum hinc colligunt heterodoxi invocationem Sanctorum esse fidei contrariam , & irrita reddere Christi Mediatoris merita , consequentiam negamus. Nam scimus unum esse Deum in tribus Personis , Patre , Filio , ac Spiritu sancto ; scimus Deum esse mundi Auctorem , hoc est , rerum visibilium & invisibilium , corporalium & incorporealium Creatorem : scimus primum hominem seu Adamum , postquam ab eo conditus fuit , minimè ipsius mandato fuisse obtemperantem : scimus post primi parentis peccatum , quotquot ex eo progeniti sunt homines , tanquam ex depravato stipite vitium contraxisse , quod Dei hominis , seu Filii Dei incarnati sanguinè eluendum oportuit. Igitur *per Christum solum* , seu Filium Dei incarnatum , tanquam per verum Mediatorem Dei & hominum , *accessum habemus* ad Deum ; nec quidquam à Deo nisi *per Christum Jesum* postulare de-

bemus. Unde Ecclesia Catholica suas orationes *per Christum Dominum* semper concludit. At quamvis unicus sit Mediator propriè dictus, nempe *Mediator redemptionis*, Christus homo Deus: (*nec enim aliud nomen est sub calo datum hominibus, in quo oporteat nos salvos fieri, ut habetur Act. Apost. cap. 4. v. 12. nec ullus hominum sive ante sive post Christi adventum salvus fieri potuit, nisi per fidem in ipsum, ut alibi dicemus.*) plures tamen dici possunt *Mediatores intercessionis*, nempe Sancti omnes, qui non ipsi per se, aut meritis duntaxat propriis gratiam nobis impetrare valent, nedum conferre; sed tanquam amici Dei à nobis invocantur, ob communionem, quæ inter omnes Sanctos, sive qui adhuc sunt in viâ, sive, qui sunt in patriâ, intercedit; ut nobis obtineant à Deo *per merita Christi*, qui *Caput* est Ecclesiæ, cujus Sancti omnes sunt *membra*, eam gratiarum & donorum effusionem, quâ indigemus, ut ad salutis portum, cælestemque patriam perveniamus. Hæc est fidei Catholicæ summa; cui perperam per consequentias, malasque cavillationes contradicunt Heterodoxi. Vide Concil. Trident. Sess. 25. ubi de Invocat. Sanctorum.

Axioma quintum.

Facta sensibilia multorum testium oculatorum diversæ nationis, factionisve testimonio, diversis temporibus confirmata, tam certa haberi debent ab unoquoque, quam si propriis oculis fuissent explorata. Nam in questionibus facti, certitudo omnis ex hujusmodi testium oculatorum turbâ petitur, de quorum testimonio, ut habet sanctus Augustinus. Epistola 147. aliàs 112. num. 5. aliàs in præmio Epistolæ, in hoc duntaxat rerum genere minimè dubitandum. Nec sanè immerito, cum eos omnes.

(præsertim si natione, Religione , aliave qualibet ratione dissentiant) communi consilio ad stabiliendum mendacium conspirasse , minimè suspicari liceat. Sed *in quæstionibus Juris* , in quibus agitur de eo quod circa materiam quamdam sentiendum ,

Est turba semper argumentum pessimi ;

Ut post P. Syrum observat Seneca lib. de vita beata cap.2. nam præcipitatione & præjudicio maximè abripitur. Unde illud Aristotelis lib.2. Topicorum cap.2. *Loquendum ut multi , sentiendum ut pauci*, scilicet cùm de jure agitur, non de facto. Et Persius satyrâ primâ

..... Non si quid turbida Roma

*Elevet , accedas ; examenve improbum in illâ
Castiges trutinâ.*

Hoc postremum axioma , ad defendenda , quæ in Religionis nostræ gratiam patrata legimus miracula , sacramque traditionem propugnandam maximè est comparatum : adeo ut , & ipsum , & quæ illud præcedunt , quibus præcipua scientiæ , ac fidei discrimina continentur , ad hujusmodi rerum cognitionem nos ducant , quas scire plurimi nostra interest : neque proinde de illis tacendum fuit in Logica , cujus finis est tradere regulas , quibus veritas inveniri , ac inventa distinctè & ordinatè possit explicari.





METAPHYSICA

S E U

PRIMA PHILOSOPHIA.

P R Æ F A T I O.

PRÆMISSO disciplinarum organo , quo singulæ circa materiam sibi subjectam uti solent , cum nos disciplinam aggredi par est , quæ inter cæteras faciliè principatum tenet , ut in ipsa primùm regularum Logicarum usum ostendamus. Hæc *prima est Philosophia* , seu *scientia generalis* , quæ primas humanæ mentis notiones , ac principia peruestigat , quæque proinde , cæterarum quodammodo parens , eas omnes in se complectitur ; iis principia suppeditat ; & , quæ singulis propria sunt effata , vel axiomata , unde suas petunt demonstrationes , expendit. Deinde tanta est illius , tamque arcta cum Logicâ connexio , ut prima pars Logicæ eadem ac prima Metaphysicæ pars esse videatur : utraque enim circa mentis ideas , primasve rerum notiones , aut perceptiones est occupata. Quare , ob eam quoque rationem , Logicæ statim subjungenda est Metaphysica , ut quæ naturâ inter se conveniunt , ordine pariter & tractandi methodo consocientur.

Quod ad Metaphysicæ nomen attinet , id nec ab Aristotele , nec ab ullo ex veteribus Philosophis fuit usurpatum ; sed ab ipsius Aristotelis interpretibus, Alexandro Aphrodisiensi, ac Johanne Philopono inventum , & ex Græca inscriptione confectum. Quod quâ ratione effectum sit , non inutile, aut ingratum fuerit à principio repetere.

Auctor est Strabo lib.13. Rerum Geographicarum in Troadis descriptione , ubi de *Scepsi* oppido , *Nelei* Philosophi patriâ , mentionem habet , Aristotelem (qui collectis multis libris bibliothecam primus composuisse , & ad idem consilium Ægyptios Reges exemplo suo perduxisse dicitur) bibliothecam discipulo suo Theophrasto tradidisse , cui & Scholam reliquit. Theophrastum pariter & suos , & Aristotelis libros testamento legasse *Neleo Scepsio* , qui fuerat illius & Aristotelis Auditor , ut testatur Diogenes Laertius in vita Theophrasti. Igitur Neleus bibliothecam illam in oppidum *Scepsin* transtulit , eamque heredibus ineruditis hominibus moriens reliquit. Illi autem , ubi Attalicorum Regum , quibus Scepsis parebat , in libris undequaque , ad instruendam Pergami Bibliothecam , conquirendis , studium intellexissent ; suos , ne auferrentur , in terram defoderunt , ubi diu relictî , ac quodammodo sepulti jacuere. Tandem ab illorum successoribus eruti sunt , humore & blattis vitiatî , ac Appelliconti Teio , librorum magis quàm scientiæ studioso , sed bene nummato , si Athenæo lib.5. Dipnosoph. habenda fides , magnâ pecuniâ venditi. Appellicon verò , factâ qualicumque exesarum partium instauratione , in nova libros transtulit exempla , quæ tamen mendis adhuc plurimis , ob relictas lacunas scatebant ; quod non parùm molestiæ Philosophis Peripateticis , à quibus evolvebantur, afferebat.

At statim post mortem Apellicontis bibliotheca illius , quæ eat in Pyræo , à Sylla , ut Plutarchus in ejus vita commemorat , subducta est , ac Romam asportata , ubi Grammaticus quidam , nomine Tyrannio , Aristotelicorum librorum usum sibi permitti petiit : eâque facultate obtentâ , plurima in iis intervertit ipse , & cum Andronico quodam Rhodio exempla communicavit , à quo similiter , ut credere fas est , interpolata , tandem in lucem emissâ sunt. Iis verò , quæ ad Logicam , Physicam , & cæteras facultates pertinent , in ordinem digestis , reliqua , quæ malè inter se cohærebant , nec uni materiæ conveniebant , Physicis sunt subjecta : hincque illis *Metaphysicorum* , quasi post physica positorum , nomen inditum est.

Itaque *Metaphysicorum* libros miserè præ cæteris fœdatos esse constat , multisque locis hiulcos ; idque argumento esse debet , non eos certò consilio conscriptos , sed ut fors tulit , post opera physica fuisse congestos. Enim verò , quemadmodum rectè observat Gassendus lib. 1. adversus Aristoteles exercitatione quintâ num. 11. *Ut omnes libri physici dicati sunt explicanda materiali substantia : ita perfectò fuerunt dicandi quatuordecim qui habentur Metaphysici tractanda immateriali. Anne porro id factum est ? Ecce , cum ejusmodi libri contineant c. x l i. capita , sola quinque posteriora duodecimi libri aliquid habent hujusce materia. Quid igitur opus est recensere operis defectus , cum omnia propè deficiant , quæ ad tractationem de rebus divinis atque metaphysicis necessaria erant ? Nihil igitur minùs accuratum quàm Aristotelis Metaphysica , si Gassendo credamus , quòd fortasse melior illius pars exciderit , exigua tantùm & mutila ad nos pervenerit.*

Nunc autem *Metaphysicæ* nomine , apud Philosophos , non ea disciplina in mentem venit , quæ

- post Physicam sit tradenda , sed ea quæ res sursum
positas , id enim *metaphysicum* quoque nomen signi-
ficat ,) id est , supra corporum naturam constitu-
tas , seu res spirituales , & à materiæ commercio
solutas prosequitur.

Res porro duplici ratione à materia secretæ & abstractæ sunt : scilicet , vel naturæ suæ conditione , cujusmodi sunt substantiæ spirituales , ut Deus , Angelus , & mens hominis ; vel per mentis ipsius præcisionem , seu abstractionem : nempe cùm generatim , sive universalibus quibusdam ideis concipiuntur.

Utroque modo Metaphysicæ considerationi sub-
jiciuntur. Nam duæ sunt Metaphysicæ partes :
prima quidem *Ontologia* , quæ circa ens generatim ,
illiusque affectiones per mentem abstractas versa-
tur ; altera , quæ *Pneumatologia* dicitur , de spiri-
tibus agit ; de Deo scilicet , de humana mente , &
quantum naturalis ratio patitur , de Angelis.

Defi- Quare , si quis Metaphysicæ definitionem quæ-
nitio rat , rectè responderi potest , eam esse *sapientiam* ,
Meta- *vel scientiam speculativam* , qua circa ens generatim ,
phy- *illiusque affectiones per mentem abstractas* , *speciatim*
fica. *verò circa substantias spirituales* , prout naturali ratio-
ne cognoscendas , occupatur.


Primò , est sapientia , id est , superior quædam
scientia , (hoc enim sensu sapientiæ nomen hîc
sumitur ,) quæ circa res altissimas , hoc est , gene-
ralissimas , vel excellentissimas , per altissima
principia , aut rationes occupatur : etenim de en-
te generatim sumpto , quo nihil universalius est ,
& de Deo , quo nihil est excellentius , agit Me-
taphysica.

Secundò , dici potest scientia , id est , cognitio
certa & evidens rei necessariæ & immutabilis , per
propriam illius causas , aut rationes. Nam quæ de
ente generatim ; de Deo , & humana mente spe-

ciatim demonstrat, ea immutabilia sunt, & immutabilibus rationibus munita, ut inferius liquabit.

Tertiò, est speculatrix quædam cognitio rerum generalissimarum, vel excellentissimarum, per altissima principia, aut argumenta; cum nihil circa res illas moliatur, aut moliendum præscribat: eoque nomine *prima Philosophia* dici potest; tum quia primas rerum ideas complectitur; tum etiam quia de rebus spiritualibus, quæ & cæteras dignitate antecellunt, & primæ ab ipsa mente, cogitationes suas naturali ordine dirigente, percipiuntur, erudiendos nos suscipit. His prænotatis, ad institutum veniamus.





P A R S P R I M A

METAPHYSICÆ,

S I V E

O N T O L O G I A.

HÆc prima Metaphysicæ pars, quæ *Ontologia*, hoc est, entis generatim tractatio dicitur, *scientia* quoque *generalis* potest appellari, cum primas humanæ mentis notiones circa ens generatim, illiusque modos, aut affectus exponat. Hinc etiam fortasse *intelligentia* non malè vocaretur: quoniam *intelligentia*, definiente Aristotele lib. 6. *Ethicorum*, cap. 6. est *cognitio primorum principiorum, seu axiomaticum communium*, quæ ex ideis notissimis sunt conflata.

Hujus autem partis pertractandæ hic futurus est ordo. Primò, de ente & modo entis generatim dicemus.

Secundò, de attributis, tum ipsi enti, tum entis modo communibus.

Tertiò, de attributis soli enti propriis.

Quartò, de primis notionibus, seu axiomatis, quæ ex primis entis generatim, attributorumque illius ideis sunt conflata.

CAPUT I.

De ente, & modo entis generalim.

QUANTUM duplicem entis intellectum vulgò afferant, alterum nempe, quo *ens* participium dicitur præsentis temporis, & quo præsentem atque actualem, ut aiunt, sive rei, sive modi existentiam significat; sive idem est, ac *existens*: alterum, quo nominis tantum, non participii vim habet, ac *rem*, vel *substantiam*, quæ aut existit aut existere potest, denotat: posteriori tamen sensu potius quam priori ab eruditis vulgò usurpatur, apud quos nimirum *ens, res & substantia* eandem prorsus significationem habent. Enim verò, sive existat actu, sive non existat aliqua substantia, putà, viola martia, rosa, &c. vera tamen semper est ista propositio, *viola martia est ens: rosa est ens*, sive est res seu substantia; nec unquam ferè *ens* participii munere defungitur.

Quapropter licet *ens* pro participio acceptum, nempe quatenus idem est ac *existens*, & tam *substantia* quam *modo* convenit, bene definiatur *id quod existit*; non tamen *ens* sumptum pro nomine ità debet definiri. Siquidem *ens* hoc modo spectatum idem est ac res seu substantia; sive est id quod per se subsistit, ut Deus, Angelus, homo, lapis. *Modus* autem non est *ens* aut *res*, sed entis seu rei *modus*, vel *affectio*, quæ in alio, tanquam in *subjecto* inhaeret, ut perceptio, vel recordatio in mente; figura vel motus in corpore. Atque ita *ens* in eo ab *accidente*, vel *modo entis* secernitur, quòd *ens* sine ullo ordine ad *subjectum* aliquod concipiatur; *accidens* verò, seu *appendix*, aut

modus entis, semper aliquem ad subiectum, cui inhaeret; & sine quo naturaliter esse nequit, ordinem dicat.

Hinc inutilis videtur ea quaestio, *utrum ens synonymum seu univocum sit respectu substantiae & accidentis*: nam cum sola substantia proprie ens, aut res vocetur; non item accidens, aut modus: fieri nunquam potest, ut ens eandem in utroque significationem habere, sive, ut aiunt, univocum esse statuatur.

Multò minùs univocum erit respectu *entis realis & entis rationis*, praesertim si ens rationis, cum vulgò Scholarum, pro coagmento quodam duarum, pluriùve idearum dissidentiarum sumatur; ut cum ex idea mentis & idea corporis fingi dicitur *mens corporea*: ex idea lapidis & ligni, *lapis ligneus*, &c. quo sensu ens rationis, *impossibile cognitum*, definitur: nam huiusmodi coagmentum adeo non est ens, ut neque esse, neque concipi possit. Siquidem *mens corporea*, *lapis ligneus*, *circulus quadratus*, *baculus sine duobus extremis*, & cetera id genus, quæ in exemplum adduci solent in Scholis, ea neque esse omnino, neque concipi possunt: circulus quippe quadratus non est circulus; lapis ligneus, non est lapis, &c. eamque duntaxat ob rationem, quòd sibi repugnare intelligantur impossibilia judicantur. Unde si vulgata in Scholis proponatur quaestio, *à qua facultate fiat ens rationis sic definitum*; an ab intellectu; an à voluntate, &c. facilis est responsio, à nulla: quia neque esse omnino, neque concipi potest: ac licet lapis & lignum seorsim intelligantur, ex iis tamen *lapidis lignei* perceptio, vel idea componi nequit.

Sed neque *ens* synonymè convenit Deo & substantiæ creatæ. Cum enim concipimus *ens* si simpliciter, sive *ipsu n esse*, nihil aliud proprie nisi

Cum

Deum concipimus. Deus enim est *ipsum esse* : substantiæ verò creatæ non sunt *ipsum esse* , sed habent *esse* , seu participant *esse* ; nec minùs à Deo distant in eo quod sunt entia , quàm vel hominis imago , vel umbra arboris ab homine vel arbore in ratione vel hominis vel arboris discrepat. Quod scholæ docent , cùm aiunt Deum esse *ens per essentialitatem* ; substantias verò creatas *entia per participationem*. Hinc est quòd in Scripturis Exod. cap. 3. v. 14. vocatur Deus simpliciter *QUI EST*. Quippe fons est & plenitudo entis à quo habent cætera quòd existant. Cùmque infinitis modis participari possit à creaturis , hinc fit , ut illius idea à nobis dividatur , primùm quidem in ideam *entis* , quæ generalis est , & quodammodo vaga ; & in ideam *variorum modorum* , quibus à creaturis participari potest ; qui modi dicuntur *entis differentia*. Quocirca sine qualicumque idea Dei , sive entis simpliciter , entis summè perfecti , entis infiniti , non limitati , non restricti , nulla nobis adesset idea entis generatim , quæ ab omnibus entibus singularibus *abstrahere* dicitur : siquidem illa entis generatim idea , nihil aliud esse videtur , quàm Dei ipsius idea.

Itaque si Deum inter cætera entia referamus, seu in eadem Categoriâ, aut eodem schemate includamus, ut fecimus in Logica, & communiter fieri solet in Scholis , id à nobis improprie duntaxat factum declaramus , scilicet ob qualemcumque analogiam , quæ inter Deum & res creatas intercedit ; non quòd ens *synonymè* seu univocè tum Deo , tum creatis entibus conveniat. Scimus enim res creatas nihil esse nisi entis umbras , si cum Deo conferantur ; nec nisi cujusdam analogiæ ratione movemur , cùm ens generatim tum enti per essentialitatem & increato , tum enti per participationem & creato commune esse pronuntiamus.

Ens ergo generatim spectatum definitur, *id quod est res aliqua vel substantia*; sive *id quod per se subsistit*; ac dividitur in spiritum & corpus. Spiritus, vel Deus est, vel Angelus, vel humana mens; sed *analogicè*, non *synonymè*. Corpus verò vel vitæ expers est, ut cælum & terra, &c. vel est vivens: rursusque vel progrediendi vim non habet, ut planta; vel progrediendi vim habet, ac dicitur animal: quod vel ratione destitutum est, ut bellua; vel est ratione præditum, ut homo.

Triplex proinde distingui potest entium, seu substantiarum, aut rerum genus. Quædam enim entia sunt planè spiritualia, ut Deus & Angelus: quædam planè corporea, ut aër, terra, lignum, &c. Inter illa duo genera tertium est, quod utramque naturam participat, scilicet homo, qui ex mente & corpore constat. Quæ omnia Concilio Lateranensi consona esse inferius ostendemus, ubi de natura Angelorum disputabimus.

Iis omnibus sua conveniunt attributa essentialia, sine quibus neque esse, neque intelligi possunt; nimirum genus, species & differentia; v. g. Deus non tantum est spiritus, non tantum substantia, sive ens, quæ sunt illius attributa generica: sed etiam est summè perfectus, id est, justissimus, potentissimus, &c. quæ sunt differentia, sine quibus ens undequaue perfectum esse nequit. Sic etiam Angelus est spiritus, est substantia, vel ens; quemadmodum lignum est corpus, est substantia, est res, quæ sunt attributa utriusque generica: sed præterea suas habent peculiare differentias, ad specialem rei cujusque naturam pertinentes: Angelus quippe spiritualis est, intelligens, &c. lignum est corporeum, extensum, &c.

Hæc attributa essentialia vulgò *gradus metaphysicos* vocant Scholæ: *gradus* quidem, quia alii

superiores sunt, id est, generaliores & communiores, alii inferiores, & sub superioribus contenti. Nam esse *ens* pluribus convenit, quàm esse *corpus*: cum corpus sub ente contineatur, quemadmodum sub corpore lignum, lapis, &c. sub lapide, marmor, silex; &c. comprehenduntur. Adeo ut per eos gradus ab infimâ specie ad genus supremum ascendatur, & à supremo genere ad speciem infimam descendatur, ut in Logica fuit explicatum.

Dicuntur autem *Metaphysici*, quia per mentem sunt præcisi & abstracti. Nam ut superius in Præfatione indicavimus, id omne metaphysicum dicitur, quod vel naturâ suâ spiritale est, vel per mentem à materiâ est abstractum, hoc est generatim conceptum.

Quærent autem Scholæ an hujusmodi gradus, seu attributa in eodem individuo tum inter se, tum ab illo individuo reverâ distinguantur. Quid sit *distinctio* dicemus ex professo capite sequenti: sed inrerim satis norunt omnes ea reverâ distingui, quæ non sunt unum quid & idem: itaque

Respondeo primò, gradus metaphysicos rerum planè spiritualium, vel planè corporearum, nec à sese mutuò, nec ab ipsis individuis esse reverâ distinctos. Nam in Deo v. g. divinitas, sapientia, omnipotentia & cætera attributa essentialia, nec inter se, nec à Deo reipsa distinguuntur, ut attendentibus omnibus patet. Pariter in sancto Michaële, Michaëlitas, natura Angelica, & substantia spiritualis ab ipso Sancto Michaële minime differunt. Itidem in ligno, ligneitas, si sic loqui fas est, corporeitas, & substantia ligni nihil sunt aliud, nisi ipsum lignum diverso modo per mentem spectatum, ut quisque facillè intelligit.

Respondeo secundò, in homine, qui partim

L ij

spiritalis est, partim corporeus, gradus corporeos à spiritualibus reverâ distingui. Nam corporeitas, quæ est quid idem ac corpus, ut omnes fatentur, extensio, soliditas, cæteraque attributa corporea à rationalitate, aut spiritualitate, aut libertate, quæ sunt quid idem atque mens, omnino sunt distincta. Equidem totus homo denominatur corporeus, vel extensus; totus item spiritualis, vel liber; quia *denominatio*, ut vulgò aiunt, *est totius*: sed tamen illius corpus spiritale non est, nec mens corporea: quemadmodum cum quis denominatur Philosophus aut Theologus, id ad mentem illius, non ad corpus pertinet, nisi quatenus affectiones corporeæ cogitandi occasionem præbent.

Quòd si quæ sint attributa, quæ corpus & mentem includant, ea à toto non distinguuntur: v. g. humanitas nihil aliud est, quàm corpus & mens, quatenus simul conjunguntur, & totum aliquod constituunt: non enim solum corpus, nec sola mens est humanitas; sed mens & corpus simul conjuncta hominem efficiunt.

Itaque cum Deus dicitur *ens perfectum*: vel cum spiritus aut mens *substantia cogitans* appellatur, certè genus & differentia in iis definitionibus inter se reverâ non distinguuntur; sed sunt una & eadem res diverso modo spectata. Deus quippe considerari potest, vel tanquam *ens*, & hoc sensu cum omnibus aliis entibus à se productis, saltem *analogicè*, convenit; vel tanquam *perfectum ens*, quo nomine ab aliis discrepat. Quare hujusmodi compositio ex genere & differentia est tantum *metaphysica*, & ab angustia mentis nostræ profecta, quatenus nempe finitus animus varias ejusdem rei facies, aut modos, aut relationes, aut attributa considerare debet, ut rem facilius ac distinctius cognoscat. Imò; *ens simplex* hujusmodi compo-

tionem, si sic eam vocare fas est, carere non potest: nam & *ens* est, quod est illius genus; & est *simplex*, quæ est illius differentia.

Sed in homine, qui ex diversi ordinis partibus coalescit, genus & differentia, si abstracto nomine exprimantur, & spectetur vulgaris illius definitio, reali distinctione secernuntur. Cum enim vulgò *animal rationale* definiatur; genus illius, quo cum belluis convenit, est *animalitas*; differentia verò, quâ ab his discrepat, *rationalitas*: animalitas autem & rationalitas reipsâ distinguuntur, nam sunt quid idem, ac partes reipsâ distinctæ, scilicet corpus & mens. Siquidem animalitas, quæ principium est functionum animalium, quæque univocè, ut aiunt homini & belluis convenit, nihil aliud est, quàm corpus organicum, quatenus spirituum animalium ope functiones animales homini & belluis communes obire potest: si enim animalitas mentem includeret, jam belluis communis non foret. Rationalitas verò est principium ratiocinandi, seu mens ipsa quæ percipit, iudicat, ratiocinatur; & ordinat: quæque in suis cogitationibus à corpore non penderet, tametsi sapissimè ex corporeis motibus cogitandi occasionem accipiat, ut identidem admonere tenemur.

Ex his liquet quid sentiendum sit de illa concertatione, quæ Thomistas & Scoti discipulos magnopere exercet; quæque à veteribus Sophistis, otiosis hominibus fuit excitata, ut admonet Porphyrius in proloquio Isagoges ad Categorias Aristotelis; scilicet, *utrum existant natura universales in rebus ipsis, ut volunt Scotista; an verò in mente sola, ut Thomistis placet.*

Primò enim constat nullam esse naturam universalem in rebus; sive *qua una reipsâ sit in multis, & apta ut de iis predicetur*, quemadmodum Sco-

tistæ definiunt. Natura enim generica , ut *animalitas* , spectata vel in Petro , vel in Paulo , minimè distinguitur à corpore organico & animato vel Petri vel Pauli , ut modò dictum est : nec proinde existit una & eadem in utroque, aut etiam in aliis hominibus. Item natura specifica , seu *humanitas* in Petro est corpus & mens Petri ; in Paulo , corpus & mens Pauli. Non sunt autem corpus & mens Petri idem quid ac corpus & mens Pauli ; & cùm Petrus dicitur esse *homo* , & Paulus *homo*, non idem homo de utroque enuntiatur ; sed alius & alius. Nulla igitur extat natura universalis in rebus.

Secundò. Neque etiam extat natura universalis per mentem , saltem eo sensu , quo à Thomistis propugnatur. Etenim naturam universalem vocant , *quæ apta est ut multis insit , iisque attribuat* : qualis certè nulla in mente existit. Nam ea nihil aliud est quàm idea objectiva. Sed idea objectiva minimè apta est ut multis insit , aut de iis prædicetur : sed tantùm ut multa exhibeat , putà vel multas species , si sit idea generica ; vel multa individua , si sit natura specifica , ut attendentibus notum est. Itaque nulla natura universalis in *essendo* & *prædicando* , ut barbarè loquuntur Scholastici , neque in rebus ipsis , neque in mente nostra consistit.

Cùm ergo Petrus & Paulus dicuntur ejusdem esse speciei , sensus non est communem iis inesse naturam ; sed naturas similes , quæ nimirùm cùm eodem exemplari , sive cum ideâ divinâ consentiunt. Hæc autem similitudo naturæ minimè dici potest *unitas* : nisi fortè *unitatis* nomen vel abusu quodam , ut nonnunquam accidit ; vel quodam sermonis compendio , quod adeò familiare est hominibus , pro *similitudine* accipiatur ; ac ejusdem naturæ dicantur , quæ tantùm similia

sunt, non eadem: quoniam eorum similitudo efficit, ut eadem ideâ generali rectè exhibeantur, & eodem nomine exprimantur.

Quàm autem impropria sit hujusmodi unitas, vel ex eo solo clarum est, quòd Angelus & lapis hoc sensu possint unum appellari; non quidem *specie*, sed *genere*: non proximo, sed remoto: quia in idea generali substantiæ, tanquam in exemplari quodam conveniunt, & *eandem*, id est, *similem*, habent naturam genericam.

Sed inquiet aliquis, nihil-ne in rerum natura universale dici potest?

Respondeo tria omnino esse universalia: scilicet, Deum *in operando*, quia omnia in omnibus operatur, ut inferiùs videbimus; ideam *in repræsentando*, quia multa repræsentat; ac demum nomen commune *in significando*, quia multa significat: præter ea nullum universale agnoscimus. Atque ita, si genus, species, aut alia attributa multis convenire dicantur, id eatenus tantum verum est, quatenus illa attributa per ideam quamdam generalem, multisque convenientem exhibentur, & communi nomine exprimuntur. Quamvis enim idea in mente nostra sit singularis; potest tamen multa repræsentare: v. g. idea circuli omnes circulos exhibet; idea hominis omnes homines, &c. Similiter attributa universalia communi nomine exprimi manifestum est.

Atque hæc quidem de attributis cuilibet substantiæ, seu enti essentialibus, scilicet genere, specie ac differentiâ hætenus dicta sunt; quæ etiam de entis modo, seu accidente sunt intelligenda. Etenim quilibet modus, sive spiritalis, sive corporeus, vel ejusdem est speciei ac alius modus, ut duæ recordationes, aut duæ rotunditates; vel est diversæ speciei: tumque aut ejusdem est generis, ut rotunditas & quadratura, quæ in eodem gene-

re, nempe in figura conveniunt; aut diversi generis, ut rotunditas & recordatio: adeo ut de quovis modo, seu accidente affirmari possit sua species, genus, & differentia: nam quadratura v. g. dicitur primò figura, tum modus; item recordatio dicitur cogitatio, deinde modus. Præterea recordatio dicitur spiritalis, rotunditas verò corporea, quæ sunt utriusque differentia. Quot verò sint modorum genera aut categoriæ, satis in Logica fuit explicatum.

C A P U T I I.

De attributis tum ipsi enti, tum entis modo communibus.

ATTRIBUTA, quæ tum ipsi enti, tum cuilibet entis modo conveniunt, vulgò *transcendentia* vocantur in Scholis, quòd genera omnia, sive categorias tum ipsius entis, seu substantiæ, tum cujuslibet accidentis, aut modi transcendunt; nec instar attributorum essentialium in unâ potiùs, quàm in aliâ categoriâ contineantur. Attributa quippe substantiæ cuilibet essentialia, scilicet genus illius, species, & differentia extra substantiæ categoriam non vagantur: attributa modi cujusvis, v. g. motûs aut figuræ extra istius modi categoriam non exeunt.

Essentia tamen generatim sumpta, sive *essentia* nomen & notio tum substantiæ, tum accidenti convenit: nam dicitur *essentia* rei, sive substantiæ; & *essentia* modi, sive accidentis: unde ut nomina generis, speciei, &c. dici possunt *transcendentia* sic *essentia* nomen, seu *essentia* generatim dici potest terminus, vel attributum *transcendens*. *Existentia*

Essentia porro idem est, ac natura rei, & definitur, *id quod res est*, sive, *quod primum in re concipitur*; sive *id quod respondetur ad questionem, quid res sit*: v. g. si quærat^rur quid sit homo? respondetur eum esse substantiam ex mente & corpore physicè sociatis constantem.

Existencia verò est *id, quo res actu est*, v. g. homo per existentiam actu in rebus extare dicitur.

Utraque ad entitatem pertinet; quæ *entitas* est *entis ipsius realitas*, sive, est rei substantia, seu res ipsa.

Hæc tria *entitas, essentia, & existentia* sunt unum quid & idem, sed diversâ ratione spectatum: v. g. *entitas*, aut substantia, aut realitas alicujus hominis est illius mens & corpus: *essentia* illius corpore etiam & mente continetur: *existentia* demum nihil aliud est, quàm idem homo, quatenus existit: sive est corpus & mens, quæ simul juncta existunt. *Singularitas* quoque, *per quam res aliqua singularis & individua esse intelligitur*, ab existentia non est reipsâ distinguenda. Nihil quippe aliud est singularitas, nisi res seu substantia, aut entitas, quæ quatenus existit, est *hæc numero*, non alia; aut si de entis modo agatur, est modus ipse, qui quatenus existit, est singularis.

Ea tamen omnia sic distinguuntur, ut *essentia* rei, vel modi sit *id, sine quo neque esse, neque concipi potest modus, vel res*, aut species aliqua. Unde quandiu res illa aut species remanet, tandiu immutabilis est illius essentia. Quemadmodum enim numerus additâ vel detractâ unitate non est idem; ita essentia, si quid ipsi adjicias vel detrahas, non eadem remanet. Quare essentiaæ similes numeris dicuntur ab Aristotele lib. 8. Metaphysicorum; cap. 3. At verò *entitas* variari potest, & tamen

eadem permanere : nam v. g. corrupto fructu remanet tota illius entitas : siquidem non perit , aut in nihilum redigitur ; sed corrumpitur tantum , & novas formas induit.

Quocirca , si existentia comparetur cum essentia , seu specie aliquâ , quoniam essentia illa, aut species perire potest , existentia quoque illius perit , scilicet cum species illa destruitur : sed si existentia cum entitate conferatur , cum entitas naturaliter perire nequeat , existentia quoque entitatis permanet , quæ nihil aliud est, nisi entitas ipsa existens : v. g. entitas ligni , sive comburatur , & in cineres ac fumos abeat , sive rursus in terram, aut fortè in arborem convertatur , semper existit, nec interire potest , aut in nihilum abire , nisi volente eo , à quo ex nihilo fuit producta.

Quod dicimus essentias rerum esse immutabiles , id intelligendum est de essentiis seu speciebus metaphysicè spectatis, nempe quatenus certo genere , certâque differentiâ necessariò contineri debent : non verò de speciebus physicis ac sensibilibus, quæ cum per accidentium congeriem constituentur , non ita consistunt in indivisibili , quin levem quandam in accidentibus mutationem sine sui destructione possint admittere. Nam parum vini quod majori aquæ moli admiscetur , speciem illius non solvit ex S. Thom. 3. parte quæst. 74. art. 3. ad 3. *quia id , quod est modicum , quodammodo absumitur à plurimo.* Sic vinum album differt in partium textura à vino nigro , rubro , rubello, helvo : quamvis assentia vini in illis omnibus vinis salva consistat. Idem de filigineo pane , & pane secundo ; idem de candido , & nigro marmore , aliisque plurimis cogitandum. Unde etiam jactura alicujus partis , puta oculi , vel auris , non obstat quominus corpus remaneat humanum.

Essentia porro & existentia sunt inter se ut potentia & actus.

Potentiam vocamus hoc loco, non agendi facultatem; sed *patiendi*, seu *aliquid recipiendi capacitatem*: unde quicquid ab alio, sive reipsâ, sive per mentem, nostro concipiendi modo, perficitur, id in potentia respectu illius esse dicitur, ut essentia est in potentia respectu existentia: entitas respectu modi: genus respectu differentia: materia respectu formæ: quoniam essentia perfici dicitur per existentiam; entitas per modum, quo efficitur; genus per differentiam, materia per formam.

Actus igitur est *rei perfectio*, aut *consummatio*: ut existentia est perfectio & actus essentia; differentia perfectio generis; forma materiae, &c. Ac duplex distinguitur, scilicet metaphysicus & physicus.

Actus metaphysicus ille est, qui *subjectum denominat tantum*, non *physicè afficit*; qualis est *spiritualitas*, aut *rationalitas* respectu mentis; *humanitas* respectu hominis: hicque actus à suâ potentia, sive subjecto, quod perficere intelligitur, reverâ non distinguitur.

Actus physicus *subjectum physicè afficit*, ut cogitatio mentem, figura corpus afficit. Unde modus omnis physicus dici potest *actus* physicus, respectu entitatis aut subjecti; cujus est modus. Quâ autem ratione modus à subjecto distinguatur, inferius dicendum.

Actus iste physicus iterum duplex: alter *primus*, nempe *agendi*, vel *patiendi*, seu *recipiendi*, potentia, ut voluntas & intellectus; alter *secundus*, scilicet *actio*, vel *passio*, seu *modificatio*, v. g. velle, intelligere: sive, ut loquuntur, *volitio* & *intellectio*. Cum tamen omnes ii actus sint imperfecti, & ulterius perfici possint, unus est *actus perfectissimus*, cui nulla potest accidere nova perfectio, scilicet Deus Opt. Max. qui idcirco *actus purissimus* vulgò appellatur.

Hæc omnia attributa & ipsi enti, & entis modo communia sunt, si fortè *entitatis* nomen exceperis, quod substantiæ potius quàm accidenti tribuendum videtur. Nam accidens non secus ac substantia suam habet essentiam, existentiam, & singularitatem: eaque singularitas tum in substantia, tum in accidente, ab existentia desumitur. Etenim cogitatio aliqua, aut rotunditas est una & singularis, quatenus existit. Quòd si cogitatio dimittatur, ac denuò resumatur; vel si rotunditas à cera v. g. tollatur, iterumque ipsi restituatur, non eadem futura est rotunditas aut cogitatio; sed alia & alia. Quare nullum aliud est *individuationis*, ut vocant, seu *singularitatis principium*, quàm rei, vel modi existentia: res enim aut modus existere non potest, quin sit singularis. Itaque hallucinari videntur Thomistæ, qui rem quamlibet, vel rei modum à sola materia *singularem* fieri volunt: nam ut nihil dicam de motu, qui in eadem materia multiplex, per successionem quamdam, recipi potest, id certum omnino videtur, remanente eadem digiti materiâ, non eadem numero esse inflexionem, cum ter quaterve digitum incurvo & erigo.

Sed præter *essentiam*, *existentiam*, *entitatem*, ac *singularitatem*, alia sunt attributa transcendentia, seu quæ tum enti, tum entis modo communia sunt: nempe *unitas*, *veritas*, *bonitas*, *duratio*, *ordo*, *relatio*, vel *habitus*, *proportio*, *oppositio*, & si quæ sint huiusmodi.

Unitas est attributum transcendens, quo sive ens, sive modus entis, aut accidens, dicitur unum, hoc est, in se indivisum, & ab omni alio secretum. Definitur quippe *unitas* in Scholis, *indivisio rei in se, & divisio ab omni alia re*.

Unitati adversatur *distinctio*, quæ quædam intelliguntur non esse unum quid, & idem: unde *distinctio* definiri solet, *identitatis negatio*.

Id autem discriminis est inter distinctionem & divisionem, quòd omnia, quæ divisa sunt sive separata, sint distincta: non vicissim. Nam v. g. bina globi media sunt *distincta*: neque tamen sunt divisa. Quædam etiam possunt esse *divisa*, quæ non sunt *diversa*: ut Petrus & Paulus sunt divisi, seu separati, non tamen sunt diversi; quia similes, non diversas habent naturas. Sed Petrus & Bucephalus sunt simul distincti, divisi & diversi.

Distinctionis verò duplex genus in Scholis admittitur: altera nempe est *distinctio realis*; altera *distinctio rationis*.

Distinctio rationis, est ea quæ à mente exco-
gitatur in iis, quæ reverà non sunt distincta: rur-
susque duplex est: scilicet, *distinctio rationis ratioci-*
nantis, quæ nempe fingitur sine fundamento in re,
qualis esse dicitur inter vestimentum, & indumen-
tum; inter Marcum Tullium, & Ciceronem: &
distinctio rationis ratiocinata, quæ fit cum aliquo
fundamento, qualis est inter rem & illius attri-
buta; vel inter ipsamet istius rei attributa, aut res-
pectus: v. g. inter misericordiam & justitiam Dei,
quæ propter diversos, quos habent, effectus,
cum legitimo fundamento, distinctis concepti-
bus percipiuntur; vel inter hominem & paterni-
tatem, aut similitudinem, aut æqualitatem, aut
aliam habitudinem, seu relationem, quam ipse
habet ad alium.

Eadem distinctio dicitur in Scholis *virtualis*:
quia per eam res una multis *virtute* æquivalere
concipitur: v. g. idem calor æquivaleret virtuti in-
durandi, & emolliendi: quia lutum indurat, &
emollit ceram. Idem de misericordia & justitia,
aut aliis Dei attributis; idem de intellectu & vo-
luntate mentis nostræ est cogitandum.

Quoniam verò attributa rei sunt quædam *for-*
malitas, aut perfectiones, aut actus: ideo di-

stinctionem illam, quæ inter rei attributa intercedit, *formalem* appellavit Scotus; & in eo à cæteris Philosophis discessit, quòd formalitates illas, v. g. justitiam & misericordiam in Deo actu inter se nemine cogitante distingui existimarit; non quidem ut *res*, sed ut *formalitates*; id est, ut attributa, aut perfectiones: quod nobis verum non videtur: nam reipsâ, & nemine cogitante justitia & misericordia Dei sunt ipse Deus. Unde distinctionem quidem formalem inter hæc attributa admitimus: non tamen eam actualem, sed virtualem tantum scilicet propter effectus diversos defendimus.

Cartesius in responsionibus ad primas objectiones, contra meditationes ipsius metaphysicas, distinctionem formalem cum modali confundendam statuit: sed modalem à reali omnino fecernit. Nam distinctio *formalis*, vel *virtualis*, vel *modalis* eadem esse videtur apud ipsum loco laudato, ac distinctio rationis: quod tamen primâ parte principiorum num. 42. paululum reformavit. Modalem tamen distinctionem à reali semper dirimit. In Scholis verò nostris, distinctio modalis est realis, ut mox dicemus.

Distinctio *realis* dicitur ea, quâ multa *actu*, nemine cogitante, non sunt una eademque res: rursusque dividi solet in distinctionem realem *majorem*, & distinctionem realem *minorem*.

Distinctio realis major spectari potest vel in Deo, vel in rebus creatis. In Deo quidem intercedere dicitur inter ea, quæ ad se mutuò referuntur; nempe inter personas sanctissimæ Trinitatis. In rebus verò creatis *inter ea* occurrit, quæ vel *separata sunt*, ut inter duos globos; vel *separari possunt*, ut inter bina ejusdem globi media. Aliqua autem certissimo argumento dividi seu separari posse judicantur, cum eorum unum sine altero ita concipitur, ut idea unius *positivè* & *completè* excludat, hoc est, à

se prorsus removeat, ideam alterius : ut, quia idea mentis *positivè* & *completè* removet à se ideam corporis, & vicissim ; ideo corpus à mente, & vicissim separari posse pronuntiamus.

Mitto dicere de distinctione *adequata*, quâ duo tota, ut Petrus & Paulus ; & de distinctione *inadequata*, quâ totum & pars, v. g. Petrus & mens Petri reipsâ distingui dicuntur. Hæ enim, & si quæ sint similes distinctionis species, non magni sanè momenti, longam explicationem non desiderant.

Distinctio realis minor, sive *modalis*, ea est, quæ inter rem & modum, ut inter digitum & illius inflexionem intercedit : quam distinctionem Cartesius negat esse realem, ut modò annotavimus.

Veritas transcendens, & *metaphysica*, de qua hîc agimus, est attributum transcendens, quo res, aut rei *modus*, cum suo exemplari, seu idea divina consentit. Differt à veritate ideæ, aut judicii, aut signi, quæ dici potest *veritas Logica*, de qua dictum est suo loco. Itaque res dicitur *vera*, quæ cum suo exemplari congruit. Verbi gratiâ, aurum dicitur verum ; ubi ideæ divinæ consonum est ; tunc enim veram habet auri naturam, talem scilicet, qualis à mente divina concipitur.

Omne autem ens, vel entis modus, seu accidens est verum ; nullum falsum, nisi respectu nostri. Verbi gratiâ, orichalcum verum est orichalcum : sed respectu nostri falsum aurum dicitur ; quatenus extrinsecâ sui specie aurum apparet, nosque ad falsum iudicium ferendum inducit.

Bonitas *metaphysica* & transcendentalis est rei vel modi perfectio ; seu, attributum transcendentale, quo quidpiam in suo genere perfectum dicitur. Differt ista bonitas à bonitate *moralis*, seu morum probitate, quæ laudem meretur, de qua in Ethica. In hoc autem consistit bonitas metaphy-

fica, quòd ens omne, vel Deus sit, quí per essentiam bonus est, id est, summè perfectus; vel à Deo sit profectum, & hoc nomine bonum sit, quòd supremi boni quædam sit participatio. Modus quoque entis bonus est, ubi eâ, quâ fieri potest ratione, est perfectus.

Duratio est attributum quo ens, vel entis modus in *esse* perseverare dicitur: eaque, si principio & fine caret, ac tota simul existit, soli Deo convenit, & dicitur *æternitas*, de qua inferiùs: si principium habeat, nec finem habitura sit, ad res spirituales, putà Angelos, imò fortasse ad hujus aspectabilis mundi universitatem pertinet: denique si principium & finem habet, rebus singularibus, corporeis, compositis, & corruptibilibus est tribuenda, ac *tempus* vocatur, de quo in Physica.

Ordo est attributum substantiæ simul & accidenti commune, quo quædam priora, alia posteriora; quædam antecedentia, alia subsequencia, alia simul posita concipiuntur. Possunt autem, si vulgo Scholarum credamus, aliqua esse priora & posteriora, vel simul posita quinque modis.

Primò quidem, aliquid est alio prius *tempore*, seu duratione: ut Adamus prior fuit Abele, David Salomone. Secundò, aliquid alio prius *naturâ* dicitur, cum ex eo inferri potest: quo sensu genus prius est specie: nam si quid v. g. sit circulus, rectè inferri potest, ergo est figura: non vicissim. Tertiò, aliquid dicitur alio prius *ordine*, seu positione: ut, in oratione exordium ante narrationem ponitur. Quartò, *honore*: quo sensu herus, prior est servo; Imperator milite, &c. Quintò denique *causa effectrix*, hoc nomine, prior est *suo effectui*, non tantum tempore; sed etiam naturâ, honore, & ordine: quia nihil est in effectu, quòd non sit à causâ profectum. Quæ omnia hisce versiculis exprimi solent.

Tempore, naturâ, prius ordine, dic & honore :

Causaque causato dicitur esse prior.

Relatio pariter attributum est transcendente, seu entibus simul omnibus, ac modis commune : ipsaque vulgò describitur ordo, seu *respectus*, vel *habitus unius ad aliud* : hoc est, vel rei ad rem, aut ad modum ; vel modi ad modum, aut ad rem. Altera est essentialis ; altera accidentaria. Nam de relationibus divinis, quæ subsistentes sunt, nec à personis Divinis distinguuntur, minime hîc agimus.

Relatio essentialis ea dicitur, sine quâ nec esse nec concipi potest res, sive modus ; v. g. relatio substantiæ creatæ ad Creatorem est essentialis : quia substantia creata naturâ suâ est ens *dependens*, ens *per participationem* à summo ente profectum. Item relatio modi ad subjectum est essentialis ipsi modo : nam modus, sive spiritalis sit, ut cogitatio ; sive sit corporeus, ut motus, quies, &c. nunquam intelligi potest sine aliquo respectu ad subjectum : quia modus *connotat*, ut loquuntur, seu respicit subjectum : unde relatio, etiam *connotatio* vocatur.

Imò sunt aliqui modi, qui non tantum essentialem ad subjectum relationem habent, sed etiam ad aliquid externum : ut scientia, non tantum ad subjectum in quo est, refertur ; sed etiam ad objectum, quod sciri potest, sive, ut loquuntur, ad rem *scibilem*. Etenim si desunt voces ad exprimendam relationis *reciprocationem*, aliquæ fingendæ sunt, ut præcipit Aristoteles, capite de relatis in categoriis, ubi ait, *caput non esse animalis, sed capitari : alam non esse avis, sed alari ; scientiam esse scibilis, &c.*

Relatio accidentaria ea est, quæ vel enti, vel modo entis propter aliquid accidentarium contingit ; & sine quo ens illud, vel modus absolute potest intelligi ac consistere. Itaque in huiusmodi

relationibus tria distingui solent in Scholis ; scilicet *subjectum* , quod refertur ad aliud ; *terminus* , ad quem fit relatio ; & *fundamentum* , seu , ratio propter quam subjectum refertur ad terminum , Verbi gratiâ , Socrates ad Platonem refertur , & vicissim , propter Philosophiam , quæ utrique communis est ; & sine qua uterque potuisset subsistere. Pater refertur ad filium ; quia genuit filium , quem potuit non generare. Vicissim filius ad patrem refertur , quia genitus est à patre , à quo potuit non gigni : nam Adamus , v. g. à patre genitus non est. Ex hypothese tamen , quòd quis à patre sit genitus , non potest non ad patrem referri.

Ea verò , quæ ad sese referuntur , *relata* vocantur , aut potius *correlata* : quia relatio , si quis attendere velit , semper mutua est , & reciproca. Unde relata vulgò dicuntur *simul naturâ & cognitione* : quia unum ex altero colligitur , & vicissim : v. g. si sit pater , filium esse necesse est ; si sit Dominus , est etiam servus , &c. Eaque vel eodem nomine gaudent , ut *simile* dicitur *simili* simile ; *æquale* , *æquali* æquale , &c. vel diversum habent nomen , ut pater dicitur filii pater ; dominus servi ; causa effecti ; majus minore , &c.

Fundamenta autem relationum ex omnibus categoriis petuntur : id est , ex substantia , & ex omnibus modis , tum spiritualibus , tum corporeis.

In substantia igitur fundantur relationes *convenientiæ* , & *discrepantiæ* in natura : v. g. duo Cherubini , duo Archangeli , duo homines , duo leones convenientiam inter se habent , sive similitudinem in substantia , seu natura : Cherubinus & Archangelus ; homo & leo discrepantiam , seu dissimilitudinem.

In quantitate fundantur relationes *æqualitatis* , & *inequalitatis* : nam æquale est alteri æquali

æquale ; inæquale verò vel est majus , vel minus altero.

Huc pertinet relatio totius ad partem , contentis ad rem contentam , loci ad rem locatam , & vicissim : quia totum est majus suâ parte , continens contento , locus re locatâ.

In qualitate fundantur relationes *similitudinis* , & *dissimilitudinis* accidentalis : quia qualitatis nomen omnes modos , aut accidentia complectitur , ut in Logica fuit observatum. Sic Plato refertur ad Aristotelem propter Philosophiam , quæ est qualitas spiritalis ; Æthiops ad Æthiopem , propter nigredinem utrique communem , quæ est qualitas corporea. In motu , quiete , situ , ac figura relationes fundari nemo non videt.

In relatione ipsa aliæ fundantur relationes : v. g. paternitas , quæ est relatio patris ad filium , legitima est causâ cur pater aliquis ad alterum patrem referatur : quia ambo in paternitate conveniunt.

In actione & passione fundantur relationes causæ ad effectum , & effectus ad causam. Ubi causæ nomen latius est accipiendum , pro eo omni , vel quod rem efficit , qualis est Deus respectu creaturarum ; vel quod nos in rei cognitionem ducit , ut signum respectu rei significatæ ; præmissæ respectu conclusionis , &c.

In *ubi* , seu in loco fundantur relationes *viciniæ* , aut *distantiæ* , &c.

In quando seu tempore relationes *ætatis* , putâ juventutis , senectutis , &c. fundamentum habent.

In habitu denique , & omnibus adjacentibus , possessis , retentis , &c. fundantur variæ relationes togatorum , armatorum , divitum , prædonum , &c. Omnia quippe , & singula relationum fundamenta enumerare non licet : sed ea , ubi occurrunt , agnoscere facillimum est.

Hic autem non est prætermittendum solam relationem *essentialem* vocari in Scholis *transcendentalem*: sed minùs accuratè, ut nobis quidem videtur. Etenim terminus transcendentalis ille dicitur, qui omnes planè categorias transcendit: sive qui, & omnibus entibus sive substantiis; & omnibus accidentibus, aut modis communis est.

Atqui relatio, sive essentialis, sive accidentaria, omnibus tum entibus, tum modis communis est.

Primò quidem relatio essentialis, tum omnibus substantiis, seu entibus, tum omnibus modis convenit, ut Scholæ fatentur: cum eam transcendentalem esse statuunt. Nam non tantùm modi omnes essentialiter ad suum subjectum referuntur: sed etiam substantiæ creatæ relationem essentialem ad Creatorem habent, ut jam indicavimus.

Secundò, relationes accidentariæ omnibus etiam substantiis & accidentibus inesse possunt, & ab iis abesse. Verbi gratiâ, Deus relationem habet Creatoris ad creaturam, à quâ producendâ potuit abstinere. Angeli aliquas habent ad se mutuò relationes cogitationum quarundam, aut actuum, aut affectuum, scilicet, amoris, gaudii, &c. Homines pariter, & res corporeæ relationes habent similitudinis, æqualitatis, &c. quibus carere possunt. Modi denique v.g. cogitatio, motus, &c. possunt aliquam habere similitudinem cum aliis: & eâ carere, salvâ eorum naturâ: nam v. g. circulus, qui aliis circulis similis est, posset esse unicus in natura, nullumque habere sibi similem, ut nemo diffiteri potest.

Ergo relationes sive essentielles, sive accidentales, sunt *transcendentales*; nec propriè ulla est Relatio *categorica*, sive quæ unam categoriam ab omnibus aliis distinctam constituat, ut jam in Logica fuit indicatum. Quare meritò relatio inter at-

tributa transcendentia, id est, enti & modo entis communia recensetur.

Ex relatione autem, habitudine, seu comparatione unius ad alterum sequitur *proportio*, quæ est, hujusmodi *rationum aut comparisonum æqualitas*, de qua in Geometria.

Relatis quoque finitima sunt, tum quæ dicuntur *adjuncta*, seu *circumstantia*, de quibus in Ethica; tum etiam *cognata*, quæ inter se aliquo modo conveniunt; sive in genere, sive in specie, sive in quantitate, aut qualitate, aut aliis attributis.

Oppositio demum est pugna duorum sive entium, sive modorum, quæ sibi peculiariter adversantur. Opposita quippe in Scholis dici solent ea, quæ ita secum pugnant; ut cum aliis eodem modo non pugnent: in quo discrepant à *disparatis*, seu diversis, quæ ita secum pugnant, ut cum aliis eodem modo pugnent: v. g. equus naturâ suâ non magis feoni quam tauro, aut alii cuivis animali est oppositus.

Oppositorum quatuor distinguuntur genera in Scholis.

Primò sunt *relativa*, seu correlata, quæ ad se mutuò referuntur; de quibus modò diximus.

Secundò, *contraria*, quæ sub eodem genere qualitatis posita, maximè à se distant. Dico *sub eodem genere qualitatis* nam substantia, si credamus Aristoteli, *nihil habet contrarium*, ratione sui, nec ratione quantitatis; sed tantum ratione qualitatum, quibus afficitur: neque tamen ratione omnium, nam qualitas in se omnes modos aut accidentia comprehendere videtur, sed duntaxat ratione aliquarum, quæ secundum Scholarum doctrinam ex utraque parte debent esse *positiva*, ut sunt *virtus & vitium*, aliæque, non sanè multæ. Contrarietas tamen latius sumpta idem planè signifi-

cat ac oppositio, & quæ *opposita* vocantur in Scholis, ea à Cicerone, in *Topicis contraria* dicuntur.

Tertiò, *privativa* occurrunt, quæ sunt forma, seu, habitus, & ejus privatio; quæque lato modo dici possunt contraria secundum Ciceronem ibidem. Hujusmodi sunt visus & cæcitas, dies & nox, &c.

Nota primò *privationem* vulgò definiri *absentiam formæ seu habitus in subiecto*, quod aptum est ut hujusmodi formâ vel habitu informetur: in quo discrepat à *negatione*, quæ definitur *absentia formæ in subiecto ad eam formam recipiendam inepto*. Exempli causâ absentia visus in homine dicitur *privatio*; in lapide verò dicitur *negatio*: quoniam homo aptus natus est ad videndum; non item lapis. Similiter absentia ejus cognitionis quâ quis informatus esse debet, dicitur ignorantia *privationis*: sed si rem illam à nobis sciri non oporteat, vocatur ignorantia *mera negationis*, ut jam advertimus in proœmio Philosophiæ cap. 2.

Itaque verbum, *privari*, eodem fere modo sumitur in Scholis, ac *carere* apud Ciceronem lib. 1. Tuscul. Quæst. Nam Ciceroni *carere* est *egere eo quod habere velis*, nempe ut aptum naturæ tuæ.

Nota secundò, id generatim verum non esse, quod tanquam axioma in Scholis usurpatur; scilicet, à *privatione ad habitum non dari regressum*. Nam licet à cæcitate v. g. ad visum non detur regressus in eo, cui eruti sunt oculi, vel qui laborat *glaucomate*, quod nempe in humore oculi crystallino producitur: tamen datur, aut dari potest, si cæcitas ex aliquo sanabili morbo, v. g. *catarractâ*, seu Suffusione quæ concrevit intra membranas corneam & uveam in humore aqueo, fuerit profecta.

Denique *contradictoria* dicuntur ea, quæ pug-

nant ut *ens* & *non ens* : v. g. homo , non homo. Ubi illud quoque non est prætermittendum , ea nomina , quibus præfigitur particula , *non* , vocari in Scholis post Aristotelem , libro de interpretatione , cap. 10. nomina *infinita* , quæ melius *indefinita* dicerentur : quia nihil definitum significant ; aut potiùs nihil omnino significant , quòd nimis significant : ut si quis dicat , *terra est non homo* , *lapis est non homo* &c.

Ex omnibus oppositionum generibus maxima est contradictoria. Nam quæ contradictoria sunt , ea neque similia , neque æqualia sunt , cujusmodi esse possunt relativa : neque in subjecto conveniunt , ut forma & privatio , quæ in eodem subjecto successivè recipiuntur : neque in genere , ut contraria , quæ sub eodem qualitatis genere sunt posita. Unde contradictoria inter se sic pugnant , ut si unum *sit* , alterum *non esse* necesse sit , nihil sit tertium , seu medium.

Sunt enim aliqua extrema , inter quæ datur medium sive per participationem , sive per exclusionem extremorum , ut aiunt. Verbi gratiâ , ætas matura est media per participationem inter juventutem & senectutem quia hujus prudentiam , & illius vigorem participat : homo est medium per participationem inter res spirituales & corporeas ; quia utriusque naturæ est particeps. Sed virtus dicitur esse quid medium inter duo vitia per utriusque exclusionem apud Horatium Epistolâ 18. lib. 1.

Virtus est medium vitiorum , & utrimque reductum.

Sic etiam Galba apud Tacitum dicebatur magis extra vitia , quàm cum virtutibus.

Inter esse autem , & non esse , nullum est , neque per participationem , neque per exclusionem medium , licèt inter *ens* & *nihil* sit aliquod medium . nempe *modus entis* , qui neque est ens neque nihil.

Quare *ens* & *nihil* propriè ac strictè loquendo non sunt *contradictoria*: quia *Contradictio*, est *Affirmatio* & *negatio ejusdem*, de eodem, secundum eadem omnia. *Nihil* autem non est *negatio solius entis*; sed est etiam *negatio modi entis*. Atque ita *ens* & *non ens*; vel *modus entis*, & *non modus entis* sunt *affirmatio* & *negatio ejusdem* de eodem secundum eadem omnia; non item *ens* & *nihil*: quia plus negat *nihil*, quàm *ens* affirmet, cum *nihil* non tantum neget *ens*; sed etiam *modum entis*.

C A P U T I I I.

De attributis soli enti, aut substantiæ propriis.

SU B S T A N T I A sive res dicitur *ens per se subsistens*; sive uno verbo *ens*. Nam quicquid per se non subsistit, id propriè non est *ens*, sed *modus* aut *appendix entis*: ac *per se subsistere* non minùs substantiæ, aut rei, sive enti competit, quàm *inhabere* accidenti, aut entis modo, ut jam diximus.

Substantia autem vel est *pars* alterius, ut caput, brachia, & omnia membra sunt partes corporis humani; & ipsum corpus humanum est hominis pars: vel est *totum* quid, & completum: rursusque aut complementum illud habet in ratione *natura*, sive *essentia* tantum; vel complementum habet in ratione *suppositi* aut *persona*: quod complementum *subsistentia*, vel *hypostasis* in Theologorum Scholâ solet appellari. Quid porro sint hæc omnia, paulò clariùs est explicandum: nam ex iis præcipuorum Religionis Christianæ mysteriorum, scilicet sanctissimæ Trinitatis, & Incarnationis Verbi divini pendet expositio.

Hypostasis

Hypostasis igitur Græcè, secundum Boëtium lib. de persona & natura cap. 3. apud veteres, profanosque Scriptores, nihil aliud, nisi substantiam singularem significabat; eaque ab ipsis, nec re, nec cogitatione à natura secernebatur. Sed Scriptores Ecclesiastici, ut sanam, receptamque à Patribus doctrinam circa mysteria sanctissimæ Trinitatis & Incarnationis tuerentur, explicatiusque traderent, naturam & substantiam ab hypostasi distinxerunt; & *hypostasin* non *substantia*, sed *subsistentia* aut *suppositi* nomine Latine reddiderunt. Quare nunc *hypostasis* nomen, in abstracto quidem, *subsistentiam*; in concreto verò, *suppositum* exprimit.

Igitur quamvis *subsistentia* secundum vim vocabuli, nihil aliud significare videatur, quam modum, quo substantia quælibet; sive completa, ut homo; sive incompleta, ut caput, existit: quemadmodum *inherentia*, sive, in alio *hærentia* est modus quos existit omne accidens: hic tamen specialius sumitur *subsistentiæ* nomen, & substantiæ duntaxat completæ tribuitur: sive est modus quo substantia quædam singularis tota & completa subsistit. Unde *subsistentia* definitur, *ultimum substantiæ complementum eam reddens sui juris; sive incommunicabilem alteri, tanquam supposito*.

Suppositum est *substantia singularis ultimo completa, & sui juris*. Dicitur autem substantia ultimo completa, sui juris, & incommunicabilis alteri tanquam supposito, quæ est *principium totum & integrum, suarum affectionum, aut operationum, si quas habet*. Ut Socrates est *suppositum*, non ipse mens sola, nec solum corpus: quia Socrates est principium totum & integrum suarum operationum; non ipse mens sola; nec solum corpus. Suppositum porro, si rationis particeps fuerit, appellabitur persona.

Persona quippe, definiente Boëtio, libro de persona & natura, cap. 3. est *natura rationalis indivisa substantia*. Hominis enim, inquit, dicimus esse personam, dicimus Dei, dicimus Angeli; non arboris, non equi: quia Deus, Angelus, & homo sunt naturæ rationales, sive cogitantes; non arbor; non equus. Quamobrem persona & suppositum in eo tantum differunt, quod omnis persona dici possit suppositum, non vicissim.

Cum hæc primis Ecclesiæ temporibus non satis distinctè fuissent explicata, gravissimæ circa adoranda sanctissimæ Trinitatis, ac Verbi incarnati mysteria exortæ sunt hæreses, quæ Religionem Christianam diu multumque acerbè dilacerarunt.

Primò quidem, circa mysterium sanctissimæ Trinitatis, sic ratiocinabatur Sabellius. Natura & persona minimè distinguuntur: atqui unica est in Deo natura: ergo unica persona. Arius verò sic assumebat: atqui tres sunt in Deo personæ: ergo tres naturæ. Sed utrumque damnavit Ecclesia, quæ & Scripturarum auctoritate, & traditionis perpetuâ serie suffulta, unam in Deo naturam, & tres personas adversus heterodoxos ineluctabiliter asseruit.

Similiter in mysterium Incarnationis Verbi divini misere impegerunt hæretici. Nestorius quidem hoc modo. Natura & persona sunt quid idem: atqui in Christo sunt duæ naturæ: ergo & duæ personæ. Eutyches verò aliter assumebat: atqui unica est in Christo persona: ergo unica natura. Quæ dogmata utrimque tanquam falsa, & impia proscripsit fides Catholica, dum unam in Christo personam, & duas naturas, divinam scilicet, ac humanam agnoscendas definivit.

Non sunt igitur hæc omnia simul confundenda: natura, substantia, subsistentia, suppositum aut personā. Siquidem in Deo unica est natura & di-

vinitas ; sed tres sunt hypostases , seu subsistentiæ : tria supposita seu personæ , quæ in eadem natura seu essentia subsistunt ; nempe Pater & Filius , & Spiritus sanctus . Sic etiam in Christo sunt duæ naturæ , divina nimirum & humana : sed natura humana , seu humanitas , quæ mente & corpore continetur , sic à Verbo divino fuit assumpta , ut ipsi *hypostaticè* , ut loquuntur , seu , *personaliter* , sit unita .

Ex *Unione* autem *Hypostatica* sequitur *Communicatio Idiomatum* , ut loquuntur Theologi , seu proprietatum utriusque naturæ , divinæ scilicet ac humanæ in Christo : per quam communicationem efficitur , ut tum ex naturæ de se mutuò concreto nomine dicantur : ut *Deus est homo ; homo est Deus* : tum proprietates naturæ divinæ de humana , & vicissim : ut *Deus est mortalis ; homo est æternus* : tum denique proprietates utriusque naturæ de *supposito* ipso , seu Christo : ut *Christus est immortalis ; Christus fuit conceptus de Spiritu sancto ; natus ex Maria Virgine* : Non tamen in abstracto dici posset *humanitas in Christo est divinitas* , aut vicissim .

Humanitas quidem , seu natura humana in Christo propriam habet *existentiam* , & in ratione naturæ est completa : non tamen propriam habet *subsistentiam* , seu personalitatem : quia non est *sui juris* ; sive , non est *principium totum* , & *integrum operationum Christi* ; cum ex sint , & à Verbo , & à natura humana ipsi hypostaticè unita , tanquam ab una persona oriundæ : quare *Theandrica* , id est , divino-humanæ vocantur .

Neque verò est , quòd quis ex eo concludat *personalitatem* , seu subsistentiam esse quamdam positivam *entitatem* à natura reipsâ distinctam , ut malè nonnulli opinantur : nam nihil omnino deest naturæ humanæ in Christo ; nec quicquam impedit quominus sit persona , nisi quòd hypostaticè Verbo divino est unita : unde si ab eo dimitte-

retur, statim sine ullius entitatis additione, rationem personæ esset habitura: ut brachium à corpore abscissum, sine ullius entitatis adjectione fit *totum*, & *suppositum*: ut vicissim aquæ gutta in Oceanum immissa, absque ulla entitatis suæ jactura, desinit esse *totum*, & Oceani *pars* evadit.

Totum quippe dicitur id, quod *sui juris* est: idque vel est simplex, & partibus caret, ut Deus, & Angelus; vel partes habet, ut homo, & corporea omnia. Id autem quod partes habet, dicitur in Scholis vel *totum actuale*, & *singulare*; vel *totum universale*, ac *potentiale*.

Totum actuale vocatur, quod habet partes *in se*; quæ partes, vel sunt *essentiales*, cum nempe sine iis neque esse, neque concipi potest *totum*, cujusmodi sunt, corpus & mens respectu hominis; vel sunt *integrales*, seu *integrantes*, seu *entitativa*; cujusmodi sunt caput, collum, &c. respectu hominis.

Totum universale seu potentiale appellatur, quod partes habet *sub se*, ut genus *sub se* habet species; & species habet individua: & eæ partes vocantur *subjectiva*, seu inferiora, ut diximus in Logica.

Jam verò substantia singularis, sive totum sit, sive pars, non tantum per se subsistit, sed omnibus etiam accidentibus aut modis subternitur, eorumque *subjectum* nuncupatur.

Non tamen uno modo subjecti nomen sumitur: sed multa sunt subjectorum genera.

Primum dicitur subjectum *invasionis*, in quo nimirum hæret accidens; rursusque vel est remotum, sive *quod*; vel est proximum, sive *quo*: illud est suppositum *quod* recipit accidens seu modum mediante alio: ut homo Philosophiam intercedente mente recipit: hoc verò est subjectum *quo* immediatè accidens recipitur: qualis est mens respectu Philosophiæ.

Secundum est subjectum *denominationis*, quod nempe ab aliqua forma, seu perfectione, vel defectu, vel actione, aut affectione denominatur: ut homo denominatur Philosophus à Philosophia; cœcus à cœcitate; agens ab actione: *denominationes enim sunt suppositorum*, ut aiunt; licet forma, aut perfectio, aut defectus, à quibus fit denominatio, sit tantum in aliqua parte suppositi: ut Philosophia est in mente; cœcitas in oculo, non in toto homine: ut etiam locutio quæ est actio quædam, ad aliquas tantum, non ad omnes corporis partes pertinet. Aliquando ista denominatio dicitur *extrinseca*, cum ab aliquo extrinseco reperitur: v. g. paries dicitur *visus* ab hominis *visione*, ipsi parieti extrinsecà.

Tertium dicitur subjectum *informationis*; scilicet, in quo recipitur aliqua forma substantialis, aut essentialis, per quam informatur, ad constituendum totum aliquod physicum: v. g. corpus humanum vulgò *subjectum informationis* appellatur respectu animæ rationalis, à qua *perficitur*, ut ex utraque substantia, tanquam ex duplici parte essentiali fiat homo. Ideo autem anima rationalis dicitur humani corporis forma *informans*, quia ipsi essentialiter, & ex conditoris destinatione est unita. Sed dæmon in energumeno, cui accidentariò tantum conjungitur, forma *assistens* in Scholis vocari consuevit.

Quartum est subjecti genus, quod *attributionis* vocant, nempe *materia alicui disciplina subiecta*, cui attribuuntur omnia, quæ in ea disciplina pertractantur. Aliter vocatur in Scholis *objectum materiale*, vel etiam *objectum totum*, seu, *totale*, si nempe cum objecto formali conjungatur. Sed si credamus S. Thomæ quæst. 1. & proœmiali summæ Theologicæ artic. 7. in corpore, objectum dici tantum debet respectu potentiarum, seu facultatum naturalium, putà visus, auditus, &c.

subjectum verò respectu disciplinarum ; ut subjectum Physicæ, seu materia Physicæ subjecta, &c.

Præterea ex substantiis aliæ dicuntur *causa*, aliæ *effectus*.

Causa definiri solet in scholis nostris , *principium influens esse in aliud*, id est, in aliam naturam. Ubi *principii* nomen generis loco sumitur : nam apud nos omnis causa est principium, sed non omne principium est causa. Additur , *influens esse in aliud* : id est, in aliam naturam , saltem numero à se distinctam : ut pater in hominibus dicitur causa filii : quia alia est ipsius , alia filii essentia & humanitas, scilicet aliud corpus & alia mens. Verùm in sanctissima Trinitate Pater in Ecclesiâ latinâ non dicitur *causa* Filii; sed tantùm *principium* Filii; quia eadem est Patris ac Filii natura & divinitas : ac licet Filius dici possit *alius* à Patre , id est , alia persona ; non tamen dici potest *aliud* , id est alia natura : neque est effectus Patris, & ab ipso dependens ; sed est ipsi consubstantialis, coæternus, coequalis, uno verbo, idem Deus. Eâdem ratione Pater & Filius sunt principium Spiritûs sancti , non causa : quia Spiritus sanctus idem etiam est Deus, eandemque habet naturam , ac Pater & Filius. Græci tamen in Concilio Florentino dixerunt hypostasim Patris in sanctissimâ Trinitate esse *principium* , & *causam* Filii ac Spiritûs sancti : quia *causa* nomen apud illos latiùs quàm apud nos accipitur.

Quatuor vulgò recensentur causæ , quæ diversas habent *causalitates*, ut loquuntur Scholæ, id est, *diversas causandi rationes*, seu modos : nempe *causa finalis*, quæ causat, tanquam *id propter quod*; *causa efficiens*, quæ causat, ut *id à quo* fit effectus ; & ambæ dicuntur *externæ*, quia extra rem sunt positæ : *causa materialis*, quæ causat, ut *id ex quo* ; & *formalis*, ut *id per quod* res efficitur : cæque *intrinsecæ* vocantur, quoniam intra rem productam remanent. Quia-

tam causam addunt aliqui, nempe *exemplarem*, quæ causat tanquam *id ad quod*, sive, ad cuius similitudinem fit effectus.

Res tota exemplo declarari potest. Architectus dicitur causa efficiens domûs : ipse enim domum ædificat: ad quod quidem aliquâ mercede allicitur, quæ est ipsius finis, seu causa finalis, sine qua ad agendum non fuisset determinatus : & hic dicitur finis *operantis* : commoda autem habitatio dicitur finis *operis*, hoc est, ipsius domûs. Lapides & ligna ex quibus domus componitur, sunt ipsius materia : ac demum dispositio singularum partium, totiusque domûs, quæ cum idea artificis congruit, dicitur domûs forma. Quod si Architectus aliam domum, aut quemdam domûs typum viderit, ad cuius similitudinem hanc extruat, prior illa domus, aut typus est causa exemplaris posterioris. Unde vel quatuor vel quinque causæ recenseri possunt. Sed inter eas, si propriè loqui volumus, sola efficiens causæ physicæ nomen ac titulum promeretur.

Ea quippe sola propriè causa physica vocari potest, quæ sola influit *esse* in aliud.

Atqui sola causa effectrix influit *esse* in aliud : nam causa finalis plerumque non existit, nisi in mente, nec nisi *objectiva* causa debet appellari, cum non moveat, aut determinet causam effectricem, nisi quatenus à mente *objectivè* percipitur : v. g. sanitas non movet ad potionem medicam sumendam, nisi quatenus à mente, tanquam objectum quoddam bonum percipitur, ut amplius videbimus in Ethica. Causa materialis & formalis, sive, materia & forma, de quibus in Physica dicemus, sunt potiùs rei productæ partes, aut principia componentia, quàm causæ. Exemplar aut typus non agit in rem ipsam, sed tantùm causæ effectrici imitandum proponitur.

Ergo sola causa effectrix propriè & strictè causæ physicæ rationem, ac titulum sibi vindicat.

Neque verò unius duntaxat rationis est causa effectrix ; sed multiplicis generis causæ effectrices distinguuntur.

Primum genus est causarum logicarum , seu metaphysicarum. Dicitur autem causa *Logica* seu *Metaphysica* , quæ , quamvis vera causa non sit, perinde tamen se habet comparatè ad cognitionem nostram , ac si vera & physica esset causa : v. g. mens humana spectatur veluti causa intellectus & voluntatis , etiamsi ab iis tanquam res à re non distinguatur. Sic Geometræ multas figurarum affectiones per earum naturam , tanquam per causam ab iis distinctam , demonstrant : cum tamen natura & affectiones figurarum , solâ mente , & logicè , seu metaphysicè , non reipsâ & physicè secernantur. Sic etiam partium dispositio dicitur opacitatis , vel perspicuitatis, aut aliarum physicarum affectionum causa, tametsi opacitas vel perspicuitas , aut aliæ affectiones in hujusmodi partium situ consistunt.

Ad illud causarum genus referri possunt *præmissæ* respectu *conclusionis* : nam illius dici possunt causæ logicæ aut metaphysicæ , quatenus ipsa ex iis ducitur , & in iis continetur : non tamen sunt causæ illius physicæ, nec reverà ipsam pariunt.

Secundum causæ effectricis genus causas *morales* continet , quæ quidem non influunt *physicè* in effectum : sed tamen secundum *morem* & existimationem hominum eodem modo se habent , ac si verè influerent : v. g. qui imperat homicidium, dicitur homicidii causa , licèt ipse hominem non occidat : qui ignem domui aut ædificio supponit, causa est conflagrationis , quæ subsequitur, tametsi non ipse homo , sed ignis domum aut ædificium comburat.

Tertium genus causas *physicas* comprehendit, quæ adhuc vel occasionales sunt tantum, ut aiunt, vel reipsa sunt effectrices.

Occasionales causæ sunt ex, quæ alicui effectui occasionem præbent, propter legem à naturæ conditore institutam: v. g. actus humanæ voluntatis est causa occasionalis, cur brachium moveatur, aut alius quilibet in corpore humano voluntarius motus excitetur: ut vicissim motus spirituum animalium causa est occasionalis multarum cogitationum, quas in mente habemus, ut experiuntur omnes. Simili modo Josue stetit solem tamquam causa occasionalis, propter Creatoris voluntatem, cum dixit, *Sol contra Gabaon ne movearis.* Jos. cap. 10. v. 12. Quò etiam pertinet quod ait Sanctus Chrysostomus homil. 83. in Matth. loquens de sanctissimo Eucharistiæ mysterio: *non sunt*, inquit, *humana virtutis opera hæc quæ proponuntur: qui tunc ipsa fecit in illâ cæna, idem & nunc quoque facit, Nos ministrorum tenemus locum: qui verò sanctificat ea & immutat, ipse est.* Item Sacramenta novæ legis meritò dicuntur causæ occasionales gratiæ, quæ ex instituto seu pacto divino in eorum susceptione percipitur. Unde Durandus in 4. distinct. 1. quest. 4. num. 19. *Alia*, inquit, *opinio est antiqua & sine calumnia, & magis, ut mihi videtur, consona dictis Sanctorum: videlicet quod in Sacramentis non est aliqua virtus causativa gratiæ characteris, vel cujuscunque dispositionis, seu ornatus existentis in anima: sed sunt causa sine qua non confertur gratia, quia ex divina præctione vel ordinatione sic fit, quod recipiens sacramentum, recipiat gratiam, nisi ponat obicem; & recipit gratiam non à sacramento, sed à Deo.* Vide Concilium Tridentinum, sess. 7. Can. 7.

Non alia ratione corpora à spiritibus, putà ab Angelis moveri posse contendunt recentiores Philosophi, quam quòd Deus legem quamdam inter

ipforum voluntatis actus, & corporum motum posuerit. Idem de corporum motibus ex aliorum corporum collisione profectis decernunt: istam quippe collisionem, non causam propriè dictam, sed occasionem tantum motûs habendam esse, solumque Deum propriè ac strictè omnium motuum ac rerum Auctorem esse cogitandum; quod ex iis, quæ in Physica dicenda sunt, clariùs innotescet.

Nec verò ab hac opinione multum recedit Aristoteles: nam ipse libro octavo Physicorum cap. 4. & alibi passim, docet nullum corpus sese movere; sed quicquid movetur ab alio moveri. Eoque argumento utitur sanctus Thomas primâ parte quæst. 2. artic. 3. ut primi moventis sive Dei ipsius existentiam demonstret, qui omnia in omnibus operatur, id est, qui motus omnes efficit; nempe, *qui producit in montibus scænum, & herbam servituti hominum: qui dat jumentis escam ipsorum*, &c. ut habet Psalmus 146. v. 9. & sequentibus.

Causa igitur effectrix propriè dicta secundum hanc opinionem, quam Cartesius & Recentiores plurimi amplexi sunt, unica est, nempe Deus: nam nullæ res creatæ, si voluntatem exceperis, propriè operantur: imò creata voluntas, quæ se ad agendum determinat, & reverâ agit, extra seipsam tamen nihil physicè agit, nisi *occasionaliter*, ut loquuntur.

Verum etiam si hæc omnia vera sint, ubi res accuratiùs expenduntur, negari tamen non potest, quin ad vulgi sensum, & populariter loquendo, multæ præter Deum assignari possint causæ, quæ *secundæ* dicuntur, quæque suo modo operantur, quamvis à prima causa pendeant, ut operentur: v. g. homo hominem generat, aquila aquilam.

Quin etiam Scriptura sacra vulgari hac loquendi ratione utitur. *Germinet, inquit, Deus ipse, Genesios I. v. 11. terra herbam virentem, & fruentem semen.*

Quamobrem dividi solet causa effectrix in *primam* & *secundam*. Prima dicitur, quæ à nulla pendet, ut agat, & cui cæteræ subjiciuntur; estque solus Deus. Secunda, quæ pendet à prima in suis operationibus, quales sunt omnes creaturæ.

Rursus causa secunda, vel est *generalis*, quæ scilicet ad multos, & diversos effectus confert, ut Sol ad multas & diversas generationes; vel est *particularis*, quæ ad aliquam tantum effectus speciem restringitur: unde causa generalis dicitur *aquivoca*, id est, effectus produciens diversi à se generis; causa verò particularis sapius est *univoca*, seu ejusdem rationis ac effectus, quem producit.

Præterea alia est causa *princeps*, quæ propriâ virtute agere dicitur; alia *instrumentalis*, quæ ab alia applicatur ad actum.

Causa princeps, vel est causa *per se*, vel causa *per accidens*.

Causa *per se*, est ea, quæ ex natura sua ad aliquem effectum producendum ordinatur, ut aquila ad producendam aquilam. Dicitur etiam potest causa *per se*, quæ aliquid ex consilio & intentione operatur.

Causa *per accidens*, est ea quæ effectum aliquem producit præter intentionem, ut qui lethale vulnus Jasoni cuidam phæro inferre olim conatus, vomitum ipsi perrupit, quæ à nullo Medicorum sanari potuerat, quemadmodum refert Valerius Maximus lib. 1. cap. 8. is *per accidens* hominem à pestifero morbo liberavit. Duplex est hujusmodi causa *per accidens* apud Aristotelem lib. 2. *physic.* cap. 4. nimirum *fortuna* & *casus*: illa prosperis eventibus; hic adversis, aut etiam indifferentibus tribuitur. Verbi gratiâ, cum quis terram fodiens thesaurum præter spem invenit, fortuna est: cum verò sub tecto transiens regulâ decidente graviter

fauciat , est casus. Quamquam *fors* , *fortuna* , & *casus* indiscriminatim sæpiùs accipiuntur.

Cæterùm fortuna & casus dicuntur ac sunt respectu nostræ cognitionis tantùm. Nam quæcumque fiunt , ea ex propriâ , determinatâque causâ , sed sæpiùs nobis ignotâ proficiscuntur : v. g. cùm tessera in alveolum projicitur , necesse est ut quædam illius facies , non alia , sursum appareat : illeque ex jactûs ipsius determinatione , aut partium in alveolo prominentium occurso , aut ex aliis quandoque complicatis causis necessariò exoritur ; non casu contingit , nisi respectu nostri. Unde Proverb. cap. 16. v. 33. *Sortes mittuntur in sinum , sed à Domino temperantur.*

C A P U T I V.

De primis axiomatis , quæ ex entis ipsius , ac modi entis generatione , & utriusque attributorum ideis sunt conflata.

HU C U S Q U E in ente & entis modo spectandis immorati sumus , ac utriusque attributa , sive communia sive propria recensuimus. Sed illud quoque ad Metaphysicam , seu scientiam generalem pertinet , ut primæ notiones seu propositiones , aut axiomata , quæ ex primis tum entis , tum modi generatione , & utriusque attributorum ideis coalescunt , hoc loco proponantur , ut quæ ab iis derivata sunt , ac per cæteras disciplinas dispersa principia , in hacce prima Philosophia , tanquam rivuli in fonte , aut rami in stipite , contenta cernantur. Est enim , ut initio diximus , prima Philosophia , seu scientia generalis , veluti communi aliarum parens , ex qua omnes suam

ducunt originem : & cui, quicquid habent evidentia ac certitudinis, acceptum singulæ referunt.

Axioma autem , ut jam definitum fuit in Logica, est *sententia communis cuilibet attendenti nota* : quale est illud Aristotelis lib. 4. Metaphysicorum cap. 3. *Impossibile est ut idem sit simul & non sit* : tanta enim est hujus propositionis evidentia, tamque clara & distincta attributi cum subjecto connexio, ut nemo quantumvis hebes, dummodò attendere velit, illius veritatem ignorare possit.

Cum igitur id omnibus axiomatis commune sit, ut eorum veritas per sese quodammodo luceat, ac evidenter cernatur, non alia viderur esse prima veritatis, ac certitudinis regula seu norma, vel, ut Græci aiunt, *criterium*, sive, ut Scholæ loquuntur, non aliud est primum certæ cognitionis principium, quàm *evidentia*, sive claritas & distinctio idearum : ita ut quicquid in clarâ distinctâque subjectæ materiæ ideâ comprehenditur, id de eâ certissimè possit affirmari, ut jam aliquoties declaravimus. Sed nunc illud ex professo secundum consuetam Scholarum methodum stabiliendum est, & ab Adversariorum argumentis vindicandum. Sit igitur

Axioma primum.

PRIMUM axioma, primum veritatis criterium, prima certitudinis regula, sive, ut aiunt Scholæ, primum certæ cognitionis principium, videtur esse illud : *Quicquid in ideâ clara & distincta rei alicujus comprehenditur, id de ea re. certissimè potest affirmari.*

Probatur. Illud est primum axioma seu primum certæ cognitionis principium, quod ita clarum est per se se, ut per aliud probari non queat, per ipsum verò cætera possint demonstrari : hæc enim

est vulgata in Scholis *primi certæ cognitionis principii* definitio.

Atqui hoc axioma , *Quicquid in idea clara* , &c. est hujusmodi.

Primò quidem,clarum est per se se : cum in ipsa veritatis luce , hoc est , in evidentia , seu claritate & distinctione idearum consistat.

2º. Probari non potest per aliud principium : cum nullum aliud ipso prius valeat assignari.

3º. Denique per ipsum cætera prorsus omnia demonstrantur , ut singulorum inductione constat. Cur enim tam certò , tam constanter affirmant Metaphysici *impossibile esse ut idem simul sit & non sit* , nisi quia in idea clara & distincta rei actu existentis includitur impossibilitas simul non existendi? Cur Mathematici asserunt *omne totum esse majus sua parte*,nisi quia in idea clara & distincta totius , partem comprehensam intelligunt , quamvis singulorum enumeratio peragi non potuerit ? Eadem est reliquorum ratio. Verbi gratiâ , nihil certius est apud Morales Philosophos hoc principio *Alteri ne feceris , quod tibi fieri non vis* , vel isto apud Medicos , dummodò propriis finibus contentum maneat , *Contraria contrariis curantur* : quia in idea clara distinctaque æquitatis ac justitiæ naturalis id continetur , *quod quisque juris in alterum statuerit , ut ipse eodem jure utatur* , nec ulli faciat , quod sibi fieri nolit ; ut in idea contrarii , potestas alterum abigendi contrarium includitur. Nam v. g. si quis nimîâ lectione fatigatos habeat oculos ; & alius ventri plus æquo indulgens superfluum sanguinem noxiosque humores congesterit ; illius remedium erit quies & remissio laboris ; hujus verò Sedula in cibo & potu temperantia.

Ergo primum axioma , primum certæ cognitionis principium videtur esse illud , *quicquid in idea clara & distincta rei alicujus comprehenditur, id de eâ certissimè potest affirmari.*

Corollarium I.

Hoc axioma ad rei essentiam pertinet, non ad existentiam, nisi quando existentia est ipsi rei essentialis: sive, quando existentia in idea clara & distincta rei continetur: adeo ut ab ipsius conceptu separari non possit.

Corollarium II.

Cum existentia actualis, quæ est perfectio quædam in idea, clara & distincta Dei, seu entis summè perfecti contineatur, potest ipsa de eo certissimè affirmari: sive, quod idem est, certò affirmare licet Deum, seu ens summè perfectum actu existere.

Corollarium III.

Quia verò existentia actualis non includitur necessario in idea clara & distincta rerum creatarum, quippe quæ non sunt entia summè perfecta, & à seipsis existentia: non potest ea necessario de illis affirmari; sed contingenter tantum.

Corollarium IV.

At existentia possibilis de rebus, quas clarè & distinctè novimus, sive jam creatæ sint, sive non creatæ; certissimè affirmari potest, quia quicquid clarè & distinctè concipimus, id potest existere: quòd erit axioma 2.

Corollarium V.

CERTUM nobis est duobus modis mentem

nostram, quæ est substantia cogitans, existere dum cogitamus. Primò enim qui cogitat, ita sibi conscius est se existere, ut de sua existentia, quandiu cogitat, dubitare non possit; ut jam declaravimus in Proœmio Philosophiæ cap. 1. Deinde in idea clara & distincta rei cogitantis inclusam existentis ideam intelligimus.

Corollarium VI.

D U O sunt, de quorum existentia dubitare, factâ quacumque hypothese, non possumus: nimirum Deus, & mens nostra. Patet ex Corollariis 2. & 5.

Corollarium VII.

A L I A R U M rerum five spiritualium, five corporearum existentia per earum ideas certa nobis esse non potest: ut patet ex Corollario tertio. Quamobrem ea non alio modo, quàm per impressiones quasdam in sensuum organa, & in mente nostra factas, nobis est comperta. Etenim ex impressionibus excitari non queunt in nobis per totam vitam, quin existant res, quarum occasione excitantur: alioqui Deus nobis per totam vitam illuderet: quod est ab idea clara & distincta entis summè perfecti, & proinde summè sapientis, summè veri ac boni penitus alienum: ut suo loco specialius explicabimus.

Corollarium VIII.

C O R P O R U M existentia per sensum vividum, constantem, & eodem semper modo se habentem nobis innotescit, factâ hypothese, quæ certissima est ex Corollariis secundo & sexto,

quod existat Deus summè verus, summè bonus, qui in nobis perpetuò decipiendis non delectetur: ut clariùs liquebit ex dicendis in Physica, ubi de corporum existentia disputabimus.

Responsiones ad objecta.

OBJICIENS primò. Primum certæ cognitionis principium debet esse certissimum.

Atqui hoc principium, *quicquid in idea clara*, &c. non est certissimum.

Ergo non est primum certæ cognitionis principium.

Respondeo negando minorem propositionem. Illud quippe principium est certissimum, à quo omnis certitudo naturalis, nempe circa rerum essentiam & qualitates, derivatur. Atqui omnis certitudo naturalis ex idea clara distinctaque proficitur: nam v. g. non aliter certum est Geometris omnem circulum esse rotundum, nisi quia rotunditas in idea clara, distinctaque circuli evidentissimè contenta cernitur. Ergo principium illud est certissimum.

Probabis minorem. Illud principium non est certissimum, quod in dubium revocatur à quibusdam, vel etiam negatur.

Atqui principium illud à quibusdam revocatur in dubium, imò etiam negatur.

Ergo non est certissimum.

Respondeo distinguendo majorem propositionem. Illud principium, non est certissimum, quod in dubium à quibusdam revocatur, imò etiam negatur, meritò & justa de causa, concedo majorem propositionem: quod in dubium à quibusdam revocatur, vel etiam negatur, immeritò & contra rationem, nego.

Simili modo distingo minorem. Atqui principium istud, *quicquid in idea clara*, &c. à quibusdam

in dubium revocatur, imò etiam negatur, immeritò & contra rationem, concedo: justa de causa, nego.

Ergo principium illud non est certissimum: nego consequentiam.

Duobus igitur modis aliquid negari potest, vel in dubium revocari; scilicet aut jure & justa de causa, aut immeritò & contra rationem.

Tunc aliquid in dubium revocatur, aut negatur jure ac meritò, cum omni attentione adhibita, remotis præjudiciis, & omni pertinaciâ depositâ, aut dubium aut falsum esse deprehenditur. Tunc verò sine causa & contra rationem in dubium revocatur, aut negatur, cum vel præjudicatâ opinione, vel animi pertinaciâ, citra debitam mentis attentionem, dubium aut falsum esse pronuntiatur.

Equidem illud certissimum non videtur, quod justa de causa in dubium revocari, aut negari potest: sed nihil vetat certissimum esse id, quod absque legitima causa, & solo contradicendi animo, vel in dubium revocatur, vel etiam negatur.

Existimamus autem principium à nobis allatum, ita omnibus attendere volentibus notum esse, ut non possit nisi solo contentionis pruritu citra legitimam rationem negari, idque ab iis solis, qui negare etiam debebunt *bis bina esse quatuor*: nam reverâ certum non erit *bis bina esse quatuor*, si quod in idea clara & distincta alicujus rei evidenter continetur, id de ea re certissimè non possit affirmari.

Instabis. Atqui principium illud, *quicquid in idea*, &c. negari potest, aut certè in dubium revocari jure ac meritò.

Ergo nulla solutio.

Respondeo negando subsumptum. Si enim revocari possit in dubium, dubitare licebit an *totum sit majus suâ parte*; an *bis bina sint quatuor*: nam ideo affirmamus omne totum esse majus suâ parte,

quia in idea clara & distincta totius continetur quod sit suâ parte majus , ut in idea binarii bis sumpti quaternarius includitur : sicque nihil omnino certum erit, quod absurdissimum est.

Probabis subsumptum. Illud principium negari potest, aut saltem in dubium revocari justa de causa, quod est errori obnoxium.

Atqui principium illud, *quicquid in idea clara*, &c. est errori obnoxium.

Ergo negari potest, aut saltem in dubium revocari etiam jure ac meritò.

Respondeo negando minorem. Illud quippe principium non est errori obnoxium, quod unicum est *criterium*, seu argumentum, quo verum à falso secernimus. Atqui principium nostrum est veritatis omnis criterium, quo nimirum solo verum à falso secernimus : cum nulla nobis alia succurrat ratio verum à falso secernendi, quàm clara, distinctaque perceptio. Ergo principium illud non est errori obnoxium.

Probabis minorem. Illud principium est errori obnoxium, per quod multi in errorem inducuntur.

Sed multi per ideam claram & distinctam in errorem inducuntur.

Ergo principium illud est errori obnoxium.

Respondeo negando minorem. Si enim principium illud homines in errorem inducat, nihil omnino tanquam certum affirmare licebit. Atqui tamen plurima licet affirmare tanquam certa : v. g. *triangulum omne tribus lineis contineri ; mentem esse substantiam cogitantem ; bis bina esse quatuor*, &c. Ergo per ideam claram & distinctam in errorem nemo inducitur.

Probabis minorem. Multi sunt somniantes multi amentes ; multi *paralogismo*, seu falsâ ratiocinatione decipiuntur.

Atqui hi omnes per ideam claram & distinctam in errorem inducuntur.

Ergo multi per ideam claram & distinctam in errorem inducuntur.

Respondeo negando minorem quoad singulas partes. Primò enim amentes vix ullas habent ideas claras & distinctas : cum ideo potius insaniant , quòd eorum ideæ sunt confusæ.

Secundò , dormientium etiam & febricitantium ideæ sæpè sunt confusæ : cum eæ occasione perturbati spirituum animalium motus excitentur , ob eam legem quam Deus inter mentis cogitationes & corporis motus posuit , ut observavimus , ubi de causis occasionalibus superiori capite agebamus , & adhuc postea uberius exponemus. Hinc eorum cogitationes vix ullâ serie inter se connectuntur : sed dissolutæ sunt & divulsæ , contra quàm in vigilantibus & sanis accidit.

Quòd si fortè dormientes ideis quibusdam claris & distinctis informati sint , ut aliquando contingit : tunc quicquid in illis ideis continetur , de rebus quarum sunt ideæ affirmari potest , ut infrà ostendemus. Nec dormiens à vigilante discrepat , nisi quod vigilantis cogitationes longâ serie inter se connectantur , dormientis verò , aut somniantis interrupta sit & dissipata cogitandi ratio , nec prima cogitatio ultimæ consentiat.

Tertiò , qui paralogismo deceptus est , is vel claram & distinctam non habet rerum ideam ; vel in deducenda ex præmissis conclusione aberrat , ut ex eo liquet , quòd si suus ipsi error indicetur , repente deceptum se fuisse agnoscat ; nisi fortè obstinato animo in errore suo contra propriam conscientiam perseverare malit. Etenim ea vis est evidentiae , ut non solum verum patefaciat ; sed etiam falsum admotâ luce veritatis detegat , ut infrà dicemus axiomate 8.

Sed inquires. Qui paralogismo decipitur, quando in errore suo permanet, ideam se claram & distinctam habere existimat.

Ergo qui putat sibi claram & distinctam adesse ideam, tamen dicitur.

Respondeo concedendo totum argumentum. Sunt enim qui claras sibi, distinctasque rerum ideas adesse existiment, cum tamen solis duntaxat vis imaginatricis phantasmatum deludantur. Tales sunt qui extensionem vacuum, hoc est, *extensionem nihili* concipere se arbitrantur: cum tamen nihili nulla sit extensio. Sed cum ab infantia sibi persuaaserint, ibi nihil esse positum, ubi sensibus nihil animadvertunt: totam illam extensionem, quæ inter Solem & nos interjecta est, quasi vacuum conceperunt: & inde ansam arripuerunt, id, quod omni corpore destitutum est, quasi magnum aliquod inane, seu vacuum imaginandi; cum tamen, si attendere vellent, & præconcep- tam opinionem emendare, facile intellecturi es- sent, id quod nihil est, nullâ extensione esse do- natum.

Quod spectat ad eos qui paralogismo decipiun- tur, ii non semper in ideis errandi occasionem habent: sed aliquando errant, quod ex claris, certisque principiis conclusiones præposterè de- ducant.

Repones. Si res ita se habeat, nunquam sciri potest, ideamne claram & distinctam quis habeat, an tantum habere se putet.

Ergo saltem dubium videri debet nostrum prin- cipium.

Respondeo negando antecedens. Multæ enim sunt ideæ quæ ab omnibus hominibus claræ & distinctæ habentur: quales sunt ideæ entis, extensio- nis, temporis, unitatis, numeri, & similes. Ac si quæ sint, quæ aliquibus tantum claræ &

distinctæ , non omnibus appereant : eæ sunt magnâ attentione expendendæ. Hujusmodi sunt ideæ , aut potius perceptiones multarum rerum physicarum , quæ per sensus transferunt , aut à sensibus occasionem habuere : eæque magna ex parte confusæ sunt , licet à pluribus citra examen ullum admittantur. Neque est quòd quisquam miretur , si paucas admodum rerum physicarum ideas claras & distinctas nobis adesse pronuntiemus : nam maxima pars rerum physicarum nos latet ; & si quæ à nobis clarè percipiuntur , eæ sunt præsertim quæ cum metaphysicis aut mathematicis propius sunt conjunctæ : in cæteris probabilitas tantum aliqua , & similitudo veri , non omnimoda certitudo est quærenda.

Quares quâ ratione certò sciamus concessas nobis fuisse rerum metaphysicarum , & mathematicarum ideas claras ac distinctas.

Respondeo id naturaliter & sensu intimo nobis esse notum ; quoniam hujusmodi ideæ sic lucent per sese , ut omnes homines earum luce afficiantur. Unde , quòd diligenter notandum est , primum certitudinis omnis principium aliquâ ratione in sensu intimo positum est ; quatenus nempe ideis claris & distinctis collustrari nos intimè sentimus , vel aliis impressionibus affici.

Utcumque illud sit nemo hætenus falsas vel obscuras seriò pronuntiavit illas ideas , quæ claræ ac distinctæ ab omnibus habentur. Quis enim unquam seriò negavit aut ignoravit *totum esse majus suâ parte : bis bina esse quatuor ; circulum esse rotundum* , & cætera hujusmodi non pauca , quæ in metaphysicis , ac mathematicis occurrunt , de quibus nulla unquam fuit opinionum diversitas?

Urgebis. Suspiciari potest aliquis vitam , quam degimus esse respectu alterius vitæ , ut somnium respectu vigiliæ.

Ergo quemadmodum in somnio ideæ apparent distinctæ, quæ vigilantibus sunt confusæ: ita ideæ, quas habemus, licet nobis videantur distinctæ, in altera tamen vita confusæ agnoscentur.

Respondeo primò, negando antecedens. Id enim suspicari ridiculum est, cujus nullum extat fundamentum. Sed hujus commenti nullum extat fundamentum: tamen enim altera vita futura sit longè excellentior præsentī, & uberiori lumine collustrata (vitam Beatorum intelligo:) non ideo tamen præsens vita perpetui somnii instar est habenda.

Secundò, ideæ somniantium non sunt semper confusæ: imò sæpè claræ sunt & distinctæ, ac conclusiones ex iis ductæ ratiocinationis regulis consentaneæ. Neque id tantum in somniis extraordinariis & divinitus missis contingit, verum etiam in ordinariis. Vidi ego Philosophum, qui noctu ratiocinationem quamdam ei ferè similem quam ex clarissimo Pascali, postremo loco afferemus, somniando inierat, ad animæ rationalis immortalitatem persuadendam: cùmque eam manè in charta exarasset, & quibusdam viris doctis exhibuisset, omnium approbationem, non sine admiratione obtinuit. Sed quoniam ideæ nostræ cum spirituum animalium motibus ita sunt ab Auctore naturæ colligatæ, ut iis tanquam occasionibus excitentur: hinc fit, ut somniantium cogitationes, propter incertum & inordinatum spirituum animalium motum, sæpius interruptæ sint; non constanti serie connexæ, ut in vigilantibus fieri solet.

Nec sanè negari potest, quin rotunditas circulo, sive inter dormiendum, sive inter vigilandum concepto conveniat: quia sic semper concipitur circulus, ut rotunditas in eo clarè, distinctèque contineatur; nec ab ipso ullâ ratione possit separari. Idem de cæteris rebus, quas clarè distinc-

tèque percipimus , iudicium est ferendum.

Ergo quod in idea clara distinctaque somniantis continetur , id de re concepta potest affirmari. Unde etiamsi vita præsens cum somnio, vita futura cum vigilia compararetur ; nihil tamen obstarret , quominus clarâ , distinctaque rerum quarunda in perceptione essemus informati.

Enimverò somnus , ut ait S. Augustinus libro de immortalitate animæ , num. 23 aliàs cap. 14. *non adimit animo vel sentiendi vim, vel intelligendi. Nam & imagines sensibilibus præsto habet , tentâ expressione similitudinis , ut eo ipso tempore discerni nequeant ab his rebus quarum imagines sunt : & si quid intelligit æquè dormienti ac vigilantem verum est. Nam , verbi gratiâ , si per somnium disputare sibi visus fuerit , verasque rationes secutus in disputando didicerit aliquid , etiam expergefacto eadem incommutabiles manent : quamvis falsa reperiantur cætera , veluti locus ubi disputatio , & persona cum qua disputatio fuisse visa erat : & verba ipsa , quod ad sonum attinet , quibus disputari videbatur , & alia huiuscemodi , quæ etiam cum ipsis sensibus sentiuntur , agunturque à vigilantibus , prætereunt tamen , nec ulla ex parte sempiternam præsentiam verarum rationum assequuntur. Ex quo colligitur tali commutatione corporis , qualis somnus est , usum ejusdem corporis anima , non vitam propriam posse minui. Hucusque sanctus Augustinus.*

Objicies secundò. Illud non est primum cognitionis principium : quod ab alio pendet.

Atqui principium istud , *quicquid in idea clara & distincta , &c. ab alio pendet.*

Ergo non est primum certæ cognitionis principium.

Respondeo negando minorem. Illud quippe principium non pendet ab alio , quod nullum agnoscit se prius. Atqui nostrum principium non agnoscit

noscit aliud se prius ; nec ullum assignari potest, à quo pendeat. Ergo nostrum principium non pendet ab alio.

Probabis minorem. Illud principium pendet ab alio, quod pendet ab ista cognitione, *Deus existit*.

Atqui principium à nobis allatum pendet ab ista cognitione, *Deus existit*.

Ergo pendet ab alio.

Respondeo negando minorem. Illud enim principium non pendet ab ista cognitione, *Deus existit*, quod est illius cognitionis fundamentum. Sed nostrum principium est istius cognitionis fundamentum: ideo enim persuasum habemus Deum existere, quia, in idea clara & distincta Dei, seu entis summe perfecti existentiam necessariò includi intelligimus, ut inferiùs liquebit. Ergo nostrum principium non pendet ab ista cognitione, *Deus existit*.

Probabis minorem. Nostrum principium pendet ab ista cognitione, *Deus existit*, si ideo tantum nobis certum sit nos non decipi in iis, quæ clarè & distinctè novimus, quia scimus Deum existere, cujus tanta est bonitas, ut nos non patiatur in huiusmodi cogitationibus decipi.

Atqui ideo tantum nobis certum est nos non decipi in iis, quæ clarè & distinctè novimus, quia scimus Deum existere, cujus tanta est bonitas, ut nos in claris distinctisque perceptionibus falli non sinat.

Ergo nostrum principium pendet ab ista cognitione, *Deus existit*.

Respondeo negando minorem. Non enim ideo præcisè certum nobis est nos non decipi in iis, quæ clarè & distinctè novimus, quia scimus Deum existere, qui nos in huiusmodi perceptionibus falli non sinat : sed potius Deum existere novimus, quia in idea clara & distincta Dei, seu entis summe perfecti existentiam actualem, quæ est perfectio quædam, contineri intelligimus, ut sæpe dictum est.

Equidem cum agitur de existentia rerum contingentium, v.g. corporum, quæ possunt existere vel non existere; nihil certi circa illam statuere possumus, nisi prius noverimus Deum existere, qui nos circa huiusmodi rerum existentiam toto vitæ nostræ decursu decipi non patiatur. Nam cum in rerum creatarum, v.g. corporum idea, possibilis tantum, non necessaria contineatur existentia, minimè dubium est, quin Deus res plurimas per omnipotentiam suam, quasi præsentibus nobis exhibere possit, licet absentes sint: ita ut nobis videamur cælum, solem, homines, & alia huiusmodi cernere, aut palpare, quæ in phantasia tantum nostra existant, quemadmodum somniantibus accidit. Sed cum Deus deceptor esse non possit, eas res existere certò scimus, qua vivido sensu, eademque semper ratione per totam vitam percipimus. Nam vividus ille sensus per totam vitam in nobis constanter vigere non potest, quin vel Deus nos fallat; vel existant res, quas hoc modo sentimus. Deus autem nec fallere potest, nec falli: ideoque res illas extare necesse est, ut pluribus adhuc probabimus in Physica, ubi de corporum existentia.

At principium nostrum essentiam spectat, non existentiam, nisi existentia ad essentiam rei pertineat, qualis est sola Dei existentia. In essentia autem clarè distincteque concepta decipi, factà quacumque hypothesi, non possumus. Nam v.g. cum concipimus *circulum*, necesse est *figuram* concipiamus, cui necessario conveniat *rotunditas*: hæc enim sunt principia essentialia, seu genus & differentia, ex quibus necessario constat circulus. Nec ullus, ut fingunt aliqui, malus Genius efficere potest, ut circulus quem concipimus, tamen non alibi quam in mente nostra existere fingatur, non sit rotundus: alioqui non conciperetur circulus. Quare etiamsi quis omni Dei cognitione dicere-

tur privatus, vel à malo genio deceptus, timere tamen non deberet, ne circulus quem conciperet, non foret rotundus: vel totum, quod intelligeret, non foret suâ parte majus : vel triangulum tribus lineis non clauderetur : alioqui, quod ab eo conciperetur, non esset circulus, aut totum, aut triangulum : sicque vel Deus, vel potens ille genius duo contradictoria simul componeret, putâ totum, non totum ; circulum, non circulum ; triangulum non triangulum : quod absurdum esse, & consequenter impossibile fatentur omnes æqui rerum æstimatores ; qui nempe quarumdam rerum essentiam, per ideam claram & distinctam sic percipi à nobis intelligunt, ut nullus nobis in eo conceptu metuendus sit error.

Ergo nostrum principium, quod rerum duntaxat essentiam spectat, non pendet ab ista cognitione, *Deus existit* : licet illud à Deo, tanquam ab Auctore omnis boni nobis concessum esse fateamur.

Nec est quod dicant aliqui cum Cartesio, in responsionibus ad sextas objectiones Metaphysicas, n. 6. & 8. *essentias rerum primasque notiones, & axiomata à sola Dei voluntate pendere, proindeque mutari posse* : id enim penitus falsum est, & rationi contrarium. Etenim essentia rerum ab immutabilibus Dei ideis pendent ; solaque earum existentia à divina voluntate repetitur. Unde circulus quidem existere potest vel non existere, produci vel non produci : sed ex hypothesi quod existat, necessario debet esse rotundus, ut cum archetypo, seu exemplari divino, quod immutabile est, consentiat. Idem de primis notionibus, seu sententiis, aut axiomatis cogitandum, in quibus idea attributi in idea subjecti necessario continetur.

Instabis. Si res ita se haberet, veritas rerum penderet ab ideis nostris.

Atqui falsum consequens.

Ergo & antecedens.

Respondeo distinguendo sequelam majoris. Veritas rerum penderet ab ideis nostris, ut à nobis cognoscatur, concedo: ut sit in rebus ipsis, nego. Simili modo distinguo minorem. Falsum consequens, id est, falsum est veritatem rerum pendere ab ideis nostris, ut sit in rebus ipsis, concedo: ut à nobis cognoscatur, nego. Quare nego consequentiam.

Itaque veritas rerum non pendet quidem ab ideis nostris ut sit in rebus: non enim ideæ nostræ sunt rerum causæ; neque res idcirco veræ sunt quia earum ideas habemus: quandoquidem, ut in Scholis loqui solent, *propter meum cogitare, nihil ponitur in re*: sed tamen veritas rerum à nobis cognosci non potest, nisi per ideas nostras: nec de iis aliter, quàm per ideas nostras judicare possumus.

Cùm igitur veritas rerum prior dicitur veritate idearum, distinguì debet propositio hoc modo. Veritas rerum prior est veritate idearum comparatè ad res ipsas, concedo: comparatè ad cognitionem nostram, nego: quoniam res ipsas, per ideas tantùm nostras cognoscimus. Hic autem agimus de principio nostræ cognitionis, non de rerum principio: quare ad ideas, non ad res ipsas est attendendum.

Quod autem aiunt aliqui nostrum principium non esse evidentissimum, quod non constet ex terminis evidentissimis, id per quàm absurdum videtur: nam termini per se non sunt alii aliis clariores aut obscuriores, licet non sint omnibus æqualiter noti. Sic termini Geometrarum, qui à vulgo non intelliguntur, nihilò sunt obscuriores quàm cæteri. Simili modo licet Gallorum voces non sint Hispanis notæ, non tamen idcirco dici debent obscuriores. Denique nulla vox in se spectatà obscura est, sed tantùm ubi ad varias res significandas per abusum usurpatur: cui incommodo ut obviam eatur, necesse est cujuscumque vocis significationem definiendo explicare, quod nos circa ideam

claram & distinctam in Logica præstitimus.

Quæres an dici non possit primum certæ cognitionis principium illud , quod à Cartesio tum secundâ meditatione metaphysicâ , tum primâ parte principiorum num.7. allatum est , nempe, *Cogito : ergo sum.*

Respondeo , si per primum certæ cognitionis principium , intelligas primam cognitionem certam , quæ homini veritatem naturali ordine quærenti, circa rerum existentiam occurrit , hanc propositionem, *ego qui cogito, existo*, dici posse primum certæ cognitionis principium , ut voluit Cartesius. Nam etiamsi quis dubitet an extra se quidpiam existat in rerum natura , dubitare tamen non potest quin ipse existat, dum dubitat: tum quia intimo sensu existere se sibi conscius est; tum quia in idea clara & distincta dubitantis inclusa est existentis idea.

Sed si per primum certæ cognitionis principium significetur regula quædam generalis, per quam expendi possint omnia judicia , quæ tum circa essentiam, tum circa existentiam rerum extra nos positarum fiunt, ea propositio, *ego, qui cogito, existo*, minimè spectari potest ut primum certæ cognitionis principium. Etenim certitudo quidem , quæ nobis adest circa rerum sensibilibum extra nos positarum existentiam , sensu intimo, vivo & constanter nititur, factâ hypothesi quod existat Deus, qui in nobis decipiendis non delectetur : sed tamen regula quâ tum de judiciis, quæ hoc sensu vivo, ubi agitur de rerum sensibilibum existentia nituntur ; tum de iis quæ circa rerum essentiam fiunt, judicamus , non alia est, nisi, quæ à nobis est constituta, nempe *quicquid in idea clara & distincta rei alicujus comprehenditur, id de ea re certissimè potest affirmari.*

Quod quidem cum à nobis sic effectum videatur , ut nulla de eo dubitandi causa superfit , jam ad alia axiomata , quæ ex hoc primo veluti fonte

ducuntur , convertendus est animus : non quidem ad ea , quæ vulgò trita sunt in Scholis , putà *impossibile est ut idem simul sit & non sit* : vel , *quodlibet est vel non est* ; vel , *ens est ens* , & cætera hujusmodi , quæ licèt vera sint , & ad res jam notas confirmandas aptissima , ipsa tamen ad detegendum , quod ignotum est , mentemque in promovendis disciplinis adjuvandam , non magnæ videntur esse utilitatis : sed ea quærenda sunt axiomata , quæ nobis in veritatis inquisitione adjumento esse possint , cujusmodi sunt quæ sequuntur desumpta ex Arte cogitandi quartâ parte cap.7. Sit igitur

Axioma secundum.

Quicquid clarè & distinctè concipitur , id vel existit , vel existere potest.

Nam quod clarè & distinctè concipimus , id , vel est ens summè perfectum ; atque ita *actualement* existentiam , quæ perfectio quædam est , necessariò includit : vel est ens imperfectum : rursusque , vel est mens ipsa , quæ cogitat , quæque dum cogitat , non potest non existere : vel est aliud quidpiam : illud autem , quodcumque sit , dummodo clarè & distinctè percipiatur , à Deo produci potest ; sive existentiam , saltem possibilem includit : id enim tantum judicamus existere non posse , quo nullo modo potest concipi , sive , cujus attributum subjecto repugnat : sic lapidem ligneum , aut circulum quadratum , impossibiles judicamus , quia circulum quadratum , aut lapidem ligneum intelligere non valemus : sive quia hæc attributa subjectis repugnare concipimus.

Duo sunt igitur , ut jam diximus , non plura , quorum existentia , factâ quacumque hypothese , nobis certissima est , scilicet mens nostra , quæ cogitare non potest , quin existat ; & Deus ipse , sive ens summè perfectum , à cujus ideâ existentiam actualement , quæ perfectio quædam est , sejungere nequimus. Cæ-

tera vel clarè concipiuntur : tumque existentiam saltem possibilem includunt , ut *mons aureus* : vel concipi nequeunt, ideoque impossibilia judicantur.

Advertis primò axioma intelligi de ente, non de entis modo; cum entis modus relationem habeat essentiālem ad substantiam , nec proinde sine illā clarè distincteque concipiatur. Secundò ipsum intelligi de natura completa seu specie, non de parte essentiæ, putà de genere aut differentia ; quia pars essentiæ seorsim ab aliā clarè distincteque non percipitur : v.g. animal generatim, vel figura prout ab omni specie abstrahit , nihil distinctum menti repræsentat. Unde nec genera sine differentiis, nec vicissim differentiæ sine generibus consistere possunt. Sed species, quæ ex genere & differentia constant, quæque totam rei essentiā complectuntur , aut existunt, aut possunt existere. Sensus ergo axiomatis hic est , quotiescumque attributum aliquod alicui subjecto *clarè & distinctè* ad constituendam aliquam speciem convenire intelligitur, toties species illa, sive subjectum illud cum isto attributo vel existit , vel existere potest.

Axioma tertium.

Nihilum non potest esse ullius rei causa. Quod quidem axioma ita clarum est , ut ne expositione quidem indigeat. Ex eo autem duo sequentia, veluti consecutaria, deducuntur.

Axioma quartum.

Nulla res aut perfectio existens habere potest *nihilum* , seu id quod non existit , pro eā , à quā existat causā.

Axioma quintum.

Quicquid est perfectionis in aliqua re, id in primā

totaque illius causâ , vel *formaliter* , vel *eminenter* continetur. Vide infra 2. parte, sect. 1. cap. 3. Propositionis primæ Corollarium.

Axioma sextum.

Corpus neque seipsum , neque aliud corpus movere potest, nisi ab alio prius moveatur. Nam corpus ratione sui , neque *formaliter* , neque *eminenter* motum continet, ut in Physica pluribus ostendetur.


Axioma septimum.

Non minor causa requiritur, ad rem conservandam , quàm ad illam primum producendam. Hoc axioma ex inferiùs dicendis de rerum conservatione clariùs evadet. Ex his omnibus sequitur

Axioma octavum.

Ea vis est evidentiae , ut non solum verum patefaciat ; sed etiam falsum admotâ luce veritatis detegat : sive, ut loquitur S. Augustinus Epist. 118. alias 56. num. 12. alias , cap. 2. *Cognitio veritatis omnia falsa : si modo proferantur , etiam qua prius inaudita erant, & dijudicare & subvertere idonea est.* v. g. novi falsum esse materiam cogitare : quia clarè distincteque percipio quid sit materia , quid cogitatio : ex qua perceptione , quæ vera est , intelligo repugnantiam , quæ materiam inter & cogitationem intercedit.





P A R S S E C U N D A

M E T A P H Y S I C E S

S I V E

P N E U M A T O L O G I A.

PArtem alteram Metaphysices , Pneumatologiam , sive spirituum scientiam vocamus. *Spiritus* verò, sive *mens*, est *res*, sive *substantia cogitans*. Dicitur *res* sive *substantia* , in quo cum corporibus convenit : dicitur verò *cogitans* , id est , percipiens, & volens , in quo à corporibus secernitur : solus enim & omnis spiritus cogitat , nihilque prius ipsâ cogitatione in spiritu potest inveniri.

Jam utrum existant spiritus generatim inutile est quærere. Etenim mens nostra dubitare non potest , quin ipsa existat , & cogitet, seu spiritalis sit, cum sibi conscia sit se cogitare; priusque existere se certò sciat, quàm ulla extare corpora probare possit, ut alibi ostendimus. Deinde existere Deum , ac esse spiritalẽ invidtis mox demonstrabimus argumentis. Denique extare Angelos seu spiritus creatos, & à corporibus secretos, rationibus ad suadendum efficacissimis convincemus. Itaque cum nullos alios spiritus, præter Deum, Angelos, & mentes nostras agnoscamus ; ac tum Deum , tum Angelos, & mentes nostras existere & spiritalis esse suo loco simus monstraturi : propositionem generalem, tanquam certam præmittere licet , nimirum , spiritus seu substantias cogitantes extare , quarum natura

N v

à corporibus sit planè diversa. Tres igitur hujus secundæ partis Metaphysicæ, quæ de spiritibus agit, futuræ sunt sectiones.

Prima erit de Deo : eaque naturalem, ut vocant, Theologiam complectetur.

Secunda erit de Angelis, quantum naturali ratione attingi possunt.

Tertia demum circa mentem humanam versabitur.

S E C T I O P R I M A.

De Deo.

CUm demonstrationes nostras, non ex sacrorum librorum auctoritate, ut iis, qui sacram & supernaturalem Theologiam docent, usu venit; sed ex ipsa naturali ratione, communibusque ideis ducamus: nihil nobis hoc loco præstandum videtur, nisi ut, quæ naturâ duce de Deo omnibus passim nota esse possunt, quàm poterimus accuratè exponamus.

Primò agitur quæremus, quid Dei nomine omnibus in mentem veniat, & quomodo à nobis cognoscatur.

Secundò, quibus potissimum rationibus existentia Dei demonstrari possit.

Tertiò, de præcipuis Dei attributis dicemus, & speciatim de immensitate, ac æternitate.

Quartò, de infinitate Dei.

Quintò, de præscientia, voluntate, omnipotentia, libertate, & decretis divinis.

Sextò, de Deo Creatore agemus.

Septimò, de Deo conservante, & providente.

Octavò, de Deo movente, & concurrente.

CAPUT I.

*Quid Dei nomine , omnibus in mentem veniat,
& quomodo à nobis cognoscuntur.*

IN Dei notione , seu ideâ consentiunt omnes, qui candidè , quod animo concipiunt ; verbis exprimere volunt : nemo enim est , qui si loqui velit , ut sentit , non fateatur se intelligere substantiam spiritalem , ac simplicem , à seipsa existentem , æternam , immensam , infinitam , omnipotentem , omnia videntem , omnia continentem , gubernantem ac moventem , uno verbo , omni perfectionum genere cumulativissimam. Eaque non tantum est eorum , qui Deum existere confitentur , notio : sed eorum etiam fuit , qui se atheos professi sunt ; si modò ulli unquam extiterint athei , quales se olim jactarunt Protagoras & Diagoras , teste Tullio lib. i. de natura Deorum. Si enim interrogati fuissent quid esset illud , quod ab ipsis existere negaretur , utique respondissent , Deum , sive substantiam spiritalem , summè simplicem , summè necessariam , æternam , immensam , uno verbo , infinitè perfectam : quæ communis est omnibus à natura insita Dei notio , quam extinguere penitusque ex mentibus delere nituntur Epicurei qui Deum nobis velut substantiam extensam proponunt : in quibus numerandus est spinosa celebratissimus ille nostri temporis Atheus : qui inter Judæos Amstelodami natus , primò judaicam , deinde Christianam Religionem , specie tenus , ut testantur qui ipsum in Batàvia viderunt , professus , tandem justo Dei judicio , ut iis accidit qui Deum cognoscunt , nec ut par est , colunt , ingenio suo

N vj

permiffus eft , ut non modò abjiceret Religio-
nem omnem , fed etiam ideas naturales Dei ac
mentis noſtræ omnino perverteret. Errores ſuos
de Deo extenſo , de ſubverſione Providentiæ , &
Religionis omnis confuſione in Batavia , ubi vi-
tam agebat, pervulgavit eo opere , quod typis im-
preſſum eſt Hamburgi anno 1670. cum hoc titu-
lo, *Tractatus Theologico politicus* , &c. & aliis operi-
bus poſthumis. Quoniam verò idea Dei, tanquam
entis ſummè perfecti, capitalis eſt , non tantum in
Religione Chriſtiana, verum etiam in Philoſophiâ
ſanâ : idcirco ſpeciali propoſitione eſt firmanda.
Sit igitur

P R O P O S I T I O.

Extat in nobis idea Dei , five entis ſummè perfe-
cti : quæ idea neque adventitia, neque factitia eſt;
ſed innata.

Probatur prima pars. Idea Dei eſt idea entis
ſummè perfecti , ut omnes homines , ne exceptis
quidem atheis , ſi qui extarent, conſentiunt.

Atqui extat in nobis idea entis perfecti : nam
non aliter nos imperfectos eſſe pronuntiamus ,
quàm quòd ab illa idea entis perfecti deficere nos
advertimus : aliunde enim mens noſtra nihil ſe-
ipſâ perfectius in hoc aſpectabili mundo deprehen-
dit : ac ſi ſe cum rebus , quas ſenſibus percipit,
conferat, nihil eſt cur ſe perfectam eſſe non judicet.

Ergo extat in nobis idea Dei. Quæ quidem idea
non eſt adventitia , ſeu à ſenſibus accepta : & eſt
ſecunda pars propoſitionis.

Probatur igitur illa ſecunda pars. Idea illa non
eſt adventitia , ſeu à ſenſibus orta , quæ nobis ex
ſenſibilium rerum perceptione non advenit.

Atqui idea entis ſummè perfecti ex rerum ſen-
ſibilium perceptione nobis non advenit , tum quia

ens summè perfectum neque coloratum est , neque lapidum , neque sonorum , neque ullâ aliâ qualitate sensibili affectum , ut à rebus sensibilibus ejus notio nobis in mentem veniat ; tum etiam quia res imperfectæ , quales sunt res sensibiles , ideam entis summè perfecti ingenerare nobis non possunt.

Ergo idea entis summè perfecti non est adventitia , sive à sensibus orta.

Probatur tertia pars , scilicet illam ideam non esse factitiam. Idea enim factitia , ut dictum est in Logica , vocatur , quæ à nobis ex pluribus aliis ideis ad libitum est conficta.

Atqui idea entis summè perfecti ex pluribus aliis non est conflata : primò quia entis perfecti idea simplex est , non ex aliis composita : secundo , quia omnes aliarum rerum ideæ simul congestæ aliquid perfectum efficere non possunt : tertio denique , quia nihil ipsi addere aut detrahere possumus , ut ideis factitiis aliquid ad libitum addi potest vel detrahi.

Ergo idea entis summè perfecti non est factitia. Hinc

Probatur quarta pars. Illa idea est innata , quæ à primò ortu divinitus nobis est concessa , sive quæ est Deus ipse , quatenus menti nostræ præsens est , eamque perpetuò illuminat.

Atqui idea Dei à primo ortu nobis est concessa , sive , est Deus ipse , quatenus menti nostræ sese saltem imperfectè percipiendum exhibet , ut inferius demonstrabimus : nam nulla res creata , utpote imperfecta , ideam illam nobis imprimere potest. Hinc Tertullianus Apologetici cap. 17. Unius Dei existentiam probat naturali animæ nostræ testimonio , *quæ licet carcere corporis pressa , licet institutionibus pravis circumscripta , licet libidinibus & concupiscentiis evigorata , licet falsis Diis*

exancillata ; cum tamen respiscit ut ex crapula , ut ex somno , ut ex aliqua valetudine , & sanitatem suam patitur , Deum nominat , hoc solo quia proprie verus hic unus Deus bonus & magnus..... O testimonium anima naturaliter christiana ! (quæ nempe naturaliter novit unum esse Deum , optimum , maximum , ut docet religio Christiana.) Denique pronuntians hæc , non ad Capitolium , sed ad calum respicit : novit enim sedem Dei viri ; ab illo , & inde descendit.

Ergo idea Dei omnibus hominibus est innata.

Responsiones ad objecta.

O B J I C I E S primò. Illa idea non est naturalis, quam per sensus acquirimus.

Atqui ideam Dei per sensus acquirimus ; nempe ex mundi ipsius contemplatione : nam , ut docet Apostolus ad Rom. cap. i. v. 20. *Invisibilia ipsius per ea , quæ facta sunt , intellecta conspiciuntur.*

Ergo idea Dei non est nobis congenita.

Respondeo negando minorem. Si enim ideam Dei ex rerum sensibilibus perceptione hauriremus , eam certè componeremus ex iis perfectionibus quas corporibus inesse percipimus , putà , ex claritate Solis ac stellarum , ex calore ignis , ex frigore glaciei , ex candore nivis , ex nigredine gagatæ , &c. Atqui ex hujusmodi perfectionibus ideam Dei conflare non possumus : alioqui Deum conciperemus lucidum ut Solem , calidum ut ignem , frigidum ut glaciem , candidum ut nivem , nigrum ut gagaten , &c. quod absurdissimum est , Ergo ideam Dei ex rerum sensibilibus perceptione non educimus,

Neque est, quod dicas cum Gassendo primâ parte Institutionis Logicæ can. 3. eam oriri à sensibus , vel per compositionem , aut adunationem

plurium idearum simul ; vel per ampliacionem aut imminutionem ; vel denique per translationem & accommodacionem. Nam primò , fieri non potest per compositionem , aut per adunacionem plurium simul , quemadmodum idea montis aurei ex montis ; & auri seorsim ideis componitur : siquidem plures ideæ imperfectæ simul positæ rem perfectam exhibere nequeunt. Deinde , fieri non potest per ampliacionem , aut imminutionem ideæ rei sensibilis , ut cùm ex infante gigas concipitur , aut vicissim : nam in eo saltem conveniunt infans & gigas , quòd alicujus extensionis , cujus naturalem ideam habemus , sint participes : Deus autem non est extensus, cùm spiritus sit , non corpus : alioqui non foret summè perfectus. Denique non potest fieri per translationem aut accommodacionem , ut cùm ex avicularum pugna intelligit aliquis duorum exercituum congressum : siquidem nulla est rei corporeæ & imperfectæ ad spiritalem & perfectam habitudo , qualis est , quæ inter avicularum & hominum pugnam intercedit. Ergo idea Dei nullo modo per sensus acquiri potest.

Ad textum autem allegatum ex Apostolo respondeo *invisibilia Dei per ea quæ facta sunt* , sive spiritalia, qualis est mens humana ; sive corporalia, quale est cœlum , &c. *intellecta conspici* , tanquam per occasiones , quæ ideam Dei nobis congenitam excitant ; non verò tanquam per causas quæ illam nobis suppeditent. Nam neque mens nostra , neque corpora visibilia ratione sui Deum invisibilem repræsentare possunt : imò ne occasionem quidem nobis præberent creaturæ ut de Deo cogitaremus , nisi Dei notio seu idea mentibus nostris , à natura , id est , ab Auctore naturæ , foret infusa.

Sed inquires. Deus vulgò concipitur instar venerabilis senis ; ut concipitur Angelus instar for-

mosi adolescentis alis instructi.

Atqui hujusmodi idea ortum ducit à sensibus.

Ergo idea Dei ortum ducit à sensibus.

Respondeo distinguendo majorem. Vulgò concipitur Deus instar venerabilis senis, conceptu absurdo, qui minimè est Dei conceptus, concedo; conceptu justo & proprio, nego: unde concessâ minore, nego consequentiam. Ista quippe conceptio Dei ut venerabilis senis penitus absurda videtur. Si enim ideo instar senis concipiendus esset Deus, quia Danielis cap. 7. v. 9. *antiquus dierum* vocatur, esset quoque concipiendus, ut ignis, quoniam apparuit Moyfi in *flamma ignis de medio rubi*, Exodi cap. 3. v. 2. & Spiritus sanctus instar columbæ intelligendus esset; vel instar linguæ igneæ: quia sic visus est Matth. cap. 3. v. 16. & Act. Apost. cap. 2. v. 3. Sed hæc fuit hæresis *Anthropomorphitarum*, qui rusticâ simplicitate, Deum humanâ formâ præditum, & humanis membris donatum existimabant. Quæ fuit etiam vilioris plebeculæ opinio, apud Ethnicos. Nam suum Saturnum, ut senem aliquem; suum Jovem, ut virum vegetum; ac omnino Deos omnes instar hominum intelligebant: nec eos ferè ab hominibus, nisi per immortalitatem secernebant. Hinc Porphyrius in Isagoge ad Categorias Aristotelis cap. 3. definit hominem *animal rationale mortale*; Deum verò, *animal rationale immortale*.

Verùm aliter longè concipitur Deus ab iis, qui non evanuerunt in cogitationibus suis. Demonstrant enim Theologi Deum non esse corporeum, aut ex partibus compositum; eum esse summè intelligentem, ubique præsentem, ubique potentem, moventem omnia immotum, nunquam senescentem, nunquam novum, & tamen omnia innovantem. Atqui hæc omnia attributa venerabili seni non conveniunt; sed enti summè perfecto, quod

Intelligi quidem, non imaginatione aut phantasmatis corporeis exhiberi potest. Ergo Deus non instar venerabilis senis est concipiendus, sed ut ens adorandum, omnipotens, æternum, infinitum; uno verbo, ut ens undequaque perfectum, quod nullâ potest imagine repræsentari. Ideoque Concilium Tridentinum sess. 25. ubi de sacris imaginibus agit, Episcopos admonet *ut nulla falsi dogmatis imagines, & rudibus periculosi erroris occasionem præbentes statuuntur. Quod si aliquando historias & narrationes sacra scriptura, cum id indocta plebi expediet, exprimi & figurari contigerit, doceatur populus non propterea divinitatem figurari, quasi corporeis oculis conspici; vel coloribus aut figuris exprimi possit.* Neque etiam Angelus instar juvenis alati cogitandus est; licet eo modo à pictoribus effingatur: sed tanquam spiritus aliquis, aut substantia cogitans, quam intelligere possumus, imaginari nequimus.

Instabis. Nulla mentibus nostris inest Dei notio, seu idea, nisi per imaginem quamdam corpoream nobis ipsum exhibeamus.

Atqui non alia esse potest illius imago, quàm venerabilis senis.

Ergo concipiendus est instar venerabilis senis.

Respondeo negando majorem. Ea enim tantum per imaginem quamdam corpoream percipimus, quæ sensibilia & corporea sunt, non quæ sunt spiritalia, & ab omni materiæ affectione soluta. Sic ipsum esse generatim, *veritatem, pulchritudinem, perfectionem*, & alia id genus clarè ac distinctè novimus, quamvis imaginibus corporeis repræsentari nequeant. Sic etiam Deum, ut ens summè perfectum, & intelligibile, non ut ens corporeum, & imagine sensibili circumscriptum concipere debemus.

Repones. Non possumus Deum cognoscere, ut ens summè perfectum, nisi removendo ab eo im-

perfectiones , quas nobis inesse ipso sensu percipimus.

Ergo Dei cognitio à sensibus est repetenda.

Respondeo negando antecedens. Imò non cognoscimus nos esse imperfectos , nisi quia ideam perfectionis insitam habemus , à qua nos plurimum abesse intelligimus. Etenim pronuntiamus quidem corpus nostrum esse ens imperfectum , quoniam cognoscimus mentem , quæ est ipso perfectior : sed nihil novimus in rerum natura perfectius nostrâ mente, seu substantiâ cogitante: unde non eam judicaremus imperfectam , si nulla nobis adesset alia cognitio quàm quæ ex sensibus profiscitur. Quamobrem cum plurimas ei perfectiones deesse intelligamus , clarum est ideam nos habere entis perfecti , in quo perfectiones illas necessario contineri videmus.

Urgebis. Si res ita se haberet , nulli unquam fuissent athei.

Respondeo distinguendo propositionem. Nulli fuissent athei , si ad ideam Dei sibi congenitam attendere voluissent , concedo : secus , nego. Nulla enim , ut optimè advertit Tullius lib. 1. Tusculan. Quæst. est gens tam fera tam immanis, cujus mentem non imbuerit divinitatis opinio. Multi de Deo prava sentiunt : *Omnes tamen esse vim & naturam divinam arbitrantur. Nec verò id collocutio hominum , aut consensus efficit : non instituti opinio est confirmata , non legibus. Omni autem in te consentio omnium gentium lex natura putanda est.* Igitur credibile non videtur ullos unquam homines ; qui ad ideam Dei attenderint , seriò atheismum fuisse professos : quia non tantum clara est , quæ omnibus hominibus à natura fuit insita Dei notio, sed insuper rerum pulcherrimarum conspectu indefinenter excitatur.

Extare tamen forsan possunt barbari quidam ,

materiæ nimium immerſi , qui ideam illam ſopitam aliquandiu teneant, ſed ſuâ tantum, non Creatoris culpâ ; cum ad illam ideam etiam rebus pulcherrimis commoti non attendant , nec *quarant Deum, ſi fortè attrectent eum , aut inveniant , quamvis non longè ſit ab unoquoque noſtrum : in ipſo enim vivimus , & movemur , & ſumus* , ut admonet Apoſtolus Act. Apoſt. cap. 17. verſ. 27. & 28. At ii propriè athei non ſunt , cum non negent Deum exiſtere , ſed tantum de eo minime cogitent.

Alii Deum quidem norunt : ſed quoniam ipſum non glorificant ut Deum ; idcirco in peccati poenam ſinuntur evaneſcere in cogitationibus ſuis : adeo ut ideam Dei , quam innatam habent, conentur à ſe amoliri , & ſibi in animum inducere , quæcumque ſiunt in hoc aſpectabili mundo , ab imaginaria quædam cauſâ , quam incerto , vel *Fati* , vel *Natura* nomine designant , proficiſci. Tales fuerunt olim , taleſque ſunt etiamnum Epicurei , falſi illi ſapientes , quos certè fatius eſt omnium hominum inſipientiſſimos appellare , juxta mentem Apoſtoli Ep. ad Rom. cap. 1.

Neque verò ex eo quòd innata nobis ſit Dei , ſeu entis perfecti cognitio , eaque clara & diſtincta , colligi poteſt Deum à nobis comprehendere , cum omnes illius perfectiones mens noſtra non capiat : imò fortàſſe nullius rei, ne tenuiſſimæ quidem perfectam , & , ut aiunt , adæquatam comprehensionem habemus , ut notatum eſt cap. ultimo Logices ad axioma primum.

Objicies ſecundò. Nulla eſt in nobis idea rei infinitæ.

Atqui Deus eſt infinitus.

Ergo nulla in nobis extat Dei idea.

Reſpondeo negando majorem. *Infiniti enim nomine intelligimus id , quod nullos habet fines ;*

sive, quod summum est, & cui nihil, ne per cogitationem quidem, adjici potest. Atqui clarè & distinctè novimus quid sit nullos habere fines, aut limites, seu summum esse, nec ullius rei adjunctione posse amplificari: nam rectè novimus enti summè perfecto nihil omnino addi posse, alioqui non esset summè perfectum: novimus pariter, nec numerum, nec corpus posse esse infinitum; quia nullus est tantus numerus, cui per cogitationem adjicere aliquid non valeamus; ut corpus non ita extensum concipitur, quin illius extensio per mentem ampliùs produci queat. Ergo clarè & distinctè novimus infinitum.

Instabis. Non possumus infinitum cognoscere, nisi per quamdam negationem finiti: nempe, cum rei alicujus fines non videmus, eam infinitam vocamus.

Ergo clarè & distinctè non novimus infinitum.

Respondeo negando antecedens. Non enim per negationem finiti infinitum novimus, si potius finitum per quamdam infiniti diminutionem intelligimus. Atqui quod finitum est, per quamdam diminutionem infiniti percipimus; nam finitum spectamus, ut aliquod ens determinatum, sive, ut partem entis generatim: adeo ut ipsius entis generatim, quod nullis limitibus clausum intelligimus, partem aliquam decerpere teneamur, ut rem finitam percipiamus: sicque prius ordine *infinitum* novimus, quàm *finitum*. Ergo infinitum per finiti negationem non intelligimus.

Verùm inquires. Si haberemus ideam Dei, cognosceremus quid sit Deus.

Atqui non cognoscimus quid sit Deus, ut multi Theologi docent: imò & ipse Sanctus Thomas primâ parte; quæst. 2. art. 1. in corpore, hæc ait: *Nos non scimus de Deo quid est,*

Ergo nullam habemus Dei ideam: aut si qua-

METAPHYSICÆ. SECT. I. CAP. I.

Iamcumque habeamus , ea non naturalis est , sed vel à parentibus , vel à magistris , aut aliis profecta.

Respondeo distinguendo minorem. Non cognoscimus *perfectè* quid sit Deus : quo sensu negat S. Thomas nos cognoscere de Deo, *quid est*, concedo: *imperfectè*, nego : quare nego consequentiam. Idea igitur, quam de Deo informatam habemus, quamvis clara sit & distincta : quoniam ea continet attributa , quæ soli Deo conveniunt , & quibus Deus ab omnibus aliis entibus clarè ac distinctè secer nitur, ut diximus primâ parte Logices cap. 4. est tamen imperfecta & manca, non tantum quia minime nobis exhibet Trinitatem personarum divinarum in una natura ; nec generationem Verbi à Patre ; nec processionem Spiritus sancti à Patre & Filio ; ut capite sequenti adhuc notabimus in corollario secundi argumenti metaphysici : sed etiam quia ab entis summè perfecti plenitudine prorsus deficit. Unde hoc sensu concipimus potius quid non sit , quàm quid sit Deus : idque non tantum docet S. Thomas ; sed etiam S. Augustinus in psalm. 85. num. 12. his verbis. *Deus ineffabilis est. Facilius dicimus quid non sit, quàm quid sit. Terram cogitas , non est hoc Deus : mare cogitas , non est hoc Deus : omnia quæ sunt in terra , homines & animalia, non est hoc Deus : omnia quæ sunt in mari , quæ volant per aërem , non est hoc Deus : quicquid lucet in calo, stella , sol , & luna, non est hoc Deus : ipsum calum, non est hoc Deus : Angelos cogita, Virtutes, Potestates , Archangelos , Thronos , Sedes , Dominatio nes , non est hoc Deus. Et quid est ? Hoc solum potui dicere, quid non sit.* Non tamen potuisset S. Augustinus pronuntiare hæc omnia, nempe , terram , mare, cælum, homines , Angelos, non esse Deum , nisi ideam Dei , imperfectam quidem, sed tamen veram ac distinctam habuisset : siye , ut ipse loqui-

tur lib. 7. confess. cap. 17. nisi mens humana bonum incommutabile aliquo modo nosset, nullo modo illud mutabili cerèd praponeret.

Hæc autem idea nec à parentibus, nec à magistris; sed à solo Deo est oriunda, ut diximus.

Corollarium.

Ex eo sequitur Deum non tantum *negativè*, ut aiunt, & removendo ab eo imperfectiones nostras, sed etiam *positivè* quamvis *imperfectè* à nobis cognosci; nempe quatenus est ens summè perfectum. Nam scire quid non sit res aliqua, non est eam cognoscere: Ac multi sciunt quid non sit lux, vel gravitas, vel durities, nec ideo lucem, aut gravitatem, aut duritiem perspicere dicuntur.

Atqui Deum cognoscimus, neque negare possumus ipsum esse ens perfectum, omnium rerum causam à quo quicquid boni est in rebus creatis, profluxisse intelligitur.

Ergo non *negativè* tantum, sed etiam *positivè* Deum cognoscimus, quamvis ipsum non comprehendamus.

C A P U T I I.

Quibus potissimum rationibus existentia Dei demonstrari possit.

CUM omnibus hominibus insita sit Dei, seu entis summè perfecti notio, nemo unquam seriò dubitare potuit, quin existat Deus, à quo, quæcumque oculis & animo cernimus, regantur & administrentur. Sed si fortè occurrant

aliqui adeo insipientes , ut dicant *in corde suo* , *non est Deus*, eos utique non omni ope destitutos relinquendos , sed potiùs viribus omnibus compellendos putamus , ut ab eo, quo miserè turpent , verno excitentur , & absurdum simul ac impium errorem ejurent.

Ex multis verò argumentis quibus convinci potest atheorum impietas & vesania circa Dei existentiam , quinque potissimum selegit Sanctus Thomas primâ partē Summæ Theologicæ , quæst. 2. art. 3. quæ cum summæ efficacîæ Theologis nostris videantur , iis certè Philosophos uti maximè decet. Primum petitur ex corporum motu , illudque Aristoteles libro præsertim octavo Physicorum adhibuit. Secundum , ex causarum efficientium serie : tertium , ex ente possibili & necessario : quartum , ex variis perfectionum gradibus , qui variis in rebus occurrunt : quintum denique , ex mundi gubernatione desumitur. Sed cum ea novam lucem ex Cartesii meditationibus metaphysicis acceperint , communis omnium salutis interesse arbitramur , ut veterem simul ac novam Philosophiam ad rem tanti momenti invictè demonstrandam conjungamus.

Sic autem omnia argumenta, sive veteris , sive novæ Philosophiæ distinguere possunt , ut alia *metaphysica* censeantur, alia *physica* , alia denique *moralia*. Omnia autem sunt à *posteriori*, seu ab effectu ad causam ; non à *priori* , sive à causa ad effectum. A metaphysicis ordiemur , tanquam priùs cognitis , & maximè generalibus , à quibus reliqua pendent : tum ad *physica* , ac tandem ad *moralia* veniemus.

*Demonstratur existentia Dei argumentis
metaphysicis.*

Argumenta *metaphysica* vocamus ea , quæ ab ipsius humanæ mentis , & ingenitarum illi idearum consideratione petuntur : nam mens humana , seu anima rationalis, & illius ideæ juris sunt metaphysici, quod nemo inficiatur. Sit igitur

Primum argumentum metaphysicum.

Primum argumentum metaphysicum ex eo ducit Cartesius tertiâ meditatione metaphysicâ, quòd omnibus hominibus à naturâ insita sit Dei notio, quæ aliunde , quàm ab ipso Deo, proficisci non potest : illudque repetit , ac geometricè proponit in responsionibus ad secundas objectiones : sic autem potest confici.

Extat in nobis idea Dei , sive idea entis summè perfecti : non enim aliam ob rationem excellentiora & meliora deterioribus præferimus, quàm quòd illa ad ideam summæ perfectionis, quæ nobis inest, magis accidere comperimus.

Atqui illa idea summæ perfectionis , seu entis summè perfecti aliunde quàm ab ipso Deo proficisci non potuit : nam neque à nobis ipsis; neque à parentibus aut magistris , nec denique à rerum aspectabilium consideratione ortum habere potest ; cum summa perfectio neque in nobis , neque in parentibus aut magistris ; neque in rebus aspectabilibus contineatur , ut contineri deberet , si hinc idea summæ perfectionis originem duceret , secundum illud axioma , quod quarto capite primæ partis retulimus : *quicquid est perfectionis in re aliqua, id in prima, totaque illius causa, vel formaliter, vel eminenter contineri debet.*

Ergo

Ergo illa idea est à Deo : proindeque existit Deus. Hoc argumentum invictissimum videri debet iis omnibus, qui ad singulas illius propositiones attentum animum adhibere non gravantur : ac si quæ in ipsum difficultates proponi possint, eas in antecessum superiori capite discussas fuisse existimamus.

Hoc fundamento nititur quarta ratio Sancti Thomæ, quæ ex variis perfectionum quæ rebus singulis insunt, gradibus repetitur : atque hoc modo proponitur.

Ex omnibus rebus, quas naturaliter novimus, aliæ sunt, quæ aliis magis ; aliæ, quæ minùs perfectæ merito habentur, ut omnes ultro concedunt : nam corpora v.g. animata & viventia inanimatis, seu vitæ expertibus meliora judicamus ; ac substantias spirituales corporalibus præponimus.

Atqui *magis*, & *minus* dici non possunt, nisi per comparationem ad aliquid, quod *maximè* perfectum sit : nam, ut rectè ratiocinatur Boëtius lib. 3. de consolatione Philosophiæ, prosâ decimâ : *omne quod imperfectum esse dicitur, id diminutione perfecti imperfectum esse perhibetur : quo fit ut, si in quolibet genere imperfectum quid esse videatur, in eo perfectum quoque aliquid esse necesse sit.*

Ergo existit aliquod ens summè perfectum, id est, ens à seipso existens, æternum, infinitum, immensum, uno verbo, Deus : nam Dei nomine ens undequaque perfectum naturaliter intelligimus : adeoque existit Deus.

Dices. Ens summè perfectum esset summè bonum : nec proinde ulla pateretur mala, quæ tamen plurima occurrunt.

Respondedo distinguendo antecedens. Nulla pateretur mala, nisi hinc majora colligeret bona, concedo : si majora bona ex iis deducat, nego : non enim, ut Sanctus August. in Enchiridio ad

Laurentium num. 3. aliàs cap. 11. sapienter observat, *Deus cum summè bonus sit, ullo modo sineret mali aliquid esse in operibus suis. nisi usque adeo esset omnipotens & bonus, ut benefaceret & de malo.* Hoc ergo ad infinitam Dei bonitatem pertinet, ut esse permittat mala, ut ex iis eliciat bona.

Instabis. Vel Deus potest tollere mala, & non vult: vel vult, & non potest. Si primum, injustus est; nec proinde Deus. Si secundum, est infirmus; nec consequenter Deus.

Respondeo Deum posse absolute omnia tollere mala, si velit: sed nihil absurdi esse, si ea permittat, cum creaturas liberas condiderit, quibus vel bene, vel malè agendi potestatem concessit: unde non vult mala, siquidem ea punit: sed ipsa tamen permittit, ut majora hinc bona colligat. Quomodo autem illa permittat, dicemus infra cap. 5.

Secundum argumentum metaphysicum.

Secundum argumentum metaphysicum petit Cartesius quintâ meditatione metaphysicâ ex eo, quod in clarâ, distinctâque Dei notione comprehenditur existentia: illudque geometricâ methodo disposuit in responsionibus ad secundas objectiones, in hunc modum.

Quicquid in ideâ clarâ & distinctâ rei alicujus comprehenditur, id de illâ re certissimè potest affirmari; hæc enim est prima veritatis ac certitudinis regula, ut fuit antea demonstratum.

Atqui existentia actualis continetur in ideâ clara & distincta Dei, seu entis summè perfecti: siquidem ens summè perfectum concipi non potest sine existentia actuali, quæ est perfectio. Eaque idea nobis omnibus innata est, & consequenter vera ac realis, non ficta & commentitia.

Ergo existentia actualis certissimè de Deo potest affirmari : sive , quod idem est , Deum existere certissimum est.

Dices. Ex eo quòd concipiam montem cum valle esse necessariò conjunctum ; vel circulum esse rotundum ; aut triangulum extare non posse, quin trës illius anguli æquales sint duobus angulis rectis , non sequitur montem , vel circulum, vel triangulum existere in rerum natura.

Ergo à pari , licèt existentiam in idea entis summè perfecti comprehensam videam , minimè concludi potest Deum existere.

Respondeo negando consequentiam & paritatem. Nam eo modo se habet existentia respectu entis summè perfecti ; quomodo se habet vallis respectu montis , rotunditas respectu circuli , æqualitas angulorum duobus rectis respectu trianguli: non quomodo se habet existentia respectu montis , vel circuli, vel trianguli. Atqui separari nequit idea vallis ab idea montis , idea rotunditatis ab idea circuli, vel æqualitatis angulorum duobus rectis à triangulo. Ergo existentia actualis & necessaria separari non potest ab idea entis summè perfecti , licèt existentia actualis separari possit à monte, vel circulo, vel triangulo. Enimverò in idea rei creatæ & imperfectæ , existentia tantum possibilis continetur, non actualis : in idea autem Dei, seu entis perfecti existentia actualis necessariò comprehenditur. Unde quemadmodum existentia possibilis separari non potest ab idea clara & distincta rei imperfectæ, v. g. circuli: ita existentia actualis separari non potest ab idea entis perfecti, scilicet Dei.

Instabis. Ex ista responsione sequitur tantum Deum , ex hypothesi quòd existat , necessariò existere : quemadmodum circulus est necessariò rotundus , ex hypothesi quòd existat : non verò sequitur Deum absolutè existere.

Respondeo negando propositionem. Nam, ut modò dictum est, instituenda est comparatio inter existentiam respectu entis summè perfecti, & rotunditatem respectu circuli, non inter existentiam utriusque : siquidem existentia necessaria continetur in idea Dei, non verò in idea circuli. Ergo dicendum, quemadmodum rotunditas à circulo separari nequit, ita existentiam à Deo divelli non posse : non verò concludendum, quemadmodum circulus, ex hypothese quòd existat, necessariò rotundus est, ita Deum, ex hypothese quòd existat, necessariò existere.

Urgebis. A statu *ideali* ad statum *realem* non valet consecutio, in eo quod spectat ad rei existentiam ; sed tantum in eo quod ad essentiam pertinet : aliàs quicquid conciperemus, existeret : quod dici non potest.

Ergo licet existentia necessaria in idea entis summè perfecti contineatur, concludi non potest ipsum existere.

Respondeo explicando antecedens. Non valet consecutio in eo, quod ad existentiam possibilem, seu contingentem spectat, concedo: in eo, quod spectat ad existentiam necessariam, nego. Quare nego consequentiam. Equidem ubi existentia rei est tantum contingens, qualis est rerum omnium creaturarum existentia, tunc non valet consecutio à statu ideali ad realem, in eo quod ad existentiam spectat: v.g. licet quis mundum, quasi ab æterno existentem conciperet, minimè hinc colligi posset mundum esse ab æterno: quoniam in ideâ mundi, existentia tantum possibilis & contingens continetur, non actualis & necessaria. Sed cum existentia est necessaria: siue cum existentia ad essentiam pertinet, ac eodem modo in idea entis alicujus continetur, quo rotunditas in idea circuli comprehenditur, si modò illa idea sit innata, & proinde vera ac realis, non fictitia, & ex Phantasia ludibrio profecta: tum à statu

ideali ad statum realem valet consecutio, etiam in eo quod ad existentiam spectat: nam tunc existentia non minùs est essentialis rei, quàm rotunditas circulo: nec magis potest illud ens non existere, quàm circulus potest non esse rotundus. Ens autem summè perfectum non minùs existentiam necessariam in suo conceptu essentiali, quàm circulus rotunditatem involvit: unde non minùs concludi potest ens summè perfectum *existere*, quàm circulum esse *rotundum*.

Nec tamen hinc inferre licet, quod malè nonnulli colligunt, nempe si res ita se habeat, futurum ut existentia Dei ab idea nostrà pendeat: id enim non sequitur; sed tantùm, nobis persuasum esse debere, Deum existere, quòd ab illius idea seu conceptu existentiam actualem separare nequeamus: ut rotunditatem à circulo nemo est qui sejungere possit: in eoque solo tota vis demonstrationis consistit.

Corollarium.

Ex iis sequitur hanc propositionem, *Deus existit*, non tantùm esse *per se* notam *quoad se*, ut loquuntur Theologi, sed etiam esse *per se* notam *quoad nos*: quia si attendere velimus ad ideam Dei, seu entis summè perfecti, certè existentiam in ea necessariò contineri, sive, ut loquitur Sanctus Thomas primâ parte, q. 2. art. 1. *prædicatum* hujus propositionis, *Deus existit*, esse *idem cum subjecto*, intelligemus. Non tamen omnino scimus de Deo *quid est*, ut ibidem ait Sanctus Thomas, & nos antea declaravimus, hoc est, perfectè ipsum non cognoscimus, nec, quæ in Deo sunt mysteria, capimus. Quis enim Trinitatem Personarum in una natura; vel generationem Verbi à Patre, cui omnino æqualis est, & consubstantialis; vel processionem Spiritûs sancti à Patre & Filio, citra ullam dependentiam, intelligit?

Hinc est quod de Deo dicitur Psal. 17. v. 12. *Posuit tenebras latibulum suum: & primæ ad Corinth. c. 13. v. 12. Videmus nunc per speculum in enigmate*: ac denique ex c. 6. primæ ad Tim. v. 16. *Lucem inhabitat inaccessibilem, quem nullus hominum vidit, sed nec videre potest*, scilicet quandiu mens hoc corruptibili corpore, quasi carcere continetur. Sed tamen nihil obstat quominus Deum cognoscere dicamur, saltem imperfectè, quoniam naturalem illius ideam habemus.

Tertium argumentum metaphysicum.

Tertium argumentum metaphysicum, quod tertio loco à Sancto Thoma recensetur, ex ente necessario & contingenti desumptum, est hujusmodi.

Vel omnia omnino entia sunt contingentia, sive, ut loquitur Sanctus Thomas, sunt *possibilia esse, & non esse*, cujusmodi sunt cælum, terra, &c. vel datur aliquod ens absolutè necessarium.

Sed omnia entia dici non possunt contingentia, sive possibilia esse & non esse: quoniam entia contingentia à se ipsis existentiam habere nequeunt, cum sint imperfecta, nec potuerint, nisi ab ente summe perfectò in rerum natura collocari. Quocirca si entia contingentia fingerentur non existere, jam non amplius essent entia contingentia, sive, *possibilia esse & non esse*: sed omnino forent impossibilia: nisi concedatur ens necessarium existere, à quo, tanquam ab omnis entis plenitudine, existentiam acciperent.

Ergo non omnia omnino entia contingentia sunt: sed unum ex iis debet esse absolutè necessarium, non dependens, non factum, à quo reliqua pendeant omnia, uno verbo, Deus.

Dices. A sensu distributivo ad collectivum, sive, à singulis partibus ad totam collectionem non valet consecutio.

Ergo quamvis res singulæ sint contingentes, non tamen tota entium collectio est contingens, sed necessaria; nec ullum ens necessarium præter eam collectionem admitti necesse est.

Respondeo distinguendo antecedens. Non valet consecutio à singulis partibus ad totam collectionem; cum enumeratio non est perfecta, nec attributum essentialiter convenit subjecto, concedo: si enumeratio perfecta sit, aut attributum subjecto essentialiter conveniat, nego. Quare nego consequentiam. Cum igitur enumeratio, seu inductio est perfecta, quicquid de singulis affirmatum est, maxime si attributum sit iis essentialiter, id de omnibus collectivè, seu, de tota collectione potest affirmari, ut diximus in Logica. Verbi gratiâ, si singuli homines distributivè accepti sint mortui obnoxii, omnes simul & collectivè erunt mortales: si singula entia secundum naturam seu essentiam suam sint contingentia, tota eorum collectio erit contingens. Non possunt autem omnia entia esse contingentia, ut probatum est. Ergo necesse est aliquid extare ens necessarium, non factum, quod reliquis existentiam concesserit, quodque Deus sit.

Equidem cum agitur de attributo toti collectioni proprio, tum à singulis partibus ad totam collectionem non valet consecutio, nec vicissim. Verbi gratiâ, miles dici non potest exercitus, tamen militum collectio exercitus dici possit. Sed hic agitur de attributo, quod & singulis entibus, & toti collectioni, & essentialiter convenit.

Instabis. Fieri non potest hypothesis, quâ omnia possibilia dicantur actu existere.

Ergo à pari fieri non potest hypothesis, quâ omnia contingentia existentia ponantur non esse.

Respondeo negando paritatem. Etenim omnia possibilia, *potestate* tantum existunt, non *actu*, nec proinde simul sumi possunt: quia quocumque nu-

mero existere fingantur , plura semper in infinitum existere posse concipiuntur , ut inferius dicemus. Sed hic contingentia , ut *actum* existentia spectantur : adeoque simul fumi queunt ; & proinde tanquam non existentia spectari : in eoque utriusque hypotheseos apparet disparitas.

Argumentis physicis Deum existere ostenditur.

Argumenta *physica* sunt ea , quæ ex rerum physicarum contemplatione desumuntur , eaque , ut efficacia sint, non secus ac *moralia*, ideam Dei nobis adesse postulant.

Primum argumentum physicum.

Primum argumentum physicum petitur ex variis affectionibus , quas in nobis occasione corporum excitari comperimus. Nam singulis ferè vitæ nostræ momentis experimur ex corporum contrectatione nos vel voluptate vel dolore affici. Et enim vernantia prata oculos nostros , seu mentem per oculos recreant ; soni graves & acuti aures vel demulcent vel offendunt. Idem de odoribus & saporibus , quorum alii grati sunt , alii ingrati : idem de quibuslibet corporum sensibilibus motibus & affectionibus est sentiendum.

Atqui corpora non possunt per seipsa , tanquam per causas effectrices & proprias vel voluptatem , vel dolorem in nobis seu mentibus nostris excitare : tum quia per se inertia esse intelliguntur ; tum etiam quia inter motus corporeos & voluptatem ac dolorem nostræ mentis nulla naturalis intercedit habitudo.

Ergo necesse est , ut voluptatem vel dolorem producant tanquam causæ occasionales tantum, vi legis inter corpus humanum & animam ratio-

nalem seu mentem constitutæ , ut quosdam corporis motus dolor , quosdam voluptas consequatur.

At lex illa quæ generalis est , & omnibus hominibus communis , ab alio constitui non potest, nisi ab eo , qui res omnes generatim continet ac conservat ; qui mentibus simul & corporibus dominatur ; qui his motum, illis sensum impertit, &c. Quippe causa privata non potest rebus omnibus simul prospicere ; easque constanti semper ratione movere ac regere , ut quæ sibi convenientia sunt, prosequantur ; quæ sunt noxia , fugiant.

Existit igitur generalis ille rerum omnium Auctor , conservator , & moderator : hunc verò Deum nominamus. Extat ergo Deus : quod erat demonstrandum.

Secundum argumentum physicum.

Secundum argumentum physicum quo usus est Aristoteles lib. 8. Physicorum , quodque primo loco posuit sanctus Thomas , ex motu corporum, id est , ex eorum translatione à loco in locum, ducitur hoc modo.

Certum est motum aliquem in corporibus naturalibus existere : idque omnibus hominibus persuasum est, ut de eo nullus dubitet.

Atqui motus iste à solo primo motore , sive Deo , necessario proficiscitur : corpus enim sive magnum , sive parvum , sive tenue , sive crassum *per se* , & ratione sui concipitur esse prorsus iners ; nec consequenter unquam moveri potest , nisi ab alio moveatur. Non potest autem moveri ab aliqua creatura , quantumvis excellenti ; nisi eam vim illam à Deo acceperit , ab eoque continuo adjuvetur , ut ex inferius dicendis patebit : nec aliter creatura , quantumvis perfecta , movere potest.

O. V.

corpora ; quàm ut causa *occasionalis* , ut dicemus in *Phylica* , ubi primam motûs causam inquiremus.

Ergo necesse est primum aliquem motûs auctorem , sive Deum existere , à quo singula corpora suum motum acceperint , in eoque semper conserventur. Nam nihil fingi potest absurdius , quàm quod commenti sunt Epicurus & Epicurei , corpora nempe suum habere motum à se ipsis , & quasdam existere atomos actuosas , ex quarum fortuito concursu omnia prodierunt : quæ atomi , si fortè inter alias implexæ quiescant , tamen continuò eluctentur , & quâ data porta , avolare conentur.

Si enim atomus aliqua nîsum aliquem , aut motum habeat : quæro in quam partem moveri nitatur : neque enim potest in omnem partem niti : si verò in unam potiùs partem , quàm in aliam niti fingatur : causam requiro , cur in istam potiùs , quàm in illam partem feratur : nam simplex entitas , aut corpusculum ad quamlibet mundi partem videtur indifferens : nec si semel sistatur , ullo modo sibi motum restituere posse intelligitur : unde si semel corpus quiescat , æternùm in quiete permansturum concipitur , nisi ab alio moveatur ; quod certè sine primo motore fieri non potest , ut infra dicemus.

Deinde , ut optimè Tullius contra illos Philosophos lib.2. de natura deorum , *si mundum efficere potest concursus atomorum* , cur porticum , cur templum , cur domum , cur urbem non potest , quæ sunt minis operosa , & multò quidem faciliora ? Certè ita temerè de mundo effutiunt , ut mihi quidem nunquam hunc admirabilem calî ornatum suspexisse videantur.

Itaque ut concludam cum Lactantio lib.3. *Div. Instit. cap.17. nemo illa prater unum Leucip-*

pum somniavit , à quo Democritus eruditus , hereditatem stultitiæ reliquit Epicuro. Nihil enim stultius in hominis mentem incidere potest , quàm hoc universum mundi syntagma ex fortuito atomorum concursu temerè , ac sine ratione fuisse coagmentatum.

Tertium argumentum physicum.

Tertium argumentum physicum , quo sanctus Thomas secundo loco utitur , ex causarum efficientium serie ducitur , & est hujusmodi. Quæcumque causæ operari , & effectus aliquos producere observantur in rerum aspectabilium natura, ut homo hominem generat , leo leonem , ex ab aliqua causa debent adjuvari : cum fieri omnino non possit , ut solus homo alteri homini ; vel leo leoni , cujus fabricam , vires , & organorum conformationem penitus ignorat , existentiam largiatur:

Ergo illæ causæ ab alia pendunt , ut quidpiam operentur.

Jam verò illa , à quâ pendunt , vel à se ipsa est , & operatur ; vel rursus operandi vim ab aliâ recipit : tumque , vel progressus dabitur in infinitum , vel tandem sistendum erit in aliqua prima rerum omnium causa.

Atqui dari non potest progressus in infinitum , saltem in causis *equivocis* , ut vocant , id est , in causis quæ si forte ultimam exceperis , diversæ sunt rationis ab effectu ; & quæ ita sunt subordinatæ , ut nunquam inferior absque superiore quidquam moliri queat : alioquin cum nulla foret prima causa movens , nulla quoque foret secunda , nulla tertia , nulla ultima : sicque nullus effectus fieret , v. g. nec homo hominem generaret , nec leo leonem , nec arbor arborem , &c. quod omnino falsum est.

O vj .

Ergo tandem sistendum in aliqua prima rerum omnium causa , quæ causa Deus dicitur : atque ita existit Deus.

Verùm inquires. Quidni processus iste in infinitum admittatur ? cùm Aristoteles lib.8. Physicorum , cap.1. & sequentibus , ac plerique Philosophi mundum crediderint extitisse ab æterno ; & consequenter infinitos homines fuisse progenitos , & infinitas alias substantias procreatas ; infinitum quoque tempus , & motum fuisse elapsum.

Respondeo hunc progressum in infinitum penitus esse impossibilem , tam secundùm opinionem Epicureorum , qui nullum Deum præter hoc universum ; aut materiam subtilem agnoscebant ; quàm secundùm sententiam Aristotelis , qui primum motûs auctorem , ac mundi rectorem confessus est ; quique proinde nobis hoc loco Deum existere contendentibus , non de duratione mundi disputantibus , minimè adversatur.

Primò quidem non potuerunt homines , aut leones secundùm sententiam Epicureorum alii ab aliis in infinitum generari ab æterno absque Deo : cùm ne unus quidem homo vel leo ab alio homine vel leone , absque Deo , produci possit ; nec homo vel leo sit solius hominis , vel leonis opus. Etenim qui fieri potest , ut stupenda illa corporis animati , præsertimque humani fabrica , tanto artificio elaborata , tot delicatissimis organis concinnata , solo materiæ concursu , sine omnipotentis artificis operâ conformetur ? ut omittam humanam mentem ; quæ cogitationis est particeps , à materiâ , seu corporibus non esse expressam , sed à solo summo Deo procreatam. Unde non tantùm homines alii ab aliis in infinitum , ab æterno produci nequivere , ut delirant Epicurei : sed ne unus quidem ab alio absque Dei auxilio produci potest : atque ita in causis saltem *equivocis* , sive , quæ

non sunt omnes ejusdem naturæ, ac effectus quem producant ; & quarum infima sola , sine primæ auxilio agere non potest, non est admittendus progressus in infinitum ; sed ad primam causam , seu Deum necessario veniendum : idque ad præsentem quæstionem omnino sufficit.

Verum insuper in causis *univocis*, id est, quæ effectum ejusdem , ac ipsæ sunt , rationis , producant , defendi non potest progressus in infinitum , qualem tueri debuit Aristoteles , cujus tamen opinio existentiam Dei , seu entis supremi non impugnat , sed mundi duntaxat æternitatem astruit. Nam si infinitæ fuisse dicantur hominum generationes , & Alexander , v. g. genitus fuerit à Philippo , hic ab Amynta , & iste ab alio , & sic in infinitum , adeo ut nullus sit primus hominum parens : hinc sequetur dies ab æterno elapsos , & homines genitos finitos esse , & infinitos ; quod contradictionem involvit. Primò , erunt infiniti , quia concipi non potest ab infinito tempore finitos tantum Solis circuitus , aut finitam hominum seriem pertransisse. Secundò , finiti quoque erunt , quoniam ipsorum numerus continuo augetur : infinitum autem augeri non potest : alioqui minus esset alio ; sicque limites haberet, nec esset infinitum , ut ex infra dicendis clariùs adhuc elucescet. Ergo in causis etiam *univocis*, quæ nempe effectum ejusdem , ac ipsæ sunt , rationis producant , ut homo hominem , leo leonem ; admitti non potest progressus in infinitum.

Adde præterea motum cælorum , aliorumque corporum , non ab ipsis corporibus , sed ab aliqua prima causa necessario esse repetendum , ut secundo argumento physico declaravimus. Unde liquet ipsum æternum esse non potuisse , sed tantum , cum primæ causæ collibuit , initium habuisse ,

adeoque prima illa causa in quacumque hypothefi necessario femper est agnoscenda.

*Exiftentia Dei argumentis moralibus
comprobatur.*

ARGUMENTIS *moralibus* demonstrari quidpiam cenfetur, cum illius eæ proferuntur rationes, quæ de *more* doctis fimul & indoctis folent eſſe accommodatæ; vel quæ mores etiam ipſos reſpiciunt, licet aliquando ex materia phyſica, vel metaphyſica depromantur.

Primum argumentum morale.

PRIMUM argumentum morale, quod eſt ultimum eorum, quæ adducta ſunt à ſancto Thoma, deſumitur ex fine in quem collineant omnia, quæ in hac univerſa mundi compagine conſpiciuntur. Nam quæcumque in hoc univerſo cernimus, ea in fines aliquos, certos & conſtantes perpetuò niti obſervamus.

Atqui ea, quæ nullâ cognitione prædita ſunt, quales eſſe ſingulas hujus mundi aſpectabilis partes nemo inficiatur, in fines certos & conſtantes ſemper agi nequeunt, niſi ab aliquo rectore ſapientiffimo moveantur & gubernentur.

Ergo exiſtit rector ille & gubernator mundi, quem Deum nominamus. Idque perpetuum fuit argumentum, quo ſacri & profani Scriptores uſi ſunt, ut Dei cognitionem in omnium mentibus excitarent. *Levate in excelfum oculos veſtros*, inquit ſacer textus Iſaiæ cap. 40. v. 26. *& videte quis creavit hac?* Et Apoſtolus Epift. ad Rom. cap. 1. v. 20. *Inviſibilia enim ipſius, à creatura mundi, per ea quæ facta ſunt, intellecta conſpiciuntur*

tur : sempiterna quoque ejus virtus & divinitas ; ita ut sint inexcusabiles (Ethnici) quia cū cognovissent Deum , non sicut Deum glorificaverunt , aut gratias egerunt : sed evanuerunt in cogitationibus suis , & obscuratum est insipiens cor eorum.

Innumera sunt Philosophorum , Poëtarum , & Oratorum in hanc rem testimonia , quæ pluribus refert Lactantius toto lib. 1. Divinarum Institutionum , quo veri Dei notitiam ingerere , falsorumque numinum cultum amoliri conatur. Nos unius Tullii auctoritate contenti erimus , qui lib. 2. de natura Deorum , hæc quæ jam vulgò nota sunt , sed non ideo minoris facienda , eleganter scribit. Si quis , inquit , in domum aliquam , aut in gymnasium , aut in forum venerit ; cū videat omnium rerum rationem , modum , disciplinam , non possit ea sine causa fieri judicare : sed esse aliquem intelligat , qui præsit , & cui pareatur : multò magis in tantis motibus , tantisque vicissitudinibus tam multarum rerum , atque tantarum ordinibus , in quibus nihil unquam immensa & infinita vetustas mentita sit , statuatur necesse est ab aliqua mente tantos natura motus gubernari. Quod statim Chrysippi argumentatione confirmat in hunc modum. Chrysippus quidem , quanquam est acerrimo ingenio , tamen ea dicit , ut ab ipsa natura didicisse , non ut ipse reperisse videatur. Si enim , inquit , est aliquid in rerum natura , quod hominis mens , quod ratio , quod vis , quod potestas humana efficere non possit , est certè quod illud efficit homine melius. Atqui res caelestes , omnesque ea quarum est ordo sempiternus , ab homine confici non possunt : est igitur id , quo illa conficiuntur , homine melius. Id autem quid potius dixerim quàm Deum ?

Et multò inferiùs eodem libro. Quis enim hunc hominem dixerit , qui cū tam certos cali motus , tam ratos astrorum ordines , tamque omnia inter se con-

nexa & apta viderit, neget in his ullam inesse rationem, eaque casu fieri dicat, qua quanto consilio gerantur, nullo consilio assequi possumus? An cum machinatione quadam moveri aliquid videmus, ut sphaeram, ut horas, ut alia permulta, non dubitamus quin illa opera sint rationis: cum autem impetum cali admirabili cum celeritate moveri, vertique videamus, constantissimè conficientem vicissitudines anniuersarias, cum summa salute, & conservatione rerum omnium, dubitamus quin ea non solum ratione fiant, sed etiam excellenti quadam, divinâque ratione?

Immensa volumina transcribere oporteat, si quæ à variis auctoribus ad primæ istius veritatis confirmationem prolata sunt, huc referre velimus. Ea siquidem trita est via, quam omnes Theologi ac Philosophi ingredi solent, ut ex operibus opificem agnoscamus. Nam ut ait Rex Propheta Psal. 18. v. 1. *Cali enarrant gloriam Dei, & opera manuum ejus annuntiat firmamentum, & Job. cap. 12. v. 7. & sequentibus. Interroga jumenta, & docebunt te: & volatilia cali, & indicabunt tibi. Loquere terra, & respondebit tibi: & narrabunt pisces maris: quis ignorat quòd omnia hæc manus Domini fecerit?*

Secundum argumentum morale.

S E C U N D U M argumentum morale, quod summæ est efficaciæ, ex eo petitur, quòd mundum ab æterno non extitisse, sed recens fuisse conditum ostendant artes, & inventa non pridem apud homines nota. Nam si mundus ab æterno extitisset, tot artes, tot machinæ ad vitæ usum necessariæ per totam æternitatem non latuissent: cujusmodi sunt ars navigandi pixidis nauticæ subsidio, ars Typographica, moletrina, sive quæ aquarum, sive quæ ventorum vi agitantur; aliæque innumera id genus inventa, quæ si olim nota

fuiſſent, nunquam ex hominum memoria ob ſuam utilitatem fuiſſent deleta.

Atqui tamen ea omnia recens detecta eſſe conſtat. Nam acus nautica initio decimi quarti Eccleſiæ chriſtianæ ſæculi, circa annum 1302. ab Italis melphitanis inventa, aut certè non multò ante, nempe circa annum 1260. à Paulo Veneto è Sinenſi regione allata memoratur, ut dicemus in Phyſica, ubi de magnete. Ars typographica, qualis jam exercetur, non in tabulis lignèis vel cereis inciſis, ſed formis aut characteribus ſeparatis mobilibuſque, accepta referenda eſt, primò quidem Johanni *Guttember*, equiti argentinenſi, inter moguntinos cives alleſto; deinde ſpecialiùs ſolertiſſimis viris Johanni *Fuſt*, & Petro *Scoeſter*, civibus moguntinis circa medium decimi quarti Eccleſiæ ſæculi, ut teſtatur Trithemius in chronico Hirſaugiènſi. Eamque artem Ulricus *Gerinc*, Conſtantiènſis Germanus, cum duobus ſociis in univerſitatem ſtudiorum Pariſienſem ſtatim intulit, à Profeſſoribus academicis, & nominatim à Johanne de Lapide, Germano accitus: primæque quas in Gallia fieri contigit librorum impreſſiones circa annum Chriſti 1470. prodierunt in Collegio Sorbonæ, ubi non tantùm Theologiæ ſacræ, ſed etiam Philoſophiæ & Rhetoricæ lectiones à Guillelmo Ficheti Alnetano, diœceſis Gebennenſis, antiquo univerſitatis Rectore, aliisſque habebantur. Antiquiora ſunt molendina, ſaltem quæ aquarum impetu rotantur. Nam Plinius hiſt. natural. lib. 18. cap. 10. refert ſuâ ætate magnam Italiæ partem ad concidenda tritici grana *ruido*, ſive aſpero, *uti pilo rotis etiam quas aqua verſet obiter & molat*. Sed tum nec ubique erant in uſu nec vento ſed aquâ tantùm circumductâ, nec omnibus ſuis partibus erant abſoluta. Quare Procopius auctor eſt Belifarium Juſtiniani ducem, in urbe Roma à

Gothis obsessum, invenisse viam & rationem ut molæ aquâ agitatae frumentum frangerent. Ita refert Pancirollus in novis repertis, Tit. 22. *de moletrinis*. Sed præter hæc omnia, quo tempore plurimæ terrarum regiones habitari cœperint, vulgo notum est ex coloniis, quæ in eas terras fuere deductæ: ut omittam historiarum monumenta ultra sex annorum millia retrò non extendi, nullaque sacris Bibliis esse antiquiora.

Ergo mundus ab æterno non exstitit: sed certo tempore ab omnipotente Deo fuit conditus: Deum igitur omnipotentem existere necesse est.

Hoc certè mundi initium, si minùs ratione materiæ, seu atomorum, saltem ratione totius compaginis, seu coagmentationis rerum omnium, agnoscunt Epicurei, ut constat ex Lucretio lib. 5. de rerum natura, v. 325. & sequentibus: sic enim loquitur.

*Præterea si nulla fuit genitalis origo
Terrarum, & cali, semperque aterna fuere:
Cur supra bellum Thebanum, & funera Troja,
Non alias alii quoque res cecinere Poeta?
Quò tot facta virum toties cecidere, neque usquam
Æternis fama monumentis insita florent?
Verùm, ut opinior, habet novitatem summa, re-
censque*

*Natura est mundi, neque pridem exordia cepit.
Quare etiam quadam nunc artes expoliuntur;
Nunc etiam augescunt: nunc addita navigiis sunt
Multa, modò organici melicos peperere sonores.*

Tertium argumentum morale.

TERTIUM argumentum morale, illudque invictissimi quoque roboris, ex eo ducitur periculo, in quod se conjiciunt ii, qui eò dementiæ devenerunt, ut Deum cum insipientibus negent,

tametsi nullum ipsis ex altera parte lucrum aut commodum accedat.

Illi quippe sunt hominum dementissimi , qui salutem suam in apertissimum discrimen adducunt, absque ulla spe lucri aut commodi percipiendi.

Sed qui sine ulla ratione , contra insitam omnibus hominibus ideam , existere Deum inficiantur vel in dubium revocant , ii salutem suam , absque ulla emolumenti spe , in apertissimum discrimen adducunt : nam si , ut ipsi stultè opinantur, nullus reipsâ existat Deus, certè viri probi , & fideles , qui Deum confitentur , nihil habent , quod reformident , cùm ipsis ea confessio nocere post mortem nequeat : sed si Deus existit , ut naturalis ea sollicitudo eorum , quæ post mortem nobis obventura sunt ; ut instinctus ille , quo in tribulationibus , & angustis manus & oculos ad cælum , tanquam ad miserorum asylum attollimus ; ut demum univèrsa natura suadet , quæ altâ , ut ita dicam , voce clamat , suumque ubique testatur Auctorem : quàm horrendum supplicium atheos manet , qui veritati tam manifestæ ingratum , ac perfidum pectus mentemque obstruxerunt ?

Ergo omnium hominum dementissimi sunt habendi , ipsorumque prorsus deploranda est conditio , nisi ad seipsos revertantur , & à prodigioso illo , immanique errore resipiscant. Eaque vel unica ratio , quam urget nobilis Arvernus, excelsi vir ingenii , summæque pietatis Blasius Pascalius Claromontanus , in eximiis illis cogitatis , quæ ad opus , quod de demonstranda Christi Religione meditabatur , comparaverat , titulo septimo:ea inquam , vel unica ratio sufficit cordato viro , ut ab atheorum impietate semper se tueatur ; aut si fortè in eorum insaniam inciderit , ab errore statim resurgat.

Quòd si qui dicant credere se quidem Deum existere ; sed tamen articulum fidei naturali ratione demonstrari non posse: respondeo ipsis ad Deum accedere licere ; si *credunt quia est* , & *inquirentibus se renumerator sit* , ut præcipit Apostolus Epist. ad Hebræos cap. 11. vers. 6. Duos autem esse articulos fidei , eosque capitales , nempe existentiam Dei , & humanæ mentis immortalitatem, de quibus certissimæ afferri possunt demonstrationes , ut jam reverâ de primo articulo fuerunt allatæ. Sed præterea docet sanctus Thomas prima parte quæst. 2. art. 2. ad 1. existentiam Dei , & alia ejusmodi quæ per rationem naturalem nota esse possunt de Deo, non esse articulos fidei; sed præambula ad articulos : quod consentaneum est sancti Augustini doctrinæ jam antea relatæ cap. ultimo Logices ad axioma tertium.

C A P U T I I I .

De præcipuis Dei attributis , & speciatim de immensitate , ac æternitate.

CUM Deus unus sit in natura , & trinus in personis , ut fides Catholica nos docet , distinguenda sunt attributa singulis personis propria , de quibus obiter tantum ac velut in transitu dicemus , ab iis quæ sunt omnibus communia, de quibus ex professo nunc disputamus. Hæc autem attributa, tribus personis divinis communia , vocantur *essentialia*, quoniam ad essentiam divinam pertinent ; sive, quoniam in ideâ clarâ & distinctâ Dei, seu Entis summè perfecti contenta cernuntur : eaque sola humano intellectu deteguntur.

Cum autem Deus dicitur ens summè perfec-

tum, hinc intelligitur esse ens à se, ens necessario existens, cæteraque illius attributa facile hinc deducuntur. Quapropter differentia, ut vocant, essentialis & constitutiva Dei, ex qua fluunt, seu potius, in qua comprehenduntur omnia illius attributa, est *summa & simplicissima perfectio*. Quod enim Deus definiri solet *ens à se*, sive *ens necessario existens*, &c. id divinam naturam non sic exprimit, ut in *aseitate*, quemadmodum vulgò loquuntur Scholæ, vel in *existendi necessitate*, &c. alia Dei attributa, putà *sapientia*, *justitia*, *scientia*, &c. contineri clarè percipiantur. Nullum quidem est ens à se, nullum ens *necessarium*, præter ens *summè perfectum*: sed cum dicitur ens à se, vel ens necessario existens, non statim idea entis omnipotentis, summè sapientis, summè providentis in mentem venit. Unde ista definitio non satis clarè naturam divinam exprimit. Sed cum dicitur ens summè perfectum, omnia quæ Deo soli competunt attributa statim concipiuntur: sit igitur

PROPOSITIO PRIMA.

D I F F E R E N T I A essentialis, & specifica Dei in summa perfectione videtur collocanda.

Probat. In eo collocanda videtur Dei differentia essentialis & specifica, quod solum claram & distinctam Dei notionem exprimit, eumque ab omni alio ente sic distinguit, ut omnia, quæcumque novimus, ipsius attributa in eo contineri clarissimè, & facillimè intelligantur.

Atqui summa perfectio sola claram & distinctam Dei notionem exhibet, eumque ab omni alio ente sic secernit, ut omnia quæ novimus ipsius attributa in summa perfectione contineri facillimè intelligantur: nam cum dicitur ens summè per-

fectum , rectè intelligitur esse ens à se , ens necessarium , summè bonum , summe sapiens , omnipotens , æternum , infinitum , &c. cùm verò dicitur ens à se , vel necessario existens , non tam facile reliqua omnia Dei attributa , quæ ad exprimendam illius naturam necessaria sunt , percipiuntur ; non enim per eam definitionem sese statim menti offerunt ipsius bonitas , justitia , omnipotentia , sapientia , cæteraque attributa , sine quibus propriè non concipitur Deus , quoniam etsi reipsa simplicissimus est , per unicum tamen attributum illius essentia declarari non potest : sed omnimodam in eo perfectionem concipere necesse est. Unde sanctus Clemens Alexandrinus lib. 5. Stromatum , *Si aliquando* , inquit , *eum nominamus aut unum , aut bonum , aut mentem , aut ipsum esse , aut Patrem , aut Deum , aut Creatorem , aut Dominum : non id dicimus tanquam nomen ejus proferentes ; sed propter ejus potestatem pulchris utimur nominibus , ut in aliis non aberrans , his inniti possit cogitatio. Non enim unumquodque ex his Deum significat , sed omnia simul omnipotentis indicant potentiam.*

Ergo differentia Dei essentialis & specifica in summa & simplicissima perfectione videtur collocanda.

Corollarium.

QUÆ dicuntur esse in Deo perfectiones , ut sapientia , justitia , &c. dici potius debent attributa , vel proprietates aut virtutes , seu dotes. Nam perfectio significat absolutionem , seu consummationem , per quam aliquid ita completum , omnibusque numeris absolutum est , ut nihil ipse desit , nec addi possit ; & consequenter perfectio

virtutes omnes seu dotes intellectu suo completur.

Ex tamen virtutes seu dotes, putà *veritas*, *bonitas*, *sapientia*, *omnipotentia*, &c. recepto apud omnes loquendi more dici solent *perfectiones*: quoniam mens nostra, ut pote cujus intelligentia septis brevibus circumscripta est, simplicissimam & tamen infinitam perfectionem uno intuitu perspicere non potest; sed eam in multas veluti partes dividit, & secundum diversas facies seu respectus considerat, maximè propter diversos effectus quos à Deo productos videt. Unde spectat Deum modò ut sapientem, modò ut justum, modò ut potentem, &c. quamvis ex dotes seu perfectiones non sint à Deo reverà distinctæ, tanquam accidentia aut qualitates naturæ divinæ advenientes: siquidem nihil aliud sunt nisi Deus ipse infinitè ac simpliciter perfectus, & à mente nostra sub diverso respectu consideratus.

Perfectio autem, (nam usitatis vocabulis utendum,) alia dicitur *simpliciter* talis; alia dicitur perfectio *secundum quid*, seu secundum certum quemdam modum. Perfectio *simpliciter* dicta est *ea qua adjunctum non habet defectum, nec oppositionem cum alia perfectione equali vel majori*: sive, *qua melior est ipsa quam non ipsa*, ut loquitur sanctus Anselmus in Monolog. cap. 14. id est, quæ melior est, quàm ipsius negatio, aut privatio. Hujusmodi sunt sapientia divina, justitia, &c.

Perfectio *secundum quid*, sive, secundum certum quemdam modum, dicitur, *qua adjunctum habet defectum*, & *qua majori perfectioni opponitur*: v. g. vis ratiocinandi, seu quæstiones minutatim & progrediendo à magis noto ad minùs notum resolvendi, quæ hominibus inest, includit defectum; nec stare potest cum summa intelligentia, per quam Deus res planè omnes uno intuitu per-

spicit. Similiter qualitates omnes corporeæ , ut calor respectu ignis , candor respectu cygni , &c. dicuntur perfectiones *secundum quid* : nam aliis perfectionibus majoribus , putà spiritualibus, opponuntur.

Primi generis perfectiones dicuntur esse in Deo *formaliter* , hoc est , secundum propriam formam & rationem : sed perfectiones secundi generis in Deo sunt tantum, vel *eminenter*, id est, excellentiori quâdam ratione, quàm in rebus creatis; vel *virtualiter* , id est, Deus habet virtutem illas in rebus creatis producendi.

Adverte attributa personalia , seu singulis Personis divinis propria, ut relationes, dici etiam perfectiones *simpliciter*, sed personales; non verò essentielles. Earum autem una alteri opponitur, non majori quidem, sed æquali : v.g. paternitas opponitur filiationi, & vicissim.

P R O P O S I T I O S E C U N D A.

UNus est tantum Deus.

Probat. Dei nomine intelligimus ens summè perfectum.

Atqui ens summè perfectum est unum: nam cum sit summè perfectum, debet esse ens supremum, seu, omnibus aliis entibus antecellere : cum cæteris præstare , & imperare sit perfectio; adeoque nullum potest habere ens sibi æquale. Deinde si duo essent , certè aliquo inter se discrimine differrent: proindeque in uno extarent proprietates , seu perfectiones , quæ ab a lio abessent : atque ita ambo omnimodam perfectionem non participarent: quod de Deo cogitari non potest. Denique cur potius duo dii , quàm plures constituerentur , quâve ratione inter se consentirent? ut omittam eos *quantò plures forent, tantò minores esse futuros*, ut rectè ratiocinatur

cinatur Lactantius, lib. 1. divinarum Institutionum cap. 3.

Ergo unus est tantum Deus.

Monitum.

UNITAS naturæ divinæ non officit Trinitati divinarum personarum, scilicet Patris, & Filii, & Spiritus Sancti. Pater à nullo est, sive est principium sine principio. Filius est à Patre ut à principio, non creatus, sed genitus. Spiritus Sanctus est à Patre & Filio, ut ab uno principio, non creatus, nec genitus, sed procedens. Itaque in Scholis Catholicis agnoscuntur in Deo una natura, duæ processiones, tres personæ, quatuor relationes, & quinque notiones.

Primò. Unica est in Deo natura & Divinitas, ut modò fuit probatum.

Secundò. Duæ occurrunt processiones sive origines. Altera, quâ Filius oritur à Patre, fit per intellectiōem, seu cognitionem, & dicitur *generatio*: Pater enim seipsum cognoscendo generat Verbum seu Filium. Altera, quâ Spiritus Sanctus à Patre & Filio, tanquam ab uno principio procedit, vel generale *processionis* nomen retinet ex Iohan. cap. 15. v. 26. vel etiam dicitur *spiratio passiva* secundum sanctum Thomam, 1. parte quæst. 27. art. 4. ad 3. eaque fit per amorem, nam Pater & Filius amore mutuo produciunt Spiritum Sanctum.

Tertiò. Tres sunt personæ inter se omninò æquales, scilicet Pater & Filius & Spiritus Sanctus. *Tres sunt*, inquit Apostolus Johannes Epist. 1. cap. 5. v. 7. *qui testimonium dant in calo, Pater, Verbum, & Spiritus Sanctus, & hi tres unum sunt*: id est, sunt una essentia, seu unus Deus.

In unitate illa naturæ, & distinctione personarum reperitur *Perichoresis*, seu, *circuminfessio*: quæ

definitur perfectissima inhabitatio unius personæ in alia, & vicissim. *Non creditis*, inquit Christus Dominus Johan. cap. 14. v. 10. *quia ego in Patre, & Pater in me est?*

Cùm Pater à nullo oriatur principio, à nullo mittitur; sed mittit Filium: quia Filius est à Patre: cui æqualis est & consubstantialis. Item Pater & Filius mittunt Spiritum Sanctum: quia Spiritus Sanctus ab utroque procedit. *Missio* enim in Personis divinis est processio unius personæ ab unâ vel duabus, cum habitudine ad effectum aliquem extrinsecum: qui effectus vel sensibilis est, ut cùm ad nos in assumptâ humanitate missus est Filius; aut cùm missus est Spiritus Sanctus in specie columbæ; vel est insensibilis, ut contingit, cùm Spiritus Sanctus mittitur ad justificationem impii.

Quartò. Quatuor sunt in Deo relationes: scilicet *paternitas*, quæ est relatio Patris ad Filium; *filiatio*, quæ est relatio Filii ad Patrem; *spiratio activa*, quæ est relatio Patris & Filii ad Spiritum Sanctum, quem *spirant* seu producant; & *spiratio passiva*, quæ est relatio Spiritûs Sancti ad Patrem & Filium, à quibus *spiratur*, seu ex quibus procedit: nam non ex Patre solo; sed ex *Patre Filique procedit*, ut tenet Ecclesia Romana contra Photium ejusque Sectatores.

Quintò. Quinque sunt in Deo notiones, per quas nempe una persona ab alia distinguitur, scilicet quatuor relationes modò recensitæ, quibus additur *innascibilitas*, quæ soli Patri convenit. Augeri fortasse posset notionum numerus salvâ fide: sed in constitutis acquiescendum.

Itaque nomen seu attributum *essentiale* in Deo est illud, quod tribus personis sanctissimæ Trinitatis commune est, ut initio hujus capitis admonuimus; seu quod in idea clara & distincta essentiae

divinæ continetur : cujusmodi sunt ea quæ tum hac , tum sequentibus propositionibus recensentur. *Notionale* est illud quod significat propriam rationem noscendi unam personam ab alia distinctam, ut *generans, genitus, procedens*. Nomen *personale* est illud quod personam Divinam significat, ut *Pater, Filius & Spiritus Sanctus* ; vel *paternitas, filiatio, processio*.

Item actus *essentialis* ille est , qui toti Trinitati est communis , ut *intelligere & velle* , dum sumuntur , quatenus Patri & Filio & Spiritui Sancto conveniunt. Actus *notionalis* est ille qui convenit certæ personæ divinæ : ut *intelligere* , quatenus significat *generare Verbum* , seu Filium , convenit soli Patri ; ut soli Filio convenit *generari*. Item *diligere* , quatenus significat *spirare* , ut loquuntur Theologi cum sancto Thoma loco laudato , seu producere Spiritum Sanctum , convenit Patri & Filio ; quia Spiritus Sanctus ab utroque procedit. Similiter alia est sapientia *essentialis* , quæ tribus personis communis est ; alia sapientiæ *genita & personalis* , quæ est ipsum Verbum. Alius est amor *essentialis* , qui tribus personis divinis convenit ; alius *notionalis* , quo Spiritus Sanctus à Patre Filioque procedit ; alius *personalis* , quo Spiritus Sanctus significatur.

Quod si quis quærat quare Pater dicatur *generans* ; Filius, *genitus* ; & Spiritus Sanctus , *procedens* ? Veram , certamque ei responsionem subjiciet illustris Bossuetus Meldensium Episcopus, secundâ parte Catecheseos Meldensis, lectione ultimâ articulo 4. nimirum quod ita loquatur Scriptura, cui, remota omni curiosâ inquisitione, est adhærendum.

Sunt etiam attributa quæ per *appropriationem*, ut loquuntur Theologi , certis personis conveniunt, ut *potentia* tribuitur Patri ; *sapientia* Filio ; & *bonitas* Spiritui Sancto.

Obſerva ex his omnibus ſolas perſonas eſſe reipſâ diſtinctas : nam quicquid eſt in Deo, unum eſt, præter perſonas, ſive præter relationes, quibus perſonæ divinæ conſtituuntur, & inter ſe reipſâ diſtinguuntur. Id autem maximè cavendum, ut ſapiat humana ratio, nec in cogitationibus ſuis evaneſcat, ubi ſermo eſt de impenetrabili Sanctiſſimæ Trinitatis myſterio. Etenim, ut ſapienter D. Bernardus admonet lib. 5. de conſiderat. cap. 8. *Sacramentum hoc magnum eſt, & quidem venerandum, non ſcrutandum, quomodo pluralitas in unitate, & hac unitate; aut ipſa in pluralitate. Scrutari hoc temeritas eſt, credere pietas eſt, noſſe vita, & vita æterna eſt.* Ante ipſum ita ſcripſerat S. Auguſtinus lib. 5. de Trinitate num. 10. aliàs cap. 9. *Cùm quaritur quid tres, magnâ prorsus inopiâ humanum laborat eloquium. Dicitur eſt tamen tres perſonæ, non ut illud diceretur, ſed ne taceretur.* Nec dubito quin hæc fuerit cauſa, cur lib. 1. Cod. Juſtinian. tit. 1. qui eſt de ſumma Trinitate & Fide Catholica, expreſſè cautum ſit, ut nemo de ea Fide publicè contendere audeat. Sed ut ad inſtitutum redeamus, ſit

P R O P O S I T I O T E R T I A.

DEus eſt ſimpliciſſimus, ſpiritalis, immutabilis, ſummè verus, ſummè bonus, ſummè juſtus, miſericors, &c.

Probatur. Deus eſt ens ſummè perfectum, ut nemo negabit.

Atqui ens ſummè perfectum eſt ſimpliciſſimum, ſpiritale, immutabile, ſummè verum, ſummè bonum, &c.

Primò, ens ſummè perfectum eſt ſimpliciſſimum, non ex variis partibus conſtans : nam ex partes non eſſent ſeorſim perfectæ, ſed ſeſe mu-

METAPHYSICÆ. SECT. I. CAP. III. 341
tuò perficerent : sicque ens perfectum constaret
ex imperfectis, quod concipi non potest.

Secundò , est spiritale , non corporeum : quia
corpus multis modis imperfectum est , nec ad spi-
ritûs dignitatem accedit.

Tertiò , ens perfectum est immutabile : quia
immutabilitas est perfectio , quâ carere non debet
ens summè perfectum : eâdemque ratione debet
esse summè verum , & summè bonum , &c. quia
veritas & bonitas &c. sunt perfectiones.

Ergo Deus est simplicissimus , spiritalis , im-
mutabilis , summè bonus , summè verus , summè
justus , misericors, &c.

Corollarium.

Nulla in Deo , ut pote simplicissimo , admitten-
da est compositio *physica* , quæ nempe plures
partes inter se distinctas exigit. Nihilominus
propter angustias nostræ mentis diversi sunt in
nobis divinæ essentia , divinorumque attributo-
rum conceptus. Ideoque *metaphysica* in Deo co-
gitatur compositio , scilicet ex genere & differen-
tia , seu ex essentia & attributis : quæ compositio
in mente tantum nostra versatur, non in Deo.
Nam cum dicitur *ens* , tum veluti quoddam illius
genus spectatur , quo nempe cum aliis entibus à
se productis, secundum *analogiam* quamdam con-
venit : cum verò dicitur *summè perfectus* , hæc est
illius differentia, quâ ab iis discrepat. Summâ au-
tem perfectio, tametsi simplex sit, rursus à nobis di-
viditur in veritatem , bonitatem , justitiam , sa-
pientiam , & cæteras virtutes seu dotes , quæ ad
ens summè perfectum pertinere intelliguntur.
Hæc enim est nostræ mentis , ut pote angustissi-
mis finibus limitata , conditio , ut ne ens quidem
simplicissimum aliter quàm per diversas facies seu

relationes , tanquam per diversas partes , consideret. Nam quod sit *ens* , id à nobis spectatur velut illius genus ; quod sit *simplicissimum* , id tanquam differentia concipitur , ut jam antea fuit notatum.

At dum mentis nostræ conditionem sequimur, magnopere cavendum nobis est , ne *figmenta miseria nostra* , ut loquitur D. Augustinus , lib.4. Confess. num.29. aliàs cap.16. in rebus ipsis statuamus ; ac Deum velut ex substantia , & diversis perfectionibus tanquam entitatibus seu modis inter se reipsa distinctis constantem putemus ; ipsumque ratione substantiæ & attributorum in diversis categoriis , ut accidit olim eidem S. Augustino , collocemus: *Quid hoc mihi proderat* inquit eximius ille Doctor loco laudato , *quando & oberat , cùm etiam te , Deus meus , mirabiliter simplicem atque incommutabilem , illis decem (Aristotelis) predicamentis putans quicquid esset omnino comprehensum , sic intelligere conarer , quasi & tu subjectus esses magnitudini tuae aut pulchritudini , ut illa essent in te quasi in subjecto , sicut in corpore ; cùm tua magnitudo , & tua pulchritudo tu ipse sis : corpus autem non eò sit magnum & pulcrum quò corpus est , quia etsi minùs magnum , & minùs pulcrum esset , nihilominus corpus esset. Falsitas enim erat quam de te cogitabam , non veritas , & figmenta miseria mea , non firmamenta beatitudinis tue.*

PROPOSITIO QUARTA.

Deus etiam est immensus , & æternus.
Probatur. Deus est ens summè perfectum.

Atqui ens summè perfectum debet esse immensum , & æternum , id est , debet esse præsens omni loco , per suam immensitatem ; & omni tempori , per suam æternitatem.

Ergo Deus etiam est immensus, & æternus.

Quæres hoc loco, an Deus per suam *immensitatem* diffusus sit in *spatiis imaginariis*, quæ scilicet extra hunc mundum in infinitum extensa vulgò concipiuntur.

Respondeo salvâ multorum pace, hanc quæstionem majestate divinâ parum dignam videri. Sin autem hæc responsio non arrideat: dico primò, Deum esse ubique, nec ullis locorum finibus coartari. Nam ut ait Scriptura lib.3. Regum cap.8. v.27. *Celi calorem eum capere non possunt*. Est autem ubique totus: quoniam ubique cogitat, id est, ubique intelligit infinito suo intellectu, & ubique vult omnipotentissimâ suâ voluntate: non verò est major in majore loco, & minor in minore, quia loco non continetur, ut corpus, cujus nimirum plures partes in ampliore loco reponuntur, & pauciores in angustiore: sed potius loca omnia continet, in eoque creaturæ omnes subsistunt. Unde, dico secundò, Deum per *spatia imaginaria* non esse diffusum: tum quia spatia imaginaria nihil sunt, ut ostendemus in Physica: tum etiam quia *diffusio* illa seu extensio Dei per infinita spatia, tametsi *virtualis* tantùm dicatur, non *formalis* aut *localis*, plurimùm tamen veræ ac sinceræ Dei notioni officere videtur. Neque enim, ut optimè sanctus Fulgentius observat lib. de fide ad Petrum Diaconum cap.3. *Deus aliquâ molis quantitate terminatur, quia nullo fine concluditur: neque per mundi partes partibus suis est ipse diffusus, ut majores mundi partes suis majoribus impleat, & minores minoribus implendo nusquam tamen totus se infundat*. Ipse enim est Deus, qui ait *calum & terram ergo impleo*. Ideo igitur Deus est ubique, quia nullis clauditur spatiis, & creaturas omnes complectitur, iisque existentiam, motum, vitam, ac sensum omnipotentissimâ semperque præ-

fenti suâ voluntate impertit. Vide sanctum Thomam primâ parte quæst. 8. art. 2. & 3.

Quæres secundò, quid sit æternitas.

Respondeo æternitatem definiri à Boëtio lib. 5. de consolatione Philosophiæ, prosâ 6. *interminabilis vita totam simul & perfectam possessionem.*

Dicitur primò, *possessio vita* : quia æternitas soli Deo viventi competit, cujus vita *interminabilis* est, sive nullum habuit initium, nec ullum habere potest finem.

Deinde, dicitur *tota simul* : non verò successiva : quia *in æternitate nihil est præteritum, nihil futurum, sed omnia præsentia.* Quare licet mundus nullum habuisset initium, ut voluit Aristoteles, non tamen fuisset æternus, quia non totum simul infinita vita spatium comprehendisset, sed futura nondum, transacta verò non amplius possedisset. Quamvis igitur mens nostra, propter cogitationis angustias, antecedentia & subsequenta in æternitate momenta concipiat : illa tamen momenta spectari non debent ut *actualia*, seu actu distincta, sed tantùm ut *virtualia*, quemadmodum loquuntur Scholæ, quatenus nempe æternitas, quæ suo ambitu tempora omnia complectitur, eam habet *virtutem*, ut singulis durationis successivæ seu temporis momentis respondeat. Ipsa tamen indivisibilis est, & tota simul existit, ut optimè definit Boëtius.


Eadem est mens sanctorum Patrum, qui docent Deum quæ factururus est aut permissurus, in immenso æternitatis suæ sinu semper præsentia non tam præscire aut prævidere, quàm videre aut scire. Quod etiam ex Prophetis liquet, qui tempora omnia confundunt, à Deo jam completa esse prædicant, quæ tantùm sunt futura. Quippe Deo nihil abesse potest, nihil ille elapsum amittit, nihil expectat futurum, omnia ad manum & ob ocu-

los habet præsentissima. Nam si scientia Dei esset
 vera præscientia, aliter ille sciret præsentia, ali-
 ter præterita, aliter futura: quia meminisset præ-
 teritorum, expectaret futura, præsentia conspi-
 ceret: sicque ipsius scientia pro variis rerum mu-
 tationibus mutaretur, quod naturæ Divinæ non
 congruit. Igitur quæcumque aliis & aliis tempo-
 ribus sparsa sunt, æternitati omnia continenti
 sunt præsentia. Adeo ut æternitas sit velut infiniti
 cujusdam circuli circumferentia, quæ nobis extra
 illam positis paulatim describitur, & cujus partes
 tantum aliquas cum successione quadam & con-
 tinuatâ serie videmus; Deus autem in illius cen-
 tro positus totam illam simul exaratam, princi-
 pio & fine carentem semper stantem semper præ-
 sentem intuetur. Testatur id sanctus Augustinus
 lib. II. de Civit. Dei cap. 21. *Non quod ullo modo
 Dei scientia varietur, ut aliud in ea faciant qua
 nondum sunt, aliud qua jam sunt, aliud qua fue-
 runt. Non enim more nostro ille vel quod futurum est
 prospicit, vel quod præsens est adspicit, vel quod
 præteritum est respicit: sed alio modo quodam à no-
 strarum cogitationum consuetudine longè altèque di-
 verso. Ille quippe non ex hoc in illud cogitatione mu-
 tatâ, sed omnino incommutabiliter videt; ita ut
 illa quidem qua temporaliter sunt, & futura non-
 dum sunt, & præsentia jam sint & præterita jam non
 sint, ipse verò hæc omnia stabili ac sempiternâ præ-
 sentiâ comprehendat: nec aliter oculis aliter mente;
 non enim ex animo constat & corpore: nec aliter
 nunc, aliter antea, & aliter postea; quoniam non
 sicut nostra, ita ejus quoque scientia trium temporum,
 præsentis videlicet & præteriti & futuri varietate
 mutetur, apud quem non est immutatio, nec mo-
 menti obumbratio. Idem lib. II. Confess. num. 16.
 aliàs cap. 13. Deum sic colloquitur: præcedis omnia
 (tempora) præterita, celsitudine semper præsentis*

aternitatis ; & superas omnia futura , quia illa futura sunt , & cū venerint , praterita erunt ; tu autem idem ipse es , & anni tui non deficiunt
 anni tui dies unus ; & dies tuus non quotidie , sed hodie : quia hodiernus tuus non cedit crastino ; neque enim succedit hesterno : hodiernus tuus , aternitas ; ideo coaternum genuisti , cui dixisti , ego hodie genui te .
 Et sanctus Gregorius Magnus lib.20. Moral. c.23. Scimus quia Deo futurum nihil est , ante cujus oculos praterita nulla sunt , prasentia non transeunt , futura non veniunt . Quippe quia omne quod nobis fuit & erit , in ejus prospectu praeesto est , & omne quod prasens est scire potest potius quam praeire . Idem sentit Auctor Carminis de Providentia apud D. Prosperum .

*At verò aeternum nihil effugit, omniaque adsunt
 Salva Deo, nihil est illi tardumve citumve ,
 Nec dilata unquam , nec festinata putemus .
 Qua veniunt nostris mutantur tempora rebus ;
 Nam quod ubique agitur , quod gestum est ,
 quodque gerendum est ,
 Ante oculos Domini puncto subsistit in uno .
 Una dies cui semper adest , cras atque heri
 nostrum .*

Vide plura apud Doctissimum Ludovicum Thomassinum Oratorii Domini Jesu Presbyterum , tom.1. Theolog. Dogmat. lib.7. de Deo Deique proprietatibus , cap.17.



CAPUT IV.

De infinitate Dei.

INFINITUM propriè vocamus quod nullis finibus, seu terminis circumscriptum est, sive, quod est in suo genere extremum, & quo nihil datur ulterius: v. g. sapientia vel potentia dicitur infinita, cum summa est, nec in se augeri potest, aut ab alia superari. Sic ens dicitur infinitè perfectum, cujus perfectiones nullis limitibus coercentur; sive, quod ulterius perfici non potest, aut aliud seipso perfectius invenire. Duobus tamen modis sumi solet infinitum in Scholis: scilicet infinitum actu, quod propriè infiniti nomen meretur; & infinitum potentiâ, cui infiniti appellatio minùs propriè convenit. Prius dicitur infinitum categorematicum, hoc est, prædicabile, quia solitariè, & sine ullo addito prædicatur, ut in hac propositione, Deus est infinitus: posterius, syncategorematicum appellatur, quasi diceretis comprædicabile, quod non possit nisi cum aliquo addito prædicari, seu attribui: v. g. nunquam dici potest sapientia hominis esse infinita, nisi addantur hæ voces, secundum incrementum, quibus significatur, nunquam esse posse tantam hominis sapientiam, quin semper incrementum aliquod in infinitum suscipere possit: quemadmodum numerus non dicitur infinitus, nisi addantur hæ voces, secundum augmentum: quia nullus est numerus tantus, quin augeri possit in infinitum. Sit igitur

PROPOSITIO PRIMA.

DEUS est actu, & categorematicè infinitus. Probatur. Deus est ens summè perfectum, ut jam sæpè definivimus.

Atqui ens summè perfectum est actu infinitum; sive infinitas habet perfectiones essentielles: alioquin ipsius natura magis compleri posset; nec proinde esset summè perfecta: quod enti summè perfecto repugnat. Unde Baruch. cap. 3. v. 25. de Deo sic loquitur: *magnus est, & non habet finem.*

Ergo Deus est actu, & ut aiunt, *categorematicè, infinitus.*

Non tantùm autem infinitus est: sed ei etiam soli actu competit infinitio: nulli autem substantiæ creatæ, nec ulli quantitati, aut qualitati: quia nunquam fieri potest, ut, vel substantia creata, vel quantitas, sive continua, sive discreta; vel qualitas actu infinita producat: sit ergo

PROPOSITIO SECUNDA.

NULLA substantia creata esse potest infinitè perfecta. Ita S. Thomas primâ parte quæst. 7. art. 2.

Probatur. Creatura infinitè perfecta ea foret, cujus perfectiones nullis limitibus, seu terminis continerentur; sive *qua non haberent finem*, ut loquitur scriptura loco laudato.

Atqui nulla esse potest hujusmodi creatura: tum quia creaturæ semper deest, quod sit *à seipsa*; sive, ut loquuntur Theologi, ipsi semper deest *independentia*, quam consequi nunquam potest; alioqui non foret creatura: tum etiam quia non potest tot perfectionibus à Deo exornari, quin

plures semper in infinitum ipsi communicari possint, cum Deus suarum perfectionum thesauros exaurire nequeat, nec ullam habeat ideam creaturæ adeo perfectæ, quin perfectiorem semper in infinitum à se produci posse videat.

Ergo nulla substantia creata potest esse infinite perfectæ.

Responsiones ad objecta.

O B J E C T I E S primò. Causa infinite perfectæ, qualis est Deus, producere potest effectum infinite perfectum.

Respondeo negando propositionem. Nam causa infinite perfectæ inexhaustum habet perfectionum thesaurum, quem proinde nunquam exaurire potest, ut effectus infinite perfectæ deberet exauriri. Deinde si effectus causæ infinitæ esset infinite perfectus, minimè differret à sua causa, seu Deo: nam esset à seipso, sive esset *independens*, omnipotens, æternus, &c. Atqui effectus Dei discrepare debet à Deo; neque unquam esse potest *independens*, omnipotens, æternus, &c. Ergo causa infinite perfectæ, scilicet Deus, producere nequit effectum infinite perfectum.

Sed inquires. Non potest aliter cognosci omnipotentia causæ infinitæ, quàm si effectum infinite perfectum procreare possit.

Respondeo negando propositionem, Satis enim intelligitur omnipotentia, seu virtus infinita Dei; ex eo, quòd perfectiores in infinitum creaturas producere possit, aut eidem plures in infinitum perfectiones adjicere. Huc adde quòd omnipotentia, seu, virtus infinita Dei in eo potissimum eluceat, quòd Deus ex nihilo cuncta produxerit: nam solum ens infinitum, quod reverà est ipsum

esse, dare potest existentiam ei, quod omnino *nihil* est, ut dicemus inferiùs.

Instabis. *Actui primo*, seu potentia effectrici respondere debet *actus secundus*, seu effectus.

Ergo si potentia sit infinita, effectus debet esse infinitus.

Respondeo 1^o. distinguendo antecedens. *Actu primo*, seu potentia effectrici respondere debet *actus secundus*: si per actum secundum intelligas actionem, seu operationem, concedo: si per actum secundum intelligas affectum, nego. Quare nego consequentiam. Cum ergo dicitur actui primo seu potentia effectrici debere respondere, seu similis esse actus secundus, id de actione seu operatione intelligendum est, non de effectus. Etenim si effectus respondere omnino seu similis esse deberet potentia agenti, cum Deus sit spiritalis & infinitus, nunquam producere potuisset effectus corporeos & finitos, quod absurdum est. Nihil autem vetat quominus Dei operatio, etiam cum effectum finitum producit, infinita ipsius virtuti planè respondere dicatur. Est enim infinita, non quidem ratione *termini*, seu effectus in quem terminatur, sed ratione *principii*, nimirum Dei: quoniam actio sequitur conditionem agentis; sive, ut scholae loquuntur, *modus operandi sequitur modum essendi*.

Respondeo 2^o. etiam admissio antecedente, distinguere posse consequens hoc modo. Si potentia sit infinita, effectus esse debet infinitus, *syncategorematicè*, seu infinitus potentia; id est, semper perfici potest in infinitum, concedo: debet esse infinitus, *categorematicè*, sive infinitus *actu*, adeo ut nulla ipsi ulterior perfectio adjici possit à causa infinite perfecta, nego: quicumque enim effectus producat, is semper inæqualis futurus est Deo; ac plures in infinitum perfectiones poterit ab eo recipere, nunquam ad ultimam pervenire.

Urgebis. Si Deus necessariò extra se ageret, tunc effectum infinitè perfectum produceret.

Ergo id etiam potest, quamvis agat liberè.

Respondeo primò negando antecedens. Nunquam enim ipsi *independentiam* tribuere posset: cum creatura sit essentialiter dependens. Quod autem aliqui exemplum afferunt de Verbo divino, quod à Patre æterno, citra dependentiam, generatur, id à proposita quæstione prorsus abhorret: nam Verbum divinum non est creatura, sed est Deus, Patri consubstantialis, coæternus, non factus: hîc autem agitur de creaturâ, quæ nunquam ad eum statum perducipotest, ut perfectiones divinas adæquet.

Secundò, posito aliquo absurdo, alia ex eo absurda consequi nihil mirum est. Absurdum autem est Deum concipi, tanquam agens necessarium, id est, quod extra se necessariò operetur: cum id illius essentiam destruat, quæ, cum sit summè perfecta, carere non debet liberâ potestate extra se operandi, quæ est perfectio. Ergo mirum videri non debet, si facta hypothesi absurdâ, quâ Deus fingitur agens necessarium, aliud ex ea sequatur absurdum, nempe creaturam infinitè perfectam ab ipso proficisci posse. Itaque quò perfectior est causa, eò perfectiorem, ut vulgò docent, procreare potest effectum: dummodo tamen effectus ille sit possibilis, nec contradictionem involvat. Sed creatura infinitè perfecta contradictionem involvit: nam infinitas haberet perfectiones, & tamen careret *independentiâ*, quæ est maxima perfectio. Deinde foret æqualis Deo, & inæqualis: ipsius perfectiones exhauriret, cum tamen exhauriri nequeant: quæ omnia, cum absurdissima sint, nihil clarius est, quàm nullam extare posse creaturam infinitè perfectam. ●

Objicies secundò, In collectione rerum omnium

possibilium, Deus videt eam, quæ est perfectissima, & quâ nulla perfectior esse potest.

Respondeo negando propositionem. Nam Deus, ut capite sequenti exponemus, videt creaturas posibles in ideis suis, hoc est, in sua natura, quatenus *secundum aliquem similitudinis modum* à creaturis participari potest, ut ait S. Thom. 2. p. q. 15. a. 2. Atqui natura seu essentia Divina infinitis modis, quorum alii sunt aliis perfectiores in infinitum, potest participari. Ergo Deus videt infinitas esse rerum possibilium species, easque esse posse alias aliis in infinitum perfectiores: & consequenter non potest ad eam speciem pervenire, quâ perfectiorem creare se non valere intelligat: ideoque non videt eam, quæ sit omnium perfectissima.

Instabis. Deus videt omnes creaturas posibles.

Ergo novit quæ sit perfectissima.

Respondeo distinguendo antecedens. Deus videt omnes creaturas posibles in simplicibus suis ideis, hoc est, in sua natura, quatenus diversis modis in infinitum participari potest à creaturis, concedo: videt omnes creaturas posibles in ipsarum collectione, ita ut aliquam inter illas videat, quæ cæteris omnibus præster, nego: quare nego consequentiam. Videt igitur Deus in simplicibus suis ideis creaturas omnes posibles, sive de speciebus agatur, sive de individuis.

Primo enim videt species in diversis ideis, quas habet, hoc est, in sua natura, quatenus diversis modis à creaturis potest participari. Cumque ab iis participari possit innumeris modis diversis, quorum alii sint aliis perfectiores in infinitum, non potest assignari species, quæ sit veluti extrema & cæterarum prorsus omnium perfectissima.

Secundò, videt etiam individua possible in iis-

dem ideis, v. g. videt omnes homines possibiles in idea simplici hominis, quæ infinitos homines exhibere potest: ut circulos possibiles videmus in idea circuli, quæ infinitos circulos repræsentat. Itaque si clarè intelligamus non tot circulos secundum ideam illam à nobis effici posse, quin plures semper in infinitum describere valeamus: certè à *fortiori* cogitare debemus nunquam tot produci posse homines aut alias quaslibet creaturas à Deo, quin plures semper in infinitum produci queant. Quare tota earum collectio sive secundum species, sive secundum individua, simul sumi non potest.

Urgebis. Creatura perfectior quâlibet aliâ finitâ possibili esset infinitè perfecta.

Atqui Deus novit creaturam perfectiorem quâlibet aliâ finitâ possibili.

Ergo novit infinitam: adeoque potest illam efficere.

Respondeo primò negando majorem. Nam, ut aliquid sit perfectius quolibet finito possibili, non debet esse infinitum; sed tantum finitorum perfectissimum.

Secundò, si mavis distinguo minorem. Deus novit creaturam perfectiorem aliâ quavis creaturâ finitâ possibili, in *sensu distributivo*, esto: in *sensu collectivo*, nego. Deus enim videt ad summum creaturam perfectiorem qualibet aliâ possibili seorsim, & in sensu distributivo acceptâ: non tamen perfectiorem quâlibet aliâ possibili in sensu collectivo, seu, in tota collectione rerum possibilium, spectatâ: tum quia quâcumque datâ semper dari potest perfectior: tum quia sumi non potest tota rerum possibilium collectio simul, cum Deus tot creaturas producere non queat, quin adhuc plures & perfectiores in infinitum procreare possit.

PROPOSITIO TERTIA.

NULLA produci potest multitudo , vel magnitudo , vel qualitas actu infinita. Ita sanctus Thomas primâ parte quæst. 7. art. 3. & 4.

Probatur. Multitudo , vel magnitudo , vel qualitas infinita , sine controversia esse deberet extrema , seu omnium possibilium maxima ; ita ut non posset eâ major , ne divinitus quidem , produci.

Atqui nulla creari potest multitudo , vel magnitudo , vel qualitas omnium possibilium maxima ; cum nulla sit , cui addi non possit aliquid à Deo : nam nullus est numerus tantus , cui unitas non possit adjici : nulla magnitudo , quin possit magis extendi : nulla qualitas , v. g. sapientia , quin incrementum suscipere possit : alioquin æqualis foret sapientiæ divinæ , quâ scilicet major nulla potest existere.

Ergo nulla dari potest multitudo , vel magnitudo , vel qualitas actu infinita.

Responsiones ad objecta.

OBJECTES primò. Infinita multitudo est possibilis.

Ergo potest existere.

Respondeo negando antecedens. Id enim non est possibile , quod repugnantiam involvit. Atqui infinita multitudo repugnantiam involvit : esset enim infinita ex hypothesi ; nec tamen esset infinita , cum non esset summa seu extrema : nam posset ab alia superari. Verbi gratiâ , si dicerentur extare infiniti homines , numerus oculorum duplo major foret quàm hominum : & tamen in idea naturali infiniti id continetur , quod est in suo

genere summum seu extremum; nec potest ab alio superari, ut de sapientia infinita diximus. Ergo multitudo infinita non est possibilis.

Probabis antecedens. Produci possunt à Deo infiniti homines, infiniti leones, &c.

Ergo multitudo infinita est possibilis.

Respondeo distinguendo antecedens. Infiniti homines produci possunt à Deo, seorsim, & in sensu distributivo, concedo: simul, & in sensu colectivo, nego: quare nego consequentiam. Infiniti quidem homines, vel leones produci possunt à Deo seorsim, & in sensu distributivo: quia quantocunque numero sint producti, eorum numerus semper augeri potest: sed nunquam infinita colligi, & coacervari potest eorum summa, aut multitudo, ita ut huic numero, seu multitudini nihil adjici queat: nam infinitum *potentiâ*, qualis est ea multitudo, ad *actum* perfectum reduci nunquam potest.

Verum inquires. Quæ suntabilia, fingi possunt ut existentia.

Ergo si infiniti homines seorsim sintabiles, fingi possunt ut existentes.

Respondeo distinguendo antecedens. Quæ suntabilia, fingi possunt ut existentia, eo modo quo suntabilia, concedo: aliâ ratione, nego: unde nego consequentiam. Infiniti autem homines vel leones sunt tantumabiles in sensu distributivo, & seorsim, non in sensu colectivo, & simul; quia nunquam infinitum *potentiâ* ad finem seu terminum perducipotest.

Instabis. *Possibili ad actum redactô nihil sequitur absurdi*, ut ait Aristoteles lib. 9. Metaphysicorum cap. 3.

Ergo si infiniti homines suntabiles, possunt fingi existentes.

Respondeo distinguendo antecedens. Possibili

ad actum redacto nihil sequitur absurdi : si reduci dicatur ad actum eo modo , quo possibile est , concedo : si reducatur ad actum alio modo ac possibile sit , nego. Simili modo distinguo consequens. Si infiniti homines sint possibiles , possunt fingi existentes , eo modo quo sunt possibiles , concedo : alio modo , nego. Sunt autem possibiles tantum seorsum & distributivè , ut aiunt , non simul & collectivè , ut jam dictum est.

Urgebis. Deus cognoscit in suis ideis ! hoc est , *in sua natura , quatenus à creaturis participabilis est* , omnes creaturas , quas producere potest ; quemadmodum videt omnia Angelorum desideria per totam æternitatem futura , scilicet , *in eo decreto , quo statuit illis ad ea desideria producenda necessarium auxilium prestare* , ut capite sequenti exponemus.

Ergo potest Deus omnes creaturas possibiles producere : adeoque infinitam multitudinem ponere.

Respondeo distinguendo antecedens. Deus cognoscit in ideis suis omnes creaturas possibiles , & eas ita possibiles novit , ut seorsum tantum , & in sensu distributivo produci possint , concedo : & eas sic possibiles esse videt , ut simul poni possint , nego : quare nego consequentiam. Creaturas igitur possibiles videt Deus in suis ideis , sive de speciebus agatur , sive de individuis , v. g. videt omnes rerum species possibiles in suâ naturâ , quatenus infinitis modis participabilis est : videt omnia individua in idea speciei , putà omnes circulos in idea circuli : unde res sunt tantum possibiles in sensu distributivo : quia non tot produci possunt , quin plures semper in infinitum procreari valeant : quoniam thesaurus omnipotentiae divinæ exhaustiri nequit : neque adeo infinitum *potentiâ* ad actum , ut vocant , perfectum & consummatum potest reduci.

Quod enim aiunt aliqui, potentiam infinitam exauriri posse effectū infinito, putā vel infinitā creaturarum multitudine; vel creaturā infinitē perfectā : id manifestam involvit repugnantiam. Nam vis creandi infinita, est vis, quæ *sine fine* creari potest; sive, quæ nunquam ad eum statum potest redigi, ut nihil amplius creare valeat. Sed si exauriretur, vel numero rerum infinito, vel creaturā infinitē perfectā, ad eum statum perduceretur, quo nihil amplius efficere posset : adeoque non foret vis creandi *sine fine* : quod contradictionem implicat.

Enimverò si quis ex nobis semper esset victurus, novos semper ac sine fine circulos efficere posset ideæ circuli, quam mente concipit, planè similes : nec unquam ad eum statum perduceretur, quo nullos posset efficere circulos. Ergo à fortiori, Deus ad eum statum redigi nunquam potest, ut certam creaturarum speciem, quamcumque voluerit, non valeat producere.

At, inquit, destruere posset creaturam illam infinitē perfectam, vel infinitam multitudinem, sive hominum, sive leonum, sive aliarum rerum. Ridicula est cavillatio. Nam si eandem tantum creaturam infinitē perfectam, vel eandem multitudinem denuò producere possit Deus, certè restricta est, & finita illius potentia : si verò aliam creaturam, aut creaturarum multitudinem producere queat : cur priores destruendæ sunt, ut novæ producantur ? Cur non potius infinita potentia nullo unquam effectū exauriri posse conceditur ?

Denique, quod opponunt numerum perfectionum, quæ in Deo sunt, esse infinitum, id nihil est. Nam perfectiones divinæ non sunt numero distinctæ, sed sunt una & simplissima Dei natura, quæ cū perfectissima sit, infinitis perfec-

tionibus æquivalet ; & variis modis à mente nostra concipitur. Sed si infiniti homines , vel leones existere dicerentur, fotent omnes inter se distincti : eoque casu illorum numerus foret infinitus ex hypothesi ; neque tamen esset infinitus , quoniam adhuc augeri posset sine fine , quod contradictionem involvit.

Objicies secundò. Magnitudo infinita , sive corpus infinitum non repugnat , neque ex parte Dei , neque ex parte sui.

Ergo produci potest.

Respondeo negando antecedens. Repugnat enim tum ex parte Dei , cujus potentia exhauriri non potest ; tum ex parte sui , quia magnitudo corporea est tantum infinita potestate , non actu ; nec tanta esse potest , quin semper amplificari queat : quoniam illud ad essentiam infiniti syncategorematici pertinet , ut semper & sine fine augeri possit , si de incremento agatur ; vel minui , si sermo sit de decremento : ut , qui docent materiam in infinitum dividi posse , eam in partes minutiores sine fine secari posse contendunt.

Instabis. Deus operari potest ubicumque est per suam immensitatem.

Atqui est ubique per suam immensitatem.

Ergo potest ubique operari : atque ita , vel infinita actu corpora , vel potius infinitum aliquod corpus producere valet.

Respondeo distinguendo majorem. Deus operari potest ubicumque est per suam immensitatem , in sensu distributivo , concedo : in sensu colectivo , nego : quare concedo minorem , & distinctâ similiter priori consequentiâ , nego posteriorem. Itaque Deus operari potest ubicumque est , in sensu distributivo , id est , nullus est locus possibilis seorsum & distributivè sumptus , in quo Deus quidpiam corporeum creare non valeat. Sed

non potest Deus operari ubicumque est , in sensu collectivo ; ita ut omnibus locis possibilibus simul sumptis aliquid producat : quia non potest tantum producere corpus, quin adhuc majus in infinitum procreare queat. Unde vulgò docent nullum corpus divinæ immensitati *coextendi* posse , ut nulla res creata ipsius æternitati adæquari potest. His adde quòd Deus non sit in loco , nec illius immensitas , quasi in spatio extensa , sit concipienda , ut superiori capite advertēbamus : & proinde cum dicitur esse ubique , id non est ita intelligendum , ut infinita occupet loca realia , quibus operari possit : nam nullus propriè est locus, nisi respectu corporis , ut dicemus in Physica.

Argumentum autem oppositum quamdam videtur in Deo extensionem arguere , eamque infinitam , in qua Deus non *adaquatè* quidem , sed *inadaquatè* , & in sensu distributivo possit operari. Neque verò me latet hujusmodi extensionem vulgò *virtualem* , non *realem* , & *localem* appellari : sed qualis qualis sit , ea non omnino ideæ entis summe perfecti , proindeque spiritalis ac simplicis , congruere videtur.

C A P U T V.

*De scientia, voluntate, omnipotentia, libertate,
ac decretis divinis.*

Quæ hætenus exposita sunt Dei attributa, sic inesse Deo concipiuntur , ut res creatas minimè respiciant : quæ verò deinceps sequuntur, quamdam ad creaturas relationem habere intelliguntur.

Scientia Dei.

Primo loco occurrit scientia Dei, quæ nihil propriè aliud est, quàm Deus ipse, quatenus & se ipsum & alia à se percipit.

At duplici modo Deus alia à se percipit. Aut enim eorum duntaxat essentiam, modosque omnes, quibus fieri possunt, considerat; aut ipsorum existentiam intuetur. Essentiam quidem omnium rerum possibilem, & modos omnes quibus fieri possunt, intelligit Deus in ideis suis; existentiam verò substantiarum & modorum realium; siue spiritalium, quales sunt ideæ nostrarum mentium; siue corporalium, quales sunt motus & quies in corporibus; videt in suis decretis. Nam & res, seu substantiæ, & modi seu qualitates reales ideo tantum existunt, vel extiterunt, vel extabunt, quia Deus existentiam illis tribuere decrevit.

Si tamen agatur de liberis voluntatis creatæ motibus; eos, si spectentur in statu naturæ innocentis, novit Deus in voluntatis ipsius creatæ determinatione, ad quam creata voluntas præmotione quidem generali indigebat, non tamen præmotione speciali, neque in ordine naturæ, neque in ordine gratiæ, ut dicemus ad propositionem 5. capitis 8. Sed si actus liberi spectentur in statu naturæ per peccatum lapsæ; tunc, vel boni sunt & supernaturales, ac eos videt Deus in Decretis suis *prædeterminantibus*, ut intelligetur ex eadem propositione 5. cap. 8. vel naturæ vires non excedunt, aut etiam sunt mali, eosque Deus in futurâ creatæ voluntatis determinatione, quæ ipsi in æternitate præsens est, & cui solâ præmotione generali opus est, cognoscit, ut ex octava propositione ejusdem capitis 8. constabit.

Essentia

Essentia igitur rerum omnium possibilium in idea divina tanquam in exemplari, seu archetypo continetur : quæ idea , seu archetypus est ipsamet natura divina , quatenus *secundum aliquem modum à creaturis est participabilis* , ut docet S. Thomas primâ parte , quæst. 15. art. 2. eaque idea dirigit voluntatem divinam in singularum rerum productione. Etenim quamvis possit res singulas producere, vel non producere, quoniam earum existentia , utpote possibilis tantum & contingens , à libero ipsius decreto pendet ; si tamen eas producere velit, necessario secundum immutabilem , quam habet ideam , seu archetypum, ipsas producit. Unde essentia rerum immutabilis est, & necessaria : quoniam ab immutabili archetypo pendet , non à libera Dei voluntate , ut *existentia* , quæ tantum est contingens. Neque enim Deus efficere potest circulum quadratum , vel decernere ut *bis bina* sint *quinque* , ut malè asseruit Cartesius in responsionibus ad sextas objectiones metaphysicas , num. 6. & 8. sed tantum velle potest circulum efficere , vel non efficere : sive dare , vel negare existentiam circulo ; numero quaternario, &c.

Archetypam hanc ideam , in qua Deus rerum omnium possibilium novit essentias , appellant Theologi post Sanctum Thomam primâ parte, quæst. 14. art. 9. *scientiam simplicis intelligentia*, eamque scientiam *præcticam* dicunt , quoniam ea decretum illas producendi antecedit , & in earum productione divinam voluntatem dirigit , quatenus nempe omnipotentissima Dei voluntas secundum ideam immutabilem semper decernit , & operatur. Unde illud vulgò tritum in Scholis Theologicis ex S. Thoma 1. p. q. 25. art. 5. ad 1. *scientia Dei dirigit , voluntas decernit , omnipotentia exequitur* : sive , ut accuratius loquamur multa Deus intelligit possibilia in suis ideis , ex

quorum numero quædam efficacissima suâ voluntate creare decernit , idque per omnipotentiam suam, cùm vult, exequitur.

Sed postquam ex infinitis rebus possibilibus, quas Deus in ideis suis intelligit , aliquas producere decrevit : tum illas videt in suo decreto tanquam præsentēs , seu æternitati suæ coexistentes, licet respectu nostri sint futuræ. Eaque scientia, quâ Deus rerum existentiam , *videt* , dicitur à Theologis post sanctum Thomam loco laudato, scientia *visionis* , quæ & practica est & speculativa. Practica quidem est , quatenus decretum voluntatis divinæ adjunctum habet, ac in opus tendit, seu simul cum decreto Divino res ipsas aut rei modos producit. v. g. *scientia* , quâ Deus novit mundi aspectabilis compagem antequam fieret , vel bonos & supernaturales actus creatarum voluntatum, quos per gratiam specialem efficit , ut ostendimus cap.8. propos.5. scientia , inquam , illa , practica est , & decretum voluntatis divinæ comitatur , ac nostro concipiendi modo res ipsas & rerum modos antecedit. Eadem verò speculativa est , quatenus res ipsas vel rei modos velut jam existentes aspicit : estque scientia vel *dilectionis* & *approbationis* , vel etiam *improbationis*. Est quidem scientia approbationis , cum ad ea fertur quæ Deus ipse quocumque modo est operatus : nam nihil odit Deus eorum quæ fecit , ex Sapient. cap.11. v.25. Improbationis verò , cum ea spectat , quæ Deus permisit tantum , non effecit. Permittit autem Deus mala , quatenus cum causis secundis ad ea producenda concurrat , non tamen speciali motione causas illas prædeterminat. Unde quæ patrantur mala , pendent quidem à Divino decreto , quo nempe Deus cum causis secundis concurrere statuit, sed non pendent ab eo tanquam prædeterminante & præmovente , saltem specia-

li præmotione , ut probabimus capite 8. propos. 8 .

Quocirca cum docet S. Thomás 1.^a p. quæst. 14. art. 8. Scientiam Dei esse causam rerum , id intelligendum est de scientia practica , hoc est , tum de scientia simplicis intelligentiæ , quæ ab ideis divinis distincta non est , quæque cum voluntatem divinam in rerum productione dirigat , dici potest causa rerum saltem dirigens ; tum etiam de scientia visionis , quatenus adjunctum habet decretum divinum , simulque cum eo vel res ipsas vel rei modos efficit. Sed scientia speculativa Dei , quæ rerum vel modorum existentiam nostro concipiendi modo supponit , rerum ipsarum vel modorum causa nequit appellari.

Hac ratione facilè conciliantur inter se sancti Patres , quorum locutiones primâ specie videntur inter se pugnare. Nam cum S. Augustinus lib. 15. de Trin. num. 22. aliàs cap. 13. ita scribit , *universas autem creaturas suas & spirituales & corporales , non quia sunt , ideo novit (Deus ;) sed ideo sunt quia novit* : id intelligendum est de scientiâ practicâ , quæ decretum divinum adjunctum habet , & semper aliquod bonum producit , nunquam malum. Cum verò idem S. Doctor Tractatu 53. in Johan. Evangelium num. 4. docet *Domini præscium futurorum , per Prophetam prædixisse infidelitatem Judæorum . . . non fecisse* : Cumque Origenes in cap. 8. Epist. ad Rom. pronuntiat non propterea aliquid futurum esse , quia id scit Deus futurum , sed quia id futurum est , à Deo præsciri : quod à D. Hieronymo in cap. 26. Jeremiæ totidem ferè verbis repetitum est : *non enim ex eo quod Deus scit futurum aliquid , idcirco futurum est ; sed quia futurum est Deus novit* : hæc omnia de scientia speculativa debent intelligi , quæ nostro concipiendi modo posterior est iis quæ futura præ-

videntur , quæque non solùm id quod bonum est, sed etiam malum intueretur.

Cùm verò nullâ necessitate agatur Deus ad res aliquas producendas , sed liberè , & pro voluntatis suæ beneplacito eas producat : hinc sequitur, quæcumque præter Deum existunt, aut extiterunt, ea contingenter tantùm existere , vel extitisse ; quæcumque futura sunt, contingenter tantùm, non necessariò esse futura , & contingentem duntaxat, non necessariam in suo conceptu existentiam involvere , ut jam diximus.

Futura autem illâ contingentia duplicis sunt generis : alia enim absolutè futura sunt ut putà universale iudicium , quo Christus in secundo suo adventu vivos & mortuos est iudicaturus ; alia futura sunt sub conditione tantùm , à quâ pendent omnino ut vel eveniant , vel non eveniant. Ea-que conditio vel à Deo ipso , quatenus statutum à se causarum naturalium ordinem cum liber , abrumpt ; vel à liberâ voluntatis creatæ determinatione repetitur.

Certum quidem est ea , quæ absolutè futura sunt , ad illam divinæ scientiæ speciem pertinere, quam vulgò *scientiam visionis* vocant. Sed de futuris conditionalibus , quæ non minùs certò cognosci constat à Deo , quàm absoluta , non consentiunt inter se Theologi. Nam propter ejusmodi futura , nonnulli tertiam quandam in Deo scientiam ponunt , quam *mediam* vocant, scilicet inter scientiam *simplicis intelligentiæ* , & scientiam *visionis* constitutam. Alii meliùs tertiam illam scientiæ speciem , quæ sit futurorum conditionalium exploratrix , rejiciunt , quòd futurorum conditionalium notitia , aut ad scientiam simplicis intelligentiæ , aut ad scientiam visionis sit revocanda. Penim si agatur de futuris illis conditionatis quorum conditio ex voluntate divinâ causarum natu-

raliū seriē, cum liber, intervertente, deducitur, illa videri Deus in naturæ legibus à se decretis, per scientiam visionis, nisi inusitata potestate usitatum rerum ordinem immutet. Sic futuram Ezechiae mortem ab Esaia lib.4. Reg. cap.20. v.1. prædictam in effecti corporis exhaustis viribus, tanquam in causâ proximâ cernebat, atque ita præscientiam habebat futuri conditionati nunquam eventuri, quod tamen eventurum fuisset, nisi ipse naturæ cursum mutare ab aeterno constituisset. Intercessit enim morti adventanti, ac vitam & quindecim annorum inducias pio regi indulxit. *Multa*, inquit S. Augustinus lib.6. de Genes. ad litteram, num.28. aliàs cap.17. *Secundum inferiores causas futura sunt, sed si ita sunt & in præsentia Dei, verè futura sunt: si autem ibi aliter sunt, ita potius futura sunt, sicut ibi sunt, ubi qui præscit, falli non potest. Nam futura dicitur Senectus in iuvene, sed tamen futura non est, si ante moriturus est: hoc autem ita erit, sicut se habent alia causa, sive mundo contexta, sive in Dei præscientia reservata. Nam secundum quasdam futurorum causas moriturus erat Ezechias, cui Deus addidit quindecim annos ad vitam, id utique faciens, quod ante constitutionem mundi se facturum esse præsciebat. Nec tamen illi anni additi rectè dicerentur, nisi aliquid adderetur, quod se aliter in aliis causis habuerat. Secundum aliquas igitur causas inferiores jam vitam finierat: secundum illas autem quæ sunt in voluntate & præscientia Dei, qui ex aeternitate noverat quid illo tempore facturum erat. (& hoc verè futurum erat) tunc erat finiturus vitam, quando finivit vitam.*

Subversionem quoque Ninives à Jona Propheta prænuntiatam Jon. cap.3. v.4. Videbat Deus per scientiam visionis in civium peccatis ad cumulum ferè perductis, de quibus vindictam erat sumptu-

rus, nisi ipse speciali gratuitoque beneficio eorum voluntates ad pœnitentiam convertere ab æterno decrevisset. Quanquam hæc Jonæ comminatio ad Ninivitarum animos à pravâ vivendi ratione deterrendos potius quàm ad futurum præfagiendum erat comparata. Aliunde, si credamus sancto Augustino, reipsâ eversa fuit Civitas Ninive, dummodò ad spiritalem sensum attendamus. Sic enim scribit in Psal. 50. v. 11. *Ego autem puto impletum fuisse quod Propheta prædixerat : respice qua fuit Ninive, & vide quia eversa est : eversa in malo, adificata in bono.*

At si quæstio sit de futuris conditionatis, quæ libera vocantur, quorum nempe conditio sita sit in libera creatæ voluntatis determinatione, quæ nunquam sit ponenda, ex profectò nec à Deo prævidentur, nec ullo modo sunt futura, sed remanent in statu merè possibili, & ad scientiam simplicis intelligentiæ sunt referenda. Nam illa futura non sunt, quibus non est ponenda conditio, sine quâ non possunt evenire. Quod si futura non sunt, nulla est eorum veritas, nulla scientia, nulla præscientia. Quippe Deus per suam præscientiam quæcumque futura sunt, tanquam præsentia, & æternitati suæ coexistentia videt aut in decretis suis, aut in voluntatis creatæ determinatione, ut diximus. Hic autem agitur de futuris quæ pendeant à voluntatis creatæ determinatione nunquam futurâ, quamque proinde in suâ æternitate præsentem Deus non cernit. Ubi igitur illam videt? an in comprehensione seu cognitione comprehensivâ, quam habet, creatæ voluntatis? sed voluntas creata est indifferens ad illam determinationem, nec unquam in eam prorumpet: quare nec determinationem illam voluntatis creatæ, nec quæ ex ea futura essent, Deus ullo modo in scientiâ suâ prævidet: & consequen-

ter scientia , quam mediam vocant , quæque huiusmodi futurorum exploratrix dicitur, omnino est commentitia.

Illam sæpius expolit S. Augustinus , expresseque rejicit lib. de prædestinat. Sanctor. numero 26. aliàs cap. 14. ubi exponens contra Semipelagianorum errores , quod de justo dicitur Sap. cap. 4. v. 11. *raptus est ne malitia mutaret intellectum ejus*, assumit quod habetur eodem capite , v. 7. *justus si morte præoccupatus fuerit , in refrigerio erit* : & quod legitur Ezech. cap. 18. v. 24. *Si averterit se justus à justitiâ suâ & fecerit iniquitatem secundum omnes abominationes , quas operari solet impius, numquid vivet ?* Ex quibus verbis sic ratiocinatur S. Augustinus. *Quis audeat negare Christianus justum , si morte præoccupatus fuerit , in refrigerio futurum ? quilibet hoc dixerit , quis homo sana fidei resistendum putabit ? Item si dixerit justum ; si à suâ justitiâ recesserit , in quâ diu vixit , & in ea fuerit impietate defunctus , in quâ non dico unum annum , sed unum diem vixerit , in pœnas iniquis debitas hinc ituram, nihil sibi suâ justitiâ profuturâ ; hinc perspicaci veritati quis fidelium contradiceret ? Porro si queratur à nobis utrum , si tunc esset mortuus , quando erat justus , pœnas esset inventurus , an requiem : numquid requiem respondere dubitabimus ? Hæc est tota causa cur dictum est , à quocumque sit dictum , raptus est ne malitia mutaret intellectum ejus. Dictum est enim secundum periculum vitæ hujus , non secundum præscientiam Dei , qui hoc præscivit quod futurum erat , non quod futurum non erat.*

Hinc est quod idem sanctus Doctor ejusdem libri num. 24. aliàs cap. 12. redarguit Semipelagianos , qui docebant parvulos pro suis futuris meritis in ipsa infantili ætate baptizari vel non baptizari antequam ex hac vitâ migrarent. Nam cum ea merita minimè futura sint , ea nec

à Deo prævidenter , nec ulla eorum , sive in præmiis sive in pœnis , habenda est ratio.

Sed jam antea conditionatorum scientiæ futilitates & cavillationes damnaverat in Pelagianis , tum Epistolâ & libris ad Bonifacium Papam , tum Epistolâ 194. aliâs 105. ad Sixtum , ubi hæc leguntur. *Deus , inquit , in eis quos hinc aufert prævidet quemadmodum victurus esset quisque si viveret , & ideo quem nequiter novit fuisse victurum , sine baptismo facit & mori , sic in eo puniens opera mala , non quæ fecit , sed quæ facturus fuit.*

Ad astruendam autem illam scientiam opponuntur loca quædam scripturæ , quæ facitè solves , si adverteris Scripturam sacram à communi hominum loquendi consuetudine ut plurimum non recedere , nec parcere tropis & figuris , quibus uti solent auctores profani , ut res paulò aliter quàm verbis exprimunt , aliquando significant. v. g. cum ait Christus Luc. cap. 19. v. 40. *Si hi tacuerint , nempe discipuli , lapides clamabunt.* Ibi nec falsitas est nec mendacium , sed venustas & tropus , non prædictio futuri lapidum clamoris , etiamsi discipuli tacuissent. Quemadmodum cum Pastor ille apud Virgilium Eclog. 3. Sic loquitur

Et , si non aliquâ nocuisses , mortuus esses :

Exprobrat alteri Pastori malam voluntatem , non ad mortem sub conditione futuram animum intendit. Quædam igitur in Libris sacris dicuntur futura , etiam absolute , quæ tamen futura non sunt , scilicet ad proximam causarum secundarum dispositionem propensionemve declarandam , vel etiam ad periculum aliquod indigitandum , ut impleretur divina bonitas , & melior vivendi ratio ineatur. v. g. lib. 4. Reg. cap. 20. Ezechiæ dicitur , *morieris tu* , & tamen ipsius vitæ facta est annorum quindecim adjectio. Item Jona cap. 3. v. 4. hoc legitur vaticinium , *adhuc quadraginta*

dies, & *Ninive subvertetur*, quæ tamen subversa non est. Hæc igitur & alia id genus ad indicandum periculum, ad excitandam Socordiam, suadendamque emendationem vitæ, & auxilii divini implorationem, atque etiam ad causarum dispositionem patefaciendam potius, quam ad futurum prænuntiandum sunt prolata.

Similiter cum ait Christus Matth. cap. 11. v. 21. *Va tibi Corozain, va tibi Bethsaida, quia si in Tyro & Sidone factæ essent virtutes, quæ factæ sunt in vobis, olim in cilicio & cinere poenitentiam egissent*: Scopus Salvatoris non est prophetare, sed duritiam cordis Judæorum urbes illas incolentium objurgare: ut si amico quidpiam neganti objicerem id mihi ab ipso non concedi quod vel ab inimicis obtinuissem. Quo loquendi modo nihil est inter homines usitatus. Hoc igitur loco nihil prædicebat Christus, sed præsentem arguebat Judæorum incredulitatem, quos videbat ei resistere gratiæ mensuræ, cui præsentem quoque Tyrriorum voluntatem cessuram noverat, ut docet Sanctus Augustinus lib. de dono perseverant. num. 35. alias cap. 14.

Quod si quæras quare apud Tyrios & Sidonios factæ non fuerint virtutes, per quas ad poenitentiam adduci potuissent: Respondet Sanctus Augustinus ibidem, quia *Dei altiore judicio à perditionis massâ non erant gratia prædestinatione discreti.*

Jam cum David interrogat Dominum hoc modo, lib. 1. Reg. cap. 23. v. 12. *Si tradent me viri Ceila? dixit Dominus, tradent*: id non futuram prodicionem, quæ nulla fuit, denotat; sed præsentem Civium hujus urbis voluntatem, qui Davidem prodere meditabantur.

Item cum lib. 4. Reg. cap. 13. v. 18. & sequentibus, Joas Elisei mandato percussit terram tribus vicibus, posteaque substitit; iratusque vir Dei

Q v

dixisse memoratur , *si percussisses quinquies aut Sexies sive septies, percussisses Syriam usque ad consumptionem, nunc autem tribus vicibus percuties eam* : in hoc nihil futuri attenditur , nihil quippe futurum erat : sed Propheta tantum innuit Joam Regem, quò promptius, fidentiùs, & perseverantiùs viri Dei mandato obtemperasset , hoc frequentiores plenioresve meriturum fuisse de suis hostibus victorias reportare.

Quamobrem & his & aliis quæ allegari solent locis , non semper scientia futurorum conditionalium statuitur , sed aliquando tantum connexio quæ inter rerum causas intercedit , putà inter meritum & præmium , vel inter supplicium & peccatum accommodatis usui communi locutionibus demonstratur. Plura vide apud Doctissimum Thomassinum tom. 1. Theolog. Dogmat. lib. 7. de Deo Deique proprietatibus cap. 23.

Verum his missis , quorum uberior tractatio ad Theologos spectat , gravissimam tantum hoc loco de præscientiâ Dei cum libero voluntatis nostræ arbitrio conciliandâ quæstionem , quæ Philosophiæ limites non transgreditur, excutere volumus. Hanc doctè & eleganter tractavit Boëtius libro 5. de consolatione Philosophiæ , ubi & futura à Deo præsciri , seu prævideri , & voluntatis nostræ liberam electionem illæsam permanere demonstravit. Idem etiam præstitit S. Thomas primâ parte, q. 14. art. 13. Sit igitur cum illis , & omnibus Catholicis Theologis.

PROPOSITIO.

DEUS futura omnia certissimè novit, ac prænovit.

Probatur. Qui omnia quæ sunt , quæ fuerunt , aut futura sunt tanquam præsentia , seu existentia videt , is futura omnia certissimè novit , ac prænovit , ut per se clarum est.

Arqui Deus omnia quæ sunt , quæ fuerunt , aut futura sunt , tanquam præsentia seu existentia videt : nam hæc una est ex perfectionibus divinis , ut res omnes in æternitate suâ præsentem semper habeat , easque quâcumque possunt ratione cognosci , sive in seipso , sive in illis perspiciat : alioqui non esset ens summe perfectum , quod de Deo cogitare per absurdum est.

Ac re quidem verâ , si de rebus seu substantiis agatur , vel de modificationibus seu qualitatibus realibus , sive spiritalibus , quales sunt ideæ vel affectiones nostræ mentis , sive corporeis , quales sunt motus & quies , earum essentiam & modos omnes quibus fieri seu produci possunt , intelligit Deus in suis ideis per scientiam simplicis intelligentiæ , ut modò dictum est ; existentiam verò illarum in suis decretis per scientiam visionis intuetur. Nam neque res neque rerum qualitates sive spirituales sive corporeæ aut extiterunt unquam, aut sunt, aut futuræ sunt, nisi quatenus Deus potentissimo & efficacissimo suo decreto existentiam illis largiri constituit, cum entia per participationem, aut entis modi à solo ente summe perfecto in rerum naturâ poni valeant , ut per se manifestum est , & sequenti capite , ubi de creatione dicemus , apertissime constabit.

Quod si sermo sit de liberis creatæ voluntatis motibus , ii vel spectantur in statu naturæ innocentis , & illos noverat Deus in futurâ voluntatis creatæ sive angelicæ sive humanæ determinatione ; quæ ipsi in æternitate præsens erat ac generale tantum , non verò specialem Dei præmotionem neque in ordine naturæ , neque in ordine gratiæ exigebat , ut colligi poterit ex proposit. 5. capitis 8. vel considerantur in statu naturæ per peccatum lapsos : rursusque , vel sunt boni & supernaturalem , vel sunt naturales tantum , aut etiam mali.

Q. vj

Si boni sint & supernaturales, sane Deus illos videt futuros in suis decretis, *prædeterminantibus*, ut loquuntur Thomistæ, cum voluntatem humanam in statu naturæ lapsæ constitutam speciali gratiæ auxilio ad eos moveat seu præmoveat, ut ostendimus cap. 8.

Si verò naturales sint, præsertimque mali, ad quos nempe creatâ voluntas speciali Dei motione non prædeterminatur, ut ibidem trademus, ii sane futuri noscuntur à Deo indeterminatione ipsâ futurâ creatæ voluntatis, per quam voluntas creatâ præmotione generali mota divinum exigit concursum ut in illos actus prorumpat, hoc est, ut in statu agentis, aut etiam rei creatæ adhærentis conservetur, prout ibidem exponemus. Nam futura illa voluntatis creatæ determinatio Deum latere non potest, cum ei præsens in æternitate semper obversetur, & à divinâ conservatione ac præmotione saltem generali pendeat, prout latius explicabimus capitibus 7. & 8.

Ergo Deus futura omnia certissimè novit, ac prænovit.

Responsiones ad objecta.

O B J I C I E S primò. Si Deus futura omnia noverit; nulla remanet in nobis electionis libertas: id est, non habemus potestatem agendi vel non agendi; seu facultatem eligendi unum præ alio ad libitum.

Atqui falsum consequens.

Ergo & antecedens.

Respondeo negando majorem. Nam vel agitur de actibus bonis & supernaturalibus creatæ voluntatis, ad quos Deus voluntatem creatam per motionem seu gratiam specialem determinat; vel de iis actibus, qui naturæ vires non excedunt, aut

etiam sunt mali. Sed neque his neque illis ullam necessitatem importat divina præscientia : nam non tantum scit Deus illos esse futuros , sed etiam modum quo futuri sunt , novit , nempe liberè ; quia in huiusmodi actibus relinquit semper voluntati creatæ potentiam ad oppositum, ita ut dum ipsa quidpiam agit , ab eo agendo possit abstinere. Ergo licet Deus futura omnia noverit illæsa semper in nobis remanet electionis libertas.

Probabis maiorem. Si Deus futura omnia noverit, omnia necessario eveniunt.

Ergo nulla remanet in nobis electionis libertas, seu potestas eligendi unum præ alio ad libitum.

Respondeo negando antecedens. Nam ut modò respondimus , scientia Dei nullam necessitatem liberis voluntatibus importat , & eo modo res futuras videt , quo sunt futuræ. Unde Boetius lib. 5. de consolatione Philosophiæ Prosâ 4. *Sicut scientia præsentium nihil his qua fiunt, ita præscientia futurorum nihil his qua ventura sunt , necessitatis importat.*

Probabis antecedens. Si Deus futura omnia noverit, omnia sunt certò ac determinatè futura.

Ergo necessario eveniunt.

Respondeo , concesso antecedente , negando consequentiam. Aliud enim est quidpiam certò , ac determinatè esse futurum ; aliud necessario esse futurum. Illud necessario futurum dicitur , quod ita futurum est , ut non possit non esse futurum : illud autem certò ac determinatè futurum est , quod reverà est futurum , licet possit non esse futurum : v. g. certò nunc scribo , ac hesternâ die certò & determinatè pronuntiari poterat me hodie esse scripturum : non tamen adeo necessario scribo, quin, si velim, à scribendo possim abstinere. Ergo quodcumque est certò ac determinatè futurum , non semper necessario futurum est.

Probabis consequentiam. Illud est necessariò futurum , quod non potest non evenire.

Sed quod certò ac determinatè futurum est , non potest non evenire.

Ergo est necessariò futurum.

Respondeo negando minorem. Illud enim potest non evenire , quod potest fieri vel non fieri, Sed quod certò ac determinatè futurum est , si à liberâ voluntate pendeat , fieri potest vel non fieri : v. g. nunc possum scribere, vel non scribere, licet hesternâ die pronuntiari certò potuisset me hodie esse scripturum. Ergo quod certò ac determinatè futurum est , aliquando tamen potest absolutè non evenire.

Si mavis , distinguere poterit minor hoc modo. Quod certò ac determinatè futurum est , non potest non evenire , factâ hypothesi , quod sit futurum , concedo ; absolutè , & citra illam hypothesim , nego. Simili modo distinguo consequens. Quod certò ac determinatè futurum est , illud est necessariò futurum , necessitate hypotheticâ , ut vocant, concedo : necessitate absolutâ , nego. Itaque duplex hoc loco distinguere potest necessitas , scilicet absoluta , & hypothetica. Necessitas absoluta est ea , quâ quidpiam in se absolutè , & citra ullam hypothesim ita est tale , ut alio modo se habere non possit , quandiu existit : v. g. homo sic constat ex mente & corpore , ut non possit ex iis non constare : voluntas humana sic prosequitur bonum generatim , & aversatur malum , ut nequeat hoc non odisse , & illud non amare. Necessitas hypothetica vocatur , quæ hypothesim quamdam consequitur ; sive , quâ quidpiam, factâ quâdam hypothesi , non potest alio modo esse : v. g. ex hypothesi quod curram , non possum in motu non versari.

Fateor igitur , quod certò ac determinatè fu-

turum est, id necessario esse futurum necessitate hypotheticâ, sive ex hypothese quod sit futurum, v. g. ex hypothese, quod essem hodie scripturus, non poteram non scribere; quemadmodum ex hypothese, quod nunc scribam, non possum non scribere: sed non concedo id, quod determinatè futurum est, esse semper necessario futurum necessitate absolutâ: nam plerumque ita futurum est, ut possit absolutè non esse futurum.

At inquires. Si quod determinatè futurum est, posset non esse futurum, falli posset præscientia divina.

Atqui absurdum consequens.

Ergo & antecedens.

Respondeo distinguendo majorem. Si quod determinatè futurum est, posset non esse futurum, *in sensu composito*, & factâ hypothese, quod prævisum sit à Deo ut futurum, falli posset præscientia Dei, concedo: si quod determinatè futurum est, posset non esse futurum *in sensu diviso*, & absolutè, falli posset præscientia divina, nego: quare concedo minorem, & nego consequentiam. Quod igitur determinatè futurum est, & à Deo prævisum, ut futurum, non potest non evenire in sensu composito, & factâ hypothese quod prævisum sit à Deo ut futurum: quia præscientia rei futuræ componi non potest cum negatione ipsius rei eventûs: quemadmodum scientiâ, quâ Petrum actu ambulantem video, cum negatione ambulationis Petri haudquaquam componi potest. Sed quod certò ac determinatè futurum est, quodque à Deo est prævisum, si absolutè & in sensu diviso, ac veluti scorsim à præscientiâ divinâ spectetur, quandoque potest non evenire: quemadmodum etiamsi videam Petrum ambulantem, potest tamen Petrus ratione sui, & veluti à visione mea

divisus , non ambulare : siquidem istam ambulandi necessitatem *non propria facit natura , sed conditionis adjectio* , ut rectè ait Boëtius lib. 5. de consolatione Philosophiæ , prosâ sextâ : id est , Petrus ex se , naturâque suâ necessariò non ambulat : sed tantùm ex hypothesi , quòd eum ambulantem videam , non potest non ambulare.

Ut igitur cognitio nostra rebus ipsis , quas novimus , necessitatem non infert , sed eas prout in se sunt attingit : sic Dei prævisio , seu *scientia visionis* , circa res futuras , eo modo , quo futuræ sunt , versatur : adeoque quæ liberè futuræ sunt , eas novit Deus liberè futuras , quia priùs decrevit causis liberis sese ad agendum determinantibus conveniens auxilium præstare , ut liberè operentur : item , quæ necessariò eventuræ sunt , eas necessariò eventuras esse videt , quoniam ita à se decretum intelligit.

Instabis. Eodem modo de cæteris actibus liberis à Deo prævisis judicandum videtur , ac de peccato Antichristi futuro.

Atqui Antichristus non poterit non peccare , etiam absolutè , & in sensu diviso.

Ergo quod determinatè futurum est , & à Deo prævisum , non potest etiam absolutè , ac in sensu diviso non evenire.

Respondeo negando minorem. Liberè quippe Antichristus sese determinabit , seu concursum divinum exigit ad peccandum : Deus autem suum concursum ipsi quidem non denegabit ; sed minime necessitatem inferet : adeoque sic est peccator , ut possit , si velit , non peccare.

Probabis minorem. Si Antichristus posset non peccare , fieri posset hypothesis quâ poneretur non peccaturus.

Atqui ea hypothesis fieri non potest.

Ergo non poterit Antichristus non peccare.

Respondeo negando majorem. Fit enim prior hypothesis, quâ Deus prævidisse dicitur Antichristum peccaturum: ergo fieri non potest secunda hypothesis priori opposita, per quam ponatur Antichristus non esse peccaturus. Quemadmodum si fiat hypothesis, quòd Petrum actu ambulans videam, non potest fieri alia hypothesis quâ ponatur non ambulare: nam hæ duæ hypotheses simul componi, aut conjungi nequeunt; ut jam dictum est.

Probabis majorem. *Possibili in actum redacto, nihil sequitur absurdi*, ut jam retulimus ex Aristotele lib. 9. Metaphysic. cap. 3.

Ergo si Antichristus possit non peccare, fieri potest hypothesis, quâ ponatur non esse peccaturus.

Respondeo distinguendo antecedens. *Possibili in actum redacto, nihil sequitur absurdi*: si reduci dicatur ad actum eo modo, quo possibile est, concedo: secus, nego: quare nego consequentiam. Possibile quippe tantum est Antichristum non peccare *in sensu diviso* à præscientia divina, & absolute; non verò *in sensu composito*, & factâ hypothesis, quòd à Deo prævisus sit peccaturus. Nam qui prævidetur à Deo peccaturus, reverâ peccaturus est; ut qui videtur actu peccatum admittens, reverâ peccat: adeoque factâ hypothesis quòd prævideatur peccaturus, non potest fieri alia hypothesis, quâ ponatur non peccaturus: ut qui fingitur actu peccare, non potest, manente eadem hypothesis, fingi non peccare; licet absolute & sublatâ hâc hypothesis possit non peccare.

Repones. Si Antichristus actu non peccaret, factâ hypothesis quòd prævisus sit à Deo peccaturus, tunc Deus actu falleretur.

Ergo si posset non peccare, etiam Deus falli posset.

Respondeo distinguendo consequens. Si posset non peccare *in sensu composito*, & facta hypothesi quod à Deo prævius sit peccaturus, tunc falli posset Deus, concedo: si posset non peccare in sensu diviso à præsentiâ divinâ, & seclusâ hypothesi, quâ ponitur prævius à Deo ut peccaturus, tunc falli posset Deus, nego: falsum autem est Antichristum posse non peccare in sensu composito, seu factâ hypothesi, quod prævius sit peccaturus, licet absolutè, & veluti divisus ab illa hypothesi possit non peccare, quoniam potestas illa quam Antichristus habet non peccandi, reduci tantum potest ad actum in sensu diviso, non in sensu composito.

Obicies secundò. Quod futurum est ex hypothesi prævisionis divinæ, illud est necessariò futurum, non liberè.

Atqui peccatum Antechristi futurum est ex hypothesi, quod prævideatur à Deo.

Ergo necessariò, non liberè est futurum.

Respondeo negando majorem. Nam scientia visionis res eo modo futuras videt, quo sunt futuræ, liberas liberè, necessarias necessariò.

Probabis majorem. Quod futurum est ex hypothesi antecedente determinationem voluntatis creatæ, illud necessariò futurum est, non liberè.

Sed quod futurum est ex hypothesi prævisionis divinæ, illud ex hypothesi antecedente determinationem voluntatis creatæ futurum est.

Ergo necessariò, non liberè est futurum.

Respondeo distinguendo majorem. Si hypothesis illa non relinquat in voluntate creatâ potentiam *ad oppositum*, aut ipsi vim inferat, concedo: secus, nego. Quare concessâ minore, nego consequentiam. Equidem quod futurum est ex hypothesi antecedente determinationem voluntatis creatæ, id

necessariò futurum est, si hypothesis illa potentiam
ad oppositum in voluntate creatâ non relinquat,
 aut ipsi voluntati inferat : v. g. si quis dicatur
 violentam mortem domi passurus propter causam
 aliquam secundam & particularem, quæ sit extra
 voluntatem, putâ propter sicariorum vim, aut
 propter ruinam recti & tabulatorum; vel in carce-
 re periturus, propterea quòd potentis alicujus
 tyranni jussu in eum ita conjiciendus sit, ut inde
 nunquam sit eruendus : tunc sanè factâ hujusmodi
 hypothesi illud necessariò futurum erit comparatè
 ad eum, cui vis inferetur, nec ulla proinde in eo
 remanebit libertas. Sed si hypothesis antecedens
 voluntatis creatæ determinationem, in eâ relin-
 quat potentiam *ad oppositum*, & à primâ causâ
 oriatur, quæ universalis est, ac intima voluntati
 creatæ, seu quæ intrâ eam agit, nec tantùm il-
 lius actus omnes, sed etiam modos, quibus ii
 fiunt, attingit : illa, inquam, hypothesis creatæ
 voluntatis libertatem non lædit, nec obstat quo-
 minus id in quod voluntas creata feretur, liberum
 omnino censeatur.

Huc adde quod si de actibus malis voluntatis
 creatæ sit sermo, distingui possit minor propositio,
 hoc modo. Illi actus fiunt ex hypothesi anteceden-
 te determinationem voluntatis creatæ, ut existen-
 tem, concedo : ut futuram, nego. Quare nego
 consequentiam. Igitur si sermo sit de malis actibus
 creatæ voluntatis, quos Deus futuros præscivit,
 ii fiunt ex hypothesi prævisionis divinæ, quæ an-
 tecedit quidem determinationem voluntatis ut
 præsentem, non verò ut futuram : quia cum
 scientia illa, quæ scientia visionis est, sed impro-
 bationis tantùm, speculativa sit, nec in malos
 actus quidquam influat, ut diximus; illa, inquam,
 nostro concipiendi modo posterior est actibus illis
 prævisis, non quidem ut existentibus, sed ut futu-
 ris.

Instabis. Si præscientia divina sit posterior determinatione voluntatis humanæ, saltem ut futurâ, hinc sequetur præscientiam divinam à voluntatis humanæ determinatione pendere : quod absurdum videtur.

Respondeo distinguendo propositionem. Sequitur præscientiam divinam à voluntatis humanæ determinatione pendere, ut ab objecto, concedo : ut à causa, nego. Minimè autem absurdum est præscientiam Dei pendere à voluntatis humanæ determinatione, tanquam ab objecto; quia scientia non est nihili, sed alicujus objecti scientia: neque id ullam in Deo imperfectionem arguit: nam hujusmodi dependentia *connexionis* tantum est, non causæ aut *causalitatis*, ut loqui solent scholæ.

Hactenus de scientia Dei, cui simul adjuncta sunt pauca de decretis divinis.

Voluntas Dei.

Cum Deus sit ens simplicissimum, nihil aliud est ipsius *intellectus*, quàm essentia divina, sive Deus ipse spectatus, quatenus intelligit; nihil aliud *voluntas*, nisi essentia divina, prout vult. Quamobrem unica est in Deo voluntas, si accurate, atque, ut res est, loqui velimus: sed propter angustias nostræ mentis multipliciter solet dividi.

Primò enim, dividitur in *voluntatem generalem*, & *voluntatem specialem*.

Voluntas generalis Dei est ea qua generalem quemdam ordinem in rebus constituit, qui semper observatur, nisi speciales causæ obstant, v. g. statuit omnem motum corporum in rectam lineam, utpotè simplicissimum & brevissimum semper dirigi, nisi circumstantia corpora impedimenta sint, quod quidem non rarò evenire advertimus. Simi-

liter creavit omnes homines propter seipsum, id enim ordo postulat: eosque proinde vult omnes ad se venire & beatos esse; sed sæpe illorum pravitas ipsius bonitati reluctatur. Hæc igitur voluntas non ad quidpiam singulare, aut ad pauca tantum pertinet, sed rebus omnibus generatim & indiscriminatim est communis.

Voluntas specialis seu particularis est ea, quâ Deus quidpiam specialiter ac determinatè constituit; eaque rursus dividitur in *voluntatem beneplaciti*, & in *voluntatem signi*.

Voluntas beneplaciti est ea, quâ Deo placet aliquid esse: sive, est actus quo Deus vult reipsâ aliquid bonum, quia illi placet: v. g. vult *voluntate beneplaciti* mundum à se conditum conservare: voluit beatam Virginem eligere ut esset Christi mater. Ubi notandum nos duntaxat optare bonum ei rei vel personæ, quam amamus: at Deus amando creaturas, iisque bonum volendo, facit ipsum bonum, seu bonum in illis producit.

Voluntas signi propriè non est in Deo: sed est *externum signum*, quo Deus aliquid se velle significat. Signum autem voluntatis dicitur voluntas, ut effectus amoris dicitur amor.

Hujusmodi signum quintuplex recensetur à sancto Thoma, 1. parte, quæst. 19. art. 12. scilicet, *prohibitio*, & *permissio* respectu mali, *præceptum*, *consilium*, & *operatio* respectu boni: unde versiculus

Præcipit, ac prohibet, permittit, consulit, implet.

Cùm ergo Deus quoddam bonum præcipit, aut consulit, vult efficaciter aliquid, nempe signum, seu præceptum, vel consilium: non verò vult semper efficaciter rem quam imperat aut consulit. Verbi gratiâ, cùm Abrahamo præcepit mortem filij, voluit efficaci voluntate id præcipere, tametsi rem ipsam fieri noluit: sed tantum ut Abrahamus præcepto divino obtemperaret. Similiter Deus

permittit, & vult permittere peccatum : non tamen vult ipsum peccatum , cùm illud oderit & puniat.

Item peccatum prohibet , sed tamen concurrat cum homine ad illud implendum seu patrandum. Quapropter voluntas signi semper includit voluntatem beneplaciti respectui signi , sed eam non semper includit respectu rei significatæ. Observa divisionem voluntatis divinæ , quam attulimus primo loco , scilicet in voluntatem *generalem* & *specialem* , aliis nominibus efferri à sancto Damasceno lib. 2. orthodoxæ fidei cap. 29. *Quin illud quoque* , inquit , *nos ne fugiat, Deum, ut bonitate præstantem , primariè quidem omnes homines servari ac regni sui compotes esse velle : (neque enim supplicij ac cruciatibus causâ , verùm ad hoc ut bonitatis ipsius participes simus nos effinxit :) ut justum autem, iis quoque qui peccant pœnam inferri nihilominus velle. Ac prius illud, antecedens voluntas, seu beneplacitum dicitur ex ipso manans ; secundum, autem, insequens voluntas atque permissio , à nostro vitio ortum ducens.*

Hanc divisionem voluntatis divinæ in *antecedentem*, & *insequentem* , seu consequentem usurpavit sanctus Thomas 1. p. q. 19. a. 6. ad 1. & cum eo Scholastici omnes Theologi, licet in utriusque intellectu ac definitione à sancto Damasceno diffideant.

Etenim voluntas antecedens à sancto Damasceno vocatur *beneplacitum*, estque voluntas Creatoris res à se productas diligentis ; consequens verò dicitur permissio à nostro vitio ortum ducens , & est voluntas justî Judicis , suum cuique pro merito tribuentis. Quod uno verbo exprimitur à Tertulliano , lib. de resurrect. carnis , cap. 14. cum dicit Deum esse *de suo optimum , de nostro justum*.

Voluntas porrò illa antecedens & generalis ex sancti Thomæ aliorumque Scholasticorum doctri-

nâ non semper impletur, sed *inefficax* est, ut aiunt, & conditionibus adjunctis suspenditur, prout mox declarabimus.

Voluntas autem beneplaciti tum ex sancto Thoma 1. p. q. 19. a. 6. & 11. tum ex Scoto in lib. 1. Magistri sentent. distinct. 46. quaestione unicâ, semper impletur.

Quare voluntas antecedens apud sanctum Thomam & Scotum non est semper voluntas beneplaciti, seu uno verbo non est semper beneplacitum, etiamsi à sancto Damasceno beneplacitum nominetur.

At voluntas consequens, quàm *permissionem* sanctus Damascenus appellat, D. Thomæ & Scoto voluntas est beneplaciti, seu voluntas *efficax* & *specialis*: adeo ut voluntas consequens & specialis, voluntas efficax, & voluntas beneplaciti idem omnino apud ipsos significant.

Estius pariter voluntatem consequentem, efficacem agnoscit, non verò antecedentem. Hinc est quod in lib. 1. Mag. Sentent. dist. 46. paragraph. 3. assentitur iis, qui putant voluntatem antecedentem esse tantum eminenter & improprie in Deo, quemadmodum in eo sunt ira, poenitentia, &c. non verò proprie & formaliter, eò quod defectum aliquem, seu impotentiam arguere videatur. Quod Theologis excutiendum relinquimus. Interim verò in scholis.

Voluntas antecedens dicitur ea, quâ Deus nostro concipiendi modo vult aliquid spectatum in se tantum, antequam considerentur ipsius adjuncta, seu circumstantiæ.

Voluntas consequens est ea, quâ Deus vult aliquid consideratum cum omnibus adjunctis, seu circumstantiis.

Voluntas antecedens dicitur etiam *voluntas prima* à sancto Chrysostomo, hom. 1. in Epist. ad

Ephes. voluntas verò consequens dicitur *secundâ*.

Ex hujusmodi voluntatum in Deo distinctione, quæ non à Deo ipso, sed à rebus externis & ab intelligentiæ nostræ imbecillitate repetitur, explicat sanctus Thomas 1. parte quæst. 19. art. 6. ad 1. quomodo verum sit de Deo, quod habetur Psal. 113. v. 11. *omnia quacumque voluit, fecit*: & illud quod ab Apostolo dicitur 1. ad Timoth. cap. 2. v. 4. *omnes homines vult salvos fieri*, quamvis eorum plurimi salvi non fiant. Etenim vult Deus de se omnium salutem, scilicet voluntate Creatoris, voluntate primâ, generali & antecedente, non verò voluntate Judicis, voluntate secundâ speciali & consequente: sive Deus vult voluntate primâ, generali, & *antecedente* omnes homines spectatos tantum ut homines à se procreatos salvari: id enim bonitati Dei maximè est consentaneum. Sed *voluntate secundâ, speciali & consequente* vult quosdam homines consideratos cum peccato adjuncto, seu homines malos damnari, & pœnis, quas promeriti sunt, subjici: nam id postulat ipsius justitia.

. Affert sanctus Thomas exemplum judicis, qui hominem spectatum ut hominem *voluntate antecedenti* vult vivere, sed eundem spectatum ut homicidam capite vult puniri.

Itaque quæcumque voluit Deus *voluntate speciali, consequenti, absolutâ, & efficaci*, fecit: non item quæcumque voluit *voluntate generali, antecedenti, conditionali & inefficaci*, quæ *velleitas* à sancto Thoma loco laudato nominatur: quia licet vera sit voluntas, conditionibus tamen suspenditur.

Sanctus Augustinus in Enchiridio de fide, spe, & charitate num. 27. aliàs cap. 103. aliis modis, quos refert fideliter sanctus Thomas ibidem, explicat hæc Apostoli verba, *omnes homines vult salvos fieri* additque hunc locum posse quocumque aliò sensu intelligi,

intelligi, dummodò contrarius non sit omnipotentia Dei, qui quæcumque *absolutè* & *simpliciter* voluit, fecit.

Omnipotentia Dei.

Omnipotentia Dei propriè est vis seu potestas efficiendi quicquid est possibile. Id autem omne est possibile, quod ordini seu sapientiæ & ideis divinis non repugnat. Potestas illa seu vis agendi in Deo non est res aliqua vel entitas ab ejus essentia, sapientia, & voluntate distincta, ut optimè observat sanctus Thomas primâ parte quæst. 25. art. 5. *nihil est*, inquit, *in Dei potentia, quod non sit in ordine divinæ sapientiæ*: sive, quod cum sapientia & ideis divinis, quæ sunt ordinatissimæ, & idem quid ac essentia divina, non consentiat.

Duplex tamen distingui solet Dei potentia: altera nimirum *absoluta*, altera *ordinaria*, sive, ut ibidem loquitur sanctus Thomas, *ordinata*.

Potentia Dei, *absoluta* est vis seu potestas Dei secundum se spectata, per quam, nullâ habitâ ratione cæterorum suorum attributorum & decretorum facere potest quæcumque sunt possible. Multa autem sunt possible absolutè, quæ non facit Deus, nec facere potest potentiâ ordinatâ: quia cum cæteris suis attributis, putâ cum sanctitate, justitiâ, sapientiâ; cumque ordine; quem sibi, habitâ omnium suorum attributorum ratione, præstituit, non consentiunt. At cum infinita sit illius sapientia, nec ullis limitibus coerceatur, potest innumerabiles alios rerum ordines constituere, secundum quos plurima effecturum fuisse se intelligit, quæ nunc non facit, nec faciet: unde *absolutè* multa facere potest Deus quæ non facit.

Potentia Dei *ordinaria*, seu, *ordinata*, est eadem vis considerata, quatenus exequitur imperium juxta suæ voluntatis in eo rerum cursu & ordine; quem per providentiam suam stabilivit; quo in ordine nihil præscivit se facturum, quod non sit aliquando facturum. Vide sanctum Thomam loco laudato.

Libertas Dei.

Qui ab omni prorsus necessitate, sive intrinsecâ, sive extrinsecâ immunis est, hunc liberum vocare solemus. Utraque verò libertatis species in Deo est conspicua. Primò enim est liber ab omni necessitate extrinsecâ, quæ *coactio* dicitur, quæque est *vis aliqua alicui contra propriam inclinationem illata*: cum nihil certius sit, quàm Deum omnipotentissimum, ac omnium Dominum cogi non posse ab alio, seu nulli coactioni, aut vi externæ esse obnoxium. Secundò, est etiam liber à necessitate intrinsecâ, saltem in iis actibus, quorum terminus est *extra Deum*. Nam duplicis generis actus in Deo distinguuntur à Theologis: alii, quorum terminus est *intra Deum*, qui dicuntur *immanentes*: alii, qui *extra Deum* terminantur, qui *trans-euntes nominantur*. Prioris generis actus vulgò *ad intra*, posterioris generis, *ad extra*, nominare solent Theologi.

Actus, quorum terminus est *intra Deum*, quales sunt *cognitio*, quâ Pater æternus se novit, ac *Verbum* generat; & *amor mutuus* Patris & Filii, quo Spiritus sanctus ab utroque, scilicet Patre & Filio, tanquam ab uno principio procedit; actus, inquam, illi sunt quidem liberi à coactione, quoniam à nulla vi externâ proficiuntur, non tamen ab intrinsecâ necessitate sunt liberi: quia Deus necessario seipsum cognoscit & amat, seu non potest seipsum non cognoscere & amare.

Verum actus , quorum termini sunt extra Deum , qualis est creatio & conservatio mundi, non tantum immunes sunt ab extrinsecâ necessitate, seu coactione, sed etiam à necessitate intrinsecâ: siquidem Deus non necessario mundum produxit, sed retinuit semper potentiam *ad oppositum* , nempe ad non creandum mundum , quia potuit eum non creare , ac modò potest eum non conservare: non enim mundus est objectum sufficiens ad voluntatem divinam necessario rapiendam , cum ea, nisi à summo bono , hoc est , ab ipso Deo , necessario non abripiatur.

At inquires. Deus ab æterno determinatus fuit ad mundum condendum.

Ergo nunquam fuit liber.

Respondeo distinguendo antecedens. Deus ab æterno determinatus fuit ad mundum condendum, & semper retinuit potentiam *ad oppositum* , scilicet ad non condendum mundum, concedo: secus, nego. Quare nego consequentiam. Deus igitur ab æterno statuit mundum condere; sed ipsius decretum fuit liberum, nec sustulit ab eo potentiam *ad oppositum* , scilicet ad non condendum mundum. Nihil enim divinam voluntatem ad ferendum illud decretum necessario impulit; cum nihil ipsam, nisi summum bonum, seu Deus ipse in sui amorem necessario pertrahat.

Quare, cum dicitur Deus jam determinatus ad conservandum mundum, distingui debet propositio hoc modo: determinatus est ratione actûs, concedo: ratione potentix, rursus distinguo: ex hypothese quòd eum conservare decreverit, concedo: absolute, & citra illam hypothese, nego. Duplex igitur distingui potest determinationis species, scilicet *quoad actum*, & *quoad potentiam*. Determinatio *quoad actum*, seu ratione ipsius actûs, est *applicatio facultatis ad ac-*

R ij

tum , ita tamen ut ad eum actum non sit restricta, seu limitata , sed potentiam ad oppositum retineat : quo sensu Deum dicimus determinatum ad mundum conservandum , quia licet eum actu conservet , ab eo tamen conservando potest abstinere, cum ab illius bonitate non necessario trahatur. Determinatio quoad potentiam , sive ratione potentiae , est limitatio & restrictio potentia ad aliquid unum cum exclusione facultatis ad oppositum : ut ignis necessario ex naturâ suâ determinatus est ad comburendum , nec potest naturaliter non comburere. Deus autem non est determinatus eo modo ad mundum conservandum : quia potest eum non conservare , saltem absolutè : quamvis ex hypothesi quòd eum conservare decreverit , jam illum non conservare non possit. Verum ea necessitas , quæ est hypothetica tantùm , quæque liberum voluntatis decretum sequitur , minimè libertatem electionis lædit , ut consentiunt omnes.

Instabis. Nunquam Deus fuit indifferens ad condendum, & conservandum mundum.

Ergo nunquam fuit liber , libertate electionis, ad condendum, & conservandum mundum.

Respondeo distinguendo antecedens. Nunquam Deus fuit indifferens ad condendum , & conservandum mundum, indifferentiâ merè negativâ, quæ est privatio omnis planè determinationis , concedo : nunquam fuit indifferens indifferentiâ positivâ, quæ nihil aliud est , quàm libera facultas agendi, vel ab actu abstinendi , nego : quare nego consequentiam. Equidem Deus nunquam fuit indifferens ad condendum mundum , indifferentiâ mere negativâ , quæ est privatio omnis determinationis : quia nunquam fuit incertus , aut ignarus eorum , quæ acturus esset : sed semper fuit indifferens respectu creationis mundi , indifferentiâ po-

fitivâ , quæ est facultas libera aliquid agendi , aut ab eo abstinendi : nam semper potuit creare mundum , vel non creare ; ac modò indifferens est indifferentiâ positivâ ad ipsum conservandum , vel non conservandum ; quia potest eum conservare , vel , si velit , destruere : quandoquidem non tanta est mundi bonitas , ut voluntatem divinam necessario in sui amorem rapiat.

Decreta Dei.

DECRETA Dei sunt *actus divina voluntatis* , quibus aliquid agere vel permittere constituit , Agit quæ bona sunt , quæ verò sunt mala , permittit , quatenus cum causis secundis ad ea perficienda concurrat , ut jam explicatum est , & ex dicendis clariùs adhuc patebit.

C A P U T VI.

De Deo Creatore.

CUM Deus ab æterno creaturarum omnium possibilitium essentias in suis ideis , per scientiam simplicis intelligentiæ noverit , ut ostendimus ; certum quendam earum numerum secundum æternas & immutabiles suas ideas creare constituit. Atque ita prima actio , quæ Deo ut primæ rerum causæ tribuitur , ipsa est creatio , quâ rebus omnibus , id est , spiritibus & corporibus , (nam aliud creaturarum genus non agnoscimus) existentiam impertiit : quæ actio vulgò definitur , *productio rei ex nihilo* ; sive , ut loqui solent , *productio rei* , tum ex nihilo sui , tum ex nihilo subiecti : v. g. mens hominis à Deo producitur , tum ex nihilo sui , quoniam antequam producat , ni-

hîl est : tum ex nihilo subjecti, quia non fit ex aliquo præjacente subjecto , seu materiâ , instar lapidis , vel arboris , vel aliarum rerum, quæ ex aliqua priori materiâ quotidie generantur.

Mundus autem cùm primùm fuit à Deo productus , non potuit ex aliquo priori subjecto fieri : quia nihil omnino ante mundum conditum extitit, nisi solus Deus , qui cùm sit *omnis entis* , ac perfectionis *plenitudo* , à nullo alio ente manavit, & cæteris omnibus entibus , aliquâ sui participatione existentiam largitus est.

Creationem quidem seu productionem rei ex nihilo capere nunquam potuerunt neque Aristoteles, neque Epicurei , quoniam ad ideam entis summè perfecti, seu entis per essentiam , aut uno nomine *Entis*, non satis attenderunt. Nam Ens ipsum *per essentiam* , & perfectum cæteris entibus *per participationem* , & imperfectis existentiam tribuit ; neque ullum ens à seipso esse potest , nisi ens summè perfectum : quare materia , quæ omnino imperfecta est , à seipsa extare minimè potest : nec proinde verum est vulgatum illud axioma ; quod extat apud Persum Sat. primâ.

Ex nihilo nihil , in nihilum nil posse reverti.

Nam omnia ab eo , *qui est* , educi è nihilo debueret ; omnia sine ipso in nihilum redirent ; solus ille æternus est, solus à seipso, cætera ab illo. Sit igitur

P R O P O S I T I O P R I M A.

S O L U S Deus esse potest increatus, æternus , & à seipso , cætera proinde ab eo facta , seu ex nihilo educta esse necesse est.

Probatur. Illud solum ens est æternum , increatum , & à seipso , quod est ens summè perfectum , ens necessarium , ens per essentiam , ipsum esse.

Atqui solus Deus est ens summè perfectum , ens necessarium , ens per essentiam , ipsum *esse* : cætera verò entia , sive spiritalia , sive corporea sunt imperfecta , & contingentia , nec necessariam in suo conceptu existentiam includunt.

Ergo solus Deus esse potest increatus , æternus , & à seipso : cæteraque proinde ab eo creata esse necesse est.

Responsiones ad objecta.

Objicies primò. Quamvis aliquod ens sit æternum , & necessarium , non tamen debet esse summè perfectum : nam Aristoteles & Epicurei materiam ab æterno extitisse docent , etiamsi eam summè perfectam non judicent.

Ergo nihil prohibet quominus aliquod ens sit æternum præter Deum.

Respondeo negando antecedens. Ens quippe æternum & necessarium est ens *non dependens* , ens à se , seu , quod à seipso suum habet *esse* : sed quod à seipso suum habet esse , id summè perfectum esse necesse est : cum enim sit causa , ut ita dicam , sui *esse* , omnes etiam perfectiones possibiles sibi largiri potest : nam facilius est attributa , aut perfectiones sibi tribuere , quàm ipsum *esse* : ergo ens æternum debet esse summè perfectum.

Ad probationem autem ex Epicureorum opinione petitam , respondeo non magis inferri posse materiam esse æternam , quòd ita concepta sit ab Epicureis , quàm Deum esse corporeum , & humanâ formâ præditum , quòd sic ab *Anthropomorphitis* fuerit confictus : nam utraque idea , sive materiæ à seipsâ æternæ , sive Dei corporei absurdissima est ; neque adeo quidquam ex ea , nisi absurdum consequitur.

Instabis. Si res ita se haberet , mundum creatum

R iiij.

fuisse naturali ratione posset demonstrari.

Atqui tamen id solâ Scripturarum revelatione compertum esse testatur Apostolus ad Heb. cap. 11. v. 3. his verbis , *fide intelligimus aptata esse secula verbo Dei.*

Ergo nihil vetat , quominus materia concipiat-
tur exstitisse ab æterno.

Respondedo distinguendo minorem. Id solâ Scripturarum revelatione compertum , *quantum ad tempus & modum creationis* , concedo : *quantum ad rem ipsam* , nego : quare nego consequentiam. Per Scripturas quidem solas novimus , quo ferè tempore , & quâ ratione conditus fuerit mundus : putâ novimus primò quater mille aut circiter annis ante verbi divini incarnationem omnia *per ipsum verbum* fuisse creata , & *sine ipso nihil factum esse , quod factum est.* Secundò cœlo & terrâ creatis factam fuisse lucem ; tum cætera *aptata* , & perfecta fuisse eo ordine , quo primum caput Genesios exponit : adeo ut sex dierum spatio cuncta *per verbum* produxerit Deus , & septimo die ab omni opere , quod patrarat , requieverit. Verùm non solâ fide creationem ipsam novimus ; nam ratio naturalis creari debuisse mundum ostendit. Etenim si quis creaturas attento animo spectare velit , possibile tantum & contingentem in earum conceptu , non necessariam includi videbit existentiam : adeoque si existant , eas ab alia causa existentiam accipere debuisse , non ab æterno , nec à se ipsis exstitisse , colliget.

Quamobrem non docet Apostolus *sola fide* intelligere nos *aptata esse secula verbo Dei* , nisi quoad modum & tempus : cum mundi creationem , non secus ac existentiam Dei , & humanæ mentis immortalitatem non sola doceat fides , sed etiam suadeat ratio.

Objicies secundò. Saltem Deus potuit mundum

creare ab æterno , ut docet sanctus Thomas , primâ parte quæst. 46. art. 2.

Ergo non ipsi soli sic competit æternitas , quin mundo etiam tribui possit.

Respondeo negando antecedens. Nam non potuit Deus creare mundum ab æterno , si quicquid creatum est, habere debuerit initium. Sed quicquid creatum est habere debuit initium : siquidem quocumque momento in ipsa æternitate conceptum creatum dicatur, id innumera alia momenta debuerunt antecedere : alioquin æternitas non foret infinita , quod absurdum est. Nullum quidem est momentum virtuale *distributivè* per cogitationem nostram acceptum in æternitate Dei , quo Deus non potuerit mundum creare : sed tamen mundi duratio omnibus æternitatis momentis virtualibus *collectivè* sumptis exæquari non potuit : atque ut Dei immensitati , sic æternitati nihil adæquatè coextendi potest. Ergo non potuit Deus mundum creare ab æterno.

Instabis. Tam Deus potuit mundum creare ab æterno , quàm Sol lucem profudisset , si fuisset ab æterno : nam Deus agit *in instanti* , ut vulgò loquuntur , non secus ac Sol lumen profundere dicitur in instanti.

Atqui si Sol fuisset ab æterno , lucem profudisset ab æterno.

Ergo Deus mundum condere potuit ab æterno.

Respondeo negando majorem , & paritatem. Disparitas autem in eo est , quod lumen Solis non sit res aliqua ab ipso Sole aut Solis naturâ distincta , sed modus corporeus essentialis ipsi Soli , quatenus est Sol ; nempe est motus partium , quæ quoquoque versus subtilioris materiæ radios impellunt , sine quo motu Sol non esset Sol. Res autem creatæ sunt quid distinctum à Deo. Quocirca minor propositio , argumenti propositi similis est

R v

illi. Si Sol extitisset ab æterno, fuisset corpus lucens ab æterno, id est, si fuisset Sol, fuisset Sol. Lux quippe, seu luciditas est attributum essenziale Soli, non secus ac rotunditas est attributum essenziale circulo. Quod si lumen sumatur pro eo quod est in æthereis spatiis expansum, id quidem à Sole distinctum est, non tamen est Solis effectus: sed materia subtilis ab eo impulsæ, quæ quamvis celeriter moveatur, non tamen temporis puncto à Sole ad nos usque impellitur, ut norunt Physici. Atque ita, quamvis Sol fuisset ab æterno, non continuò lumen, pro æthereâ substantiâ agitâtâ aut pressâ usurparum, extitisset ab æterno. At verò mundus est effectus Dei, & quocumque momento creatus concipiatur, innumeris anterioribus in Dei æternitate momentis *virtualibus* anteverti debet, nec proinde potest ipsi Deo duratione adæquari.

Eadem est ratio alterius exempli, quod de pedis vestigio afferre solent. Si enim, inquiunt, pes ab æterno fuisset in pulvere, ab æterno quoque vestigium quoddam pedi subesse debuisset. Id quippe verum est, quia vestigium illud non est entitas, aut res à pulvere excavato, & pede premente distincta: sed tantum est hujus pulveris modus, sine quo pulvis ab æterno dici non potuisset excavatus. Nihil igitur his exemplis efficitur, nisi id quod in hypothesi ponitur; nempe lucem ab æterno fuisse extituram, si corpus ab æterno fuisset lucens; & vestigium ab æterno fuisse extiturum ex hypothesi, quod ab æterno fuisset exaratum.

Sed cum mundus sit res à Deo distincta, quæ ipsum duratione adæquare non potest, nullo modo inferre licet mundum ab æterno creari potuisse, tametsi Deus *in instanti* agere concedatur.

Argumentum igitur ex Sole petitum utiliter qui-

dem adhiberi potuit à sanctis Ecclesiæ Patribus adversus Arianos, ut ostenderent Verbum divinum esse Patri cœternum ; quemadmodum lux Solis foret ipsi cœterna , si Sol esset æternus:quia quemadmodum lux Solis non est natura aliqua à Sole distincta ; ita Verbum divinum est Patri consubstantiale , nec habet naturam à Patre distinctam. At si quæ natura à Deo distincta sit , qualis est natura mundi, ea certè momento aliquo creari debuit ; nec unquam duratione suâ Divinæ æternitati corquari potuit.

Quod addunt aliqui , incredibile videri Deum per totam æternitatem nihil creavisse , id à quæstione alienum est , & aptum duntaxat ad gehennas mentibus superbis altiora scrutantibus parandas. Qua de re legi potest Sanctus Augustinus lib. 11. confess. cap. 10. 11. 12. & sequentibus. Præterea constat Deum , qui mundo non indiget , qui-que liberrimus est , potuisse agere *extra se* , cum ipsi libuit : nam *intra se* semper agebat , seipsum contemplando , & amando : neque nunc , postquam mundum condidit , feriari credendus est : siquidem in omnibus rebus operatur , ut auctor est Christus Dominus Johannis cap. 5. v. 17. *Pater meus usque modò operatur , & ego operor.*

Objicies tertio. Ex Aristotele lib. 8. Physicorum, cap. 1. Corpus mobile , seu naturale , fieri non potuit , nisi per motum.

Ergo motus fuit ante mobile , nisi mobile fuerit ab æterno.

Atqui motus non potuit esse ante mobile.

Ergo mobile fuit ab æterno : proindeque mundus , motus , & tempus sunt ab æterno , ut hac ratione sibi persuasit Aristoteles.

Respondeo distinguendo primam propositionem. Mobile fieri non potuit , nisi per motum , si

R. vj

mobile *genitum sit*, esto : si *creatum*, nego. Id quidem, quod fit *per generationem*, fit per motum : nam generatio est motus, aut certe, secundum Aristotelem, motus eam præcedit, nempe *alteratio*, seu *variatio*, quæ apud ipsum est motus. Sed si mobile fiat *per creationem*, & *in instanti*, ut loquuntur, non indiget motu, ut fiat. Id autem latuit non modò Aristotelem, sed veteres etiam ferè omnes. Philosophos, Democritum, Epicurum, &c. mundum fuisse à Deo conditum : imò creationem mundi impossibilem judicabant : nam ex nihilo nihil fieri, in nihilum nihil posse redire, affirmabant. Sed aliter docent Scripturæ sacræ ; aliter ipsa ratio naturalis attendentibus omnibus suadet : nam nulla res finita, contingens, & imperfecta, qualis est rerum omnium creatarum compages, à seipsa existentiam habere potest, ut modò demonstravimus.

Instabis. Si res fuerunt creatæ in tempore, *prius* non erat tempus, cùm tamen illud, *prius* esse non possit sine tempore.

Ergo res in tempore non fuerunt creatæ : sed sunt ab æterno.

Respondeo concedendo antecedens, cujus probationem distinguo ; *prius actuale* non potest esse sine tempore, concedo : *prius virtuale*, nego. Quare nego consequentiam. Nullum quidem est prius aut posterius actuale in æternitate, cum tota simul existat : sed quia hæc est ejus *virtus*, ut omnibus durationis successivæ seu temporis momentis respondeat : hinc mens nostra, cujus admodum angusta est cogitatio, antecedentia & subsequencia in eâ momenta distinguit, quæ *virtualia* vocantur in scholis, ut ad definitionem æternitatis superius annotavimus.

Cùm autem certum sit hunc mundum, & sin-

gula quæ in ipso continentur , à solo Deo fuisse ex nihilo procreata , id in quæstionem venit in Scholis Philosophicis ac Theologicis , utrum creandi potestas ita sit Deo propria , ut creaturæ nunquam tribui possit , neque tanquam causæ principi , neque tanquam causæ instrumentali , quâ Deus ad aliquid creandum utatur , qua de re sit .

PROPOSITIO SECUNDA.

CREATURA potest esse causa *instrumentalis* creationis , dummodò per causam instrumentalem intelligatur causa *occasionalis*.

Probatur. Illud esse potest causa occasionalis creationis , quod determinare potest Deum ad creationem , tanquam occasio.

Atqui creatura potest determinare Deum ad creationem, tanquam occasio : v.g. fieri potest ut Deus aliquam creaturam producat , ad votum alterius creaturæ, ut Solis cursum tenuit in gratiam Josue ; ut etiam occasione corporis organici determinatur quotidie ad mentem creandam in humano fœtu ; & occasione *Sacramentorum*, seu *signorum sensibilibus* determinatur ad conferendam gratiam : nam Sacramenta novæ legis dici possunt causæ occasionales gratiæ, cum eam in mentibus humanis ex omnipotentis beneplacito operentur, ut antea diximus.

Ergo creatura potest esse causa instrumentalis creationis , dummodò per causam instrumentalem intelligatur causa occasionalis. Sed si aliud quiddam, à causa occasionali diversum intelligatur , scilicet *instrumentum* aliquod , quo Deus utatur , ut artifex securi , minimè probabile est creaturam hoc modo concurrere posse ad creationem : cum nihil habeat in se, quo hujusmodi operationis capax efficiatur, ut optimè advertit sanctus Thomas primâ parte quæstion. 45. art. 5. quia non potest

agere in ipsum nihilum , sed tantum in aliquod præjacens subjectum. Multò minùs esse potest causa princeps creationis : quare sit

PROPOSITIO TERTIA.

AL I E N U M à ratione videtur ullam creaturam posse creare , ut causam principem , quæ nempe propriâ virtute operetur. Ita sanctus Thomas loco supra laudato.

Probat. Quod non potest dare esse nihilo , non potest rem aliquam creare , ut causa princeps , nam creatio est productio rei ex nihilo.

Atqui nulla creatura tribuere potest *esse* nihilo : cum illud cuilibet attendenti , clarasque & omnibus innatas ideas diligenter consulenti solius entis per *essentiam* , seu Dei pateat esse proprium , ut aliquâ sui participatione existentiam *non enti* impertiat ; ac ipse solus *vocare possit ea quæ non sunt , tanquam ea quæ sunt* , ut loquitur Apostolus ad Roman. cap. 4. v. 17.

Hinc est quòd sancti Patres creandi virtutem semper spectaverint veluti notam & characterem , quo Deus à creaturis sejungitur : nam hoc argumento , tamquam palmario adversùs Arianos utebantur , ut Verbi æterni divinitatem probarent ; quòd per Verbum omnia creata sint , nihilque sine ipso factum sit.

Ergo nihil minus probabile est , quàm ullam creaturam posse aliquid creare , ut causam principem.

Opponunt adversarii. Si quæ sit ratio quæ prober causam secundam creare non posse , ut causam principem , ea est maximè , quòd ad creandum requiratur virtus infinita.

Atqui non requiritur virtus infinita ad creandum : cum non occurrat distantia , sive , ut aiunt , *disproportio* infinita inter ens creatum , & non ens :

cùmque concursus *materia*, qui suppleri debet, non sit infinitus.

Ergo dari potest creatura creatrix, etiam ut causa princeps.

Responderi solet, & quidem optimè, negando minorem. Nam virtus infinita ad aliquid creandum reipsâ necessaria est: sed ratio quam hujus rei vulgò afferunt, nempe quòd superanda sit distantia infinita: quæ scilicet inter *ens*, & *nihil* reperitur, non videtur satis idonea. Nam inter *ens* quidem infinitum, & *nihil*, distantia est infinita; non verò inter *ens* finitum, & *nihil*: adeoque Deus infinitè distat à nihilo, non item creatura, putà materia: sicque ad producendam materiam superanda non est infinita distantia.

Quod verò aiunt, inter *ens* & *nihil* nullam esse proportionem, sive, ut rectiùs loquamur, habitudinem; id equidem fateor: sed cùm hinc inferunt inter utrumque distantiam infinitam intercedere, conclusionem non admitto: nam inter ea quæ sunt diversi generis, v. g. inter oculum corporeum, & Angelum nulla est habitudo, sive, si ita loqui velint, *proportio*, quamvis infinitè à sese non distent, nisi *negative*, ut loquuntur, quòd ea distantia definiri & determinari non queat. Quamobrem argumento opposito.

Respondeo negando minorem. Ad creandum enim requiritur virtus infinita, cujus ratio non est in eo posita, quòd inter *ens* quodlibet, & *nihil* infinita sit distantia: sed quòd causa creatrix debeat esse *ens* per essentiam, sive *ipsum esse* in se continere, quod soli enti infinito, seu Deo convenit. Nam vera & propria ratio cur causa secunda creare non possit, tanquam causa princeps, hæc est, quòd effectus in suæ causæ virtute totus debeat contineri. Sed materia ipsa in nullius causæ naturalis virtute continetur, nec potest ab

aliâ, quàm à primâ causâ procreari, seu accipere *esse* simpliciter : quandoquidem nulla alia causa, præter primam, est essentialiter ipsa entis plenitudo, quæ à creaturis participari possit : atque ita sola causa prima, quæ virtutem habet infinitam, potest dare rei *totum esse*, sive ex nihilo quidpiam producere. Sola pariter potest creaturarum existentiam conservare, ut jam est ostendendum.

CAPUT VII.

De Deo conservante, & providente.

ACTIO Dei, quâ in principio creavit calum & terram, quâ dixit, *fiat lux, fiat firmamentum, fiant luminaria*, cæteraque omnia, ex quibus hæc universa mundi compages constat, *creatio* dicitur, inspecto primo momento, quo hæc omnia existere cœperunt. Sed cum *verbum* illud, seu divinæ voluntatis actus non statim transeat, aut excidat, sed permanentem habeat virtutem, hinc non ad primum duntaxat momentum referri debet, sed ad subsequenter etiam rerum durationem pertinet : tumque *conservatio* vocatur, quâ Deus creaturas omnes in *esse* conservat, & continet, ac tandiu conservabit, quandiu decretum suum non revocaverit. Itaque *conservatio* est veluti *continuata quedam ac minimè interrupta creatio* : sive potius est idem creationis actus quatenus non primo solum momento, sed subsequentibus etiam temporibus viget.

Duplex tamen distingui solet in Scholis conservationis species: directa scilicet; & indirecta.

Conservatio directa est ea, quam modò definivimus, nimirum *continuata ac minimè interrupta creatio*. Conservatio verò indirecta est *remotio co-*

rum omnium , quæ rei nocere possunt: ut cùm quis accensæ lucernæ flammulam contra ventorum vim manu protegit , eam directè conservare dicitur, removendo scilicet id, quo extingueretur.

Circa priorem conservationis speciem, duo nobis præstanda sunt hoc loco : primum quidem ostendendum eam non esse actionem quamdam à creatione distinctam : deinde sine ipsa res creatas subsistere non posse: sit igitur

PROPOSITIO PRIMA.

CONSERVATIO directa non videtur esse actio, ab ipsa creatione distincta.

Probatur. Quod nihil aliud est quàm creatio ipsa continuata ; ac perseverans , non est actio à creatione distincta.

Atqui conservatio directa nihil aliud est , quàm creatio ipsa continuata , ac perseverans, quatenus scilicet Deus omnipotentissimæ suæ voluntatis actum non revocavit , quo dixit , *fiat lux , fiat firmamentum, &c.* nam divinæ voluntatis actus tandiu res creatas in *esse* continet, quandiu perseverat; nec similis est humanarum voluntatum actibus, qui citò transeunt; sed in perpetuum viger , nisi revocetur.

Ergo conservatio directa non est actio quædam ab ipsa creatione distincta.

Sin autem opponat aliquis creationem & conservationem diversas habere definitiones; proindeque esse actiones diversas.

Respondeo distinguendo consequens. Sunt actiones diversæ penes diversam connotationem, esto : penes diversam rem , nego. Diversa quidem est definitio creationis & conservationis , diversaque utriusque connotatio , seu relatio : nam creatio rem ante non fuisse , conservatio verò rem,

jam antè productam fuisse indicat & denotat: sed tamen idem est utriusque terminus, seu effectus, nempe mundus, & idem principium, nempe Deus: proindeque eadem est actio, quæ quatenus rem primùm efficit, *creatio*; quatenus verò eam in *esse* continet, *conservatio* dicitur.

Instabis. Creatio unico temporis puncto perficitur, conservatio verò diu perseverat.

Respondeo distinguendo propositionem. Creatio momento perficitur, quatenus res primùm in *esse* ponit, concedo: quatenus illas in eo *esse* conservat, nego. Non enim concedimus actionem divinæ voluntatis momento consumi; sed eam perseverantem esse putamus: & consequenter, cum Deus dixerit, *fiat lux, fiat firmamentum*, &c. tandiu res illæ subsistere debent, quandiu pronuntiatum illud pro suâ omnipotentiâ Deus non revocaverit. Nunc sit

PROPOSITIO SECUNDA.

CREATURÆ omnes egent directâ Dei conservatione.

Probat. Quæ non possunt in *esse* perseverare sine continuata Dei creatione, ipsa indigent perpetuâ Dei conservatione: conservatio enim directâ est *continuata rei creatio*, ut modò dictum est.

Atqui creaturæ non possunt in *esse* permanere, sine continuata Dei creatione, id est, sine perseverante Dei voluntate eas in *esse* continendi: nam cum sint entia per participationem, nec existentiam habeant nisi à voluntate divinâ, ideo tantùm esse cœperunt, quia Deus illas primùm esse voluit, cum dixit, *fiat lux, fiat firmamentum*, &c. ac proinde tandiu subsistunt, quandiu voluntas illa divina, seu potiùs divinæ voluntatis actus perseverat, casque in *esse* tuetur.

Et sanè quod nunc existam, ut rectè ratiocina-

tur Cartesius in fine responsionum ad secundas objectiones metaphysicas, tertiâ propositione, quâ Deum existere demonstrat, non hinc sequitur debere me post horam existere, nisi existentia mihi continuo tribuatur ab eo, qui est ens per essentiam.

Ergo creaturæ continuatâ Dei creatione indigent, ut existere pergant: nec solum quantum ad fieri, ut loquuntur, seu, quantum ad primam creationem, sed etiam quantum ad esse, id est, quantum ad conservationem, à prima causa effetrice essentialiter pendent: ut collustratio loci alicujus continuum Solis influxum postulat, sine quo nulla foret collustratio.

Responsiones ad objecta.

OBJICES primò. Opus artefactum sine artifice remanet.

Ergo opus naturale stare potest citra perpetuum Auctoris sui influxum.

Respondeo negando consequentiam, & paritatem. Opus enim artefactum non habet *esse simpliciter*, seu *totum esse* ab artifice; sed tantum *tale esse*, hoc est, partium dispositionem: nam partes totius artefacti, secundum entitatem, prius existebant, quàm ab artifice disponerentur, nec ab artificis voluntate pendeabant, ut existerent. At creaturæ sunt tantum entia per participationem, quæ ideo tantum existunt, quòd à Deo indefinenter fluant, sicque continuo illius influxu indigent. Quare si cessaret voluntas, quâ Deus res creatas vult existere, eæ quoque ab ipso emanare desinerent, ac proinde in nihilum redirent. Ergo quamvis res artefacta sine artifice subsistere possit, non tamen res creata potest citra Dei conservationem in *esse* perseverare.

Objicies secundò. Quod semel habuit *esse*, non potest desinere *esse*.

Sed creaturæ in ipsa creatione habuerunt *esse*.

Ergo non possunt desinere *esse*.

Respondeo distinguendo majorem. Quod semel habuit *esse*, non potest desinere *esse*, per se, concedo : per cessationem influxûs ejus causæ, à qua habuit *esse*, nego : unde concedo minorem, & nego consequentiam. Cum enim creaturæ à Deo profluant, ut lux à Sole, non possunt *per se* desinere *esse*, sive seipsas in nihilum redigere : sed si Deus influere in eas cessaret, nulla foret entis emanatio ; nulla entis participatio ; & consequenter in nihilum redirent.

Corollarium I.

ETIAMSI Angeli, & mens humana sint substantiæ incorruptibiles, quæ *ab intrinseco* quidem, & ratione sui corrumpi nequeant, semperque vivant, seu mortales sint ; possunt tamen *ab extrinseco* desinere *esse* : nam cum sint entia duntaxat per participationem, si Deus influxum suum subduceret, non jam *esse* participarent, sed in nihilum ruerent : quod obscuri loci à Sole collustrati exemplo facillimè intelligitur.

Corollarium II.

IBI corpora existunt, ubi Deus ea vult existere : & consequenter corpus, quod nunc existit Lutetiæ, potest, si Deus velit, sequenti momento sine ulla intermissione existere Romæ, etiam si per interjecta loca non transferatur. Nam actus divinæ voluntatis, quo res creantur & continuè ac sine intermissione conservantur, nullis locis est illigatus ; sed Deus, ubicumque vult,

operatur. Hacque ratione explicari potest *agilitas* corporis gloriosi : nam ibi *corpus gloriosum* post resurrectionem à Deo ponetur , id est creabitur , seu conservabitur , ubi mens beata cupiet : cumque cogitatio nostra seu desiderium à loco in locum feratur , quamvis per interjecta spatia non transeat , nec interposita claustra perfringat , ibi reperietur corpus gloriosum, ubi erit desiderium, seu cogitatio , non trajectis spatiis intermediis , non effractis claustris interpositis. *Certè* , inquit Sanctus Augustinus lib.22. de civit. Dei cap.30. *ubi volet spiritus, ibi protinus erit corpus.*

Corollarium III.

Fieri non potest , ut vel passer in terram cadat , quemadmodum loquitur Christus Dominus Matth. cap.10. v.29. sine Dei voluntate : vel ulla res sive spiritalis , sive corporea , etiam minima , Divinam providentiam fugiat. Nam res quælibet , quantulacumque sint, ut folium , ut capillus , vel pulveris granum , ubicumque existant; sive moveantur , sive quiescant, præientissimâ semper & potentissimâ Dei voluntate indigent ut conserventur. Sed nunc dicendum

De Providentia.

Quæcumque Deus initio condidit , ea perpetuò in omni statu & modo , quo existunt , conservat , ut modò dictum est : & proinde res planè omnes Providentiâ suâ regit , ac gubernat. *Providentia* autem nihil aliud est , nisi *æterna quædam dispositio , & ratio, quâ singula in suos fines peculiare , & omnia simul in finem universalem, scilicet , ad Dei ipsius gloriam diriguntur.* Diverso autem modo corpora & mentes in suos fines colli-

neant. Etenim mentes quidem suâ se libertate movent , & ordinario tantum , de quo mox agerem , Dei auxilio , seu concursu ad agendum indigent : corpora verò , cum se movere nequeant , à Deo moveri ac determinari debent, secundum leges ab ipso præscriptas, quas infringere non valent.

Hæ leges , quibus corpora omnia perpetuò moventur , *fati* nomine olim apud Ethnicos designabantur : quod cum à *fando* dicatur , spectari solebat veluti *pronuntiatum* quoddam , quo non tantum corporibus , sed ipsis etiam animis necessitatem indeclinabilem inferri putabant aliqui , ut Democritus , Heraclitus, Empedocles, &c. quemadmodum refert Tullius circa finem libri de fato. Sed alii melius hanc necessitatem corporibus solis impositam arbitrabantur.

Juxta posteriorem hanc , saniolemque sententiam definitur *fatum* à Boëtio lib.4. de consolatione Philosophiæ , *prosa 6. inharens rebus mobilibus dispositio , per quam Providentia suis quæque necit ordinibus* , id est , certa quædam ordinatissimaque motuum omnium corporeorum distributio , quâ corpora omnia in destinatos sibi fines promoventur. Sed cum motus illi voluntates humanas abducere nequeant , eæ liberis actibus , & propriâ determinatione in finem tendunt , ut modò diximus.

Non possunt tamen homines finem suum ultimum sive beatificam Dei possessionem , ad quam creati sunt , naturalibus viribus obtinere : finis quippe supernaturalis , qualis est Dei possessio, seu jucundissima cum Deo viso & amato conjunctio , non potest nisi viâ seu medio supernaturali comparari. At propterea, quemadmodum Angeli in viâ adhuc constituti , sic Adamus in statu innocentiae positus , supernaturali Dei Creatoris auxilio indigebat , nunc autem post humanæ na-

turæ lapsum ipsius posterî gratiâ *Christi Salvatoris*, quæ multò est validior, indigent, ut ad beatam felicitatem perveniant. Qui autem ad eam perveniunt, ii sunt *prædestinati*; qui non assequuntur, *reprobi*, vocantur. Itaque providentia divina, si comparatè ad homines solos consideretur, duas in se partes continet secundùm S. Thomam 1. p. quæst. 22. scilicet *prædestinationem* & *reprobationem*.

Prædestinatio porrò generatim est prævia quædã destinatio: unde hac voce continentur ea omnia, quæ Deus ab æterno facturum se constituit. Hinc S. August. lib. de dono perseverantiæ num. 41. aliàs cap. 17. in *sua*, inquit, *qua falli mutarique non potest præscientiâ opera sua futura disponere, id omnino, nec aliud quidquam est; prædestinare*. Quo quidem modo prædestinationis nomen non minùs ad damnationem & pœnam, quàm ad Salutem & gloriam refertur. Quare ab eodem S. Doctore in Enchiridio ad Laurentium num. 26. aliàs cap. 100. Deus dicitur *bene utens & malis tanquam summè bonus ad eorum damnationem, quos justè prædestinavit ad pœnam, & ad eorum salutem, quos benignè prædestinavit ad gratiam*, id est, ad gloriam, seu ad vitam æternam: est enim *gratia Dei vita æterna*, ex Apostolo ad Rom. cap. 6. v. 23. Similiter prædestinationis nomen tum quoad bonum, tum quoad malum adhibetur à Concil. Trident. sess. 6. Can. 17.

Communiùs tamen prædestinatio reprobationi opponi solet, & de solis *electis*, dicitur; unde etiam *electio* nominatur.

Definitur autem prædestinatio hoc sensu sumpta à Theologis, *divina destinatio natura intelligentis ad gloriam per gratiam*. A S. Thoma 1. p. quæst. 23. art. 1. dicitur *ratio transmissionis creaturæ rationalis in finem vitæ æternæ*: & art. 2. ejus-

dem quæstionis , *ratio ordinis aliquorum in salutem æternam in mente divina existens* : & art. 3. ad 1. *causa gratia in presenti , & gloria in futuro.*

Quæ quidem definitiones intelligi possunt de prædestinatione tum Angelorum , tum etiam hominum ante & post lapsum humanæ naturæ. Sed cum eorum statuum distinctio , nimirum *status innocentia originalis* , & *status natura per peccatum lapsæ* , magni momenti visa sit S. Augustino ad exponendam prædestinationis doctrinam , ideo Sanctus ille Doctor solius hominis lapsi , & à peccati servitute liberandi prædestinationem definit lib. de dono perseverantiæ num. 35. aliàs cap. 14. his verbis. *Hæc est*, inquit, *prædestinatio sanctorum nihil aliud : præscientia scilicet & præparatio beneficiorum Dei , quibus certissimè liberantur , quicumque liberantur.*

Dicitur *præscientia* : quo vocabulo intelligunt aliqui scientiam , quæ *simplicis intelligentiæ* nominatur , quâ Deus novit generatim vias omnes , seu *media* , quibus salvari possunt homines , antequam hæc vel illa auxilia his aut illis hominibus præparet seu dare decernat. Unde , inquiunt , subjungitur , & *præparatio* , id est , actus , seu decretum voluntatis divinæ subsequens scientiam *simplicis intelligentiæ* , quo decreto Deus certa præparat & præstat beneficia seu media ad æternam felicitatem conducentia.

Alii hujus præscientiæ nomine intelligunt *scientiam* , quæ dicitur *visionis* , quæque voluntatis divinæ decretum habet adjunctum. Nam , inquiunt , non est præscientia generalis gratiarum omnium , quas Deus præstare potest omnibus hominibus : sed est præscientia specialis futurorum beneficiorum seu gratiarum , quibus decrevit liberare eos qui liberantur ; eaque proinde cum eorundem beneficiorum præparatione est conjuncta , & decretum
Dei

Dei comitatur. Quare idem S. Doctor lib. de præd. Sanctior. num. 19. aliàs cap. 10. ita scribit. *Prædestinatio. . . sine præscientia non potest esse: potest autem esse sine prædestinatione præscientia: prædestinatione quippe Deus ea præscivit qua fuerat ipse, facturus* Præscire autem potens est etiam qua ipse non facit, sicut quacumque peccata. Et lib. de dono perseverantiæ num. 47. aliàs cap. 18. *Prædestinatio significatur etiam nomine præscientia, sicut ait Apostolus, non repulit Deus plebem suam, quam præscivit; hic quod ait, præscivit, non rectè intelligitur, nisi prædestinavit: quod circumstantia ipsius lectionis ostendit.* Præscientia enim divina in scripturis respectu electorum seu prædestinatorum, est scientia dilectionis & approbationis; sive est ipsa prædestinatio: sed respectu malorum & reproborum est scientia improbationis, quâ Deus non approbat nec eligit reprobos, quos idcirco ignorare seu nescire dicitur. Unde idem S. Doctor eod. lib. num. 48. aliàs cap. 19. *Quid ergo nos prohibet, quando apud aliquos verbi Dei tractatores legimus Dei præscientiam, & agitur de vocatione electorum, eandem prædestinationem intelligere.*

Est igitur prædestinatio, præscientia simul & præparatio beneficiorum Dei; id est, omnis generis gratiarum: in quibus sunt præsertim vocatio secundum propositum, justificatio, & demùm perseverantia finalis, quibus certissimè à peccati servitute liberantur, quicumque liberantur, nimirum electi omnes. Quod paucis verbis complexus est Beatus Fulgentius l. 3. de veritate prædestinat. cap. 5. *Prædestinavit ergo Deus sanctos suos & ad gratiam vitæ bonæ, & ad gratiam vitæ æternæ, id est, & ad gratiam & ad gloriam, seu felicitatem æternam, quæ gratia nominatur in scripturis, ut modò advertimus ex Apostolo, & patet adhuc Johan. cap. 1. v. 6. ubi sic habetur, de plenitudine ejus nos om-*

nes accepimus, & gratiam pro gratiâ, seu gratiam glorificationis pro gratiâ justificationis. Idcirco vita æterna dicitur etiam *gratia* à sancto Augustino Epistolâ 194. aliàs 105. num. 19. aliàs cap. 5.

Prædestinatio quidem propriè accepta, & prout hic à sancto Augustino definita est, æternam gloriam spectat, cum sit præparatio beneficiorum Dei ad consequendam æternam gloriam: sed tamen dici potest fieri & ad *gratiam vitæ bonæ*, & ad *gratiam vitæ æternæ*, secundum S. Fulgentium, id est, & ad medium & ad finem; sive ad *gratiam* & ad *gloriam*. Nihilominus finis primariò spectatur & ordine intentionis antecedit medium. *Nam quos præscivit Deus*, inquit Apostolus ad Rom. cap. 8. v. 29. nempe *scientia visionis*, imò & *approbationis*, quæ adjunctum habet divinæ voluntatis decretum, id est, quos prædilexit, & *elegit ante mundi constitutionem*, sive quos ab æterno suos facere in sua præscientia decrevit, eos & *prædestinavit conformes fieri imagini filii sui..... quos autem prædestinavit, hos & vocavit, & quos vocavit, hos & justificavit: quos autem justificavit, illos & glorificavit*. Quibus verbis prædestinatio ad gloriam indicatur ordine intentionis esse prior vocatione, & vocatio prior justificatione. Sed ordine executionis præit vocatio, tum sequitur justificatio, & tandem glorificatio.

Nota hîc vocationem intelligi, non quamcumque; *multi enim*, docente Christo Domino, Matth. c. 20. v. 16. *sunt vocati, pauci verò electi*: sed vocationem secundum propositum, ut loquitur Apostolus ad Rom. cap. 8. v. 28. id est, secundum æternum Dei decretum, quo merâ suâ bonitate vocavit, quos æternæ gloriæ participes efficere constituit: & consequenter vocationem secundum propositum sequuntur tum justificatio, tum perseverantia finalis in bono, & ipsa glorificatio.

Qui verò justificati in acceptâ justitiâ non perseverant usque in finem , *temporales* vocantur à S. Augustino lib. de correp. & grat. num. 42. & lib. de don. persever. num. 57. & 61. prout fuerat ante indicatum à Christo Domino Matth. cap. 13. v. 21. Marc. cap. 4. v. 17. Luc. cap. 8. v. 13.

Cum ergo in peccato nascantur omnes Adamæ posterî , nec proinde gratiam aut gloriam à se ipsis mereri possint , eos , non ex præviis ipsorum meritis ; sed gratuitâ Dei benignitate , tum ad gloriam , tum ad gratiam eligi seu prædestinari constat : idque multis locis declarat Apostolus , ut epist. ad Tit. cap. 3. v. 5. *non ex operibus justitia , qua fecimus nos , sed secundum suam misericordiam salvos nos fecit.* Et ad Romanos cap. 11. v. 5. *Reliquia secundum electionem gratia salva facta sunt :* id est , quemadmodum olim in veteri testamento querentē Eliæ Prophetas occisos esse ab impiis Judæis , quæ ad Idola defecerant , sic respondit Deus : *reliquæ mihi (non ipsi se servaverunt) septem millia virorum , qui non curvarunt genua ante Baal ;* ita hoc tempore , postquam annuntiatur Evangelium , ex infinita pene hominum , qui pereunt , multitudine , reliqui facti sunt pauci , qui *secundum electionem gratiæ* æternâ vitâ sunt donandi. Si autem gratiâ , jam non ex operibus , alioqui gratia jam non est gratia. Et cap. 9. ejusdem epist. v. 11. 12. 13. *Cum enim nondum nati fuissent , aut aliquid boni egissent , aut mali , (ut secundum electionem propositum Dei maneret) non ex operibus , sed ex vacante dictum est ei , quia major serviet minori , sicut scriptum est , Jacob dilexi , Esaiâ autem odio habui. Quem locum explicans S. August. in Enchiridio de fide , spe & charitate num. 25. aliàs cap. 98. sic scribit. Qua in re si futura opera vel bona hujus vel mala illius , quæ Deus utique præsciebat , vellet intelligi , nequaquam diceret , non ex operibus ; sed*

diceret ex futuris operibus ; eoque modo istam solveret quaestionem ; imò nullam , quam solvi opus esset , faceret quaestionem . Et lib. 2. contra duas Epistolas Pelagianorum num. 15. aliàs cap. 7. sic ipsos Pelagianos increpat . Profectò desipitis qui dicente veritate , non ex operibus , sed ex vocante dictum est , vos dicitis ex futuris operibus , quæ Deus illum facturum esse præsciebat , Jacob fuisse dilectum : atque ita contradicitis Apostolo dicenti , non ex operibus : quasi non posset dicere , non ex præsentibus , sed ex futuris operibus : sed ait , non ex operibus , ut gratiam commendaret .

Sed ut omne dubium circa mentem Apostoli penitus tollatur , ac liquidò constet dilectionem , de quâ fit mentio his verbis , *Jacob dilexi* , esse omnino gratuitam ; videndum quid Apostolus ipse respondeat objectioni , quam sibi sub alterius persona proponit v. 19. ejusdem capituli . *Dices itaque mihi ; quid adhuc (Deus) queritur ? Voluntati enim ejus quis resistit ?*

Quam objectionem ut dissolvat , non confugit ad prævisionem meritorum futurorum , quæ solutio , ut observat S. Aug. Epist. 194. aliàs 105. num. 35. aliàs cap. 8. ad Sixtum esset facilis , si vera foret : sed mysterium prædestinationis humanæ rationi impenetrabile esse ostendit hac responsione : *o homo tu quis es , qui respondeas Deo ? Nunquid dicit figmentum ei qui se finxit , quid me fecisti sic ? an non habet potestatem figulus luti ex eadem massa facere aliud quidem vas in honorem , aliud in contumeliam ?* Et sub finem capituli undecimi totam illam de prædestinatione sanctorum disputationem his verbis concludit : *o altitudo divitiarum sapientia & scientia Dei : quàm incomprehensibilia sunt judicia ejus , & investigabiles (id est , impervestigabiles) viæ ejus !* Mysterium autem prædestinationis non esset impenetrabile , si ex prævisis me-

ritis fieri cum Pelagianis, vel etiam cum Semipelagianis perhiberetur, ut per se manifestum est.

Pelagius quippe Monachus Anglus circa annum Christi 410. docuit prædestinationem ad gloriam non fieri nisi ex prævisis meritis, eaque merita omnino esse naturalia, & in bono usu libertatis humanæ posita, non à gratia Christi profecta. Admittebat quidem nomen *gratia*, quam nempe in lege atque doctrina, & in exemplis Christi constituebat: sed eam non tenebat gratiam, per quam, ut ait S. Augustinus lib. de grat. Christi, num. 11. aliàs cap. 10. *non solum suadetur omne quod bonum est, verum & persuadetur.* Itaque & prædicabat ipse, & omnes cum eo Pelagiani affirmabant Adamum suo peccato sibi soli nocuisse, non posteris; nulloque proinde nos originis peccato sauciatos; sed robustos ac valentes, & ad æternam gloriam propriis viribus promerendam comparatos. Cùmque urgebantur circa necessitatem baptismi, quo in Ecclesia Catholica non tantum ætate majores, verum etiam infantes sunt abluendi, respondebant, referente S. Aug. lib. 3. contra Julianum num. 8. aliàs cap. 3. infantes ideo baptizari, quia *Christus qui est operis sui redemptor..... quos fecerat condendo bonos, facit innovando adoptandoque meliores.* Quæ responsio ad nihilum ferè baptismi sacramentum redigit. Nam si nihil in parvulis occurrit immundum, cur abluuntur? Cur exorcizantur & exsufflantur, si minimè sint in Dæmonis potestate? Cur dictum est Johan. 3. v. 5, *nisi quis renatus fuerit ex aquâ & Spiritu Sancto, non potest introire in regnum Dei?*

Ad proscribendos autem illos Pelagii & Pelagianorum errores cum Romanis Pontificibus universa conspiravit Ecclesia in variis Conciliis.

Semipelagiani verò agnoscebant peccatum originale; ideoque sacramentum regenerationis ad

salutem necessarium esse cum Ecclesia Catholica constanter tenebant: sed in eo maximè digni erant reprehensione, quod salutis initium à nobis vel-
lent repetendum. De iis ita scribit D. Prosper in Epistola ad S. Augustinum, quæ præmissa est libro ejusdem sancti Augustini de prædestinat. San-
ctorum, num. 3. *Hæc ipsorum definitio ac professio est: omnem quidem hominem Adam peccante peccasse; & neminem per opera sua, sed per Dei gratiam regeneratione salvari. Universis tamen hominibus propitiationem, quæ est in sacramento sanguinis Christi, sine exceptione esse propositam, ut quicumque ad fidem & ad baptismum accedere voluerint, salvi esse possint. Qui autem credituri sunt, quive in ea fide, qua deinceps per gratiam sit juvanda, mansuri sunt, præscisse ante mundi constitutionem Deum, & eos prædestinasse in regnum suum, quos gratis vocatos, dignos futuros electione, & de hac vita bono sine excessuros esse præviderit.*

Cumque iis difficultas proponebatur de parvulis, in quibus nullus est libertatis usus, & quorum tamen alii ad gratiam baptismi vocantur, alii non item: ad scientiam futurorum conditionalium exploratricem confugiebant, ut ex eodem D. Prospero intelligimus ibid. num. 5. *Tales aiunt perdi, talesque servari, quales futuros illos in annis majoribus, si ad activam servarentur ætatem, scientia Divina præviderit. Idem sentiebant de iis nationibus quæ vel in præteritis seculis dimissa sunt ingredi vias suas; vel nunc quoque adhuc in veteris ignorantia impietate depererunt scilicet, prævisos inquirunt à Domino credituros & ad unam quamque gentem ita dispensata tempora ac ministeria magistrorum, ut exorta erat bonarum credulitas voluntatum.*

Verùm hæc explicandæ prædestinationis ratio, cum iis quæ docet Ecclesia, conciliari non va-

let. Nam primò scientia Divina non prævidet ea quæ nunquam futura sunt, ut supra ostendimus c. 5. Deinde si Deus expectaret creatæ voluntatis nuntium, antequam gratiam conferre decerneret, initium fidei ac salutis nostræ à nobis foret, non à Deo: nec Deus nos discerneret; sed ipsi nos discernere contra clarissimam & certissimam Apostoli doctrinam 1. ad Cor. cap. 4. v. 7. *Quis enim te discernit? Quid habes quod non accepisti? Si autem accepisti, quid gloriaris, quasi non acceperis?* & Ep. ad Ephes. c. 1. v. 4. *elegit nos in ipso (Christo) ante mundi constitutionem, ut essemus sancti & immaculati in conspectu ejus in charitate.* Non dicit Apostolus, *elegit nos*, quia nos sanctos fore prævidit, sed *ut essemus sancti*, ut ostendat sanctitatem & justitiam esse effectum, non causam electionis æternæ. Quo testimonio Pelagianos urget S. Augustinus lib. de prædestinatione Sanctorum num. 37. aliàs cap. 18. *Elegit ergo nos Deus in Christo ante mundi constitutionem, prædestinans nos in adoptionem filiorum: non quia per nos sancti & immaculati futuri eramus: sed elegit prædestinavitque ut essemus. Fecit autem hoc secundum placitum voluntatis suæ, ut nemo de suâ, sed de illius erga se voluntate gloriatur.*

Idem S. Doctor num. 23. aliàs cap. 12. ejusdem libri, ut alibi sæpè, ostendit prævisionem meritorum minimè locum habere posse in parvulis, qui vel suscepto baptismo moriuntur, & ad gloriam perveniunt; vel ante regenerationis sacramentum à vitâ migrant, & *in tenebras exteriores mittuntur.* Neque verò parentum diligentiae aut negligentiae tribuendum, quod parvuli vel lavacro regenerationis abluantur; vel sine baptismo decedant. *Plerumque enim* inquit, lib. de dono perseverantiæ num. 31. aliàs cap. 12. *festinantibus parentibus, & paratis ministris, ut baptismus parvulo detur, Deo*

tamen nolente non datur , qui eum paululum in hac vita non tenuit , ut daretur. Quid etiam quodd ali- quando parvulis infidelium filiis potuit , ne irent in perditionem ; & filiis fidelium non potuit baptis- mate sub-veniri ? Idem ferè repetit Epist.194. aliàs 105. num.32. aliàs cap.7.

Quod verò dicunt aliqui gratuitam quidem esse prædestinationem ad gratiam, quâ gloriam promeremur ; sed ipsam gloriam ob merita præcedentia concedi ; id nihil est. Nam ipsi spectant *ordinem executionis* , quo certum est opera bona, quæ per gratiam fiunt , priora esse , & antecedere gloriam , quæ bonorum operum est merces. Sed si spectetur *ordo intentionis* , gratia non antecedit gloriam ; imo eam subsequitur.

Non tamen per doctrinam gratuitæ prædestinationis ad gloriam inducitur fatum aut desperatio, aut in agendo segnities, ut malè propter angustior- em intellectum sibi persuadebant Pelagiani & Semi- pelagiani. Nam qui ad salutem æternam gratis prædestinantur , eam non obtinent , nisi per bona opera, quæ præveniente , & voluntatem præparante Salvatoris gratiâ ab ipsis fiunt : unde per præde- stinationem procuratur iis audiendum Christi E- vangelium, offeruntur occasiones bene agendi ; ex- citantur ut orent & bene agant ; suis, & amicorum, sive qui sunt in cœlo, sive qui adhuc vivunt, preci- bus per merita Redemptoris impetrant auxilia effi- cacia, quibus sanctè, sed liberè vitam instituant, ac in finem usque in amore Dei per Christum perseve- rent : hæc enim omnia beneficia in prædestinatio- nis definitione comprehenduntur.

Quicumque ergo, inquit sanctus Augustinus lib.de Corrept. & Grat. num. 13. aliàs cap.7. ab illa originali damnatione istâ divina gratia largitate dis- creti sunt , non est dubium quod & procuratur eis audiendum Evangelium ; & cum audiunt ; credunt ;

Et in fide qua per dilectionem operatur, usque in finem perseverant; Et si quando exorbitant, correpti emendantur, Et quidam eorum, etsi ab hominibus non corripiantur, in viam, quam reliquerant, redeunt; Et nonnulli acceptâ gratiâ, in qualibet ætate, periculis huius vita mortis celeritate subtrahuntur. Hac enim omnia operatur in eis, qui vasa misericordia operatus est eos, qui Et elegit eos in filio suo ante constitutionem mundi per electionem gratia. Si autem gratia jam non ex operibus, alioquin gratia jam non est gratia. Non enim sic sunt vocati ut non essent electi; propter quod dictum est, multi enim vocati pauci vero electi: sed quoniam secundum propositum vocati sunt, profectò Et electi sunt per electionem, ut dictum est, gratia, non precedentium meritorum suorum; quia gratia illis est omne meritum.

Jam qui prædestinati non sunt, ii reprobī vocantur. Reprobatio quippe opponitur prædestinationi, & definitur, preparatio pœna æterna ob peccata prævisa irroganda. Nam quamvis prædestinatio sine prævisione meritorum fiat, reprobatio tamen non fit nisi intuitu peccati saltem originalis.

Docent quidem S. Thomæ discipuli reprobationis, quam negativam vocant, nullam esse causam meritoriam in creaturâ: sed Deum sine ulla prævisione vel boni vel mali operis, sive primorum parentum, sive aliorum, ab æterno voluisse quosdam eligere ad gloriam, quosdam non eligere. Idque probant ex S. Thom. 1. p. q. 23. a. 5. ad 3. ita scribente, quare hos elegit in gloriam, Et illos reprobavit, non habet rationem nisi divinam voluntatem.

Hanc autem reprobationem ideo negativam vocant, quia non existimant Deum sine ullo peccati intuitu quosdam sive Angelos sive Homines ab æterno positivè prædestinasse ad pœnam: adeo ut illos eo duntaxat consilio creaverit, ut essent vasa iræ; eamque ob causam Adami lapsum & cate-

ra peccata ordinaverit , ut homines , quos ad interitum destinaverat , horrendis inferorum cruciatibus in æternum subjicerentur , quemadmodum impiè docuerunt quidam nostri temporis heterodoxi : sed tantummodò putant Deum *non elegisse* quosdam ad gloriam per gratiam , quia nec gloriam iis debet nec gratiam , etiam ante peccatum originale.

Hæc tamen Thomistarum opinio durior aliis videtur , nec tantum cum voluntate *antecedenti* , quâ Deus omnes homines vult salvos fieri , ut docet D. Thomas 1. p. q. 19. art. 6. ad 1. sed etiam cum S. Augustini doctrinâ malè cohærens.

Etenim S. Augustinus duplicem distinguit hominis statum ; scilicet *statum innocentia originalis* , in quo conditus fuit Adamus ; & *statum naturæ per peccatum lapsa* , in quo post Adami culpam versantur ejus posterii.

In primo statu indigebat homo *gratiâ creatoris* , quæ erat *adjutorium sine quo* non poterat æternam gloriam consequi. Sed adjutorium illud , quod in illustratione mentis & excitatione voluntatis consistebat , non tantæ erat virtutis , ut voluntatem humanam ad agendum certissimè determinaret ; cum hæc sit gratiæ medicinalis Christi prerogativa , ut mox dicemus.

Itaque poterat homo in illo statu cum eo adjutorio agere quando volebat , ut nunc voluntas nostra concursum Divinum exigit ad operandum in ordine naturali : sed non ipsi dabat *velle* ; seu voluntatem ad agendum non determinabat. Idem de Angelis in *statu viæ* positus est cogitandum : siquidem aderat illis auxilium sufficiens , quo possent agere ; non quo ad agendum applicarentur.

Verum in secundo statu , scilicet post primi parentis peccatum , opus nobis est *gratiâ Salvatoris* , quæ multò est valentior : quæque non tantum est

adjutorium sine quo non possumus agere; sed etiam auxilium quo certissimè ad agendum determinamur : nam operatur in nobis & velle & perficere. Vide S. Augustinum lib. de Corrept. & Grat. num. 29. 30. & sequentibus, aliàs cap. 11. & 12.

Sin autem audiantur Thomistæ, necessaria semper fuit prævia gratiæ efficacis determinatio ad bene agendum ; eaque ejusdem fuit efficaciz sive in statu naturæ innocentis , sive in statu naturæ lapsæ : nec ullum proinde , quantum ad illud, occurrit discrimen apud Thomistas inter statum innocentiz , & statum naturæ per peccatum lapsæ : ac eodem planè modo de prædestinatione & reprobatione in utroque statu judicant.

At diversa est prædestinationis ratio secundum S. Augustinum pro diverso naturæ humanæ statu. Siquidem in primo statu hominis (idem de Angelis in statu viæ positus est sentiendum) prædestinatio sequebatur prævisionem meritorum : nulla verò fuisset reprobatio , si nullum exitisset peccatum. Quomodo autem admisisset Adamus peccatum, nisi adfuisset ipsi *auxilium sufficiens* , quo ad libitum uti potuisset ? id certè intellectu est difficillimum : nam nemo peccare videtur in iis quæ absolute & sine sua culpa vitare non potest, ut sequenti capite dicemus ex S. Augustino lib. de Corrept. & Grat. num. 29. 30. & seq. aliàs cap. 11. Sive ergo dicant Thomistæ Adamo , cum adhuc erat innocens , denegatum fuisse auxilium, quo posset bene agere ; sive ipsum physicè præmotorum fuisse ad actum peccati contendat , magnæ utrimque occurrunt ambages ex quibus non facilè sese expediunt. Licet enim hominibus peccato sive originali , sive actuali inquinatis non debeat Deus auxilia supernaturalia ad bene agendum necessaria : tamen cum homo est innocens, ut erat Adamus , ubi primum è Divinis manibus

prodiit , ipsum Deus non deserit , nisi prius ab eo deferatur. Nihilominus id Thomistis est familiare , Deum ad æterno sine ullo respectu ad peccatum voluisse quibusdam *non dare* gloriam per gratiam , primumque hujus *negativa* reprobationis effectum , esse *permissionem* peccari , propter quod pœnæ inferuntur.

Quod autem attinet ad secundum statum , in quo nunc propter peccatum primi hominis nascuntur omnes illius posterì , nihil discriminis esse videtur inter Thomistas & sancti Augustini discipulos : nam & hi & illi cum Apostolo statuunt ex massa perditionis liberatos esse per misericordiam Dei quicumque in Christo liberantur , reliquos verò justè propter peccatum saltem originale condemnatos. De hoc autem duntaxat statu intelligendum videtur quod retulimus ex D. Thoma ; *quare hos elegit in gloriam , & illos reprobavit , non habet rationem , nisi Divinam voluntatem*. Itaque reprobatio in hoc statu dici potest *negativa* , quatenus reprobi relinquuntur à Deo in massa corruptionis ; *positiva* verò , quatenus ob peccatum pœnis destinantur.

Prima igitur causa damnationis hominum est peccatum originale : ac licèt in iis , qui aquâ regenerationis per baptismum sunt abluti , prorsus deleatur quantum ad culpam , seu reatum , aut labem , quâ inquinatur anima rationalis , remanet tamen appendix illius , nimirum concupiscentia , quâ per totam vitam sollicitantur homines ad malum seu peccatum actuale , per quod denuò cælesti gratiâ excidunt , & pœnam merentur , à quâ non possunt nisi Christi mediatoris sanguine , per sacramenta tanquam per canales defluente , liberari.

Sed uberior earum rerum tractatio Theologos respicit. Legatur tomus decimus operum sancti

Augustini Edit. Monach. Benedictin. Cong. sancti Mauri : vel saltem libri de gratia Christi , de perfectione justitiæ , de correptione & gratia , de prædestinatione Sanctorum , de dono perseverantiæ , quibus addes Epistolam 217. aliàs 107. ad Vitalium ; Ep. 194. aliàs 105. ad Sixtum ; & Carmen de ingratis D. Prosperi. Cum enim S. Augustinus & ejus discipuli D. Prosper , D. Fulgentius , alii-que contra hostes gratiæ Christi Pelagianos & Semipelagianos dimicare coacti sint , accuratiùs Ecclesiæ Doctrinam circa gratiam & prædestinationem expresserunt , quam anteriores Ecclesiæ Doctores , qui quamvis in eadem sententia , quam hauserant ab Apostolò , versarentur : cum tamen nullis permerentur adversariis , minùs cautè in sermonibus præsertim , quos habebant ad populum , de hoc argumento disputabant. Unde ipse sanctus Augustinus lib. 1. contra Julianum num. 22. aliàs cap. 6. de sancto Chrysostomo hæc habet. *Vobis (nimirum Pelagianis) nondum litigantibus securiùs loquebatur. Et lib. de prædestinat. Sanctorum num. 27. aliàs cap. 14. Certè enim si de divinarum scripturarum tractatoribus , qui fuerunt ante nos , proferrem defensionem hujusce sententia , quam nunc solitò diligentius atque copiosius contra novum Pelagianorum defendere urgemur errorem profectò hi fratres , pro quibus nunc agimus , adquiescerent. Quid igitur opus est , ut eorum scrutemur opuscula , qui priùs quàm ista hæresis oriretur , non habuerunt necessitatem in hac difficili ad solvendum questione versari : quod proculdubio facerent si respondere talibus cogerentur.* Adeundus igitur sanctus Augustinus ab iis qui circa hanc materiam erudiri cupiunt : nam ipse ab Ecclesia Romana , tanquam Doctor gratiæ proponitur , ut rectè inter cæteros admonet Petavius Tom. 1. Theol. Dogm. lib. 9. §. 6. Vide pariter sanctum Thomam 1. part. q. 23.

integrâ. Nos ut ad ea quæ providentiæ divinæ executionem spectant , quæque motione & concursu continentur , veniamus , de Deo movente & concurrente cum cæteris Philosophis postremo tandem loco disputabimus.

CAPUT VIII.

De Deo movente & concurrente.

UT ad destinatos sibi fines perducantur creaturæ , quas condidit & conservat Deus , *cujus providentia in sui dispositione non fallitur* , perpetuum ipsius auxilium desiderant , sine quo inefficaces prorsus forent , omnisque motûs & actûs expertes.

Sed cum duplicis generis sint creaturæ , ut diximus ; aliæ spirituales , aliæ corporeæ : non eodem modo Deus in utrisque operatur. Etenim creaturæ spirituales vim agendi ab ipso accepere ; corpora verò moveri tantum possunt non se movere. Cumque hæc satis distingui non soleant in Scholis , hinc fit ut in varias ambages incidant Philosophi , à quibus ut caveamus , corpora seorsim spectabimus ; tum ad mentes veniemus : sed prius definitiones sunt ponendæ.

Definitiones.

Motionis seu præmotionis aut prædeterminationis nomine intelligitur prævius quidam actus aut influxus alicuius rei vel causæ in aliam , quo hæc ad actum seu motum determinatur.

Motio quippe & præmotio , determinatio & prædeterminatio idem omnino significant: nam qui

mover seu determinat , prius agit : qui prius agit , præmover , seu prædeterminat : igitur qui mover , præmover ; qui determinat , prædeterminat.

Motio spectari potest vel respectu spirituum , vel respectu corporum.

Motio respectu corporum consideratur vel in Deo , vel in causis secundis.

Motio corporum in Deo est continuata corporum creatio , seu conservatio in diversis locis successivè.

Motio corporum in causis secundis sive spiritalibus , sive corporeis , est actio causæ secundæ , per quam velut occasionem corpora transferuntur à loco in locum , sive in diversis locis successivè conservantur : v. g. occasione actûs meæ voluntatis , pars quædam organica mei corporis in diversis locis successivè conservatur : occasione impulsione unius corporis , aliud corpus à loco in locum transfertur , aut alteri applicatur : ut ventorum impulsione navis ad scopulos alliditur.

Motio seu præmotio respectu spirituum spectatur similiter , vel in Deo vel in causis secundis.

Præmotio spirituum spectata in Deo vel generalis est , vel specialis.

Præmotio generalis est impressio aut inclinatio seu propensio ab Auctore naturæ spiritibus omnibus per creationem indita , & per conservationem jugiter continuata , per quam in bonum seu felicitatem generatim semper feruntur ; & malum seu miseriam nunquam non averfantur. Exempli gratia voluntas humana in quovis homine spectata miseriam generatim , quantum potest , refugit ; & felicitatem generatim prosequitur , licet ipsam aliquando quærat in iis rebus , in quibus non est posita.

Præmotio seu prædeterminatio specialis dicitur , quâ quædam causa secunda spiritalis ad actum

aliquem specialem à Deo movetur aut excitatur : rursusque duplex est , scilicet , vel physica , vel moralis.

Præmotio physica specialis ea dicitur , quâ causa secunda efficaciter & physicè ad actum seu motum specialem à Deo determinatur : eaque considerari potest vel respectu intellectûs , vel respectu voluntatis.

Præmotio physica specialis respectu intellectûs creati, est illustratio ipsius intellectûs , quâ rerum speciebus à Deo informatur resque ipsas percipit. Non enim aliâ ratione moveri concipitur intellectus ; ut inferiùs explicabitur. Quod spectat ad eum , quem in nobis experimur , & cujus conscii sumus , sensum intimum , putà vel gaudii vel doloris, &c. illum p.riter à Deo Physicè in nobis effici nemo jure negat.

Præmotio Physica specialis respectu voluntatis creatæ est actio Dei quâ voluntas creata ad bonum aliquod speciale applicatur , & consequenter à malo retrahitur ; sive clariùs est actio quâ Deus amorem boni alicujus determinati , & consequenter odium mali oppositi in voluntate creata cum ipsâ simul producit. Non enim aliter Deus movet voluntatem creatam , quàm in eâ operando boni amorem , ex quo mali odium consequitur. Itaque cum voluntas creata satis determinetur ad bona ordinis naturalis per generalem in bonum universè præmotionem , vi cujus ipsa per se in malum sub specie boni spectatum prorumpere potest sine speciali Dei determinatione , ut inferiùs explicabimus : hinc liquet præmotionem illam specialem Dei ad eos tantùm actus pertinere , qui sunt ordinis supernaturalis ; nec ipsam ullatenus à gratiâ victrici & per se efficaci differre. In hoc autem sita est gratia per se efficax ex S. Augustino lib. de spiritu & litterâ , num. 51. aliàs cap. 29.

quod Deus *inspiratâ gratia suavitare per Spiritum sanctum faciat plus delectare quod præcipit, quàm delectat quod impedit.* Sive, quod idem est, Deus per gratiam suam in mente nostrâ, circa verum bonum & verum malum prius illustratâ suavissimam delectationem Physicè & intrinsecè producit, ac simul voluntatem nostram præter ordinem naturalem specialiter movet ad amorem ejus quod imperat, & odium ejus quod prohibet. Hac ratione intelligere licet quod habetur Proverb. c. 21. v. 1. *Cor regis in manu Domini: quocumque voluerit, inclinabit illud.* Inclinat autem illud in bonum semper, nec in malum potest inclinare.

Præmotio moralis est excitatio quædam voluntatis creatæ facta secundum hominum morem & consuetudinem; nempe exterius alliciendo, blandiendo, terrendo, minitando, aliâve consimili ratione apud homines usurpatâ, quæ non vincit per se resistantiam creatæ voluntatis; sed eam tantum excitat. Hac ratione orator auditores movet, egenus prætereuntes flectit. Deus quidem aliquando movet voluntatem creatam, eâ motione morali, ut postea dicemus; sed causæ secundæ non possunt aliter ipsam movere.

Superest concursus, quem *simultaneum* vocant, quique vulgò definitur cooperatio unius causæ cum alia ad eundem effectum producendum: ut cum duo bajuli simul lecticam ferunt. Non autem eo duntaxat modo concurrat Deus cum voluntate creatâ: siquidem unus bajulus non est alteri bajulo subjectus, nec ab eo pendet quoad nisum & actionem; sed tantum ab illo adjuvatur, ut ambo simul eundem effectum producant; voluntas autem creatâ Deo subjecta est, & ab eo pendet ut operetur.

Si tamen concursus nomine intelligatur auxilium uni causæ ab alia præstitum secundum

illius indigentiam , sive , ut loqui solent , *exigentiam* : quemadmodum bajulo in terram sparso , & sub onere anhelanti , opemque imploranti manum tendo , ut auxilio meo adjutus sese erigat : tum nihil obstat quominus Deus cum voluntate creata concurrere affirmetur , ut postea probabimus. Sed singula ordine sunt pertractanda : atque ut à corporibus incipiamus, sit

P R O P O S I T I O P R I M A.

Deus corpora omnia physicè mover seu præmover.

Probat. Qui motum omnem corporibus tribuit , is corpora omnia physicè mover seu præmover.

Atqui Deus motum omnem corporibus tribuit. Nam corpus quodlibet sive crassum, sive exiguum, si ratione sui & secundum ideam corporis omnibus hominibus innatam , remotis infantiae præjudiciis , consideretur , omnis actûs & motus est expers ; nec moveri potest , nisi ab alio moveatur. Cumque in moventibus & mobilibus progressum in infinitum ratio non admittat , ut antea dictum est : primum aliquod movens agnoscere necesse est , à quo motus omnis initium ducatur, & in corpora transmittatur ; sive , ut clariùs loquamur , quod corpora in diversis locis successivè conservet : non enim aliter corpora moverentur, ut mox dicemus.

Ergo Deus corpora omnia physicè mover ac præmover.

Oppones Deum corporibus facultates quasdam concessisse, quibus se moveant. Nam, v.g. corpora gravia moventur deorsum; arbores & omnia viventia crescendo se movent; animalia omnia artus suos agitant, ut à loco in locum progrediantur.

Ergo corpora omnia non præmoventur physicè & immediatè à Deo , sed tantùm *permissivè* , ut aiunt , & mediatè , quatenus nempe ipsis facultates concessit Deus , quas ad usum applicare ipsis permittat. Eaque est opinio Durandi in lib. 2. Magistri Sententiarum , distinctione 1. quæst. 5. quæ Gassendo ac Epicureis vehementer placet ; cum ii quasdam atomos naturaliter actuosas , quasdam inertes esse velint , quod refelletur in Physica.

Respondeo negando antecedens. Deus enim vim sese movendi corporibus non tribuit , si corpora omnia ratione sui sint inertia , & minimè actuosas. Atqui corpora omnia ratione sui inertia sunt & minimè actuosas : nec corpus quiescens sese ad motum excitare potest , nisi ab alio moveatur , prout ad ideam corporis attendenti constat. Ergo Deus vim sese movendi corporibus non tribuit. Imò nec ab aliis corporibus moventur , nisi , ut à causis occasionalibus , quibus ad ipsa in diversis successivè locis conservanda Deus determinatur , ut mox videbimus.

Quod verò ad corpora gravia spectat , ea non moventur à seipsis ; sed à liquido corpore , ut in Physica dicemus : liquidum autem corpus à Deo in motu continetur. Atque ita motus gravium corporum à Deo proficiscitur.

Simili modo plantæ augeſcunt , dum tenuiores succi nutritii particule subtilioris materiæ vi sursum pulsæ per quosdam plantarum tubulos seu canaliculos ascendunt , ut etiam in Physica declarabitur. Subtilior autem illa fluidaque materies à Deo movetur , ut modò dictum est.

Eadem est ratio motionis , sive pedum , sive aliorum organorum in animalibus : nam objectorum externorum occasione secundùm præscriptas ab Auctore naturæ leges , certi quidam excitantur.

tur motus in tenui illa mobilique substantia , quæ à sanguine in cerebro expressa , & in nervis recepta *spiritus animalis* appellatur. Hæc autem substantia , quatenus nervos subit , ac musculos implet , ipsos artus agitat : hincque oriuntur motus voluntarii in homine , quatenus nempe occasione actûs voluntatis magna spirituum animalium copia ad certas corporis partes confluit , quas secundum legem ab Auctore naturæ corpus inter & mentem stabilitam , movet : hos spiritus agitat subtilior materia , quæ à Deo movetur , ut non semel admonuimus. Ergo corpora omnia à Deo moventur, seu præmoventur, non *permiffivè* duntaxat & *mediatè*, quasi facultates tantum iis concesserit Deus , quarum usum ipsis permittat ; sed *immediatè* , & physicè ; ita ut illa in motu ponat ; quod ut expressius determinemus, sit

P R O P O S I T I O S E C U N D A.

MO T I O sive præmotio corporis à Deo non est actio à creatione & conservatione corporis revera distincta.

Probatur. Ea actio non est ab ipsa creatione & conservatione corporis distincta , quæ nihil aliud est quàm ipsamet continuata corporis creatio, seu successiva ipsius in diversis locis conservatio.

Atqui motio corporis à Deo nihil aliud est, quàm *continuata corporis creatio* , seu , *successiva ipsius in diversis locis conservatio* , ut definivimus. Tunc enim corpus creari intelligitur , cum extra nihil ponitur ; tunc verò intelligitur conservari, cum continuè creatur : idque vel in eodem loco, & tunc quiescere dicitur ; vel in diversis locis cum aliqua temporis successione , & concipitur moveri.

Ergo motio seu præmotio corporis à Deo,

non est actio à creatione & conservatione reverà distincta.

Enimverò si fingamus animo Deum nihil aliud velle, quàm corpus aliquod creare: certè vi istius actionis corpus illud erit alicubi. Jam verò si Deus non aliud velit, quàm corpus ita conservare in pluribus locis, ut nusquam quiescat, hoc ipso solo corpus moveri intelligetur; nec multitudo locorum actionem aliam specie distinctam à conservatione exiget: neque proinde hæc duo *physicè*, & reipsà; sed *metaphysicè* tantùm seu *formaliter* & secundùm diversam *connotationem*, seu relationem sunt distincta. Ergo unâ & eâdem âctione corpus à Deo creatur, conservatur & movetur.

Quod si dicas motionem esse posteriorem creatione, quia nihil movetur, nisi quod fuit creatum.

Respondeo cum distinctione. Motio est posterior creatione, sumptâ pro actione, quâ primùm corpori existentia concessa est, concedo: posterior est creatione spectatâ, quatenus est continuata & perseverans corporis in variis locis productio, nego. Cum enim corpus à seipso non existat, creari primùm debuit, ut existeret: deinde continuatâ quâdam conservatione indiget, ut subsistere pergat. Non potest autem conservari, quin certo loco & tempore conservetur: quare si pluribus locis successivè conservari dicatur, statim moveri intelligitur. Atque ita motio nihil creationi addit, nisi simplicem quamdam, ut aiunt, *connotationem*, seu relationem ad loca diversâ; ut conservatio nihil eidem creationi adjicit, nisi *connotationem*, seu respectum ad tempora diversâ. Unde creatio, conservatio, & motio, pro una eademque actione diverso modo spectata videntur usurpandæ.

Cum verò hæc omnia de motionem corporum non ægrè à Philosophis admittantur, opus modò

est ut expendamus , quòd multò est operosius, quomodo Deus cum spiritibus creatis operetur. Cùmque duplex præsertim in iis facultas occurrat, altera *passiva*, nimirum intellectus ; altera *activa*, scilicet voluntas: quâ ratione utraque moveatur à Deo, explicandum nobis incumbit: fit igitur

P R O P O S I T I O T E R T I A .

Deus intellectum creatum physicè movet ac præmovet , quatenus ipsum indefinenter illuminat.

Probatur. Movere intellectum creatum est ipsum determinare ad intelligendum , seu percipiendum.

Atqui Deus intellectum creatum determinat ad percipiendum, quatenus ipsum indefinenter illuminat, rerumque ideas ipsi exhibet ; sive per seipsum solum , absque causa occasionali ; sive occasione motûs spirituum animalium , secundum legem quam inter corpus & mentem tulit , ut occasione quorundam corporis motuum, quasdam in mente perceptiones excitaret, & vice versâ: non enim intellectus creatus seipsum illuminat, ut constabit ex dicendis inferiùs, sessione tertiâ, cap. 4. propositione 2. & 3.

Ergo Deus intellectum creatum movet ac præmovet quatenus ipsum illuminat.

P R O P O S I T I O Q U A R T A .

Deus voluntatem quoque creatam physicè movet & præmovet præmotione generali.

Probatur. Præmotio Generalis est *impressio seu inclinatio quadam voluntati create ab Auctore natura per creationem indita , & per conservationem jugiter continuata per quam voluntas ad bonum seu sc-*

licitatem generatim semper contendit : quæ quidem impressio non uni aut alteri substantiæ spiritali est propria, sed omnibus est communis , seu ad omnes generatim pertinet, ut antea fuit definitum.

Atqui Deus hac motione voluntatem creatam physicè movet & præmovet : nam creatura nihil habet à seipsa : & consequenter cum hujusmodi nisus aut propensio in voluntate creatâ semper vigeat: necesse prorsus est ut à Deo jugiter influente conservetur. Unde nisi voluntas creata impressionem illam aliò deflecteret, seu potius sisteret, dum in privatis bonis, quæ apparentia tantum sunt, non vera bona , conquiescit , semper recti essent illius motus.

Ergo Deus voluntatem creatam physicè movet ac præmovet præmotione generali.

Hæc sanè mens est sancti Thomæ 1. 2. quæst. 9. art. 6. ubi docet naturalem humanæ mentis ad bonum universale inclinationem , quæ *præmotio generalis* à nobis dicitur , à Deo solo proficisci, licet homo libero suo arbitrio ipsam ad malum sæpè numero detorqueat , quatenus bonis creatis, quæ tantum apparentia bona sunt immoratur. Quare idem sanctus Doctor in responsione ad tertiam objectionem , quâ dicitur futurum ut voluntas creata nunquam in malum propenderet , si semper à Deo moveretur, hæc habet: *Deus, inquit, movet voluntatem hominis sicut universalis motor ad universale objectum voluntatis , quod est bonum : & sine hac universali motione , homo non potest aliquid velle. Sed homo per rationem determinat se ad valendum hoc vel illud, quod est verè bonum, vel apprensens bonum. Sed tamen interdum specialiter Deus movet aliquos ad aliquid determinatè volendum, quod est bonum, sicut in eis , quos movet per gratiam.* Ex quibus verbis sequitur

PROPOSITIO QUINTA.

DEUS movet etiam physicè voluntatem humanam motione speciali per gratiam ad actus bonos & supernaturales, putà ad actus fidei, spei & charitatis.

Probatur. Qui operatur in nobis & velle & perficere pro bona voluntate, sive pro gratuità & speciali benevolentia, is certè voluntatem humanam physicè mover & præmover motione speciali ad actus bonos & supernaturales: siquidem operatio quæ reipsà facit *velle* ex beneplacito seu gratuita specialique benevolentia, specialis est non generalis; physica, non duntaxat moralis.

Atqui Deus, ex Apostolo ad Philippenſes c. 2. v. 13. *operatur in nobis & velle & perficere pro bona voluntate*, hoc est, operatur in nobis supernaturalem boni amorem, facitque efficacissimà suà gratià, ut sordescant nobis bona sensibilia, æternum verò & incommutabile bonum nos delectet. Ea-que gratia *gratuita* est, & speciali Dei beneplacito datur. Unde præmittuntur ab Apostolo hæc verba: *cum metu & tremore vestram salutem operamini*, Siquidem cum de actibus præsertim supernaturalibus agitur, *non sufficientes sumus cogitare aliquid à nobis, quasi ex nobis; sed sufficientia nostra ex Deo est*, ut habet idem Apostolus Epistolâ 2. ad Corinth. cap. 3. v. 5.

Ergo Deus movet etiam physicè voluntatem humanam motione speciali per gratiam ad actus bonos & supernaturales.

Confirmatur conclusio communibus Ecclesiæ precibus. Nam Dominicâ 13. post Pentecosten, sic Deum orant Fideles: *Da nobis fidei, spei & charitatis augmentum: & ut mereamur assequi quod promittis, fac nos amare quod præcipis*. Et Dominicâ 4. *Ad te nostras*

nostras etiam rebelles compelle propitius voluntates. Et Dominicâ 10. quos divinis reparare non desinis sacramentis tuis non destituas benignus auxilium, &c.

Quocirca sanctus Augustinus lib. de correptione & gratia, num. 29. 30. & sequentibus, aliâs cap. 11. & 12. hoc statuit discrimen inter gratiam Creatoris, quâ nempe donati sunt, tum Angeli in sua creatione, tum primi hominum parentes in statu innocentiae, & inter gratiam Salvatoris, quâ hominibus lapsis post peccatum originale tribuitur, quod illa subdita esset libero creaturæ rationalis arbitrio, sano scilicet & incolumi, ei-que occasione desiderii sui daretur, quemadmodum nunc concursus divinus nobis accommodatur, ut dicemus postea; hæc verò liberum arbitrium peccato labefactatum, pravisque cupiditatibus continuo laceffitum præverrat, & ad agendum determinet. Sic enim loquitur num. 31.

Nec ipsum ergo (Adamum) Deus esse voluit sine sua gratia, quam reliquit in ejus libero arbitrio. Quoniam liberum arbitrium ad malum sufficit, ad bonum autem parum est, nisi adjuvetur ab omnipotenti bono. Quod adjutorium si homo ille per liberum non deseruisset arbitrium, semper esset bonus: sed deseruit & desertus est. Tale quippe erat adjutorium, quod desereret, cum vellet, & in quo permaneret, si vellet, non quo fieret, ut vellet. Hæc prima est gratia, quæ data est primo Adam, sed hæc potentior est in secundo Adam. Prima est enim, quâ fit ut habeat homo justitiam, si velit: secunda ergo plus potest, quâ etiam fit ut velit, & tantum velit, tantoque ardore diligat, ut carnis voluntatem contraria concupiscentem voluntate spiritus vincat.

Hoc etiam discrimen inter gratiam Creatoris & gratiam Salvatoris, refert sanctus Thomas 2. 2. quæst. 137. art. 4. ad 2. quamvis sancti Thomæ discipuli communiter existiment in utroque statu,

scilicet tam in statu innocentiae, quam in statu naturae lapsae, necessariam semper fuisse gratiam praeventientem, & speciali motione determinantem ad bene agendum, quae opinio cum sancti Augustini doctrina loco laudato minùs congruit.

Etenim, inquit, ibidem num. 32. *Si hoc adjutorium vel Angelo vel homini, cum primum facti sunt defuisset, quoniam non talis natura facta erat, ut sine divino adjutorio posset manere, si vellet, non utique suâ culpâ cecidissent: adjutorium quippe defuisset, sine quo manere non possent. Nunc autem quibus deest tale adjutorium, jam poena peccati est: quibus autem datur, secundum gratiam datur, non secundum debitum; & tantò ampliùs datur per Jesum Christum Dominum nostrum, quibus id dare Deo placuit, ut non solum adsit, sine quo permanere non possumus, etiamsi velimus; verum etiam tantum ac tale sit, ut velimus.*

Et num. 38. aliàs cap. 12. ejusdem libri. *Nam si in tanta infirmitate vita hujus, (in qua tamen infirmitate propter elationem reprimendam perfici virtutem oportebat,) ipsis relinqueretur voluntas sua, ut in adjutorio Dei, sine quo perseverare non possent, manerent si vellet, nec Deus in eis operaretur ut vellet: inter tot & tantas tentationes infirmitate suâ voluntas ipsa succumberet, & ideo perseverare non possent, quia deficientes infirmitate nec vellet, aut non ita vellet infirmitate voluntatis, ut possent. Subventum est igitur infirmitati voluntatis humana, ut divinâ gratiâ indeclinabiliter & insuperabiliter ageretur; & ideo quamvis infirma, non tamen deficeret, neque adversitate aliquâ vinceretur.*

Quomodo autem gratia illa actualis quâ fit ut velimus, quæque per se efficax nominatur, voluntatem nostram ad bonum determinet, disci potest ex eodem sancto Doctore variis locis. In Enchiri-

dio de fide , spe & charitate ad Laurentium , num. 22. aliàs cap. 81. sic loquitur. *Duabus ex causis peccamus ; aut nondum videndo quid facere debeamus , aut non faciendo quod debere fieri jam videmus : quorum duorum illud ignorantia malum est , hoc infirmitatis. Contra quæ quidem pugnare nos convenit : sed profectò vincimur , nisi divinitus adjuvemur , ut non solum videamus quid faciendum sit , sed etiam accedente sanitate delectatio justitiæ vincat in nobis earum rerum delectationes , quas vel habere cupiendo , vel amittere metuendo , scientes videntesque peccamus ,* Et libro secundo de peccatorum meritis , num. 26. aliàs cap. 17. *Nolunt homines facere quod justum est , sive quia latet an justum sit , sive quia non delectat. Tantò enim quidque vehementius volumus , quantò certius , quàm bonum sit , novimus , eoque delectamur ardentius. Ignorantia igitur & infirmitas vitia sunt , quæ impediunt voluntatem ne morveatur ad faciendum opus bonum , vel ab opere malo abstinendum. Ut autem innotescat quod latebat , & suave fiat , quod non delectabat , gratia Dei est , quæ hominum adjuvat voluntates. Hinc est quòd idem S. Doctor lib. 10. Confess. num. 60. aliàs cap. 37. his verbis Deum compellat : da quod jubes , & jube quod vis.*

Corollarium.

Ex his testimoniis aliisque innumeris quæ transcribi possent , omnino constat duas esse veluti partes gratiæ actualis secundum sanctum Augustinum , scilicet *gratiam luminis* , quâ mens nostra illustratur , ut videat quid sit agendum ; & *gratiam delectationis* atque *amoris* , quâ ad agendum suavissimè , sed certissimè & efficacissimè determinatur. Nam & suavissimam delectationem , & supernaturalem boni amorem simul in nobis Deus operatur.

Lumen quippe ignorantiam & tenebras nostras discutit ; delectatio sancta malam cupiditatem vincit. Hinc est quòd gratiam actualem, quæ efficax dicitur, quæque mentem interius mutat, seu physicè & efficaciter mover, non exterius tantum excitat, idem sanctus Doctor definit lib. 4. contra duas epistolas Pelagianorum ad Bonifacium, num. 11. aliàs, cap. 5. *Inspirationem dilectionis ut cognita sancto amore faciamus.* Quod brevius exprimit Ecclesia in hymno sancti Spiritus. *Accende lumen sensibus, infunde amorem cordibus.*

Fatentur Catholici omnes supernaturale gratiæ auxilium Adamo etiam in statu innocentiae constituto fuisse necessarium ; cum nempe ordinatus esset ad finem supernaturalem, scilicet ad fruitionem Dei, quæ non potest nisi supernaturali viâ & & ratione obtineri : sed docent eruditi quidam inutilem ipsi fuisse gratiam delectationis, solâque ei opus fuisse, gratiâ luminis ; quoniam in eo statu non esset vincenda cupiditas : sed utramque tamen in eo admisit sanctus Augustinus, quia creatura, quantumvis innocens, per se tamen facilimè deficit, continuoque eget Dei auxilio præsertim in ordine supernaturali, non tantum ad videndum, quid factò sit opus, sed etiam ad illud sancto amore perficiendum.

Cum inspiratio illa dilectionis, tam potens est & valida, ut voluntatem humanam ad actum bonum supernaturalis ordinis certissimè determinet, tum gratia *per se efficax* dicitur : nam & *velle est perficere in nobis operatur* ; seu voluntatem nostram ad agendum reipta ac physicè determinat, hoc est, eam mutat, & in id, quod bonum est, convertit, aut in bono conservat. Sed cum ea minus potens est, ac voluntatem excitat tantum ad aliquem actum, aut effectum quem reipsa non producit, vocatur tantum gratia *excitans*, quâ vo-

luntas reipsâ quidem, physicè & *intrinsecus* excitatus ad actum bonum, sed ad eum perficiendum non omninò determinatur.

Hæc igitur excitans gratia interiùs movet: verum alia est exterior & moralis motio, de qua sit

PROPOSITIO SEXTA.

DEus præterea movet voluntatem humanam, motione speciali ac morali.

Probatur. Motio moralis ea dicitur, quâ una res aut causa ab alia re aut causa excitatur *moraliter*, id est, secundum *morem* & consuetudinem hominum, nempe blandiendo, minitendo, exemplis externis provocando, aliisque similibus modis.

Atqui Deus voluntatem humanam hoc modo movet & præmovet: nam modò justæ suæ vindictæ, modò misericordiæ exempla nobis ob oculos ponit, ut à vitiis nos retrahat, & ad virtutem extimulet: modò sacrorum verbi sui præconum ministerio, ad meliorem vivendi rationem nos vocat ut nemini ignotum est.

Ergo Deus movet etiam ac præmovet humanam voluntatem motione speciali & morali.

Quamquam fatendum aliam requiri motionem, ut certò & efficaciter ad bonum determinemur. Unde sanctus Augustinus lib. 2. oper. imperfecti. contra Julianum cap. 157. sic Pelagianos arguit. *Admoneo ut intelligatis, cui gratia sitis inimici, negando operari Deum voluntates in mentibus hominum: non ut nolentes credant, quod absurdissimè dicitur; sed ut volentes ex nolentibus fiant. Non sicut facit Doctor homo, docendo & hortando, minando, & promittendo in sermone Dei: quod frustrâ fit, nisi Deus intus operetur & velle per investigabiles vias suas. Et sanctus Prosper carmine de ingratia.*

*At verò omnipotens hominem cum gratia salvat,
 Ipsa suum consummat opus , cui tempus agendi
 Semper adest, qua gesta velit : non moribus illi
 Fit mora : nec causis anceps suspenditur ullis.*

Corollarium.

Hæc propositio , *Faciendi quod in se est Deus non deest , nec denegat gratiam* , vera est præsertim in homine Christiano & justo faciente quod in se est per auxilium supernaturale à Deo præstitum : quippe Deus ipsi non denegat gratiam , ut in bono perseverare possit. Ac reverà homini justo præter potentiam naturalem , seu voluntatem liberam , quâ potest bene agere , & à malo abstinere si velit , adest gratia habitualis , quæ etiam sanctificans , & justificans nominatur , quæque est bona qualitas, seu bonus habitus in mente humanâ permanenter inhærens , tanquam forma spiritalis , ut scholæ loquuntur , hominemque reddens formaliter justum & sanctum , non secus ac sapientia sapientem , non efficienter , seu tanquam causa efficiens , sed formaliter , id est , tanquam forma , seu causa formalis , aut qualitas spiritalis , constituit. Hæc gratia sanctificans ex S. Thom. i. 2. quæst. 106. art. 2. ad 2. *quantum est de se , sufficiens auxilium dat ad non peccandum.* Quod quidem auxilium sufficiens intelligit S. Thomas in genere auxilii habitualis , quantum ad sufficientiam operativæ virtutis , ut colligitur ex art. 2. quæstionis 109. sequentis : adeo ut in eo genere nihil desit operativæ virtuti , putà humanæ voluntati , ut dicatur posse bene agere vel à malo abstinere : complectur tamen complemento ultimo per gratiam actua-lem , quæ vel excitans est , quæque sufficiens dicitur in Schola Thomistarum , quâ scilicet voluntas humana potentiam habet expeditam & proximam

bene agendi , aut ab actu malo abstinendi ; vel est efficax , quâ voluntas reverâ bene agit , aut ab actu malo abstinet. Falsa verò est propositio , si hoc sensu exponatur , *Facienti homini cuilibet quod in se est per solas naturæ vires Deus certâ lege dat gratiam*. Etenim voluntas humana in statu nature lapsa non est causa occasionalis gratiæ divinæ , nec quisquam potest illam actibus naturalibus promereri.

Quamvis autem Deus præmoveat nostram voluntatem in actibus bonis & supernaturalibus : nihil tamen vetat quominus cum ipsa concurrere ad actus omnes naturales , tum bonos , tum malos dicatur , dummodo *concurrit* nomen secundum allatam à nobis definitionem accipiat. Sit igitur

PROPOSITIO SEPTIMA.

DEus item dici potest concurrere cum voluntate creata ad omnes & singulos illius actus.

Probatur. Qui cooperatur cum voluntate creata secundum ipsius exigentiam ad omnes & singulos illius actus , is concurret cum voluntate creata ad omnes & singulos ejus actus : nam ita concursum divinum definivimus.

Atqui Deus cum voluntate creata in omnibus & singulis ipsius actibus secundum ipsius exigentiam cooperatur : siquidem ipsam singulis momentis non tantum *in esse* simpliciter conservat ; sed etiam *in tali esse* , nempe in esse *operantis* , aut *volentis* : & ad illius votum organa corporea disponit , ut ipsi obsequantur.

Ergo Deus cum voluntate creata in omnibus & singulis actibus concurret.

Corollarium primum.

C O N C U R S U S divinus à continua rei creatione , seu conservatione distinguendus non videtur : cum nihil aliud sit , nisi continuata rei productio , seu conservatio , non tantum in *esse simpliciter* , sed etiam in *tali esse* , aut statu , aut modo , nempe in *esse operantis* , aut *volentis* , aut *aversantis* ; idque secundum ipsius rei indigentiam , seu exigentiam : quod præsertim vulgari Scholarum axiomate significatur ; *qui dat esse , dat consequentia ad esse*.

Hinc non tantum concurrat Deus cum humana voluntate , quatenus eam & in *esse simpliciter* , & in *esse tali* , nempe in *esse cupientis* aut *aversantis* conservat : sed etiam , quatenus secundum legem à se constitutam artus nostros , putà brachia vel pedes occasione desideriorum nostrorum movet ac impellit.

Similiter concurrat Deus cum omnibus corporibus , quatenus ea omnia , non modò in *esse simpliciter* , sed etiam in *tali esse* , putà in motu , secundum causarum secundarum indigentiam , occurrentesque rerum occasiones , continet. Nam v. g. si globus aliquis in loco declivi ponatur , statim cum eo concurrat Deus , ut secundum eam declivitatem delabatur : id est , ipsum in singulis hujusce declivitaris locis successivè creare , aut conservare perget : atque ad id occasione declivitaris , & impulsione materiæ fluidæ , quâ globus deorsum protruditur , secundum leges à se constitutas determinabitur.

Corollarium secundum.

IN eo discrepat concursus divinus à concursu

creato, quod concursus creatus sit longè debilior divino; neque causam, quam adjuvat, in *esse* contineat, sed tantum ad eundem effectum cum ea cooperetur. Nam cum bajulus bajulo fert opem ad onus attollendum, neuter ab altero pendet, ut in *esse agentis* conservetur; sed sibi duntaxat mutuam præstant operam, ut aliquid simul efficiant. Deus autem per suum concursum non tantum causas secundas ad agendum adjuvat, sed eas etiam in *esse*, aut *statu agentium* conservat, iisque vim omnem, quâ præditæ sunt, tribuit, ut sæpè dictum est.

Responsiones ad objecta.

O B J I C I E S primò. Agentia corporea, ut ignis, & alia ejusmodi vim habent agendi completam, & integram.

Ergo nullo indigent Dei concursu ad operandum.

Respondeo negando antecedens. Nam corpora ratione sui minimè agere possunt, nisi à Deo moveantur: v. g. ignis comburere non potest, nisi ipsius partes in celeri motu contineantur: eumque motum à seipsis non habent, sed à materia subtili, ut ostendemus in Physica: quæ materia subtilis in continuo, ac minimè interrupto motu, eoque pernicissimo, à primo motore, seu Deo conservatur: atque ita ignis non habet completam agendi vim ratione sui, sed perpetuo Dei concursu indiget.

Distinguunt alii antecedens. Agentia corporea, ut ignis, habent completam & integram agendi virtutem, cum dependentiâ à primâ causâ, concedunt: citrà hujusmodi dependentiam, negant: quare negant consequentiam. Certum quippe est causam secundam non tantum in *esse simpli-*

citer, sed etiam in *tali esse*, nempe in *esse agentis* à Deo pendere, ut dictum est; ac proinde perpetuo illius auxilio indigere, ut operetur.

Objicies secundò. Si Deus immediatè concurreret ad omnes actiones humanæ voluntatis, concurreret ad actum peccati, idque sciens ac volens.

Atqui Deus hoc modo non concurrat ad actum peccati: alioquin illius foret reus, utpote qui sciens ac volens ad id concurreret, quod malum est: quod Deo attribuere nefas est.

Ergo non concurrat immediatè cum humana voluntate ad operandum.

Respondeo distinguendo majorem. Concurreret ad actum peccati *materialiter* sumptum, hoc est, ad substantiam actûs peccati, quæ non est quid distinctum ab ipso agente & termino, aut objecto, concedo: concurreret ad actum peccati *formaliter* sumptum, hoc est, ad malitiam ipsius actûs rectæ rationi repugnantis, nego. Simili modo distinguo minorem, cujus probationem solito modo explico: reus est qui sciens, ac volens concurrat ad actum peccati, tanquam causa *particularis*, ex propria electione, & determinatione, concedo: qui concurrat ut causa *universalis* per actionem à creatione & conservatione minimè distinctam, nego: quare nego consequentiam.

Igitur in actu peccati, duo distingui debent. Primum, id quod dicitur *materiale peccati*, scilicet ipsius actûs substantia, quæ est aliquid physicum & reale, quamvis non sit entitas aut res ab agente & termino vel objecto distincta. Secundum, id quod vocatur *formale peccati*, nempe malitia ipsius actûs, quæ in eo consistit, quòd quis in creaturâ contra rationem & ordinem conquiescat, nec in Deum, ad quem, tanquam ad finem ultimum dirigi debent omnes voluntatis nostræ

motus & actus contendat. Exempli gratiâ, actus superbix, five, *amor inordinatus propria excellentia*, considerari potest, vel quatenus est *amor*, vel quatenus est *inordinatus*, & hæret in creatura. Primo modo, spectatur *substantia* ipsius actûs, quæ est quid reale ac physicum. Secundo modo, spectatur illius *malitia*, quæ est privatio perfectionis, cum nempe hæreat in creaturâ, nec in Deum tendat. Similiter in occisione hominis spectari potest actûs substantia, seu, occisio, quæ physica est; deinde malitia actionis, quâ quis contra rationem hæret in creatura, v. g. in vindictâ; proindeque deficit, nec ad finem suum, qui Deus est, tendit: ut explicabimus in Ethica.

Deus quidem ad *materiale* peccati concurrit: cum sit universalis causa rerum omnium, resque omnes continuatâ quadam creatione conseruet, non tantum in *esse simpliciter*, verum etiam in *tali esse*, v. g. in *esse amantis propriam excellentiam*; vel in *esse occidentis*: five, in eo statu, in quo quis inordinatè propriam excellentiam amat; vel quo brachium extendit, ut alterum confodiat. Eoque pertinere potest illa Dei querela, quam legimus Isaïæ cap. 43. v. 24. ubi secundum vulgatam editionem, sic Deus hominem increpat: *servire me fecisti in peccatis tuis*: id est, cum te ad nihilum redigere valerem, conservavi te, & sustinui, etiam cum malè ageres, legemque meam violares.

Sed cum malitia actionis ab æterna lege discrepantis non sit quoddam ens, vel quidam modus physicus, sed tantum defectus seu privatio perfectionis, aut relatio repugnantix cum ordine seu ratione, ut in Ethica probabimus, ipsa Deum habere non potest Auctorem, nec cooperatorem, seu concurrentem: cum Deus deficere non possit, aut ordini repugnare; sed sola creatura, quam nonnunquam finit vias suas malas facere; non

tamen cogit, aut impellit ad malè agendum, quem-
admodum definitum est in Concilio Trid. sess. 6.
Can. 6.

Ad id autem, quòd dicitur ille reus, qui sciens,
& volens ad actum peccati concurrit; id utique
intelligi debet de causa aliqua *particulari*, v. g.
de homine, qui ex propria determinatione ad ac-
tum illum concurrit, non de causa prima & *uni-
versali*, seu Deo, qui per eandem actionem con-
servat hominem in *esse simpliciter*, & in *esse tali*,
nempe in *esse* aut statu agentis, putà in eo statu,
in quo ensem alterius jugulo admoveret. Nisi enim
concurreret ad hunc actum: certè vel suum con-
cursum planè subduceret homini ad existendum,
sicque homo ille non amplius existeret; vel sal-
tem concursum suum ad eum actum, seu statum
ipsi denegaret, tumque agendi potestate ipsum
spoliaret: quod ab ipso Dei ordine videtur alie-
num. Deus enim ita condidit hominem, ut eum
reliquerit in manu consilii sui, adeo ut quacun-
que in partem sit inflexurus voluntatem suam, ei
concursum suum, à conservatione minimè dis-
tinctum, non sit denegaturus. Qua in re nihil
est, quod bonitati ac justitiæ divinæ derogare vi-
deatur.

Quærent hoc loco, utrum eadem sit actio Dei
moventis, seu concurrentis, & causæ secundæ
operantis.

Respondeo non esse eandem *physicè* actionem
Dei moventis, aut concurrentis, & creaturæ
agentis, si actio spectetur ratione principii. Cum
enim actio spectata ratione principii, non sit res,
vel entitas ab agente distincta, ubi duo sunt agen-
tia, ibi duas quoque *physicè* actiones esse necesse
est. Sed si hujusmodi actio spectetur ratione ef-
fectus, aut termini, dici potest una & eadem actio.
Deinde *moraliter* loquendo, una eademque actio

PROPOSITIO OCTAVA.

DEUS non præmover physicè præmotione speciali, ut statuunt communiter Thomistæ, voluntatem creatam in actibus liberis , sive, ut loquuntur , deliberatis , qui naturæ vires non superant, præsertimque in malis.

Actus liberos, seu *deliberatos* nominant eos, qui à voluntatis deliberatione proficiscuntur , ut cum quis ad scribendum se determinat. Actus verò *indeliberatos* , (si tamen *actus* dici possint) appellant eos motus, in quos voluntas , citra deliberationem prorumpit, quales sunt *primi motus*, quibus repente nonnunquam abripimur : ut si quis dormiens gravi quodam ictu ab aliquo percutiatur, ac statim excitatus , & cum impetu exurgens ipsum referiat. Actus igitur liberos, necessariis; deliberatos , indeliberatis opponunt : quanquam omnis actus deliberatus est liber. De solis actibus liberis intelligenda est propositio , quoniam ii soli dicuntur humani , ut videbimus in *Ethica*. Imò ex iis actibus humanis & deliberatis, eos duntaxat hinc comprehendimus , qui naturæ vires non superant, non eos , qui ab auxilio supernaturali pendent, quales sunt actus fidei , spei , & charitatis. Igitur propositio nostra sic explicata

Probatur primò , quia Deus physicè non præmover præmotione speciali in actibus deliberatis, naturæ vires non excedentibus , eam facultatem, quam activam fecit , & actuum suorum dominam , ita ut eos ponere possit , vel non ponere ad libitum.

Atqui Deus voluntatem humanam facit activam, & actuum suorum Dominam, ita ut eos po-

nere possit , vel non ponere ad libitum : hancque facultatem , quotquot sumus ; in nobis experimur : v. g. possum me determinare ad scribendum , vel non scribendum : sive, possum exigere concursum divinum , quo me non tantum in *esse simpliciter* ; sed etiam in *tali esse* , nempe in *esse scribentis* conservet : nam concursus , conservatio, & creatio secundum diversam tantum connotationem , seu relationem inter se discrepant , ut sæpè diximus.

Ergo Deus non præmoveret physicè , præmotione speciali, voluntatem humanam in actibus deliberatis, qui naturæ vires non superant.

Probatur secundò ratione longè efficaciori, quantum ad actus malos. Nam si Deus physicè præmoveret præmotione speciali voluntatem creatam in omnibus & singulis actibus deliberatis, qui naturæ vires non superant, eam sanè ad actum peccati determinaret , & impelleret : cum ipsa citrà præmotionem physicam specialem in eum actum prorumpere non posset.

Atqui Deus voluntatem creatam ad peccatum non determinat, aut movet: alioquin peccati auctor dicendus esset , & omnium quæ patrantur scelerum atrocissimorum reus; quod de Deo cogitare animus exhorrescit. Unde sanctus Thomas 1. 2. quæst. 9. art. 6. respondens ad tertiam objectionem, quâ dicitur futurum ut *si à solo Deo voluntas hominis moveretur, nunquam moveretur ad malum*, hæc habet verba , quæ jam retulimus proposit. 4. *Deus movet voluntatem hominis sicut universalis motor ad universale objectum voluntatis, quod est bonum* : cujus nimirum præmotionis vi , voluntas creata sese determinat ad quodlibet bonum privatum, quod vel verè bonum est , vel tantum apparenter bonum. Non verò docet D. Thomas humanam voluntatem à Deo specialiter moveri ad

actum malum : neque id ullibi apud D. Thomam reperitur. Similiter sanctus Bernardus tractatu de gratia & libero arbitrio : *Velle siquidem*, inquit , *nobis est ex libero arbitrio , non etiam posse quod volumus. Non dico velle bonum , aut velle malum , sed tantum velle ; velle etenim bonum , profectus est , velle malum , defectus : velle vero simpliciter ipsum est quod vel proficit , vel deficit: Porro ipsum , ut esset , creans gratia fecit ; ut proficiat , salvans gratia facit : ut deficiat , ipsum se dejicit. Denique Concilium Tridentinum sess. 6. Can. 6. expressis verbis definit voluntatem creatam ad malum seu peccatum non moveri à Deo , ut ad bonum movetur : sic enim statuit. Si quis dixerit non esse in potestate hominis vias suas malas facere , sed mala opera , ita ut bona , Deum operari , non permittit solum , sed etiam propriè & per se , adeo ut sit proprium ejus opus non minus proditio Judæ , quàm vocatio Pauli : Anathema sit.*

Ergo Deus voluntatem creatam in actibus liberis , qui naturæ vires non superant , præsertimque in malis speciali motione physica non præmoveret.

Respondent adversarii , distinguendo minorem. Deus non determinat voluntatem creatam ad peccatum *formaliter* sumptum , seu ad malitiam peccati , quæ est privatio perfectionis actui humano debitæ , vel repugnantia cum lege , concedunt : Deus voluntatem non determinat ad peccatum *materialiter* sumptum ; id est , ad ipsam actus substantiam , quæ bona est physicè , negant. Nam quemadmodum , si quis calamo malè aptato ad scribendum utatur , calamus non determinat ad vitium , quod scripturæ inest ; sed vitium istud à solo calamo proficiscitur : ita Deus præmovendo creaturam ad materiale peccati , minimè influit in malitiam actus , sed ea in solam creaturam est refundenda. Addunt , etiam si Deus ad

materiale peccati concurrat , eum tamen peccati auctorem à nobis non dici : cur ergo, inquit, peccati auctor censebitur , si ad materiale tantum peccati præmoveat ?

Verum advertere deberent longè diversam esse rationem præmotionis physicæ specialis , & concursus. Nam Deus per concursum non determinat voluntatem creatam , sed ab ea determinatur, quatenus ipsa exigit , ut in *tali esse*, v. g. in *esse peccantis* à Deo conservetur : quocirca Deus solo universalis causæ nomine cum ea tunc operatur, nec consequenter ipsius peccati malitia in Deum refundi potest. At per præmotionem physicam specialem non determinatur Deus à voluntate creata , sed , si eam præmoveat ad peccatum , ut volunt adversarii , ipsam utique determinat ad id volendum , quod æternæ legi & rectæ rationi repugnat , v. g. ad furtum volendum , vel homicidium , vel adulterium : uno verbo , Deus per concursum *permittit* hominem peccare , dum eum in *esse peccantis* conservat , secundum ipsius exigentiam ; per præmotionem verò, seu prædeterminationem physicam specialem, ipsum ad peccandum impelleret. Atque ita, quantumvis immunis sit à peccato , dum concurrat tantum cum voluntate creata ad ipsius exigentiam : non tamen à peccato liber foret , si voluntatem creatam determinaret ad illud , quod divinæ legi adversatur , quodque *materiale* peccati nominari solet : quemadmodum peccato non careret, qui calamum malè aptatum ad scribendum applicaret , si vitiositas scripturæ non physicus tantum , sed moralis defectus haberi deberet : cum enim ille determinaret calamum ad scriptionem , certè ipsum quoque determinaret ad defectum , seu vitium scripturæ : siquidem , nisi applicaretur calamus ad scribendum , non foret malè scripturus.

Enimverò qui determinat ad *materiale* peccati, determinat quoque ad id, quod cum materiali peccati conjunctum est. Atqui *formale* peccati cum materiali conjunctum est, ut in mendacio, in pomi primis parentibus interdicti comestura, cæterisque prohibitis liquidò apparet. Nam v.g. esus pomi est actus *materialiter*, & quoad substantiam spectatus. Idem si consideretur, quatenus legi divinæ repugnat, *formaliter* & *moraliter* sumitur; sive est actus *formaliter* malus. Quocirca *materiale* actus mali, cum *formali* planè conjungitur. Ergo qui præmoveret ad materiale peccati, ad formale quoque censetur præmovere.

Ut autem incommoda, quibus adversarii nostri premuntur, magis adhuc pateant, unumquemque apud semetipsum perpendere velimus, an Deus, qui summè bonus est, dignum quiddam suâ bonitate fuisset acturus, si primos hominum parentes ad fructum, quem ipsis, propositâ mortis pœnâ, interdixerat, comedendum impulisset. An nunc illæsâ istâ bonitate, hominem recens baptizarum, aut veræ pœnitentiæ lacrymis ab omnibus inquinamenti mundatum, & in sui amicitiam receptum, rursus ad furtum, homicidium, vel adulterium determinare possit, non tantum *moraliter*, & pravas hujusmodi cogitationes extrinsecus ipsi suggerendo, quod horribile dictu est; sed etiam *physicè*, ad actus scilicet pravos eum applicando. Certè quancumque in formam se vertant adversarii, hanc sententiam cum justitia & bonitate divina, vix ac ne vix quidem conciliare valent: Deus enim, ut malis tentari non potest, sic *neminem tentat*, ex Apostolo Jacobo Epistolæ Catholicæ cap. i. vers. 13. ac si *suâ gratiâ semel justificados non deserit, nisi ab eis prius deferatur*, ut ex sancto Augustino definit Concilium Tridentinum sessione sexta, cap. ii. nunquam fieri potuit, ut pri-

mos parentes , cùm adhuc innocentes forent, necdum ab ipso per peccatum descivissent , non tantùm desereret ; sed , quod atrocius est , ad suum præceptum violandum immeritos præmoveret : nunquam recens baptizati , aut pœnitentiæ lavacro abluti voluntatem & linguam , ad blasphemias in seipsum voces proferendas prior determinabit, aut impellet. Adeoque præmotio physica specialis in actibus deliberatis , qui naturæ vires non excedunt , præsertimque in malis , non tantùm inutilis est , sed etiam divinæ bonitati ac justitiæ videtur contraria.

Responsiones ad objecta.

Duobus præcipuè argumentis utuntur adversarii ad sententiam suam stabiliendam. Primum ex eo petunt, quòd creatura tum in *esse*, tum in *operari* sit Deo subjecta. Secundum , quòd voluntas creata sit indifferens , & in potentia ad agendum , vel non agendum , & consequenter prædeterminatione indigeat. Itaque cum iis

Objicies primò. Illud necessariò admittendum est , sine quo dependentia causæ secundæ à prima intelligi non potest.

Atqui sine præmotione physica speciali ad omnes & singulos actus , dependentia causæ secundæ à prima, intelligi non potest.

Ergo admittenda est præmotio physica ad omnes & singulos actus etiam malos.

Respondeo negando minorem. Sine eo quippe intelligi potest dependentia causæ secundæ à prima , sine quo concipitur humana voluntas à Deo pendere , tum in *esse* , tum in *operari*. Atqui sine præmotione physica speciali ad actus deliberatos, qui naturæ vires non excedunt , concipitur humana voluntas à Deo pendere , tum in *esse* , tum in

operari. Et quidem, quòd in *esse* pendeat, facile intelligitur, cum ab illo creata sit, & continuo conservetur. Deinde pendere etiam concipitur in *operari*. Primò, quia Deus agendi facultatem ipsi concessit, seu eam activam fecit, & actuum suorum dominam, ut dictum est. Secundò, quia præmotione generali ad bonum universè eam impellit, cujus impulsione, seu inclinationis vi, ad privata bona seipsam movet, ut etiam ostendimus. Tertiò, quia ad actus bonos & supernaturales illam determinat, vel per se solum, ut cum v.g. pias quasdam cogitationes, aut pia desideria expurgiscentibus nobis inspirat; vel causarum secundarum interventu, ut cum easdem cogitationes ex occasione rerum externarum in nobis excitat. Quartò denique, quia in actibus etiam deliberatis, qui naturæ vires non superant, cum humana voluntate sic concurrat, ut eam non tantum in *esse simpliciter*, sed etiam in *tali esse*, nempe in *esse operantis*, aut volentis secundum ipsius exigentiam, conservet. Ergo sine præmotione physica speciali ad omnes & singulos actus, etiam malos, summam creatæ voluntatis à Deo dependentiam intelligere, & explicare licet.

Probabis minorem. Sine eo explicari non potest dependentia causæ secundæ à prima, sine quo Deus intelligi non potest primus motor.

Atqui sine præmotione physica speciali ad omnes & singulos actus, intelligi non potest Deus esse primus motor.

Ergo sine præmotione physica speciali ad omnes & singulos actus, explicari non potest dependentia causæ secundæ à prima.

Respondeo negando minorem. Ille enim verè primus motor intelligitur; primò, qui motum omnem corporibus indidit; secundò, qui voluntatem creatam præmotione generali ad bonum

universè mover ; tertio , qui eandem præmotione speciali ad actus supernaturales evehit ; & cum ea in omnibus aliis actibus sic concurrat , ut sine illo concursu voluntas agere non possit. Atqui sine præmotione physica speciali ad omnes , & singulos actus , etiam malos , Deus omnia hæc præstat. Ergo sine huiusmodi præmotione physica ad omnes & singulos actus , etiam malos , rectè esse intelligitur primus motor.

Probabis minorem. Ille non intelligitur primus motor , cujus operatio prævia non est hominis voluntati.

Atqui operatio Dei , sine præmotione physica , non est prævia hominis voluntati.

Ergo Deus sine præmotione physica non est primus motor.

Respondeo distinguendo minorem. Operatio Dei sine præmotione physica , saltem generali , non est prævia hominis voluntati , concedo : sine præmotione physica speciali ad omnes & singulos actus , etiam malos , nego : quare nego consequentiam. Operatio quidem Dei non foret prævia hominis voluntati , sine præmotione physica generali , quâ Deus voluntatem humanam ad bonum generatim sic impellit , ut istius impulsione vi ad hoc , vel illud bonum singulare ipsa se determinare & applicare possit : sed per hanc solam præmotionem generalem satis intelligitur Deus esse primus motor , quia per eam solam voluntas humana ad bonum quodlibet privatum , saltem in ordine naturali positum se determinat ; nec citra eam , in ullum bonum , etiam privatum , & ordinis naturalis propriis viribus propenderet : quare , ut actio Dei sit prævia voluntati creatæ , minimè necessaria est præmotio specialis ad quoslibet actus deliberatos , etiam malos , per quam aliunde Deus peccati auctor esse videretur.

At inquires. Ex ista responsione sequitur voluntatem creatam à Deo non pendere perfectissimo modo, in actibus deliberatis : quod absurdum est.

Respondeo negando propositionem. Non potest enim perfectiori modo à Deo pendere , quàm si ab eo non tantùm in *esse simpliciter* , sed etiam in *esse tali* , nempe in *esse operantis* conservetur : ac præmotione generali in bonum universè , & præmotione speciali in bonum supernaturale ab ipso moveatur.

Probabis propositionem. Perfectiori modo penderet à Deo , si per præmotionem physicam specialem ad actus quoslibet deliberatos determinari diceretur.

Ergo sine eâ præmotione non pendet à Deo perfectissimo modo.

Respondeo negando antecedens duabus de causis. Primò , quia etiam si voluntas creata in singulis actibus deliberatis , qui naturæ vires non superant , non determinetur à Deo per præmotionem specialem, determinatur tamen per præmotionem generalem , cum solâ vi prædeterminationis generalis in bonum generatim , sese ad bona privata movere , iisque adhærere possit , ut ex D. Thomæ doctrinâ superiùs ostendimus : unde voluntatis creatæ determinationes à divina prædeterminatione semper sunt repetendæ. Secundò , quia si voluntas creata penderet à speciali Dei determinatione ad quoslibet actus , qui naturæ vires non superant , deberet ab eo ad actus malos præmoveri , quod ceriè citra horrorem aliquem cogitare non possumus.

Objicies secundò. Quod per se indifferens est, & in *potentia* , determinare se non potest , nec ad *actum* reduci , nisi per id , quod est in *actu* ; ut lignum , quod est ignis tantùm *potestate* , reduci non valet ad actum ignis , nisi per id quod actu,

& reverà ignis est : alioqui simul esset in actu & in potentia respectu ejusdem , quod absurdum est.

Atqui voluntas creata est indifferens ad agendum , vel non agendum , ac similis est libræ in æquilibrio positæ.

Ergo seipsam determinare non potest ad agendum, sed à Deo determinari debet.

Respondeo distinguendo majorem. Quod est indifferens indifferentiâ *passivâ* , sive quod est in potentia passiva ad aliquid , debet ab alio determinari, sive ad actum reduci per id quod est *in actu*, v. g. lapis qui est in potentia passiva ad motum, debet ab alio moveri, lignum, quod est ignis potestate tantum *passivâ*, debet ad actum ignis reduci, per id quod actu ignis est, concedo: quod est indifferens *indifferentiâ activâ*, sive quod habet potentiam agendi , & non agendi ad libitum , debet ab alio determinari , sive ad actum reduci ; rursus distinguo : per præmotionem , vel generalem, vel specialem , concedo : per præmotionem specialem semper , nego : simili modo distinguo minorem: voluntas creata est indifferens *indifferentiâ activâ*, concedo : *passivâ* , nego: quare nego consequentiam. Quamvis igitur voluntas creata sit indifferens , & in potentia ad agendum , vel non agendum; quoniam tamen est libera, potest se ad agendum , vel non agendum determinare , saltem in iis actibus , qui naturæ vires non superant. Nam agere & non agere *boni* rationem habere possunt: voluntas verò creata , utpote activa , potest , vi præmotionis generalis in bonum generatim , sese ad privata bona determinare , iisque adhærere: sive, quod idem est , ex multis bonis privatis ab intellectu sibi propositis , ut loquuntur Scholæ, unum præ alio eligere. Unde nihil vetat quominus dicatur esse *in potentia* simul, & *in actu primo*, non *in actu secundo* : quoniam actus secundus est

actio ipsa ; sed actus primus nihil est aliud , nisi *agendi potentia* , quæ Deo concurrente potest in *actum secundum* , seu actionem prorumpere ; sive quæ potest concursum divinum ad agendum , aut ab actu abstinendum exigere. Hinc sanctus Thomas primâ secundæ , quæst. 9. art. 3. de voluntate sic loquitur. *Voluntas* , inquit , *per hoc quod vult finem , movet seipsam ad volendam ea , quæ sunt ad finem* : id est , præmotio quidem aliqua generalis humanam voluntatem in bonum generatim inclinat : sed vi illius propensionis in bonum universale , movet seipsam voluntas in bona privata , iisque ad arbitrium immoratur. Quamobrem illud ultrò admittimus , quod art. 4. ejusdem quæst. docet Sanctus Thomas : *Neceffe est* , inquit , *ponere quod in primum motum voluntatis , voluntas prodeat ex instinctu alicujus exterioris moventis* : siquidem instinctus ille necessarius est ad bonum generatim , & ad primos forsan , ac *indeliberatos* , ut vocant , voluntatis motus : non tamen ad actus secundos & deliberatos est extendendus , nisi ii vim naturalem excedant.

Instabis , Causa quæ ultimum finem respicit , prædeterminare debet causas cæteras in eundem finem.

Atqui Deus est causa universalis ultimum finem respiciens : unde creaturæ omnes dicuntur illius instrumenta , quoniam iis utitur propter suum finem.

Ergo Deus prædeterminat causas secundas , atque adeo voluntatem creatam ad agendum.

Respondeo distinguendo majorem. Causa , quæ ultimum finem respicit , prædeterminare debet causas secundas in finem , sive præmotione generali , sive præmotione speciali , concedo : præmotione speciali semper , nego : unde concessâ minore , nego consequentiam. Si enim Deus speciali motione ad

omnes & singulos actus voluntatem nostram præmoveret, certè nonnunquam abduceret nos ab ipso fine ultimo, ad quem nos dirigit, cùm scilicet ad peccatum nos prædeterminaret: quod divinæ bonitati ac iustitiæ contrarium est.

Quod autem aiunt causas secundas esse instrumenta Dei, id utique fatemur: nam causæ omnes secundæ, sive sint corpora, sive mentes, in finem totius universi à Deo diriguntur, & vel ipsa improborum scelera ad eum finem, etiam iis nolentibus, referuntur. Magis tamen pendent creaturæ à Deo, qui eas perpetuò conservat, quàm instrumenta ab artifice, ut optimè observat sanctus Thomas 1. parte, quæst. 105. art. 5.

Verùm inquires. Omnes & singuli actus humanæ voluntatis, quicumque sint, prædeterminantur à Deo, si determinatio ipsius voluntatis creatæ sit à Deo præmovente.

Atqui determinatio voluntatis creatæ est à Deo præmovente, ut modò diximus ex S. Thoma.

Ergo actus quilibet, etiam deliberati voluntatis creatæ prædeterminantur à Deo

Respondeo distinguendo minorem. Determinatio voluntatis creatæ est à Deo præmovente præmotione generali, aut speciali, concedo: præmotione speciali semper, nego: quare nego consequentiam. Determinatio igitur voluntatis creatæ est à Deo præmovente præmotione speciali in actibus supernaturalibus, putà fidei, spei, & charitatis: sed in actibus deliberatis, qui naturæ vires non superant, est tantum à Deo præmovente præmotione generali, quâ voluntas creata in bonum universè nititur, huiusque nisus vi ad bona privata se determinat, id est, iis immoratur, ut toties explicuimus.

Urgebis. Si voluntas creata vi præmotionis generalis in bonum universè determinaret se ad boni

bona privata, hoc est, si concursus divinus exigeret ad agendum, Deus seipsum non determinaret, sed à creatura determinaretur.

Atqui Deus non potest à creatura determinari: alioquin ipsi subiceretur, & necessario cum ea concurreret, quod absurdum est.

Ergo creatura non exigit concursus divinum, sed à Deo semper determinatur, etiam determinatione speciali.

Respondeo distinguendo minorem. Deus non potest determinari *physicè* à creatura, scilicet, tanquam à causa physica ipsum impellente & movente, concedo: non potest determinari *moraliter*, tanquam à causa occasionali, nempe, cum creatura concursu Dei indiget ad agendum, nego: quare nego consequentiam. Deus enim causas liberas ea lege condidit, ut seipsas ad agendum determinare, hoc est, divinum concursus ad operandum, vi præmotionis generalis, exigere possent. Neque idcirco dici potest Deus creaturæ subijci, quod necessarium illi auxilium præstet: nam potest semper illud negare, si velit. Sed hoc per mirum videtur, quod timeant adversarii, ne Deus, cum extrinsecus, & moraliter determinatur à creatura, secundum leges à se constitutas, aliquam necessitatem patiatur, minimè verò reformident, ne creatura per præmotionem divinam, quæ physica, & efficacissima est, ad omnes & singulos actus, tum bonos, tum malos impulsa libertatis suæ jacturam faciat, quod tamen multò magis est pertimescendum: unde sit

PROPOSITIO NONA.

SI præmotio physica specialis ad omnes voluntatis humanæ actus, tum bonos, tum malos dicatur necessaria, non satis aptè cum liberæ vo-

Tom. I.

V

luntatis arbitrio cohærere videtur.

Probatur. Illud cum liberæ voluntatis arbitrio minùs aptè cohærere videtur , quo posito non superest voluntati facultas benè , aut malè agendi, vel non agendi ad libitum.

Atqui si præmotio physica, tum ad bonos, tum ad malos actus dicatur necessaria , non superest voluntati creatæ facultas benè , aut malè agendi, vel non agendi ad libitum. Primò , non superest ipsi facultas benè , aut malè agendi ad libitum: cum ad agendum , sive benè , sive malè ipsi opus sit præmotione , seu prædeterminatione physicâ. Secundò , nec ipsi inest facultas non agendi ad libitum , cum se ad non agendum hoc modo , seu ad liberam actûs omissionem determinare non possit , nisi per actum aliquem intrinsecum , quo statuat ab agendo abstinere ; ad quem actum, seu determinationem indiget præmotione physicâ speciali, secundùm communem Thomistarum doctrinam.

Ergo si præmotio physica specialis ad actus omnes , tum bonos , tum malos necessaria dicatur , minùs aptè cum libero voluntatis arbitrio conciliari poterit.

P R O P O S I T I O D E C I M A.

SI tamen præmotio physica specialis ad actus tantùm bonos & supernaturales requisita dicatur , ut post S. Thomam asseruimus propositione quintâ , tunc minimè officere videtur libero voluntatis creatæ arbitrio.

Probatur. Illud libero voluntatis creatæ arbitrio minimè officere videtur , quod voluntati relinquit *potentiam ad oppositum*.

Atqui præmotio physica specialis, si ad solos actus bonos , & supernaturales , non ad malos ne-

ecessaria dicatur, *potentiam* voluntati relinquit *ad oppositum*, hoc est, ad malè agendum, vel à bono actu abstinendum: nam homo, ut antea diximus ex Concilio Tridentino, semper potestatem malè agendi, vel à bono actu abstinendi conservat: neque illi necessaria est prædeterminatio physica specialis, ut vel à bono actu abstineat, vel vias suas malas faciat, sive id quod malum est, eligat, hoc est, in creatura conquiescat, nec in summum bonum, ad quod per præmotionem generalem dirigitur, contendere pergat.

Ergo si præmotio physica specialis ad solos actus bonos, & supernaturales requisita dicatur, ut illustriores Thomistæ sentiunt cum Capreolo in 2. dist. 28. quæst. 1. libertatem humanam lædere non videtur.

Responsiones ad objecta.

OBJICIES primò. Illud perimit libertatem, quod tollit potentiam non agendi, seu ab actu abstinendi.

Atqui præmotio physica tollit potentiam non agendi, seu ab actu abstinendi: nam suum effectum semper consequitur. Ergo præmotio physica tollit libertatem.

Respondeo distinguendo minorem. Præmotio physica tollit potentiam non agendi *in sensu composito*, concedo: *in sensu diviso*, nego: quare nego consequentiam. Præmotio quidem physica ad bonos, & supernaturales actus collata voluntatem mutat, & *ex nolente volentem* efficit; *ex repugnante consentientem*, *ex oppugnante amantem*, ut loquitur sanctus Augustinus lib. 4. ad Bonifacium num. 26. aliàs cap. 9. Non possunt autem simul componi voluntatis consensus, & repugnantia; seu voluntas non potest *in sensu composito* esse simul volens,

& nolens ; consentiens & repugnans : ac factâ hypothesi quòd velit , & consentiat , non potest repugnare & dissentire. Sed tamen si absolutè , ac ratione sui consideretur , & in sensu diviso , seu divisim ab hypothesi, quâ ex nolente ac repugnante fieri dicitur volens & consentiens , retinet semper, etiam dum actu ad consentiendum & benè agendum præmoveretur , facultatem seu potentiam *ad oppositum*, id est , facultatem dissentiendi , & malè agendi , seu ab actu bono abstinendi , cum citra aliam præmotionem physicam specialem possit non agere , aut malè agere ; cumque nullo bono finito repleri , sed sola Dei fruitione satiari possit. Sola autem potentia ad oppositum *in sensu diviso* , ad libertatis essentiam requiritur : alioqui dum occultissimâ & efficacissimâ suâ potestate cor hominis convertit Deus , sive cum mentem illuminat ut videat quod bonum est , eamque physicè removel à malo , & ad bonum certissimè ac efficacissimè determinat , minimè remaneret in homine libertas : quia hujusmodi motioni divinæ dissentire non potest in sensu composito , sed in sensu duntaxat diviso. *Gratia* , inquit sanctus Augustinus lib. de prædestinat. sanctorum num. 13. alias cap. 8. *qua occultè humanis cordibus divinâ largitate tribuitur , à nullo duro corde respuitur : ideo quippe tribuitur , ut cordis duritia primitus auferatur.* Etenim cognitio & amor boni cum ejusdem ignorance & rejectione conjungi nequeunt , sed tantum voluntas humana , dum cuidam bono privato applicatur , retinet potestatem ab eo recedendi , aut in id quod malum est se se convertendi.

Quare perperam omnino contra hanc opinionem allegant Adversarii Canonem quartum sessionis 6. Concilii Tridentini , cujus hæc sunt verba : *Si quis dixerit , liberum hominis arbitrium à Deo motum , & excitatum , nihil cooperari assentien-*

do Deo excitanti, atque vocanti, quo ad obtinendam justificationis gratiam se disponat, ac preparet; neque posse dissentire, si velit, sed veluti inanime quoddam nihil omnino agere, merèque passivè se habere: anathema sit. Fatemur enim liberum hominis arbitrium à Deo, etiam physicè motum, & excitatum cooperari per assensum Deo moventi & excitanti, ac posse dissentire si velit: velle autem potest dissentire in sensu diviso tantum; seu potentia; quam habet ad oppositum, reduci tantum potest ad actum, in sensu diviso, non in sensu composito. Quare negamus liberum arbitrium esse veluti inanime quoddam, quod merè passivè se habeat: si quidem intelligunt omnes, qui nobiscum sentiunt, spiritu Dei se agi, ut quod agendum est, agant; & cum egerint illi à quo aguntur gratias agant: aguntur enim, ut agant, non ut ipsi nihil agant: ex sancto Augustino lib. de correptione, & gratia num. 4. aliàs cap. 2.

Instabis. Si res ita se haberet, dum quis truditur in carcerem, dici posset liber, quia potentiam retinet non eundi in carcerem, in sensu diviso.

Respondeo negando propositionem, & paritatem. Disparitas in eo est, quòd, qui truditur in carcerem, ab extrinsecà causâ contra voluntatis inclinationem moveatur; qui verò per pramotionem physicam specialem ad actum bonum, & supernaturalem à Deo intus operante impellitur, à causa sibi intimâ secundum naturam suam inclinatur, & ex voluntate agat: nam per eam morionem voluntas humana non tollitur, sed ex mala mutatur in bonam, & cum bona fuerit, adjuvatur: ut habet sanctus Augustinus libro de gratia & libero arbitrio num. 41. aliàs cap. 20. Id igitur diligenter notandum, non sufficere potentiam ad

oppositum *in sensu diviso*, ut liber dicatur is, qui contra voluntatis inclinationem ab agente extrinseco movetur; sufficere verò, ut liber remaneat, qui per gratiam divinam intimè operantem ad agendum certissimè, sed suavissimè, & secundum propensionem voluntatis determinatur.

Repones. Ex ista responsione sequitur, cum dici posse liberum, qui ab alio determinatur, nec seipsum determinat.

Respondeo cum sancto Thoma primâ parte quæst. 83. art. 1. ad tertium, & alibi sæpè negando propositionem. Nam qui ad actum bonum præmoveretur, seu suavissimè & efficacissimè determinatur, se etiam ad eum determinat, non quidem, ut primum agens, sed ut causa secunda, quæ à prima, ad bene operandum, pendet. Quis enim, quæso, fateri recuset Deum, qui omnia potest determinare posse & ad actum & ad modum actûs, seu, efficere posse, ut homo agat, & liberè agat, seu actionis suæ sit Dominus? *Certum est enim*, inquit sanctus Augustinus, libro de gratia & libero arbitrio, num. 32. aliàs cap. 16. *nos velle cum volumus: sed ille facit, ut velimus bonum, de quo dictum est..... preparatur voluntas à Domino . . . certum est nos facere, cum facimus: sed ille facit, ut faciamus, præbendo vires efficacissimas voluntati, qui dixit, faciam ut in justificationibus meis ambuletis, & iudicia mea observetis, & faciatis.*

Verùm inquires. Qui physicè prædeterminatur, non est indifferens.

Respondeo distinguendo propositionem. Non est indifferens indifferentiâ *merè negativâ*, quæ est privatio omnis planè determinationis, ut suprâ jam dictum est, agendo de libertate Dei, concedo: non est indifferens *indifferentiâ positivâ*, quæ est facultas oppositorum capax, nego: nam voluntas ad

actum bonum prædeterminata, etiam dum actu prædeterminata est, potentiam retinet ad malè agendum, vel ab actu bono abstinendum.

Urgebis. Non potest Deus voluntatem humanam ad actum bonum prædeterminare, quin ipsi vim inferat.

Respondeo negando propositionem. Nam vim inferre voluntati, est ipsam movere contra propriam ipsius inclinationem. Atqui Deus dum intinè ac suavissimè *operatur in nobis & velle & perficere* secundum doctrinam Apostoli ad Philipp. cap. 2. v. 13. non movet humanam voluntatem contra propriam ejus inclinationem, sed eam mutat, & ex nolente volentem, ex mala bonam efficit. Quis autem auxilio divino mutari posse homines in bonum inficiabitur? *Itane rerum ordo crediti putari ve permittitur*, inquit divus Fulgentius libro de Incarnatione, & gratiâ Christi cap. 29. *ut Deus, qui Creator est hominis, valeat hominem facere, non mutare? & qui nullius eget adjutorio, ut hominem faciat, operari tamen quod vult, in hominis voluntate, non possit, priusquam in homine ipsum velle repperit? & ut sit homo habeat ex Deo, ut autem melior sit, habeat ex seipso? Ergone potuit Deus Stephanum coronare, per Pauli persecutoris infidelitatem, & persecutorem Paulum Deus convertere nequivit ad fidem? . . . hanc amentiam, & à fidelibus suis arceat, & ab infidelibus auferat Deus.*

Verum hoc fallit adversarios quod nullam habeant ideam motionis, nisi quatenus corporibus moventibus & motis convenit. Unde cum Deus voluntatem movere dicitur, eum spectare solent instar lictoris cujusdam apprehensum hominem violenter abducentis, quod est absurdissimum. Mens enim nostra movetur tum per illustrationem, quâ Deus illam penetrat, & vera bona ipsi patefacit, tum per propensissimum boni amorem,

quem simul cum suavissimâ delectatione, in ea producit. Eaque motio efficacissima est, nec liberati ullatenus contraria. Ut autem familiari exemplo adumbretur, spectandi sunt homines post primi parentis peccatum respectu vitæ spiritualis ferè ut febricitantes respectu vitæ naturalis. Cum igitur correptus est quidam ardenti febre, & morbus invasit cerebrum, illudque occupat, is è cubili, vel mediâ hieme, nudus exilit, ac præcipitem se dare per fenestram paratus est, nisi prohibeatur. Quemadmodum autem si quis eo momento peritus accederet medicus, qui sedaret febris ardorem, & cerebri caliginem ac tenebras discuteret, mutaretur hominis voluntas; tumque contra frigoris acerbicatem placere inciperet cubile, quod antea displicebat, horribilisque videretur præalta & præceps fenestra, quæ prius alliciebat: sic ubi per illustrationem gratiæ vera bona hominibus patent, ac dulcescere incipiunt; tum mens physicè mutata, & ad hujusmodi bonorum amorem efficacissimè determinata, liberrimè sed certissimè à falsis & fallacibus bonis avertitur, ac in ea, quæ prius displicebant, & jam placent, omni propensione nititur. Ut verò præcipitem se per fenestram nunquam dabit, cui mens erit sana, quamvis se se præcipitandi potentiam retineat: ita quandiu mens puro gratiæ lumine ad videndum verum bonum illustratur, & per suavissimam delectationem, supernaturalemque motionem ad ejus amorem accenditur, abhorret prorsus ab eo quod malum est tametsi potentiam ad id se conferendi semper conservat. Hoc modo explicata divina motio nullum attentis animis facessit negotium.

[Objicies secundò. Voluntas præmota ad bonum, non est domina sui actûs.

Respondeo negando propositionem. Nam dum præmoveretur ad bonum, conservat semper poten-

tiam ad malè agendum, vel ab actu bono abstinendum, saltem in sensu diviso, quod sufficit.

Instabis: Non est domina præmotionis.

Ergo non est domina sui actûs.

Respondeo distinguendo antecedens. Non est domina præmotionis, & tamen liberè eam excipit, scilicet retinendo potentiam ad oppositum, concedo: secus, nego: quare nego consequentiam. Ut enim voluntas creata sit domina sui actûs, minimè opus est, ut dominetur Deo, qui principium est præmotionis physicæ; sed tantum, ut motionem divinam liberè excipiat, & potestatem malè agendi, aut ab actu bono abstinendi conservet.

At inquires. Ut voluntas sit domina sui actûs, habere debet in sua potestate omnia ad agendum exquisita.

Atqui, si domina non sit præmotionis physicæ, non habebit omnia requisita ad agendum.

Ergo non erit domina sui actûs.

Respondeo distinguendo majorem. Debet habere in sua potestate omnia requisita ad agendum, ut causa secunda, concedo: ut causa prima, nego. Simili modo distinguo minorem, & nego consequentiam. Voluntas quidem creata non habet omnia requisita ad agendum, ut causa prima: sed ea habet ut causa secunda: id est, prorumpere potest in actum naturalem, & ordinarium, cum auxilio Dei ordinario, & in actum supernaturalem, fidei, v. g. spei & charitatis, cum auxilio supernaturali *Deus enim impossibilia non jubet, sed jubendo monet, & facere quod possis, & potere quod non possis, & adjuvat ut possis*, ut docet Concilium Tridentinum sessione sextâ cap. 11. Non igitur est impossibile, quod adjuvante Deo possumus; licet propriis viribus id non possumus.

Urgebis. Si tantum duntaxat progredimur,

V v

quantum à Deo per gratiam promovemur , nihil hinc mereri possumus. Nam , ut observat vir doctissimus, tract. de naturâ & gratiâ differt. 3. parte 2. numer. 24. quando quis eò tantum pervenit, quo fuit actus & impulsus, nullâ dignus est remuneratione , seu nullum habet jus ad mercedem : sed ex eo duntaxat ipsi meritum accedit, si per gratiam semel determinatus , vi primæ istius determinationis ulterius pergat , & propriâ ratione ac electione contendat in bonum , ad quod per illicitum & delectationem gratiæ fuit excitatus.

Atqui falsum est nos nihil mereri , cum benè agimus.

Ergo per libertatem nostram & rationem tendimus longius , quàm per gratiam fuimus præmoti ; & consequenter sine adjumento gratiæ saltem continuo benè agimus.

Respondeo negando majorem. Quamvis enim tantum progrediamur , quantum à Deo per gratiam promovemur , non tamen caremus merito ; sed illud meritum est gratiæ donum. *Tanta est enim*, inquit Cælestinus Papa primus in Epist. ad Galliarum Episcopos pro Prospero & Hilario , *erga omnes homines bonitas Dei , ut nostra velit esse merita, quæ sunt ipsius dona. Quæ verba usurpata sunt à Concilio Trident. sess. 6. cap. 16. ut , quemadmodum scriptum est , qui gloriatur , in Domino gloriatur*, ex Epist. 1. ad Corinth. cap. 1. v. 31. Idem docet S. Aug. lib. de gratiâ & libero arbitrio num. 15. aliàs cap. 6. *Prorsus talia cogitanti verissimè dicitur : dona sua coronat Deus , non merita tua , sed tibi à te ipso non ab illo sunt merita tua. Hac enim , si talia sunt , mala sunt , quæ non coronat Deus : si autem bona sunt, Dei dona sunt, quia sicut dicit Apostolus Jacobus , omne datum optimum, & omne donum perfectum desursum est , descendens à Patre luminum. Unde dicit & Joannes præcursor Domini , non potest*

homo accipere quidquam nisi fuerit ei datum de cœlo :
 utique de calo , undè etiam venit spiritus sanctus ,
 quando Iesus ascendit in altum , captivavit captivi-
 tatem , dedit dona hominibus. Si ergo Dei dona sunt
 bona merita tua , non Deus coronat merita tua , tan-
 quam merita tua , sed tanquam dona sua. Huc adde
 quod gratia Dei secundùm Apostoli doctrinam non
 tantùm excitet nos ad volendum , sed etiam ad per-
 ficiendum : Deus est enim qui operatur in nobis &
 velle & perficere pro bona voluntate. Neque sine spe-
 ciali auxilio Dei in accepta iustitia perseverare possu-
 mus , ex definitione Concilii Trident. sess. 6. can.
 22. Quod etiam inculcat sanctus Augustinus variis
 locis ; & speciatim lib. de gratia & libero arbitrio
 num. 33. aliàs cap. 17. Ut ergo velimus , inquit , si-
 ne nobis operatur ; cum autem volumus , & sic volu-
 mus ut faciamus , nobiscum cooperatur : tamen sine
 illo vel operante , ut velimus , vel cooperante cum
 volumus , ad bona pietatis opera nihil valeamus. Vide
 etiam lib. de correptione & gratia num. 37. & 38.
 olim cap. 11.

Cætera quæ , tum ab adversariis præmotionis
 physicæ ad eam impugnandam adducuntur argu-
 menta , tum quæ à Thomistis ad illius defensionem
 responsa proferuntur , si modò ad solos actus
 bonos & supernaturales necessaria dicatur , ex
 paucis illis à nobis delibatis , non ægrè , ut pu-
 tamus , intelligi poterunt.

SECTIO SECUNDA.

De Angelis.

EX naturis spiritualibus à Deo creatis , aliæ ab
 omni corporis contagio sunt immunes , quæ

generali Angelorum nomine continentur ; aliæ unâ cum corpore substantiam aliquam completam constituunt, quæ mentes humanæ , aut animæ rationales appellantur : de prioribus hac secundâ sectione , de posterioribus tertiâ , seu postremâ dicemus.

C A P U T I.

De natura Angelorum.

QUOD Latine *nuntius* , hoc Græcè *Angelus* significat: præcipuum enim Angelorum officium est , mandata divina perferre ; ut cùm Lucæ c. 1. v. 26. Angelus Gabriel ad Mariam Virginem missus dicitur , Verbi Incarnationem ipsi annuntiaturus. Alio nomine vocantur *Intelligentia* , & à Græcis , *Dæmones* : quanquam Dæmonis nomen solis cacodæmonibus , seu malis spiritibus , ex usu nunc apud Christianos tribuitur.

Definiri solet in Scholis Angelus , *spiritus quidam creatus , suo modo completus*. Dicitur *spiritus* , sive substantia spiritalis , & cogitationis particeps , non corpus , aut substantia extensa. Nam corpus non potest Deum videre , & ipsius mandata perferre : *Angeli autem vident faciem Dei* , auctore Christo Domino Matth. 18. v. 10. ac Dei mandata perferunt , ut modò de Angelo Gabriele diximus. Præterea locum non replent instar corporum , ut intelligitur ex legione Dæmonum , quam Christus ex *energumeno* , apud Gerasenos eiecit , Marci c. 5. v. 13. Hinc in Concilio Lateranensi sub Innocentio III. duplex natura à Deo dicitur condita , spiritalis scilicet & corporea ; sive ; angelica & mundana , prout refertur capitulo *Firmiter* , lib. 1.

Decretalium Gregorii I X. titulo primo, qui est de summa Trinitate & fide Catholica, his verbis : *Deus utramque de nihilo condidit creaturam, spirituales & corporeas, angelicam videlicet, & mundanam ac deinde humanam quasi communem ex spiritu & corpore constitutam.*

Deinde Angelus dicitur *spiritus creatus*, ut à Deo distinguatur, qui increatus est, cum sit *ipsum esse*, ut antea diximus, sive *ens per essentiam* : Angelus verò sit ens duntaxat *per participationem*, & velut entis umbra, si cum Deo comparatur.

Denique dicitur *suo modo completus* : hoc est, *sui juris* ; nec ad constituendam unà cum corpore naturam aliquam integram, instar animæ rationalis, à Deo destinatus : solus quippe ita subsistit, ut in alterius compositionem venire ex naturæ instituto, seu conditoris voluntate, non debeat.

Vulgatam hanc naturæ angelicæ definitionem approbat & stabilit sanctus Thomas primâ parte, quæst. 50. art. 1. Atamen præter Epicureos, qui nihil nisi corporeum in rebus agnoscunt ; & Sadducæos, qui dicunt non esse resurrectionem, neque Angelum, neque spiritum, ut scribitur Actuum Apost. cap. 23. v. 8. nonnulli ex sanctis Patribus, tam Græcis, quàm Latinis asseruisse videntur, Angelos esse substantias quasdam spirituales corporibus tenuissimis, utpote aëris, aut igneis conjunctas : idque non tantum ex Platoniorum Schola hausserant ; sed etiam Scripturæ sacre auctoritate firmare nitebantur, quæ Genesios cap. 6. v. 2. secundum quorundam lectionem sic loquitur : *Videntes autem Angeli Dei filias hominum, quod essent pulchra, acceperunt sibi uxores ex omnibus, quas elegerant.* Non possunt autem puri spiritus uxores accipere : atque inde Angelos corporeos esse inferebant.

Verum id fuit Platonicis familiare, ut Dæmo-

nes, seu Angelos, vel tanquam tenues quoddam, sed tamen corporeas substantias, vel potius, ut inentes corporibus tenuissimis conjunctas conciperent: eaque opinio, saltem posteriori modo accepta, quibusdam Ecclesiæ Patribus videtur non displicuisse, quod, illorum ætate, Angelorum natura nondum satis accuratè fuisset perpenſa.

Certum tamen est, non posterioribus tantum Ecclesiæ seculis agnitas fuisse substantias spirituales, & incorporeas, extra corpus omne subsistentes; verum etiam, multò antè stabilitam à Christo Ecclesiam, assertum fuisse ab Aristotele lib. 14. Metaphysicorum c. 7. & 8. non modò Deum esse substantiam immaterialem, & ordinis planè diversi à corporibus; sed alias quoque extare substantias, quas *Intelligentias*, sive substantias cogitantes, vocamus, ab omni prorsus materiæ commercio & conjunctione liberas, quales putabat esse substantias, à quibus cælestia corpora moveri arbitrabatur. Unde tam vetus est spirituum notitia, quàm mundus ipse. Sed utrum spiritus aliqui citra corpus omne subsisterent, id nonnullis Ecclesiæ Patribus vel ignotum fuit, vel non satis accuratè perspectum.

Quod verò Geneseos cap. 6. v. 2. Angeli Dei filias hominum in uxores accepisse dicuntur, id de Angelis propriè dictis non est intelligendum; sed de hominibus sanctis, nempe de Sethi nepotibus, qui ob Patris pietatem, *Fili Dei*, vel, ut pauci legunt, *Angeli Dei*, appellantur. Hi autem uxores accepere ex semine Caini, quæ *filia hominum* dicebantur, unde progenitos gigantes ferunt.

Sed aliud opponitur argumentum, ex actione quinta septimæ Synodi Oecumenicæ, quæ fuit Nicæna secunda, petitum, in qua quidem approbata fuit Johannis Episcopi Thessalonicensis de Angelis pingendis sententia: unde colligunt An-

gelos non spirituales, sed corporeos, cum Johanne Theſſalonicenſi, eſſe habendos; quia ſola corpora, non ſpiritus penicillo exprimuntur.

Respondendum autem ſententiam Johannis Theſſalonicenſis à Concilio generali aliqua ex parte fuiſſe approbatam, ſcilicet, quatenus Angelos pingi non vetuit Concilium: non tamen hinc ſequi rationem, quam afferebat Johannes Theſſalonicenſis nempe quòd Angeli forent corporei, fuiſſe admiſſam: nam reiſpā rationem illam in medio reliquit Concilium, nec ſuper ea quidquam pronuntiavit. Unde cū omnia Angelorum munera citra corporeas vires perfici poſſint, corpoream in his naturam cum ſpirituali conjunctam admittere minimè neceſſe eſt; & contrarium in Concilio Lateranenſi ſuprà laudato videtur definitum.

Cū verò Angeli nomen variis ſpirituum ordinibus tribui ſoleat, de huiusmodi ordinum numero non conſentiunt inter ſe Theologi, ut obſervat Eſtius in ſecundum librum Magiſtri Sententiarum diſtinctione 23. Communior tamen opinio, quæ ex divo Dionyſio petitur, novem huiusmodi Ordines in tribus Hierarchiis, ſeu ſacris Principatibus recenset: quos ordines ex Scriptura ſacra rectè deducit Eſtius ibidem.

Prima Hierarchia Seraphinos, Cherubinos, & Thronos:

Secunda Dominationes, Virtutes & Potestates:

Tertia Principatus, Archangelos, & Angelos ſpecificè ſumptos complectitur. Sed fuſiorem horum omnium tractationem proprio jure ſibi vindicant Theologi.

C A P U T I I.

Quæsitæ quædam de Angelis proponuntur , & vulgarata iis responsa subjiciuntur.

Multa hoc capite congerimus , quoniam in singulis diu hærendum nobis non putamus. Neque enim hoc argumentum planè Philosophicum est : & aliunde magna ex parte conjecturis potiùs, quàm veris rationibus est subnixum.

Quærent igitur primò , utrum Angelorum existentia ad fidem Christianam pertineat.

Respondeo ita esse. Nam frequentissime in Scripturis sacris , sive veteris , sive novi Testamenti Angelorum fit mentio. Etenim Raphaël Tobiam filium sanum duxisse, & sanum reduxisse legitur in libro Tobix. Gabriel ad Mariam Virginem missus est , Lucæ cap.1. v.26. Angelus Pastoribus prope Bethleem excubantibus , & noctis vigiliis super gregem suum agentibus , natum Salvatorem , Lucæ c.2. v.9. annuntiavit : ut cætera omittam testimonia , quæ passim occurrunt , quæque nemini Scripturas sacras contrectanti ignota esse possunt.

Quærent deinde , an existentia Angelorum ratione naturali demonstrari possit.

Respondeo illam non demonstrari quidem , sed tamen suaderi posse. Nam aliqui extiterunt, & identidem existunt *energumeni* , id est , à malo spiritu agitati , qui vel motibus extraordinariis aguntur, vel res procul gestas memorant , vel diversis linguis sibi antea ignotis loquuntur. Hæc autem omnia naturam humanam superant ; neque in Deum refundi possunt : cùm Deus obscœnas , aut blasphemias voces , quales nonnunquam proferun-

tur ab energumenis , non suggerat. Quamobrem à malis Angelis necessario inspirantur : atque ita Angeli saltem mali existunt.

Quarunt tertio , utrum Angeli ante mundum corporeum fuerint conditi.

Respondet sanctus Thomas primâ parte , quæstione 61. art. 3. probabilius esse Angelos , unâ cum mundo corporali fuisse productos : alioqui Moyse scribere non potuisset , *in principio creavit Deus cælum & terram* : siquidem Angelos antea condidisset. Attamen Job cap. 38. v. 7. cum Deus terram conderet, dicuntur filii Dei, sive, ut Septuaginta verterunt, Angeli, Deum laudavisse : quod arguere videtur illos ante mundum corporeum fuisse creatos.

Docet idem S. Thomas primâ parte quæst. 62. art. 1. 2. 3. 4. 5. 8. Angelos , non *in termino* , sed *in via* fuisse conditos , hoc est , non in statu gloriæ , seu beatitudinis supernaturalis , sed in statu gratiæ & beatitudinis naturalis , in quo , cum essent liberi ab omni necessitate tum extrinsecâ , tum etiam intrinsecâ , poterant auxilio gratiæ supernaturalem beatitudinem promereri. Hinc sanctus Augustinus lib. 12. de Civitate Dei , cap. 9. sic loquitur de bona Angelorum voluntate. *Istam quis fecerat , nisi ille , qui eos cum bona voluntate , id est , cum amore casto , quo illi adharerent , creavit , simul eis & condens naturam , & largiens gratiam ?*

Licuit autem ipsis unico charitatis actu supernaturalem beatitudinem adipisci : ut homo eam quoque unico charitatis actu consequeretur , si mens illius repente à corpore foret libera.

Postquam autem adepti fuere beatitudinem , non remansit in iis potestas peccandi : sed eorum voluntas in bono fuit confirmata , non secus ac beatæ hominum mentes , cum summo bono fruun-

tur , malè agendi potestatem feliciter amittunt.

Quemadmodum verò unico charitatis actu beatitudo supernaturalis, & confirmatio voluntatis in bono ab Angelis sanctis obtenta est; ita unico superbiæ actu cacodæmonum princeps, unà cum suis asseclis damnationem æternam, & confirmationem voluntatis in malo, fuit promeritus.

Quærent quartò, utrum diversæ Angelorum species à Deo fuerint procreatæ.

Respondeo id probabile videri. Etenim Sera-
phini , Cherubini , Throni , & cæteri ordines
specie inter se differre videntur. In unoquoque
etiam ordine plures esse posse Angelos solo nu-
mero distinctos , nihil verat. Quanquam sanctus
Thomas primâ parte quæst. 50. art. 4. quemlibet
Angelum specie distingui ab alio existimat,
quòd Angeli , utpote spirituales , & ab omni ma-
teria soluti , nullum in se *individuationis* princi-
pium habeant , quo intrâ eandem speciem , solo
numero multiplicentur. Sed paucos hac parte Se-
ctatores nactus est sanctus Thomas. Nam quem-
admodum multæ sunt hominum mentes ejusdem
speciei , quæ hoc ipso quod existunt , singulares
sunt , & inter se solo numero distinctæ : ita mul-
tos Angelos secundùm idem exemplar , aut ideam
productos esse à Deo , ac inter se solo numero di-
stinctos nihil prohibet. Repete quæ de principio
individuationis seu singularitatis tradita sunt,
priori parte, cap. 2.

Quærent quintò , utrum singulis hominibus da-
tus sit Angelus custos.

Respondeo ita videri sancto Hieronymo ex Ma-
thæi cap. 18. v. 10. At singulis saltem Christi fide-
libus Angelum adesse persuasum fuit primis Chri-
stianis, ut constat ex Act. cap. 12. v. 15.

Quærent sextò, utrum Angeli sint in loco.

Respondeo res spirituales , ut Angelos , propriè

non esse in loco : cùm id corporibus , seu substantiis extensis peculiare sit ut certo loco contineantur. Verùm cùm aliquæ sint *communes animi conceptiones*, & *per se nota apud sapientes tantùm*, ut *incorporalia in loco non esse*, quemadmodum loquitur Boëtius apud S. Thomam primâ parte q.2. art.1. hinc est, quod vulgò duas in loco existendi rationes, aut modos distinguere soleant Scholæ; scilicet *circumscriptivè* & *definitivè*.

Illud aiunt esse in loco *circumscriptivè*, quod ambitur à loco, seu, superficie corporis, in quo continetur; & cujus una pars uni itidem loci parti responder, altera alteri: ut corpus humanum, sic est in loco, ut caput sit in una parte loci, pes in altera. Hicque modus existendi in loco, solis corporibus convenire dicitur, non spiritibus.

Id verò dicunt esse in loco *definitivè*, quod certo ac definito loco est præsens; sic tamen, ut ab eo loco non circumscribatur, aut circumdetur: quo sensu res spirituales aiunt esse in loco: v. g. Angelus Gabriel fuit præsens cubiculo beatæ Virginis, cùm eam Salvatoris Matrem mox futuram salutavit; sed ab aëre istius cubiculi non fuit circumdatus. Addunt nonnulli quod est in loco *definitivè*, id esse *totum in toto loco*, & *totum in qualibet parte loci*, ut anima rationalis, inquit, est tota in toto corpore humano, & tota in qualibet parte corporis. Verùm anima rationalis determinatur quidem à spirituum animalium motibus in cerebro factis, ad varias cogitationes, secundum legem ab Auctore naturæ stabilitam, & proinde hoc sensu dici potest cum Cicerone lib.1. Tuscul. quæst. cum cerebro conjuncta: verum neque in manu, neque in pede, neque intestinis secundum propriam substantiam existere videtur: sed tantùm quatenus occasione motuum qui in iis partibus fiunt, vario modo afficitur. Unde satis

dicatur aliquid esse in loco *definitivè*, cum huic loco, certo nimirum, ac definito, suâ cogitatione est præsens, non alteri, ita tamen ut ab eo loco non ambiatur : qua ratione Angelos in loco existere non inficiamur.

Quærunt septimò, utrum Angeli moveri possint.

Respondeo ipsos eodem fere modo moveri, quo sunt in loco : id est, eos posse per suam cogitationem, modò uni loco præsentem esse, modò alteri : ut cogitatio nostra unico temporis puncto remotissimis locis sit præsens : ac fortasse secundum propriam substantiam in ea loca momento temporis transferretur, nisi corpori esset alligata.

Cum autem Angeli ab uno loco in alium migrant, minime iis opus est per locum intermedium transire : ut cogitatio nostra si ex urbe Roma Lutetiam feratur, per loca interjecta transire non debet ; sed repenrè, quæ erat Romæ, sequenti momento præsens est Lutetiæ. Hic quidem motus non fit secundum propriam mentis substantiam, ut diximus, quia corpori est alligata : sed si mens ab omni corpore esset soluta, ut Angelus, tam facile moveretur, quàm cogitaret ; nec alibi esse videretur, quàm ubi cogitaret : unde si de Roma, de Lutetia, de aliis locis cogitaret, dici posset præsens Romæ, tum Lutetiæ, tum alibi : non quòd iis locis ritu corporum contineretur ; sed quòd iis suo modo, nempe per cogitationem, præsens foret, non aliis : quia mens aut spiritus non alibi à Deo conservari videtur, quàm ubi cogitat.

Quærunt octavò circa cognitionem Angelorum utrum Angeli cognoscant visibilia simul, & invisibilia.

Respondeo probabile esse multas ipsis à Deo

naturales notitias tum rerum visibilium , tum rerum invisibilium fuisse concessas ; sed Angelos beatos longè plurimas fuisse adeptos , ubi Deum intuitivè , id est, facie ad faciem , & veluti defixis mentis oculis præsentem intuendo videre cœperunt. In Deo enim , tanquam in lumine quodam intelligibili, vident quæcumque iis vult Deus revelare. Ideoque indigentiam nostram , & preces intelligunt , quascumque ipsis intermediis in Deum dirigimus ; bonaque opera nostra cognoscunt , ut Tobix olim testatus est Archangelus Raphaël Tobix 12. vers. 12. his verbis. *Quando orabas cum lacrymis , & sepeliebas mortuos , & derelinquebas prandium tuum , & mortuos abscondebas per diem in domo tua , & nocte sepeliebas eos , ego obtuli orationem tuam Domino.*

Secretas tamen cogitationes nostras iis ignotas esse putat sanctus Thomas primâ parte quæst. 57. art. 4. nisi eas ad illos dirigamus. Nam solus Deus est cordium scrutator , ut his verbis docet Jerem. cap. 17. v. 9. *Pravum est cor omnium & inscrutabile: quis cognoscet illud ? Ego Dominus scrutans cor , & probans renes.*

Quod spectat ad malos Angelos , seu Cacodæmones , longè pauciora norunt quàm beati , nec occultas cogitationes nostras penetrant , nisi ad eos dirigantur : sed illas conjecturis tantùm , scilicet ex operibus, aut moribus nostris ratiocinando assequi conantur. Angeli quippe non secus ac homines ratiocinantur , seu , unum ex alio colligunt , ut satis constat ex tentatore , qui ad Christum accessit Matth. 4. ut ex ipsius responsis inferre posset, verusne esset Dei Filius, necne ?

Quærunt nono, quâ ratione Angeli sese invicem alloquantur.

Responderi solet locutionem Angeli nihil aliud esse , quàm cogitationem illius ad alterum Ange-

lum directam. Etenim si Deus hanc legem inter homines constituit , ut ex occasione quorundam signorum , seu sonorum manifestæ forent eorum cogitationes ; nihil quoque obstare videtur , quominus ex sola Angeli intentione , seu voluntate, tanquam ex occasione ipsius cogitatio alteri Angelo , imò etiam homini pateat. Nec ulla nobis alia commodior occurrit angelicam locutionem explicandi ratio , quàm si ad causas *occasionales* , & constitutam à Deo legem confugiamus. Nam eà quoque ratione , ut jam diximus , corpora ab Angelis moveri videntur , quatenus scilicet eorum voluntas , aut desiderium est causa occasionalis, cur corpus aliquod secundum beneplacitum Dei moveatur. Ac quemadmodum certi quidam corporis nostri motus , qui voluntarii appellantur, quamdam habent , ex naturæ , sive Dei instituto, cum nostræ voluntatis actibus connexionem ; ita aliorum corporum motus , secundum decretum divinum, angelicam voluntatem quasi causam occasionalem subsequi possunt.

Verùm hæc , & alia quæ de Angelis quæri solent plurima , putà an superiores hierarchiæ à Deo illuminatæ subjectas irradiant : quousque angelica cognitio , aut vis pateat ? &c. vix levibus conjecturis assequimur. Quare maximam eorum partem consulto omittimus , quia nihil certi de iis habemus.

S E C T I O . T E R T I A .

De mente humana.

MEntis humanæ consideratio ad eam quoque Metaphysicæ partem spectat , quæ

Pneumatologia , seu spirituum scientia nominatur : nam ea quoque inter res spirituales est annumeranda , ut mox ostendemus. De ea verò dicemus hoc ordine.

Prīmò, quæremus quid sit mens humana.

Secundò, quomodo ea seipsam cognoscat.

Tertiò, an demonstrari possit immortalis.

Quartò, de illius intellectu, & ideis dicemus.

Quintò, agemus de voluntate & libertate.

Sextò denique, de habitibus naturalibus.

C A P U T I.

Quid sit mens humana.

Humanæ mentis natura non aliundè melius, quàm ex ipsius affectionibus ; aut operationibus nobis innotescere potest : res enim quælibet per suas proprietates , & functiones se prædit. In ipsa autem mente humana , seu anima rationali cogitationes advertimus , nimirum , *intelligere* , & *velle* : seu , *percipere* , *dubitare* , *opinari* , &c. quæ quidem cogitationes ab ipso corpore proficisci non possunt : nam corpus quantumvis dividatur , aut moveatur , aut figuretur , cogitationem ex se numquam profundet , sed ea ad diversi ordinis naturam , aut substantiam pertinet , quam nos spiritalem appellamus. Igitur mens humana, seu animus humanus, aut anima rationalis (nam hæc diversa sunt ejusdem rei nomina) est substantia quædam spiritalis, & cogitans, ad imaginem & similitudinem Dei creata. Non enim aliâ ratione Deo similes dicimur , quàm quòd animam nobis rationalem, seu mentem concessit , quâ ipsius cognoscendi, & amandi capaces efficimur. Sed ut illud consuetâ methodo demonstretur, sit

P R O P O S I T I O.

MENS hominis est spiritalis.

Probatnr. Ea substantia spiritalis est, quæ cogitationis, hoc est, perceptionis, & voluntatis est capax: nam corpus nec percipere potest, nec velle; idque ab illius idea prorsus excluditur, ut attendentibus manifestum est.

Atqui mens hominis est cogitationis, seu, perceptionis, & desiderii capax: nemo enim negare potest quin mens percipiat, & desideret, seu velit. Ergo mens hominis est spiritalis.

Respondent Epicurei negando majorem. Existimant enim substantiam corpoream capacem esse cogitationis simul, & extentionis, sive extensionem, & cogitationem esse duos substantiæ corporeæ modos: ut esse Medicum, & Musicum sunt duo hominis modi. Quid enim, inquirunt, obstarè potest quominus corpus sit cognitionis particeps?

Sed cum ita loquuntur Epicurei, non attendunt ad naturam illius substantiæ, quæ ipsi à belluis secernuntur: nam si ad eam attenderent, illam perfectò à corpore prorsus distinctam intelligerent. Si quidem ea reipsâ secernuntur, quorum idæ clæræ, ac distinctæ, sese mutuò *positivè* & *completè* excludunt: non enim aliud certius argumentum occurrit diversitatis, aut distinctionis rerum, quàm idearum diversitas, aut oppositio; nec aliter de rebus judicare licet, quàm per claras distinctasque illarum idæ: siquidem eas, quæ consentaneæ sunt, jungimus affirmando, & dissentaneas negando separamus, ut dictum est in Logica.

Atqui idea corporis & idea mentis sese mutuò *positivè*, & *completè* excludunt. Non enim aliud quidquam concipitur per corpus, quàm substantia extensa, quæ dividi, moveri, & figurari potest: cum
verò

Verò mentem cognoscimus, substantiam cogitantem intelligimus. Porro extensio, figura, & motus positivè ac completè cogitationem excludunt, & viceversâ: siquidem quantumvis corpus extendas, vel dividas, moveas, vel figures, nunquam cogitationem elicies: vicissim, quantascumque cogitationes, seu perceptiones, & desideria congeras, nunquam substantiam extensam efficies.

Ergo corpus & mens reipsâ distinguuntur; sive, substantia corporea, & extensa diversî planè ordinis est à substantia cogitante & spiritali.

Et sanè quid absurdius fingi potest, quàm tenuissimum pulverem, aut exiguam materiæ portionem esse intelligentem, & amare non tantùm res corporeas, ac sensibus subjectas; sed etiam res spirituales & à sensuum commercio remotissimas? Non enim res duntaxat materiales percipimus: sed eas etiam intelligimus, quæ nullam habent cum rebus materialibus affinitatem, putà Deum, ipsiusque attributa, v. g. unitatem, pulchritudinem, æternitatem, infinitatem, &c. deinde argumentationum leges, æquitatis & justitiæ regulas, temporum seriem ac discrimina, &c. Quis autem exiguæ pulveris portioni tantam vim tribuere audeat, ut cœlorum motus metiatur; dierum, noctiumque vicissitudines, & inæqualitates, temporumque periodos inito certo calculo definiat; ut cæteras taceam demonstrationes metaphysicas, & mathematicas, quæ omnium admirationem movent, quæque nobilior arguunt principium, quàm rudem crassamque materiam, quocumque motu, quacumque tenuitate, aut figurâ donata sit?

Quid autem de voluntatis actibus dicemus? An ii substantiæ corporeæ sunt tribuendi? An materia justitiam, fidem, constantiam, cæterasque animi virtutes diligit, ut reverâ à voluntate no-

stra diliguntur ? Quid enim in Sanctis , quid in Martyribus *amamus* , inquit sanctus Augustinus tractatu 3. in Johannem , num. 21. *membra laniata à feris ? quid fœdus , si oculos carnis interroges : quid pulchrius , si oculos cordis interroges ? quid tibi videtur adolescens pulcherrimus fur ? quomodo horrent oculi tui ? nunquid oculi carnis horrent ? si ipsos interroges , nihil illo corpore compositius , nihil ordinatius , & paritas membrorum , & coloris delectatio illicit oculos : & tamen cum audis quia fur est , fugis hominem animo. Vides ex alia parte senem curvum baculo innitentem , vix se morientem , rugis undique exaratum : quid vides quod oculos delectet ? audis quia justus est , amas , amplecteris. Ex quibus rectè infertur substantiam cogitantem , & substantiam extensam ; seu mentem , & corpus , in diverso prorsus genere esse constitutas ; nec substantiam corpoream cogitationis nec substantiam spiritalem extensionis esse participem.*

Instant Epicurei. Idea Medici ac Musici sunt diversæ , ac sese mutuò excludunt.

Atqui tamen idem homo potest esse Medicus , & Musicus.

Ergo eadem quoque substantia potest esse cogitans , & extensa.

Respondco distinguendo majorem. Idea Medici , & idea Musici sunt diversæ , ac se mutuò excludunt , exclusione *negativâ* & *incompletâ* , concedo : exclusione *positivâ* & *completâ* , nego : quare concessâ minore , nego consequentiam. Idea quidem Medici excludit *negativè* ideam Musici , id est , eam præcisè in se non includit , ac saltem *incompletè* potest ab ea præscindi , quatenus potest aliquis spectari ut Medicus , tamen non spectetur ut Musicus : sed idea Medici non excludit *positivè* ideam Musici , id est , eam à se non removet , nec potest ab ipsa *completè* separari : siquidem idea

Musici semper includit *mentem*, cui inest Musica, ut idea quoque Medici *mentem* includit, in qua medicina recipitur: unde ambæ in eo conveniunt, quòd sint modi mentis, seu, quòd sint ipsa *mens*, certo modo affecta; nec una proinde alteram *completè* excludit, aut *positivè* à se removet: sed sese mutuò *negativè* tantùm, & *incompletè* excludunt, ut misericordia divina justitiam, vel omnipotentiam non *positivè* & *completè*, sed *negativè* tantùm & *incompletè* excludit: ut etiam candor lactis excludit *negativè* & *incompletè* ipsius dulcedinem.

At verò idea corporis *positivè* & *completè* mentem removet, ac vicissim: sive, idea rei extensæ *positivè*, & *completè*, id est, secundùm se totam, removet à se ideam rei cogitantis, & vicissim: nec proinde cogitatio & extensio in uno eodemque subjecto consistere possunt, ut Musica & Medicina in eadem mente recipiuntur, ut candor & dulcedo sunt ejusdem lactis modi. Nam primò, extensio non concipitur, nisi ut res in longum, latum, & profundum extensa, eaque proinde relationem non habet ad subjectum, ut modus. Deinde nulla est cogitatio citra quamdam conscientiam, id est, nulla res cogitare potest, quin sentiat se cogitare, suæque cogitationis sibi sit conscia. Sed nemo sanus dixerit corpus cogitare, suæque cogitationis sibi consciùm esse; aut panem & fruges, cæteraque id genus, quæ priùs non cogitabant, postquam ore excepta, in stomacho digesta sunt, & in chylum, ac sanguinem conversa, cogitationis effici capacia: id enim sanam rationem gravissimè offendit, nec quidquam homini attento clariùs esse potest, quàm corpus & mentem toto genere inter se discrepare.

Quocirca ut mentem nostram spiritalem esse ostendamus, minimè opus est, ut ad illam, quam

habet rerum universalium & immaterialium perceptionem confugiamus : nam nulla res, nisi spiritalis sit , non tantum quæ universalia sunt , & immaterialia ; sed ne singularia quidem & corporea cogitando potest attingere : ac si quæ substantia intelligat res singulares, ea universales quoque intelligere poterit , cum unum altero difficilius non videatur. Imò fieri non potest , ut quis, v. g. singularem circulum concipiat , quin generatim norit quid sit circulus , ideamque circuli mente complectatur, per quam omnes planè circuli possibiles exhibeantur. Unde quod Galenici, quidam contendunt belluas circa res tantum singulares ratiocinari, id manifestam contradictionem involvit : cum ovis , v. g. quæ lupum nunquam vidit, vel quæ rufum duntaxat , non fuscum conspicata est , accedente lupo fusco fugere per ratiocinationem non possit , nisi præconceptam habeat hanc notionem generalem , *omnis lupus , quicumque sit, & cuiuscumque coloris , sive rufus , sive fuscus, est fugiendus.* Igitur nulla potest belluis attribui ratiocinatio circa res singulares , quin ipsis etiam circa universales concedatur ; eaque ex universalibus notionibus ducta intelligatur.

Nec majoris roboris esse videtur , quod alii quidam sentiunt , belluas scilicet percipere , ac discernere objecta ; non tamen suæ perceptionis sibi esse conscias : nam nulla res percipere potest, (nisi in perceptionis vocabulo lateat ambiguitas) quin suæ perceptionis sibi sit conscia. Unde discrimen quod inter nostram, & belluarum perceptionem intercedit , non in eo statuendum est, quod & universalia percipere possimus , & perceptionis nostræ nobis simus conscii ; belluæ verò res tantum singulares percipiant, nec percipere se sentiant : sed in eo ab illis distinguimur ; quod cogitationis simus capaces , non illæ. Etenim

METAPHYSICÆ. SECT. III. CAP. I. 485.
cùm bellua videre dicitur , aut audire , ipsius auditio , vel visio in solis spirituum moribus consistit, nec eum cogitatione conjuncta est, ut in nobis accidit. Sed de ea re pluribus in Physica.

Cæterum mens humana , etiam si spiritalis sit, & incorporea , cum corpore tamen organico , *ex conditoris instituto*, ad hominem constituendum conjungitur: quapropter *hominis forma* merito dicitur, ut probabimus in Physica.

Corollarium.

Ex his omnibus confici potest humanæ mentis definitio quam attulit sanctus Augustinus libro de quantitate animæ, num. 22. aliàs cap. 13. his verbis. *Si..... definiri tibi animum vis*, inquit, *& ideo quaeris quid sit animus*, faciè respondeo : *nam mihi videtur esse SUBSTANTIA quadam rationis particeps , regendo corpori accommodata.* In qua definitione *rationis* nomen pro *cogitatione* generatim usurpari videtur. Adeo ut non malè à recentioribus Philosophis dicatur, *substantia cogitans*, quæ cum corpore humano conjuncta , totum quidpiam , nempe hominem, constituit.

C A P U T II.

Quomodo mens humana seipsam cognoscat.

CUM mens humana ex modò dictis sit substantia cogitans , quæ se cogitare sentit; five , quæ suæ cogitationis sibi est conscia: eam quoque à seipsa naturaliter cognosci certissimum est. Quare sit,

P R O P O S I T I O.

MENS humana seipsam naturaliter novit , per conscientiam , seu , sensum intimum , quo sibi conscia est existere se , & cogitare. Utrum verò per ideam etiam se cognoscat , dicemus cap. 4. hujus sectionis.

Probatur. Ea substantia seipsam per sensum intimum naturaliter novit , quæ & naturaliter cogitat , & suæ cogitationis sibi conscia est.

Atqui mens humana naturaliter cogitat , & suæ cogitationis sibi conscia est : cùm in cogitatione posita sit illius natura , ut ostendimus ; nec ulla substantia cogitare possit quin se cogitantem sentiat , aut suæ cogitationis sibi sit conscia , ut etiam declaratum est.

Ergo mens humana , seu anima rationalis intimo sensu seipsam naturaliter novit , sive existere se , & cogitare sibi naturaliter est conscia.

Responsiones ad objecta.

O B J I C I E S primò. Si mens humana seipsam , suasque cogitationes naturaliter cognosceret , utique , & se , & illas à primo creationis suæ momento percipere deberet.

Atqui tamen humana mens , neque seipsam , neque suas cogitationes à primo creationis suæ momento novit.

Ergo mens seipsam ingenitâ notione non percipit.

Respondeo distinguendo minorem. Seipsam à primo suæ creationis momento non novit , id est , ad seipsam , reflexâ quâdam cognitione non attendit , concedo : id est , nullo modo se sensit , nego : quare nego consequentiam. Igitur huma-

na mens naturaliter est substantia cogitans, & suæ cogitationis sibi est conscia; nec percipiendi facultatem accipit à corpore. Unde semper se sentit: sed tenelli corporis motibus agitata ad seipsam primis temporibus vix attendere potest.

Verùm, quod omne dubium in ea re videtur amoliri, præter quam quòd ex sententia sanctorum Ecclesiæ Doctorum Irenæi, Tertulliani, Origenis, Ambrosii, &c.

D. Johannes Baptista, cum exultavit in utero matris ad præsentiam Christi Domini, quem etiam B. Virgo in utero gestabat, verè Christum agnovit, seu perceptionis sensu simul motus fuit & exultandi affectu: præter hoc, inquam, certum omnino est, & experientia quotidianâ confirmatum, infantes rerum omnium, quæ sibi exhibentur, nomina, dores, ac discrimina percipere; idque multò antè, quàm ea vocibus exprimere possint. Atqui ista rerum perceptio, ac memoriæ vis, qualis plerumque in adultis non reperitur, perfectam in infantibus rationem vigere demonstrat: quamvis ob infirmam adhuc corporis constitutionem, & incertos motus ad rem eandem diutius attendere non possit. Quocirca sanctus Augustinus lib. 22. de Civit. Dei, cap. 24. hæc habet *Ipse itaque (Deus) animæ humanæ mentem dedit, ubi ratio, & intelligentia in infante sepita est quodammodo, quasi nulla sit, excitanda scilicet atque exserenda atatis accessu, quâ sit scientia capax atque doctrina, & habilis perceptioni veritatis, & amor boni.* Ergo in infantibus non secus ac in adultis perfecta est ratio, sive mens, licet ea primis illis temporibus, ad rem eandem diutius fortasse attempta esse nequeat. Cùm enim debili admodum sit juncta corpori, quod à circumstantibus aliis corporibus omni ex parte facillimè, ac vehementissimè concutitur, tota semper externis objectis oc-

cupata est , iisque continuò agitur , nec ferè in seipsam redire , nec de se , aut de alia re attentè cogitare finitur : sicque propter attentionis defectum sopita quodammodo videtur , quasi nulla sit.

Instabis. Si mens seipsam à primo creationis momento perciperet , certè cogitationum nostrarum recordaremur : neque earum tantum , quæ nobis acciderunt , ubi primum editi sumus , sed etiam earum ; quibus in matrum utero fuimus affecti.

Atqui tamen hujusmodi cogitationum minimè recordamur.

Ergo mens seipsam à primo ortu non novit.

Respondeo negando majorem. Ut enim quarundam cogitationum recordemur , quandiu mens corpori est conjuncta , necesse est quædam cerebro inuri vestigia , per quæ mens ad easdem res recolendas determinetur : nam memoria non in sola mente , sed maximè in impressis cerebro vestigiis consistit , ut explicabimus inferiùs. Atqui in infantium cerebro , nulla inuri possunt hujusmodi vestigia : tum quia mollius est cerebrum , nec sat tenax ; tum etiam quia ab omnibus simul , & ex omni parte circumstantibus corporibus , ob debiliorem habitum tenelli corporis agitur : ex quo fit ut tot diversæ impressiones confundantur , ac sese mutuò deleant. Ergo etiam si mens nostra ab initio suæ creationis cogitet , minimè tamen suarum cogitationum memor esse potest , antequam firmior fuerit cerebri substantia , ac specierum aut vestigiorum in eo impressorum tenax , quod circa tertium ferè annum consuetudo naturæ cursu solet accidere. Quanquam id aliquando , sed rarissimè , citiùs contingit , ut de Tasso , eximio illo Poëtarum Italorum coryphæo memorant , qui cum sex tantum menses foret natus , quasi

adultus, aut vir ratiocinabatur; jamque Scholæ publicas tertio ætatis suæ anno frequentabat; ac septimo anno Latinam Linguam perfectè, Græcam plusquam mediocriter possidebat. Verùm hæc, si vera sint, insolita sunt exempla: nec iis ullo modo indigemus, ut assertionis nostræ veritas constet.

Objicies secundò. Mens nostra per quādam duntaxat reflexam cognitionem, seipsam novit, id est, postquam de re aliqua cogitavit, in seipsam redit ut se cogitantem esse intelligat.

Ergo seipsam naturaliter non novit, sed tantum postquam aliquā rerum externarum cognitione fuit informata.

Respondeo negando antecedens. Non enim per reflexam tantum cogitationem, ex prævia rerum externarum cognitione, mens humana seipsam intelligit; sed etiam intimo sensu & conscientia, quā se sentit, & se existere, ac cogitantem esse intelligit. Hæcque est mens sancti Augustini tum multis locis, tum maximè lib. 10. de Trinitate num. 10. aliàs cap. 7. & sequentibus. Nam hoc numero 10. ita loquitur. *Quid enim tam cognitioni adest, quàm id quod menti adest; aut quid tam menti adest, quàm ipsa mens?* Et numero 11. aliàs capite octavo: *cognoscat, inquit, semetipsam, nec quasi absentem se quarat, sed intentionem voluntatis, quā per alia vagabatur, statuat in semetipsam, & se cogitet.* Item numero 12. aliàs cap. 9. mentem cognoscere se ipsam ait, *nec ob aliud, quàm eò quod sibi præsens est.* Denique num. 14. aliàs cap. 10. *Quoniam de natura mentis agitur, inquit, removeamus à consideratione nostra omnes notitias, quæ capiuntur extrinsecus per sensus corporis, & ea, quæ posuimus, omnes mentes de seipsis nosse certasque esse, diligentius attendamus, &c.*

CAPUT III.

*Utrum mens humana demonstrari possit
immortalis.*

MENTIS humanæ, non secus ac rerum omnium spiritualium vita in cogitatione consistit: non enim aliter vivunt spiritus, quam per cogitationem; nec proinde interire possunt, nisi cogitare desinant. Quandiu autem existunt, cogitationis compotes esse intelliguntur: atque ita tandiu vivere censendi sunt, quandiu existunt. Hæcque certitudo metaphysica est: nam non tantum spiritus aliter esse non potest, sed nec aliter cogitari.

Cum ergo quæritur, utrum mens hominis sit immortalis: status quidem illius quæstionis est utrum vita ei semper competat: sed cum vivere non possit, nisi existat; prius est, videndum, an ipsa, postquam est a corpore sejuncta, pergat existere: si enim existat, vivere ipsam necesse est; cum ipsius vita, utpote quæ in cogitatione consistit, ab ejus existentia separari non queat.

Illud autem fide certum est, imò fidei Christianæ fundamentum, animos nostros non interire, ubi corporis carcere liberantur, sed immortales esse. Hinc Christus Dominus Matth. c. 10. v. 28. *Nolite, inquit, timere eos qui occidunt corpus, animam autem non possunt occidere:* Et Johan cap. 12. v. 25. *Qui odit animam suam in hoc mundo, in vitam æternam custodit eam.*

Cum autem non solâ auctoritate, sed etiam ratione hoc loco agendum sit; cumque Lateranense Concilium sub Julio I I. & Leone X. celebratum

Philosophos omnes sessione octavâ excitet , ut ad istam capitalem in Christiana Religione veritatem demonstrandam omnes ingenii vires, & industriam adhibeant ; nostræ sunt partes , ex innumeris penè rationibus , quas veteres & recentiores Philosophi attulerunt , efficaciores in medium proferre. Sed ante omnia , revocandum est in mentem , quod superius fuit demonstratum , scilicet , mentem humanam à corpore revera esse distinctam. Sit igitur

PROPOSITIO PRIMA.

MENS humana à corpore reverâ est distincta.

Probatur. Ea substantia reverâ distincta est à corpore quæ saltem divinitus existere potest sine corpore : nam unum & idem sine seipso nequit existere.

Atqui mens humana saltem divinitus existere potest sine corpore : nam cum ipsa sit substantia cogitationis particeps , rectè à nobis concipitur sine corpore , id est , sine substantia naturaliter extensa : proindeque à Deo separari potest & conservari extra corpus : cum Deus id efficere possit , quod clarè ac distinctè à nobis concipitur. Eaque ferè est ratiocinatio Cartesii tum sextâ meditatione metaphysicâ , tum maximè in fine responsionum ad secundas objectiones.

Ergo mens humana à corpore reverâ est distincta.

Quod si ita est , ut certissimum est , etiam certitudine metaphysicâ , cum res aliter cogitari non queat , hinc sequitur

PROPOSITIO SECUNDA.

MULTIS argumentis demonstrari potest humanæ mentis immortalitas.

Argumentum primum.

ARGUMENTUM primum, illudque metaphysicum immortalitatis animæ rationalis, ex ingenita omnibus hominibus humanæ mentis notionem repetitum, sic confici potest.

Illa substantia immortalis est, quæ à corpore sejuncta subsistit & vivit.

Atqui mens humana à corpore sejuncta subsistit & vivit. Primò quidem subsistit, cum sit substantia à corpore prorsus distincta; quæ proinde nec corpore ad subsistendum indiget, nec aliunde per se in propriam perniciem ruit. Secundò, vivit: nam cum semper cogitet, ejusque vita in cogitatione posita sit, minimè subsistere potest, quin vivat.

Ergo mens hominis est immortalis.

Quod dico primum hoc argumentum metaphysicum esse, id intelligo tantum de vitâ respecta substantiæ cogitantis: nam concipi non potest substantia cogitans sine vitâ, cum ejus vita in cogitatione consistat: adeoque, quandiu ipsa subsistit, vivit; sive non moritur, & consequenter est immortalis.

Sed quod spectat ad subsistentiam ejus, postquam separata est à corpore, de eâ certi non sumus certitudine metaphysicâ; quia fieri potest divinitus, ut ipsa deficiat, seu subsistere non pergat, quamvis per seipsam deficere non possit. Cum enim solus Deus existat necessario, cætera verò contingenter, & quatenus existentiam à Deo ac-

cupiunt, manifestum est fore ut ea in nihilum redirent, si Deus vel unico momento influxum suum subtraheret. Verum cum hic ordo ab omnipotenti Deo sit in rebus creatis constitutus, ut quas è nihilo semel eduxit, eas perpetuò conservet, fieri non potest, manente illo ordine, ut humana mens à corpore sejuncta pereat. Hæcque certitudo physica est, & astrui potest sequenti argumento.

Argumentum secundum.

MENS humana deterioris non est conditionis, quàm alia inferioris ordinis substantia, putà corpus aut pars corporis.

Atqui corpus à mente relictum, ut pars corporis à sua comparte separata, subsistere postulat: v. g. certum est, certitudine physicâ, ramum à trunco avulsum, etiam combusto, aut in pulverem comminuto trunco debere remanere: ac deum certitudine metaphysicâ constat rem creatam per seipsam deficere non posse, sed tantum, si Deus concursum suum ad existendum ipsi subduxerit: Deus verò hunc concursum non subducit uni parti pereunte alterâ, à qua minimè pendet: unde Ecclesiastes cap. 3. vers. 14. hæc ait, *didici quòd omnia opera, qua fecit Deus, perseverent in perpetuum.*

Ergo soluto corpore Deus menti concursum non denegat ad subsistendum; sed tam mentem ipsam, quàm corpus conservat, cum hoc tamen discrimine; quòd corpus, utpote ex partibus constans, varias mutationes subeat; seu variis speciebus, aut formis afficiatur: mens verò, quæ simplex est, non composita ex partibus integra semper, & incorrupta remaneat.

Hincque omnibus hominibus ingenerita est illa

opinio immortalitatis animæ rationalis , quàm à natura hausimus , non ratione , non doctrina comparavimus : ex qua sequitur argumentum tertium quod morale est , & omnium captui accommodatum.

Argumentum tertium.

Hoc argumentum ex omnium , quotquot sunt , sanæ mentis hominum consensione repetitur. Enim , ut ait Tullius lib. 1. Tusculanarum quaestionum , *maximum argumentum est naturam ipsam de immortalitate animorum tacitam judicare , quod omnibus cura sunt , & maximè quidem , quæ post mortem futura sint.* Deinde commemoratis iis , quæ à viris cordatis futuræ vitæ gratiâ geruntur , qualia sunt , arbores ferere , adoptare liberos , sepulchrorum monumenta extruere , vitam pro patria offerre , hæc subjungit : *Quod si omnium consensus , natura vox est , omnesque , qui ubique sunt , consentiunt esse aliquid , quod ad eos pertineat , qui è vita cesserunt ; nobis quoque idem existimandum est.*

Cui consentiens Seneca Epist. 117. hæc scribit : *Multum , inquit , dare solemus præsumptioni omnium hominum : apud nos veritatis argumentum est , aliquid omnibus videri cum de animarum aternitate differimus , non leve momentum apud nos habet consensus hominum , aut timentium inferos , aut colentium.*

Mitto Platonis , Aristotelis , ac cæterorum Philosophorum auctoritatem de qua videndus est Tullius libro præsertim 1. Tusculanarum quaest. ubi eorum sententias doctè simul , & eleganter exponit.

Verum negari non potest huic universo , tantquam Reipublicæ bene constitutæ summum ali-

quem præesse Gubernatorem, à quo singula regantur, qui justas criminibus pœnas, debitamque virtuti mercedem rependat.

Atqui id fieri non potest, nisi mens post mortem superstes remaneat: nam hîc videmus insonites sæpiùs indigere, & opprimi; improbos verò dominari, ac deliciis affluere: quod quidem à Christo Domino in paupere Lazaro, & epulone divite expressum est, Lucae c. 16. v. 25. *Fili, recordare, quia recepisti bona in vita tua, & Lazarus similiter mala: nunc autem hic consolatur, tu verò cruciaris.*

Ergo mentem humanam immortalem esse necesse est.

Denique eandem adhibere possumus ratiocinationem, quâ jam usi sumus cum clarissimo Pascali, cum Deum existere demonstraremus. Eorum quippe deploranda est amentia, qui, sine ulla spe emolumenti, salutem suam in certissimum discrimen adducunt.

Sec qui mentem humanam immortalem esse inficiantur, hâc dementiâ & cœcitate animi laborant. Nam etiamsi mens interitui foret obnoxia, ut falsò sibi persuadere conantur, nulla ipsos tam stultæ confidentiæ merces maneret: quandoquidem omni sensu & vitâ essent orbatî. At si ea mortem non oppetat, ut demonstratum à nobis putamus, quantas & quàm horribiles pervicaciæ suæ pœnas sunt daturi, qui non modò Religionem omnem abjecerunt; sed ipsi etiam naturæ interiùs, & exteriùs pulsanti obstinato animo restiterunt, donec instanti jam mortis puncto, remotâ erroris nebulâ, amentem suam impietatem, velut apertis oculis, conspiciere cœperint.

Ergo ab eorum hominum insania recedendum, totisque viribus in illorum sententiâ eundum, qui alteram vitam expectant, suamque vivendi rationem illius intuitu componunt.

Responsiones ad objecta.

Q U Æ C U M Q U E ab adversariis opponuntur argumenta contra humanæ mentis immortalitatem, ea, vel ex auctoritate desumuntur, vel ex ratione. Itaque

Objicies primo, unum esse interitum hominis & jumentorum ex cap. 3. Ecclesiastæ v. 19.

Respondeo verum esse quod ait Ecclesiastes hoc loco, de homine & jumentis: nam *unus interitus est hominis, & jumentorum, & aqua utriusque conditio*, quantum ad moriendi necessitatem: *sicut moritur homo, sic & illa moriuntur: similiter spirant omnia, & nihil habet homo jumento amplius*, quoad vitam corpoream omnibus animantibus communem.

Etenim, ut habetur Psalm. 48. v. 13. *homo cum in honore esset, non intellexit* (nimirum quantus esset iste honor: quoniam in Deum peccavit: omninoque) *comparatus est jumentis insipientibus, & similis factus est illis*, scilicet ratione corporis & vitæ præsentis, quæ brevissima est. Unde addit Ecclesiastes, *omnia pergunt ad unum locum: de terra facta sunt, & in terram pariter revertuntur*, nimirum ratione corporis: nam mens, quæ de terra facta non est, in terram non revertitur. Mens tamen ipsa post peccatum sic aggravata est, & veluti sepulta in materia, ut originis suæ quodammodo oblita, nonnisi terrena sapiat, nec se ad patriam cœlestem natam meminerit.

Quocirca subjungit Ecclesiastes, *quis novit si spiritus filiorum Adam ascendat sursum, & si spiritus jumentorum descendat deorsum?* Multi quippe etiam inter eos, qui sapientes haberi volunt, ut Epicurei, id ignorant: quia toti corpore suo, aut iis quæ ad corpus spectant, occupati, quæ

mentis propria sunt , considerare negligunt.

Illos tamen admonet Ecclesiastes eodem loco , nempe versibus 16. & 17. alteram nos manere vitam ; quâ justis mercedem tribuet Deus , & pœnas ab impiis repetet. Sed ipsi nempe innumera propemodum Scripturæ sacre testimonia , quibus eorum impietas apertissimè convincitur , negligunt ; unum aut alterum , quò faciliùs apud imperitos abuti possunt , studiosè requirunt.

Objicies secundo. Ex Apostolo 1. ad Timoth. 6. vers. 16. *Deus solus habet immortalitatem.*

Ergo mens hominis non est immortalis.

Respondeo explicando textum Apostoli. Solus Deus habet immortalitatem à seipso , concedo : ab alio , nego : quare nego consequentiam. Deus quidem solus habet immortalitatem à seipso , quia solus est increatus , & in seipso summè perfectus. Sed mentes angelicæ , & humanæ etiam immortalitatem participant , non quòd eam sibi ipsæ concesserint ; sed quòd à Deo illam acceperint. Unde sanctus Augustinus Epist. 166. aliàs 28. num. 3. aliàs cap. 2. sic scribit. *Anima hominis immortalis est , secundum quemdam modum suum : non enim omni modo , sicut Deus , de quo dictum , quia solus habet immortalitatem.* Hinc est quòd in Scholis dicitur Deus æternus & immortalis tum ab intrinseco , tum ab extrinseco , id est , neque à seipso , neque ab alio destrui potest , seu in nihilum redigi : sed mens humana immortalis tantùm est ab intrinseco : quoniam à seipsa interimi nequit , licet à principio extrinseco , seu Deo in nihilum , unde educta est , possit redigi. Quare etiam in sexta Synodo mentes hominum dicuntur *non naturâ , sed gratiâ Dei immortales* , quia non à seipsis , sed à divinâ voluntate & gratia immortalitatem consequuntur.

Objicies tertio , cum Lucretio lib. 3. de rerum

natura , cum Plinio seniore lib. 7. naturalis historie cap. 55. totâque veterum Epicureorum familiâ , animum nasci cum corpore ; aut in corpore.

Ergo perit cum corpore.

Respondeo negando consequentiam. Quamvis enim nascatur animus cum corpore , seu in corpore , est tamen substantia à corpore distincta , & diversæ penitus ab eo rationis , ac proinde , etiam soluto corpore , subsistit.

Probabis consequentiam. Anima belluarum interit cum corpore , quia nascitur cum corpore.

Ergo animus hominis perit cum corpore , si nascatur in corpore.

Respondeo negando consequentiam & paritatem. Disparitatis ratio est , quòd anima belluarum sit corporea , & ex partibus constans , scilicet in sanguine , aut spiritibus animalibus posita , ut tertiâ Physices parte dicemus ; animus vero humanus sit spiritalis , & cagitans. Quare anima quidem belluarum dissolvi potest ; & corrumpi , ut etiam spiritus animales in homine dissipantur : sed mens hominis illæsa semper , & incorrupta manet , cum sit simplissima & partium omnium expers , diversæque prorsus à corpore humano naturæ.

Instabis. Magna est inter homines , & belluas similitudo.

Respondeo distinguendo propositionem. Magna est similitudo , quoad functiones corporeas , & animales , nam homo edit , dormit , ægrotat , non secus ac bellua , concedo : quoad functiones spirituales , putà intellectum , & voluntatem nego : nulla enim est in belluis intelligendi vis , nulla libertas ; sed cæco , ac temerario impetu abripiuntur.

Urgebis. Sunt quædam belluæ , in quibus exquisitissima percipitur ratiocinatio.

Respondeo negando propositionem. Si enim foret in belluis ratiocinatio, suas cogitationes quibusdam signis, non tantum inter se, sed etiam nobiscum communicarent, ut homo inter exterarum nationes, quarum linguam ignorat, positus, continuo usu linguam illam, saltem imperfectè assequitur, ut cum iis commercium inire possit. Atqui belluæ nullis vocibus, aut signis cogitationes nobiscum communicant, tametsi organis ad loquendum idoneis magna ex parte sint præditæ, ut in picis, & psittacis liquet. Ergo in iis est ratiocinatio nulla, nedum exquisita. Quæ de re uberioris in Physica.

Præterea hoc argumentum non ostendit mentem hominis esse corruptibilem, & mortalem; sed animæ belluarum immortalitatem tribuit. Nam si belluæ non secus ac homines cogitant, earum sanè cogitatio ab anima spiritali seu mente, quæ incorrupta est, & immortalis, omnino prodit. Verùm cogitationem illam à belluis amoliamur in Physica, & omnes earum functiones in spirituum animalium motus refundi posse demonstrabimus.

Opponunt alii mentem humanam, tametsi cogitationis sit capax, soluto tamen corpore interire.

Respondeo negando propositionem. Est enim substantia à corpore distincta, nec pendet à corpore ad subsistendum, ut jam sæpè dictum est.

At inquirunt. Mens humana propter corpus duntaxat à Deo creata est.

Ergo soluto corpore, quo animabatur, & ad quod informandum erat condita, debet interire.

Respondeo negando antecedens. Non enim spiritum propter corpus solum, nempe substantiam nobiliorem propter ignobiliorem creavit Deus; sed propter semetipsum. Unde mens nostra, utpote ad Dei similitudinem formata, & propter ipsum con-

data , non omni suo munere , cùm corpus interit , defuncta est , ut malè contendunt nonnulli : sed Dei gloriæ in perpetuum est ipsi serviendum. Unde eam soluto corpore superstitem remanere necesse est.

Instant. Quod habet initium, habet finem, teste Aristotele lib.1. de cœlo, cap.12.

Atqui licèt humana mens propter Deum creata dicatur, tamen habet initium.

Ergo habet finem ; seu soluto corpore interit.

Respondeo distinguendo majorem. Quod habet initium per generationem , ut animal , vel arbor , vel aliud quodvis compositum naturale, & corporeum, illud habet finem, esto : quod habet initium per creationem , habet finem , nego : simili modo distinguo minorem , & nego consequentiam. Mens igitur humana habet initium per creationem , non per generationem : adeoque finem non habet. Enim verò si materia, quæ creata est , semper existere pergat , nec ad nihilum redigatur , nisi Deus ipsi suum concursum ad existendum deneget , à fortiori mens humana , quæ est substantia multò nobilior ac perfectior , per solum Dei concursum valet subsistere.

Urgent. Mens crescit in pueris , viget in juvenibus , deficit in senibus. Præterea in corpore sano est sana , in ægro ægrotat , in temulento turbatur , ac omnibus demum corporis mutationibus est obnoxia.

Ergo vel corporea est , vel certè sic pendet à corpore, ut eo soluto non subsistat.

Respondeo distinguendo antecedens. Mens crescit in pueris , &c. propter arctissimam , quam habet cum corpore conjunctionem , esto : propter seipsam, suamque naturam , nego : quare nego consequentiam. Idcirco igitur mens crescere videtur in pueris , vigere in juvenibus , &c. quia Deus hanc

legem corpus inter & mentem sancivit , ut nullæ ferè sint mentis cogitationes , quas statim non consequantur aliqui spirituum in organis corporeis motus, & vicissim. Unde quò magis explicata fiunt illa organa, liberiorque & expeditior spirituum motus , crescere aut vigere videtur mens ipsa , quòd faciliùs & promptiùs, imò fortiùs ad cogitandum determinetur. Cùm verò turbantur aut deficiunt spiritus , turbari quoque ob eandem rationem, vel deficere videtur cogitatio. Quare in lethargo, phrenesi, & ebrietate, non mens ipsa, sed cerebrum laborat , quod est ipsius mentis instrumentum : hincque non animus , sed cerebrum curari debet. Sed ubi mens à corpore est soluta, nullis hujusmodi corporis motibus agitur , sed eadem eodemque statu permanet : nec proinde colligi potest eam soluto corpore interire , aut in nihilum abire , cùm à corpore non pendeat ad subsistendum , ut sæpè dictum est.

Quod autem Lucretius libro laudato eos desipere ait , qui æternum cum mortali , hoc est, mentem cum corpore conjungunt , id parùm sanè dictum videtur : quia convenientissimum est substantiam spiritalem cum corporea simul conjungi , ut tam spiritus , quàm corpora in uno & eodem composito quodammodo consociantur , nec ullus in operibus divinis occurrat hiatus. Quòd si mens seipsam perimere nequeat : neque ipsa quoque materia perire potest , nisi Deus conservatricem manum illi subduxerit. Quocirca suo etiam modo futura est æterna, non secus ac mens , tametsi varias formarum , ac specierum mutationes subire debeat.

Objicies quartò , cum Petro Pomponatio Mantuano Philosopho , & iis omnibus , qui nullâ ratione , sed solâ fide Divinâ animam rationalem probari posse immortalem existimant , sententiam

nostram contrariam esse Aristotelis auctoritati.

Respondeo negando propositionem. Nam quamvis Aristoteles circa mentis humanæ immortalitatem dubius fuisse multis videatur : quoniam tamen lib. I. Ethic. cap. II. docuit mortuos amicorum fortunis quodammodo affici , certè mentem humanam interitui minimè obnoxiam putavit.

Instabis. Anima rationalis à corpore separata esset in statu violento , nec proinde posset subsistere.

Respondeo negando propositionem. Primò quia substantia , quæ est in statu violento , non continuò in nihilum redigitur ; sed tantùm , si sit corporea , & ex partibus constans, dissolvitur. Unde animæ damnatorum , quæ simplices sunt , & spiritales , etiam in statu violento , non tamen idcirco pereunt , sed dolori suo in perpetuum vivunt.

Secundò , non probant adversarii mentem humanam esse in statu violento , postquam est à corpore separata. Nam ideo ex illorum mente foret in statu violento , quod retineret aliquam ad corpus propensionem , ut vulgò docent : sed ex eo quod hujusmodi propensionem habeat , non continuò dici potest in statu violento : si quidem ea propensio non ita mentem sollicitat , quin facile carere possit corporis præsentia.

Tertiò , si sit anima beata , & intimè cum Deo conjuncta , minimè est in statu violento : nam ipsius conjunctio cum Deo tantis illam gaudiis perfundit , ut suam à corpore separationem nihili ferè instar habeat.

Ergo mens humana etiam extra corpus posita subsistit, ac vivit.

Sed inquires. Saltem anima rationalis à corpore sejuncta foret otiosa : quia nec sentire posset, nec intelligere , nec moveri , nec aliis mentibus,

sua cogitata posset manifestare : quod omnino est absurdum.

Respondeo negando propositionem. Illa enim substantia non est otiosa , quæ cogitat. Sed mens humana à corpore soluta cogitat : cum cogitandi vim non habeat à corpore , nec phantasmatis , aut speciebus sensibilibus , ac corporeis ad cogitandum indigeat , quia multa sunt in intellectu quæ prius non fuerunt in sensu , ut jam sæpius ostendimus. Ergo mens à corpore soluta non est otiosa.

Quod autem dicitur extra corpus sentire non posse, id aliquo sensu verum est , nempe , si *sensus*, aut quemadmodum loquimur, *sensatio* , definiatur cum sancto Augustino libro de quantitate animæ num. 59. aliàs cap. 30. *corporis passio per seipsam non latens animam* : quia cum corpori definat esse conjuncta , illius motibus , tanquam occasionibus non afficitur. Sed si sensatio sumatur pro interiori quadam humanæ mentis affectione , quæ occasionem habere solet à corpore , cujusmodi sunt dolor, & gaudium: certè mens à corpore sejuncta sentire potest , quoniam iisdem doloris , ac lætitiæ sensibus tunc affici potest Deo volente , quibus afficitur ubi corpori est sociata. Imò non abhorret à vero, quamdam materiæ portionem respectu cujusdam animæ , ab humano corpore separatae , sic disponi posse à Deo , ut , quemadmodum occasione motuum, qui in corpore humano fiebant , vel gaudii , vel doloris sensu commovebatur ; ita etiam occasione motuum istius materiæ-portionis, gaudium vel dolorem sentiat. Eâque ratione explicari potest quo pacto damnatæ mentes inferiorum ignibus torqueantur. Nam licet earum substantia flammis consumi nequeat , occasione tamen motuum circumstantis materiæ , dolorem urentem percipere ; vel , Deo volente etiam

sine hujusmodi materia , eodem dolore cruciari possunt.

Deinde mens humana à corpore avulsa intelligit , tum seipsam, tum Deum, tum alia permultra. Primò seipsam : quia cogitare non potest, quin suæ cogitationis sibi sit conscia : quare cum perpetuò cogitet , se quoque perpetuò potest intelligere.

Secundò intelligit Deum : quia Deus illi continuo præsens est , sive , ut remunerator , sive ut vindex.

Tertiò, alia multa intelligere potest, nempe, vel ea, quæ in Deo intuetur ; vel ea, quibuscum affinitatem, aut conjunctionem habet aliquam : nam ex una quandoque veritate multiplex alia consequitur. Ergo mens sine corpore potest intelligere.

Præterea moveri etiam potest sine corpore , scilicet ea motione , quæ spiritibus convenit. Etenim cum res spirituales non sint propriè in loco , ut de Angelis antea diximus , neque etiam propriè moventur , sive, à loco ad locum propriè non transferuntur , nisi *definitivè* , quatenus scilicet per suam cogitationem , modò uni loco , modò alteri præsentés sunt ; quamvis in eo loco non includantur, aut ab eo ambiantur.

Denique , quod spectat ad modum , quo suas cogitationes aliis mentibus aperire potest , vel aliarum cogitata percipere , idem statuendum putamus , quod de Angelis ante hac statuimus, nempe , ex occasione voluntatis unius mentis, cogitationem ipsius alteri manifestam fieri ; ut nunc ex occasione quarundam vocum aut aliorum signorum cogitatio hominis alteri homini innotescit : tam enim Deus potest efficere , ut hujusmodi communicatio , seu commercium inter plures mentes occasione solius voluntatis , quàm occasione motuum corporeorum, instituat.

CAPUT IV.

De humano intellectu, & ideis.

DUO præsertim in substantia cogitante occurrunt munera, scilicet *intelligere*, & *velle*; quasque proinde in ipsa facultates præcipuas distinguere necesse est, nimirum intelligendi vim & volendi: prior, *intellectus* dicitur, posterior *voluntas*: quanquam *intellectus* magis *perceptionem*, seu intellectionem, quàm *intelligendi facultatem*; & *voluntas* potiùs *volendi actum*, quàm *potentiam* significat. Has facultates ab ipsa mente reipsâ distinctas negant contra Thomistas reliqui omnes Philosophi; & quidem meritò. Etenim nihil nos cogit hujusmodi facultates à mente reipsâ secernere, si mens sola citra realem illam distinctionem intellectûs & voluntatis muneribus defungi possit. Atqui mens sola potest intellectûs & voluntatis functiones obire, citra realem hujusmodi facultatum ab ipsa distinctionem: mens enim per se cogitat: cogitare autem est intelligere, & velle. Adeoque intellectus & voluntas, reali distinctione, à mente ipsa non debent secerni; *nec entia*, ut vulgò aiunt, *citra necessitatem sunt multiplicanda*.

De utraque tamen facultate, & aliis, quæ harum alterutri sunt affines, seorsim disputabimus, ut ordo disciplinæ accuratiùs observetur. Ac primo quidem loco de *intellectu* dicemus, qui definiri solet *facultas humana mentis ens omne, & modum entis percipiens*: estque mens ipsa, quatenus intelligit, seu percipit; ut *voluntas* est eadem mens, quatenus vult.

Tom. I.

Y

Quomodo autem humana mens percipiat , arduum omnino , operosumque est definire.

Epicurei , qui nihil omnino in rerum natura , præter inane , & atomos extare falsò sibi persuadent , ad *idola* , & *spectra* confugiunt , ut indicavimus primâ parte Logices , cap. i. de cujus opinionis insulsite nihil est cur amplius dicamus. Dux sunt aliæ Philosophorum sententiæ , in quibus paulò studiosius hærendum : brevitati tamen consulemus. Prima est Peripateticorum , seu Scholasticorum : secunda Cartesianorum , seu Platoniorum , quam amplificavit Auctor operis *de Veritatis inquisitione*.

Sententia Peripateticorum.

Quod spectat ad Peripateticos , seu Scholasticos , duplicem distinguere solent intellectum ex Aristotele , libro tertio de anima capitibus 5. & 6. scilicet , *intellectum agentem* , & *intellectum patientem* , seu *patibilem* , seu *possibilem*. Docent intellectum agentem eum esse , qui *res potestate intelligibiles* , facit *actu intelligi* , fabricando nimirum sive excudendo & *exprimendo* species intellectiles , seu ideas , hoc est , spirituales rerum imagines quæ in Scholis Theologicis dicuntur *verbum mentis* , seu *species expressa* , ad differentiam specierum ab objectis , ut volunt , profectarum , quæ ab iis *species impressa* nominantur. Porro intellectus agens exprimere dicitur species illas *per conversionem ad phantasmata* , seu , convertendo se ad species corporeas , in phantasia exaratas , quas etiam si non videat , ad præsentiam tamen illarum , species intellectiles iis consimiles effingit , propterea quòd intellectus & Phantasia sunt facultates in eodem subjecto seu animâ rationali radicatæ & fundatæ : quod tamen conceptu arduum est , ut nihil dicam amplius.

Intellectum verò patientem cum vocant , qui *species illas intellectuales* , seu *ideas ab intellectu agente formatas recipiens* , res omnes intelligit. Nam etiam si *idea* nomen pro perceptione mentis nonnunquam sumatur , sapius tamen pro rei *specie* , sive pro objecto concepto solet usurpari : illa , *formalis* ; hæc , *objectiva* idea vocatur , ut declaravimus in Logica. Verùm id observatione dignum videtur , vocem græcam , quâ utitur Aristoteles eo loco , *mentem ipsam* , seu , animam rationalem , non intellectum pro mentis facultate sumptum , exprimere. Porro mentem nostram agentem simul , ac patientem dici , & haberi nihil verat : est enim agens , quatenus se ad agendum determinat , quo sensu *voluntas* dicitur ; est verò patiens quatenus intelligit , ac *intellectus* nominatur.

Sententia Cartesianorum.

Quocirca Cartesiani *voluntatem* quidem nostram , seu mentem *quatenus vult* , agere decernunt : sed cum nullam vim , nec in objectis , ad immittendas in sensuum organa sensibiles sui species ; nec in sensibus , vel phantasia , ad eas species formandas agnoscant : omnem perceptionem in nobis *passivam* esse volunt : adeo ut intellectus noster ideas , seu species intelligibiles rerum à se perceptarum non cudat , sed recipiat. Istas autem ideas , vel *innatas* esse , vel *adventitias* , vel ex iis compositas , seu *factitias* , docet Cartesius , ut explicuimus in Logica primâ parte cap. I. easque omnes cum spirituum animalium motibus in nobis sic connexas putat , ut sibi mutuò occasionem præbere possint , ob legem à Deo corpus inter & mentem constitutam , de qua sapissimè.

An mens nostra sui ipsius ideam cudat , aut alio modo habeat , nondum dicimus : sed difficile

non videtur ostendere, nullum esse in nobis , aut in ullo spiritu creato intellectum agentem , qui nempe rerum extra se positarum species , seu imagines intellectiles fabricet , ut vulgò traditur in Scholis Peripateticis : sed solum intellectum divinum agere , quippe qui à nullo illuminatur , & alios omnes illuminat, rerumque ideas , quas in se continet , spiritibus creatis exhibet. Sit igitur

PROPOSITIO PRIMA.

Non videtur extare in nobis intellectus agens. Probat. Intellectus agens vulgò dicitur, qui rerum extra se positarum species intellectiles exprimit & fabricat ; nam mens nostra sui ipsius ideam non habet secundum vulgares Scholarum Peripateticos.

Atqui nullus extare videtur in nobis hujusmodi intellectus : siquidem antequam eas species cuderet , vel res ipsas perciperet , vel eas ignoraret : si perciperet , jam intelligibili earum specie , seu ideâ informaretur , nec proinde novâ specie ad eas percipiendas indigeret : quòd si eas ignoraret , fieri nunquam posset , ut earum speciem *representativam* , quemadmodum loquuntur , fabricaret , cum rei ignotæ nulla fingi possit imago, aut species, aut idea, ut omnes norunt.

Ergo nullus extare videtur in nobis hujusmodi intellectus agens.

Dices. Intellectus noster non intelligi , nisi per *conversionem ad phantasmata* , seu species in phantasia , aut imaginandi vi depictas , ex quibus *species intellectiles* , seu ideas elicit , ut Peripatetici omnes docent interpretando Aristotelem libro 3. de anima, cap. 9.

Ergo intellectus noster non tantum patiens est, sed etiam agens.

Respondeo negando antecedens. Primò , quia sunt duo genera rerum qua sciuntur , inquit sanctus Augustinus libro 15. de Trinitate num. 21. alias cap. 12. *unum eorum qua per sensus corporis percipit animus , alterum eorum qua per seipsum* , hoc est , sine huiusmodi conversione ad phantasmata in cerebro depicta , ut sæpiùs demonstratum est. Secundò , si intellectus non intelligit , nisi per conversionem ad phantasmata , vel ea percipit , vel non percipit : si percipiat , nihil ipsi speciebus intelligibilibus ad intelligendum opus est , proindeque eas frustra fabricaret : quòd si phantasmata illa minimè cognoscat ; quomodo potest ex iis consimiles quasdam species intelligibiles , seu ideas exprimere , cum ignotæ rei nulla imago , vel species effingi possit ? Fateor quidem res corporeas , ex occasione motuum in cerebro excitatorum , aut vestigiorum in eo impressorum , ab ipsa mente percipi. Verùm hoc ita fieri non videtur , quòd ex species , aut vestigia ullam habeant cum rebus perceptis similitudinem , quæ intellectum , quasi vim quamdam , ut Scholæ loquuntur , *assimilativam* , moveat ad ideam intellectilem similem producendam : sed quòd ea lex ab Auctore naturæ corpus inter & mentem sancita sit , ut ex occasione quorundam corporis motuum , quædam animi perceptiones sequantur , seu in mente nostra excitentur , ut modò dictum est.

Sed inquires. Si motus illi nullam habeant cum rebus perceptis similitudinem , quomodo illarum perceptionem excitare possunt ?

Respondeo , per eam legem , de qua loquimur. Nam nihil vetat quominus Deus per omnipotentiam suam quasdam mentis cogitationes certis corporis motibus alligaverit , ut nos ipsi quasdam cogitationes cum certis vocabulis , quæ nullo modo

similia sunt rebus significatis, & in mente nostra excitatis, jungimus. Quid enim simile est inter vocem hanc, *domus*, & rem, quæ nobis occasione ipsius in mentem venit? Eodem modo de cæteris judicandum.

Corollarium I.

MENS humana percipiendo, seu intelligendo patitur; sive, quod idem est, intellectus noster dici debet facultas humanæ mentis passiva, non activa. Etenim ideas suscipere non est agere, sed pati.

Atqui mens nostra intelligendo ideas suscipit: tum quia illas fabricare non potest, ut modo diximus; tum etiam quia nobis invitis in mentem, sæpè veniunt, ut quilibet quotidie experitur.

Ergo mens humana, quatenus percipit, vel intelligit, patitur.

Corollarium II.

QUOTIES voluntaria est nostræ mentis intellectio, toties eam præcedit determinatio aliqua voluntatis, quâ mens sese ad intelligendum applicat; eaque applicatio, quæ etiam *attentio* dicitur, vera est actio, quæ ad libitum poni potest à voluntate vel omitti. Unde cum mens ad seipsam attendit, ut se cognoscat, reverâ agit: in eoque maximè ad Dei similitudinem creata dicitur, quòd se cognoscat, & amet: quamvis se cognoscendo & amando non producat terminos subsistentes, seu personas, ut fit in sanctissima Trinitate.

Cum autem dicitur aliquid cogitando sibi quidpiam repræsentare ea repræsentatio, spectata ut actio, nihil aliud est, nisi determinatio voluntatis, quâ intelligendi vis, quæ passiva est, ad percipi-

METAPHYSICÆ. SECT. III. CAP. IV. 511
piendum applicatur: sive est creatæ mentis *attentio*,
quæ instar *orationis cujusdam naturalis*, impetrat
à Deo, secundum legem, quam ipse constituit,
ut se rei cujuscumque ideâ informet; non verò est
actio intellectûs, quæ *verbum* quoddam, seu *speciem expressam*, cudat aut fabricet.

Corollarium III.

DUM mens humana seipsam per conscientiam
cognoscit, non producit ideam aliquam à seipsa
distinctam, & sui *representatricem*: sed tantum
intimo sensu sibi conscia est se existere; & cogi-
tantem esse. An autem veram sui ipsius ideam
aliunde habeat, quæremus postmodum.

PROPOSITIO SECUNDA.

MENS humana extrinsecus rerum ideis in-
formatur.

Probatur. Nam vel eas cudit, vel extrinsecus
eas recipit.

Atqui eas non cudit, ut modò probatum est.

Ergo extrinsecus iis informatur.

Oppones magnam nos in nobis ipsis defatigatio-
nem sentire, dum animum ad rem aliquam perci-
piendam adjungimus. Ergo mens humana intelli-
gendo agit, non patitur; seu ideas cudit, non
eas recipit.

Respondeo negando consequentiam. Licet enim
contentio animi, & studium acre plurimum nos
defatigare soleant, ista tamen defatigatio in cor-
pore, non in animo insidet, & à spiritibus; vel
exasperatis, vel exhaustis proficiscitur, ob eam
legem, quæ inter corpus & mentem intercedit,
de qua sæpius.

Deinde cum mentem ad rem aliquam adjungi-

Y iiij

mus, non sola occurrit perceptio, sed etiam voluntas, seu voluntatis actio, quâ nos ad aliquod percipiendum applicamus. Nec quidquam aliud esse videtur *mentis attentio*, quàm *actus voluntatis intellectum ad percipiendum applicantis*, sive, est mens ipsa, quatenus se ad intelligendum applicat.

PROPOSITIO TERTIA.

NON aliunde humana mens ideis rerum informatur, quàm à Deo.

Probatur. Vel à Deo solo ideis rerum informatur humana mens, vel ab objectis in eam immituntur, vel eas ipsa fabricat.

Atqui ipsa sibi rerum ideas non fabricat: alioquin iis, quod dici non potest, jam antè deberet esse informatâ, cum ignotæ rei nulla formari queat idea. Deinde res aut objecta, ideas sive species sui, in mentem nostram immittere, sive, ut scholæ loquuntur, *imprimere* non possunt: neque enim ulla est ratio, quæ vim illam, seu facultatem rebus creatis inesse persuadeat. Denique idea entis generatim, entis infiniti, attributorumque illius aliunde nobis suppeditari non potest, quàm ab eo, qui Exodi cap. 3. versu 14. propriâ appellatione dicitur *qui est*: cum nulla res, præter Deum, entis generatim, entis infiniti, attributorumque illius, putâ veritatis, bonitatis, & ceterorum speciem contineat. Unde Lactantius lib. 7. divinarum Institutionum, cap. 2. de veritate sic loquitur: *Homo autem non cogitando, aut disputando assequi eam potest, sed discendo, & audiendo ab eo, qui scire solus potest, & docere.*

Ergo non aliunde humana mens ideis rerum informatur, quàm à Deo.

Oppones hinc sequi Deum in nobis malas co-

gitationes operari, quod impium est.

Respondeo negando propositionem. Perceptiones enim, seu ideæ ratione sui minimè malæ sunt: v. g. idea adulterii, aut furti per se mala non est; cum ipsi Dei Ministri, dum alios ab adulterio, vel furto deterrent, ideas illas habere debeant, non secus ac fures, & adulteri: sed solus amor, vel desiderium, aut assensus voluntatis, quæ vel istis ideis immoratur, & oblectamentum ex iis capit: vel huiusmodi idearum objecta cupit, aut prosequitur, malus dicendus est. Assensus autem ille in nobis à Deo non efficitur; sed actus est voluntatis nostræ proprius, ut iam antè probatum est. Quod si mens illis ideis *immoretur* tantum, non verò iis acquiescat, tum cogitatio illius vocatur à Theologis *morosa*.

Instabis. Saltem *intellectio* non poterit dici *actio vitalis* ab intellectu, tanquam à principio vivente, *vitaliter* operante producta: quod in Scholis absurdum judicabitur.

Respondeo intellectionem non esse quidem actionem *vitalem* ab intellectu, tanquam à principio activo productam, sed esse affectionem *vitalem*. Nam affectio vitalis dicitur, quæ ita propria est substantiæ viventi, ut in ea recipi debeat, nec ab ullo principio extra eam produci possit.

Atqui intellectio ita propria est substantiæ viventi, nempe menti intelligenti, ut in mente recipi debeat, nec ab ullo principio extra mentem produci possit: nam potest quidem Deus mentem nostram illuminare, & ideas rerum in nobis excitare; sed extra mentem percipientem produci non potest perceptio, seu intellectio: quemadmodum potest Deus mentem nostram gaudio perfundere; sed sine substantia gaudente, quæ necessario vivere debet, non potest effici gaudium.

Ergo *intellectio* est *affectio vitalis* nostræ mentis.

tis, ut *volitio* est *actus vitalis* ab eadem mente seu voluntate *vitaliter*, hoc est, vitali modo operante profectus. Item visio, auditio, & omnes demum sensuum perceptiones sunt *affectiones vitales* in anima ipsa rationali, seu mente humana excitatæ.

Quod spectat ad *verbum mentis*, id non inficiamur extare in mente humanâ, quatenus illam Deus ideis rerum informat, & veluti gravidat: sed hoc verbum non videtur esse *species expressa*, ab intellectu agente, ad præsentiam phantasmatum corporeorum, quæ nullatenus ipse percipiat, efficta. Id enim ex ante dictis rationi repugnare videtur.

Corollarium I.

Quod de humana mente, hac propositione affirmamus, id de quolibet intellectu creato est sentiendum: solus quippe Dei intellectus percipiendo, hoc est, seipsum, & omnia alia in seipso contemplando, operatur: quia solus Deus à nullo alio illuminatur, nec illuminari potest; omnesque alios spiritus illuminat, seu ideis rerum informat.

Corollarium II.

DEUS dici debet creatarum mentium lumen. Etenim qui creatarum mentium tenebras, ferè ut Sol opaca collustrat corpora, is verè earum lumen debet appellari.

Atqui Deus creatarum mentium tenebras illuminat, sive illis ideas rerum sufficit, quas nec à seipsis, nec ab objectis haurire possunt, cum nec in seipsis illas contineant, nec ab objectis immediatè possint affici: unde S. Augustinus sermone 67. aliàs 8. de verbis Domini, num. 8. aliàs cap. 5, *Dic quia tu tibi lumen non es. Ut mul-*

METAPHYSICÆ. SECT. III. CAP. IV. 515

tum, oculus es, lumen non es. Quid prodest patens & sanus oculus, si lumen desit? Ergo dic, à te tibi lumen non esse, & clama quod scriptum est, tu illuminabis lucernam meam, Domine: lumine tuo, Domine, illuminabis tenebras meas. Mea enim nihil nisi tenebra, tu autem lumen fugans tenebras, illuminans me non à me mihi lumen existens, sed lumen non participans, nisi in te, &c. Similiter sanctus Thomas primâ parte quæstione 88. art. 3. ad primum, in luce primæ veritatis omnia nos intelligere & judicare ait. Ergo Deus dici debet creatarum mentium lumen perenni influxu mentes nostras illuminans, quatenus tum entis generatim, tum modi entis speciebus nos informat, earumque ad sese mutuò relationes nobis ostendit.

Corollarium III.

Non aliter cum intellectu creato concurrere videtur Deus, quàm ipsum illuminando: hoc est, rerum speciebus, sive immediatè, sive corporeis moribus, tanquam occasionibus quibusdam intercedentibus, ob eam legem quam frequenter inculcamus, instruendo: ut jam ante est declaratum.

Corollarium IV.

ATTENTIO mentis est causa occasionalis, sive ut loquitur Auctor Inquisitionis veritatis, est veluti *oratio quadam naturalis*, quâ Deum determinamus, ut intelligentiam nobis tribuat, hoc est, rerum species, seu ideas mentibus nostris suppeditet, ac relationes, quas aliæ habent ad alias patefaciat. Hinc sequitur

PROPOSITIO QUARTA.

EXTANT in nobis ideæ quædam innatæ.

Probatur, Idea innata dicitur, quæ nobiscum est nata; sive quæ nobis à primo vitæ momento ad extremum, quoties attendit animus, semper præstò est, quamque sola prima causa sine corporis, aut cujuscumque aliûs causæ secundæ subsidio omnibus communiter impertit, ut definitum est in Logica: eaque idea rectè dicitur lumen naturale, quo nempe Deus humanas mentes communiter illuminat, seu rerum, quæ clarè ac distinctè percipiuntur, speciebus naturaliter informat.

Atqui plurimæ sunt hujusmodi ideæ, quæ statim ab ortu menti nostræ divinitus sunt ingenitæ, cum nec à nobis formari, nec ab objectis per sensus immitti posse videantur. Talis est idea entis summè perfecti, seu entis simpliciter, aut uno verbo *entis*, quod propriè Deus est, qui cùm infinitis modis à creaturis participari possit, spectatur à nobis primò, ut ens, deinde, ut summum ens, hoc est, ut verum, ut bonum, &c. Hinc est, quòd naturaliter nobis adest idea entis generatim, & illius attributorum, seu differentiarum, aut modorum, scilicet unitatis, veritatis, pulchritudinis, & reliquorum, quæ ad summam perfectionem requiruntur: hinc etiam ducitur idea extensionis, & eorum, quæ extensioni insunt, putà divisibilitatis, mobilitatis, quæ omnes ideæ per sensus transire nequiverunt. Nec tantùm istæ ideæ nobis adsunt à natura, sed relationes etiam, quas ad se mutuò habent naturaliter novimus; in eoque maximè vis luminis naturalis consistit, cujus ope ideas consimiles jungimus, dissimiles removemus, & omnia judicia, quæ certa & evidentia sunt, facimus.

Ergo aliquæ sunt in nobis ideæ innatæ : idque ita visum est non modò præstantissimis inter Philosophos , nimirum Platonis ; sed & ipsis quoque Ecclesiæ Patribus , qui iudicia , quæ de ente generatim , ipsiusque attributis habemus , innatis duntaxat ideis niti putaverunt.

Nam quod spectat ad ipsum esse , simulque ad cognitionem , & dilectionem ; quæ sunt modi entis , nempe modi nostræ mentis , non verò sunt entia , de his ita loquitur S. Augustinus libro 11. de Civitate Dei cap. 26. *Et sumus , inquit , & nos esse novimus , & id esse , ac nosse diligimus. In his autem tribus , quæ dixi , nulla nos falsitas verisimilis turbat : non etiam ea sicut illa quæ foris sunt , ullo sensu corporis tangimus , velut colores videndo , sonos audiendo , odores olfaciendo , saporibus gustando , dura & mollia contrectando sentimus sed sine ulla phantasiarum , vel phantasmatum imaginatione ludificatoria , mihi esse me , idque nosse , & amare certissimum est.* Et Epistola 147. aliàs 112. ad Paulinam , num. 38. aliàs cap. 16. *Ipsa discretio , inquit , videtur mente , non corpore , & ea quæ mente conspiciuntur , non indigent ullo corporis sensu , ut ea vera esse noverimus.*

De veritate verò sic habet lib. 8. de Trinitate num. 3. aliàs cap. 2. *Noli querere , quid sit veritas statim enim se opponunt caligines imaginum corporalium , & nubila phantasmatum , & perturbabunt serenitatem , quæ primo ictu diluxit tibi , cum dicerem veritas.* Ex quibus verbis veritatem naturaliter , seu naturali lumine percipi significat sanctus Doctor , non sensibus attingi.

Idem de pulchritudine sic sentit libro 2. de libero arbitrio , num. 41. aliàs cap. 16. *Quicquid te delectat in corpore , & per corporeos illicit sensus , videns esse numerosum , & quæras unde sit , & in te ipsum redeas , atque intelligas te id , quod attingis*

sensibus corporis , probare aut improbare non posse , nisi apud te habeas quasdam pulchritudinis leges , ad quas referas quaque pulchra sentis exterius. Ean-que opinionem ex Platoniorum Schola hausisse videtur , ut colligi potest ex his Tullii verbis initio libri , qui , Orator , inscribitur. Itaque , inquit , ut Phidia simulacris , quibus in illo genere nihil perfectius videmus , & his picturis , quas nominavi , excogitare tamen possumus pulchriora. Nec verò ille artifex , cum faceret Jovis formam , aut Minerva , contemplabatur aliquem , ex quo similitudinem duceret , sed ipsius in mente insidebat species pulchritudinis eximia quadam , quam intuens , in eaque defixus ad illius similitudinem artem & manum dirigebat. Ut igitur in formis , & figuris est aliquid perfectum & excellens , cuius ad excogitatam speciem imitando referuntur ea , quæ sub oculos ipsa cadunt : sic perfecta eloquentia speciem animo videmus , effigiem auribus quarimus. Has rerum formas appellat ideas , ille , non intelligendi solum , sed etiam dicendi gravissimus Auctor , & Magister Plato , easque gigni negat , & ait semper esse , ac ratione & intelligentiâ contineri.

De perfectione denique audiendus est Boëtius lib. 3. de consolatione Philosophiæ , prosa 10. Omne , inquit , quod imperfectum esse dicitur , id diminutione perfecti , imperfectum esse perhibetur. Quo fit , ut si in quolibet genere imperfectum esse aliquid videatur , in eo perfectum quoque aliquid esse necesse sit. Unde rectè inferitur nos , nec nostram , nec aliarum rerum imperfectionem esse cognituros , nisi summæ perfectionis notitiam mentibus præsentem haberemus.

Plura hujusmodi testimonia congerere nihil attinet , cum aliunde res attentis animis per se pateat.

Responsiones ad objecta.

O B J E C T I E S primò. Nullæ ideæ nobis sunt innatæ, si omnes à sensibus originem ducant.

Atqui ideæ omnes ortum habent à sensibus, secundum receptum in Scholis axioma: *nihil est in intellectu, quod prius non fuerit in sensu.*

Ergo nullæ sunt ideæ nobis innatæ.

Respondeo negando minorem. Illæ quippe ideæ non oriuntur à sensibus, quarum objecta nec colorata sunt, nec sapida, nec sonora, nec ullâ sensibili qualitate affecta, ut ait sanctus Augustinus lib. 10. Confessionum, num. 17. aliàs cap. 10. & alibi passim. Atqui multæ sunt ideæ, quarum objecta nec colorata sunt, nec sapida, nec sonora, nec ullâ sensibili qualitate affecta: cujusmodi sunt idea entis generatim, illiusque attributorum, aut modorum; idea Dei, ut omittam notionem nostræ mentis, &c. Ergo illæ ideæ ortum non habent à sensibus: sed eæ duntaxat à sensibus oriuntur, quarum objecta per sensus percipi possunt, videlicet ideæ, sive potius perceptiones qualitatum sensibilium, ut coloris, soni, odoris, saporis, caloris, frigoris, & aliæ hujusmodi, ex quibus vel gaudium, vel dolor, vel alii id genus affectus nascuntur. Sic tamen à sensibus pendent, ut non ab iis, tanquam à causis propriè dictis, sed tantum, ut ab occasionibus originem ducant. Quare principium illud generatim propugnari non debet, *nihil est in intellectu, &c.* sed in solis qualitatum sensibilium perceptionibus locum habere potest.

Probabis minorem. Si quæ sit idea quæ ortum non habeat à sensibus, maximè idea entis generatim, idea Dei, idea, seu perceptio nostræ mentis cogitationis, &c.

Atqui omnes istæ ideæ ortum ducunt à sensibus.

Ergo omnis idea à sensibus est oriunda.

Respondeo negando minorem. Idea quippe entis generatim ortum non habet à sensibus, si ens generatim, nec coloratum sit, nec sapidum, nec ullâ qualitate sensibili præditum, priusque à nobis cognoscatur, quàm sensuum ministerio utamur. Atqui ens generatim nec coloratum est, nec sapidum, nec ullâ qualitate sensibili vestitum, ut per se clarum est. Deinde prius cognoscimus quid sit ens, seu *esse* generatim, quàm sensibus nostris utamur: nam ut in præmio Philosophiæ observavimus, cap. 1. dubitare potest aliquis de rerum sensibilibus existentia, etiamsi se esse, aut existere certò sciat, nec de eo dubitare queat. Ergo idea entis generatim ortum non ducit à sensibus, sed nobis omnibus à natura est congenita. Neque ea solum, verùm etiã ideæ attributorum, aut modorum entis generatim, primarumque illius specierum naturaliter omnibus insunt, ut ex eo facile intelligitur, quod illarum idearum objecta sensibus observari nequeant: idque de Deo, & humana mente sic à nobis demonstratum arbitramur, ut nulla in iis superesse possit difficultas. Quare

Probabis minorem, quoad ens generatim, & aliquorum illius attributorum, seu modorum, putà extensionis, aut ordinis; nimirum quod ens generatim per solam abstractionem à singularibus intelligatur, & extensio ac ordo per solos sensus innotescant.

Verùm nego primò, entis generatim cognitionem à rerum singularium perceptione esse profectam: prius enim est cognoscere ens simpliciter, quàm ens tale, aut entis differentias: neque unquam ens generatim ab entibus singularibus ab-

trahere per mentem possemus, nisi entis generatim idea nobis esset congenita: v. g. intelligere non possemus quid sit spiritus generatim, quid homo, quid animal, quid arbor, &c. nisi nobis inlita foret idea entis generatim, cujus species sunt & spiritus, & homo, & animal, & arbor, ac in illius extensione includuntur. Idea quippe entis generatim non tantum substantias corporeas; sed etiam spirituales, imò, si quod esset aliud substantiarum genus à Deo procreatum, aut procreandum, in sua extensione complectitur. At si hæc idea ortum haberet à sensibus, & ex rebus sensibilibus foret expressa, non omnia planè entium genera in sua extensione comprehenderet; sed tantum entia corporea. Ergo illa idea non ducit originem à sensibus, imò res singulares, entia quædam esse pronuntiamus, quoniam ideam entis generatim iis convenire videmus, non verò hanc ideam ex rebus singularibus ducimus. Vide quæ de abstractione, seu præcisione mentis disputavimus in Logica, primâ parte, capite tertio.

Secundò. Neque ens corporeum generatim, aut extensionem percipimus ex sensuum duntaxat impressione. Etenim sensus nobis extensionem, aut corpus generatim non exhibent: sed potius aliquam substantiam corpus esse novimus, quia cum idea corporis, aut substantiæ extensæ nobis congenita, congruere eam animadvertimus.

Instabis. Quomodo igitur idea universalis per abstractionem fieri dicitur, nisi sit à singularibus expressa?

Respondeo ideam generalem idcirco abstractam dici à singularibus, quòd, dum mens ideam generalem intuetur, non magis unum aliquod ens singulare, quàm aliud sibi repræsentet, v. g. cum ideam circuli considerat, non magis hunc, quàm

illum circulum percipit ; sed generatim formam quamdam respicit , quæ omnes ex æquo circulos repræsentare potest. Non ergo hæc idea dicitur à singularibus abstracta , quòd ab omnibus & singulis circulis fuerit expressa ; cùm minimè necesse sit aliquem perlustrare omnes circulos , ut ideam circuli generatim habeat : sed ideo dicitur abstracta , quòd non magis unum , quàm alium circulum exhibeat.

Objicies secundò. Si quis nasceretur omni sensu , præter tactum , quo forsan carere non potest , orbatus ita , ut neque videret , neque audiret , neque olfaceret , neque gustaret , is sanè nullis rerum ideis informari posse videretur.

Ergo nullæ sunt ideæ menti nostræ congenitæ.

Respondeo negando antecedens. Mens quippe in ea hypothesi viveret : vita autem mentis in cogitatione consistit , hoc est , in perceptione intellectûs , & inclinatione voluntatis. Ergo mens cogitaret. Non cogitaret autem de rebus à se remotis , sed de iis , quæ præsentibus sibi forent , & à quibus commoveretur. *Nihil autem menti magis præsto est , quàm ipsa sibi* , ut docet sanctus Augustinus lib. 14. de Trinitate num. 7. aliàs cap. 4. Ergo de seipsa cogitaret , sive seipsam per quamdam conscientiam cognosceret. Deinde Deus quoque , à quo continuo illustratur , & cujus ipsa viva est imago , ab ea perciperetur : quandoquidem aliter seipsam imperfectam esse non judicaret , quàm quòd ab idea entis summè perfecti , seu Dei , deficere se intelligere. Denique extensionis ideam haberet , ac corpus ipsum , cui foret conjuncta quodammodo cognosceret. Nam si corpus illud pungeretur in capite , deinde in pede , mens quamdam inter illa loca distantiam , seu ex-

ensionem perciperet. Si corpus ad ignem propius admoveretur, ea dolorem sentiret; si titillaretur, gaudium perciperet. Imò, si quis vi majore corpus cui conjuncta esset, palo catenis alligaret, & circumquaque ingentem ignem accenderet, ut ab eo torreretur; ac postmodum benignior aliquis accederet, qui illud solveret, oleoque, ac unguentis liniret: certè de priori apud seipsam conquereretur: ac posteriori gratiam haberet. Itaque mens humana, in eo statu, non foret omni cognitione orbata, tametsi nullo luminis, vel colorum, vel sonorum, vel odorum, vel saporum sensu foret affecta.

Nunc videndum, in quo consistat natura & entitas idearum innatarum, objectivè sumptarum; & quæ sint ea, quæ per ideas claras, quæ illa, quæ per ideas confusas, aut potius per sensum confusum percipimus. Quo quidem loco exponenda videtur sententia Auctoris Operis, quod est de veritatis inquisitione.

*Sententia Auctoris Operis de veritatis
inquisitione.*

Cartesius & Cartesiani docuerant generatim perceptionem in nobis fieri per ideas innatas, aut adventitias, aut factitias, scilicet vi legis à Deo inter corpus & mentem constitutæ, quæ ex occasione motuum qui in cerebro fiunt, variæ in mentibus nostris ideæ, aut perceptiones excitantur: sed modum, quo res quælibet intellectui nostro sunt præsentis, ipsique quodammodo uniuntur, in medio reliquerant. At Philosophus excellens Nicolaus Malebranchius Parisinus, Presbyter Oratorii D. Jesu, longius progressus est in eo opere, quod inscripsit de veritatis inquisitione:

nam ipse quatuor in nobis distinguit percipiendi modos secundâ parte libri tertii, cap. 7.

Primus est, quo res *in seipsa* videtur: quâ ratione solus Deus à nobis cognoscitur. Secundus, quo res non in seipsa percipitur, sed *per ideam claram*, quæ sola propriè idea est, quæque vel ens, vel entis modum menti nostræ repræsentat. Tertius est per *sensum intimum*, seu *per conscientiam*: quomodo mens humana affectionum, seu sensuum, aut sensationum suarum sibi est conscia. Quartus denique fit *per conjecturam*: quâ ratione aliorum hominum mentes nobis innotescere videntur. Quintum cognoscendi modum addere licet, eumque supernaturalem, nempe per *revelationem divinam*, seu *fidem*, per quam mysteria novimus: sed iste modus Theologorum est proprius.

Itaque quod Cartesius *per ideam confusam* cognosci ait, id Auctor inquisitionis veritatis per *sensum intimum*, seu *conscientiam* percipi decernit: nam nullam admittit ideam, nisi quæ clara est, & distincta, quæque quidpiam clarè & distinctè menti nostræ repræsentat, quales sunt idea extensionis, idea numeri, &c. Verùm hæc omnia paulò explicatiùs sunt tradenda.

Primus percipiendi modus, cùm res in seipsa videtur.

Primò igitur, si Auctorem inquisitionis veritatis audiamus, essentiam Dei cognoscimus, non in idea quadam, aut specie, vel imagine, à Deo distincta; sed illam *in Deo ipso* novimus: quatenus menti nostræ præsens est, eamque illuminat. Quippe nulla res, aut imago, aut species, aut similitudo Deum nobis exhibere potest, ut optimè docet sanctus Thomas primâ parte, quæst. 12. art. 2.

Atque adeo mens humana non tantum cum humano corpore, sed etiam cum Deo ipso est suo modo conjuncta, ut ostendit sanctus Augustinus libro octaginta trium questionum, quæst. 54. his verbis. *Deo igitur junctum est, quod intelligit Deum. Intelligit autem rationalis anima Deum. Nam intelligit quod semper ejusmodi est, neque ullam patitur mutationem. At & corpus per tempus & locos, & anima ipsa rationalis, quod aliquando sapiens, aliquando stulta est, mutationem patitur. Quod autem semper eodem modo est, melius profectò est, quam id quod non ita est. Nec quidquam est melius rationali anima, nisi Deus. Cum igitur intelligit aliquid, quod semper eodem modo sese habet, ipsum sine dubio intelligit. Hac autem est ipsa veritas; cui quia intelligendo anima rationalis jungitur, & hoc bonum est anima, rectè accipitur id esse, quod dictum est, mihi autem adharere Deo bonum est.*

Nec tantum essentiam divinam novimus, quoniam menti nostræ utcumque se exhibet, sed in ea pariter generales rerum ideas, primasque & immutabiles judiciorum ac ratiocinationum leges, & axiomata, quæ idearum illarum ad se mutuò relationes exprimunt, tanquam in publico quodam lumine, quo illustrantur creatæ mentes, contuemur. Quapropter, inquit S. Aug. lib. 2. de libero arbitrio, num. 33. aliàs cap. 12. *nullo modo negaveris esse incommutabilem veritatem, hac omnia, quæ incommutabiliter vera sunt, continentem, quam non possis dicere tuam, vel meam, vel cujusquam hominis, sed omnibus incommutabilia vera cernentibus, tanquam miris modis secretum, & publicum lumen præsto esse, ac se præbere communiter. Omne autem quod communiter omnibus ratiocinantibus, atque intelligentibus præsto est, ad ullius eorum propriè naturam pertinere, quis dixerit? Et libro 14. de Trinitate, num. 21. aliàs cap. 15. docet ab incommu-*

tabili luce veritatis , etiam impium , dum ab ea avertitur, quodammodo tangi. *Hinc est quod etiam impii cogitant aternitatem , & multa rectè reprehendunt , rectèque laudant in hominum moribus. Quibus ea tandem regulis judicant , nisi in quibus vident, quemadmodum quisque vivere debeat , etiamsi nec ipsi eodem modo vivant ? Ubi eas vident ? Neque enim in sua natura , cùm proculdubio mente ista videantur , eorumque mentes constet esse mutabiles, has verò regulas immutabiles videat , quisquis in eis & hoc videre potuerit. Ubinam sunt ista regula scripta nisi in libro lucis illius , quæ veritas dicitur, unde omnis lex iusta describitur. Legatur liber secundus ejusdem sancti Doctoris de libero arbitrio num.20. aliàs cap.8. & sequentibus.*

Dices. Si Deus à nobis in seipso perciperetur, jam essemus beati.

Atqui falsum consequens.

Ergo & antecedens.

Respondeo distinguendo majorem. Si Deus à nobis in seipso perciperetur , quantum à nobis percipi potest *perfectè* , id est , si uberiori lumine, quod *gloria lumen* dicitur , mentem nostram perfunderet , & ad se *intuitivè* , ut aiunt , & veluti revelatâ facie conspiciendum eveheret , jam essemus beati , concedo : si tantum videatur *imperfectè* , eo scilicet lumine , quod *natura lumen* vocatur , nego : quare concessâ minore , nego consequentiam. Quamvis igitur distinctè Deum in hac vita percipiamus , imperfectè tamen illum cognoscimus , non revelatâ facie , quoniam à *luce incorruptibili caligo nos nostra corruptionis obscurat*, ut loquitur Divus Gregorius lib.31. *Moralium* in Job , cap.20. Hinc Apostolus primæ ad Corinth. cap.13. v.12. *Videmus nunc per speculum in enigmate , tunc autem facie ad faciem.* Enimverò ut ad Deum propius accedamus , liberanda

est à corpore mortis hujus mens nostra, & uberiori ac fortiori gloriæ lumine collustranda: nam corpus quod corrumpitur aggravat animam, nec Dei fulgorem à nobis sustineri finit. Quare non licebit nobis Deum facie ad faciem, nisi post mortem contemplari, cum nempe ad intuitum, seu conspectum sui nos evehet, summoque ac perenni gaudio nos perfundet.

*Secundus perceptionis modus per ideam
claram.*

Secundo modo ab eodem Auctore corporum essentiam, communiaque illorum attributa percipere dicimur, nempe *per ideam claram*, hoc est, ut ipse interpretatur, spectando ideam *archetypam*, quæ corpora intelligibili modo continentur, quæ idea archetypa, nihil aliud ipsi est, nisi essentia divina, *quatenus secundum aliquem similitudinis modum participabilis est à creaturis*, ut loquitur sanctus Thomas primâ parte, quæst. 15. art. 2. Ideoque omnia corpora in Deo videri pronuntiat.

Etenim apud ipsum *perceptio* & *idea* plurimum inter se discrepant. *Perceptio* quippe est modus, seu affectio mentis percipientis, quæ proinde cuique menti est peculiaris, & aliquando est sensio intima & confusa, vel *conscientia*. At *idea* omnibus est communis. Nam non solum, inquit, nostri homines mente vident, seu concipiunt extensionem immensam, & in infinitum sine ullis terminis per spatia, quæ vocant aliqui *imaginaria*, diffusam, sed eadem reliquis etiam hominibus, putà Asiaticis, Africanis, Americanis adest idea clara & distincta: omnes ii in illa idea diversas distinguere possunt figuras, diversos motus, &c. omnes norunt minores istius extensionis partes in majoribus contineri, &c. Cumque perceptio, seu

modus mentis humanæ immensam extensionem in se non comprehendat ; nec in circulum, aut triangulum , aut in alias hujusmodi figuras sit conformata : necesse videtur , ut extensionem illam, omnesque illius proprietates in exemplari quodam , seu lumine omnibus hominibus communi percipiat , hoc est, id *idea illa archetypa* , quæ omnibus hominibus exhibetur , & in qua proinde vident homines , quicquid clarè & distinctè concipiunt. Illud autem exemplar , seu *idea archetypa* , Deus est , *quatenus aliquâ ratione à creaturis est participabilis* , illasque in se *eminenter* continet. In Deo igitur extensionem immensam , & consequenter omnia corpora contuemur.

Si extensionem illam clausis oculis apud se concipiant homines , eam ubique *homogeneam* , seu ejusdem ubique rationis percipiunt. Sed si oculos aperiant , magnam in ea diversitatem sentiunt. Nam aliter ab una illius parte , aliter ab alia afficiuntur : putà forti luminis sensu à Sole percelluntur ; debiliori à Luna ; variisque colorum , sonorum , odorum , saporum , & aliarum qualitarum sensibilibus perceptionibus , propter diversorum corporum præsentiam , tanguntur. Perceptiones igitur illæ cujusque hominis sunt propriæ : quæque quibusdam gratæ videntur , aliis sunt ingrata : sed *idea corporis & extensionis* est exemplar quoddam omnibus hominibus commune, quo omnes extensionem eodem prorsus modo concipiunt , easdem in ea designare possunt figuras , & similes motus intelligere. Quæ omnia non tantum loco laudato ; sed aliis etiam ejusdem Auctoris operibus latius disputata comperientur.

Oppones nullam esse in Deo extensionem , cum minimè corporeus sit , quomodo igitur exhibere nobis poterit extensionis speciem ?

Respondeo nullam esse in Deo extensionem ,
formaliter

formaliter, ut aiunt, sed *eminenter*. Deus enim in se extensus non est, nec locum replet ut corpora: sed tamen cum Deus sit ens simpliciter, ens per essentiam, à quo quæcumque existunt, necessario profluxere, omnia planè entia in eo, sive formaliter, sive eminenter comprehendi necesse est, ex quinto axiomate suprà allato. Cum igitur corpora, quæ sunt, omnia ab eo producta sint, ea intelligibili saltem modo in ipso comprehendi oportuit, id est, secundum extensionem *intelligibilem*, non secundum extensionem *localem*: quapropter ea nobis exhibere potest Deus, vel immediatè, vel interventu quorundam corporis motuum, tanquam occasione aliquâ, ut sæpè diximus.

Tertius percipiendi modus, per conscientiam.

TERTIO modo, nempe *per conscientiam*, secundum eundem Auctorem, mens humana se ipsam novit, suasque cogitationes & affectiones, nempe gaudium, tristitiam, sensationesque, seu sensaciones omnes luminis, coloris, soni, odoris, caloris, frigoris, famis, &c. Non enim scimus, quâ ratione disponi debeat humana mens, ut gaudii, vel doloris, vel caloris, vel frigoris, vel alio quolibet sensu afficiatur, sicut clarè videmus, qualis esse debeat dispositio corporis, ut sit rotundum, quadratum, aut aliâ quâvis figurâ instructum: idque ex eo quòd essentiam corporis in idea archetypa, seu Deo conspiciamus; mentis verò nostræ sensum duntaxat confusum habeamus, quo sentimus quidem, seu nobis conscii sumus nostram mentem existere, & cogitare; neque proinde ejusdem esse naturæ ac corpus: sed tamen illius naturam, & proprietates clarè ac distinctè non novimus.

Alii tamen, à quorum opinione non abhorremus, naturam nostræ mentis in idea generali entis, quâ tam spiritus, quàm corpora continentur, intelligi putant. Cum enim Deus sit ens per

essentiam, & infinitis modis à creaturis participari possit, mentem nostram sic illuminat, ut & entis generatim, & specierum ac modorum entis ideam nobis suppeditet. Sed quamvis humana mens seipsam per ideam norit, suas tamen affectiones, putà gaudium, tristitiam, &c. non per ideam claram, sed per conscientiam duntaxat, seu sensum confusum percipere videtur.

Quartus percipiendi modus, per conjecturam.

QUARTO denique modo aliarum mentium creaturarum, sive Angelicarum, sive humanarum naturam *per conjecturam* à nobis cognosci putat idem Auctor. Cum enim illas, neque in seipsis, neque in ideis claris videamus, nec per conscientiam, quid in ipsis peragatur, sentire possimus; unum superest, nempe ut eas tales esse in se conjiciamus, quales nos esse conscii nobis sumus. Quæ omnia, si vera sint ut sunt certè verisimillima, sequitur

P R O P O S I T I O Q U I N T A

I D E Æ adventitiæ, vel nullæ sunt vel falsæ, aut confusæ.

Probatur. Ideæ adventitiæ dicuntur, quæ nobis occasione motuum corporis adveniunt; suntque præsertim ideæ qualitatuum sensibilium, ut definitum est in Logica.

Atqui istæ ideæ vel nullæ sunt, vel sunt falsæ, aut confusæ.

Primò enim, si sumantur pro affectionibus mentis, quæ occasione motuum corporis excitantur, non sunt propriè ideæ, cum nihil propriè repræsentent: v. g. affectio quàm mens nostra sentit calorem, frigus, sonum, aut cæteras qualitates, nihil propriè repræsentat; sed est tantum sensus aliquis intimus, quo mens humana confusè quidpiam in seipsa sentit.

Secundò, si sumantur pro qualitatibus ipsis objectivè perceptis, falsæ sunt, aut confusæ: falsæ quidem, quatenus id quod minimè in corpo-

ribus invenitur, nobis exhibent; confusæ verò, quatenus ideam formalem, quæ est ipsa mentis perceptio, aut *sensio*, cum eo quod rebus inest, confundunt, quamvis nulla sit inter qualitates corporeas, & sensum ab iis excitatum similitudo.

Ergo idæ adventitiæ vel nullæ sunt, vel sunt falsæ, aut. confusæ.

PROPOSITIO SEXTA.

IDÆ factitiæ vel ex ideis, innatis componuntur, vel ex conjunctione sensationis intimæ cum idea clara producuntur. Conjectio autem illa non fit ab intellectu nostro, cum intellectus noster pati potius videatur, quam agere: sed tamen fit in nostro intellectu, vel ex occasione perturbati spirituum animalium motûs, ut in febricitantibus accidit; vel per actum voluntatis, ut dum v. g. voluntas simul cum idea extensionis, aut molis, quæ menti nostræ præsens est, cum spirituum animalium motum determinat, quo flavi, vel aurei coloris sensus excitatur; quo casu molem auream, aut montem aureum percipimus; vel cum ideam capitis humani cum idea corporis piscis, sive ex occasione motûs spirituum animalium, sive ex determinatione voluntatis jungimus, ut effingatur, &c. In quibus omnibus vel spirituum motum, vel actum voluntatis semper intercedere necesse est, à quo vel immediatè & proximè, vel mediatè hujusmodi compositio determinetur; in qua judicium nonnunquam tacitum occurrit, quo res non actu quidem existere, sed saltem existere posse decernitur.

Verùm inquires. Si res ita se habeat, saltem idea factitia à nostra mente composita est, non aliunde accepta.

Ergo mens nostra non semper extrinsecùs ideis rerum informatur.

Respondeo distinguendo antecedens. Idea factitia non est aliunde accepta, si spectetur *ratione*

ompositionis, esto: si *ratione idearum*, ex quibus teluti partibus componitur, nego. Idea enim extensionis, v. g. seu molis est nobis congenita: dea auri, vel coloris aurei, seu flavi est adventitia, ut dictum est; seu potius est sensio quædam intima ipsius humanæ mentis: sed ex utraque fit, aut componitur per mentem mons aureus, vel moles aurea, quæ idea ratione partium componentium aliunde accepta est, non à nobis effecta. Hucusque de modo, quo cognoscuntur rerum essentia, verba fecimus: nunc quomodo earum existentia nobis comperta sit explicandum.

P R O P O S I T I O S E P T I M A.

EX I S T E N T I A M Dei in clara ipsius idea, quæ ab eo, quatenus mentem nostram illuminat, distincta non est, comprehensam intelligimus. Etenim in idea entis summè perfecti, existentia, quæ est perfectio, necessariò comprehensa intelligitur, ut est antea demonstratum.

P R O P O S I T I O O C T A V A.

EX I S T E N T I A M nostræ mentis per quamdam conscientiam seu sensum intimum, quo suarum cogitationum sibi conscia est, manifestam nobis esse attendentibus omnibus liquet. Non enim cogitare possumus, quin nos cogitare, proindeque existere conscii nobis simus. Hinc principium, *cogito: ergo sum*. Ac licet minùs clarè, secundùm auctorem inquisitionis veritatis, mens nostra suam, quàm corporis essentiam norit, magis tamen de sua, quàm de corporum existentia certa est: siquidem de corporum existentia adhuc dubitare potest; cum existere se omnino sibi est conscia.

P R O P O S I T I O N O N A.

R E R U M spiritualium, putà Angelorum, aut humanarum mentium à nostra distinctarum existentiam novimus ex effectibus, quos ab iis prodire intelligimus, ut jam superiùs de Angelis fuit probatum.

PROPOSITIO DECIMA.

Res corporeas existere, certisque qualitatibus esse præditas novimus per quasdam impressiones, quibus, velut occasionibus, quædam affectiones, aut sensationes vividæ constanter, ac eâdem semper ratione in mente nostra excitantur.

Probat. Eodem planè modo judicandum de cæteris corporibus, ac de Sole.

Atqui Solem existere, ac luminosum & calidum esse cognoscimus per impressionem luminis, aut caloris, aut aliarum qualitatum, quibus velut occasionibus, certæ quædam affectiones, aut sensationes vividæ constanter, & eodem semper modo in mente nostra excitantur; si enim eæ affectiones citra illam impressionem in nobis per totam vitam excitarentur, Deus certè, quod cogitare nefas est, nobis illuderet, ut pluribus dicemus in Physica, ubi de corporum existentia.

Ergo res corporeas existere, certisque qualitatibus præditas esse novimus per impressiones aliquas, &c.

Corollarium.

Ex dictis hætenus colligere licet, quæ sit idearum omnium origo. Nam eæ omnes à Deo, sive proximè & immediatè, sive mediatè, & intercedentibus corporeis motibus proficiscuntur, & in mente, seu intelligendi vi excitantur. Nunc de ratione, phantasia, & memoria, quæ sunt facultates intellectui affines, pauca supersunt subjungenda.

Ratio, phantasia, & memoria.

MEMORIA in homine est facultas animæ rationalis, seu humana mentis, quâ rerum prius cognitarum recordamur. Ea verò nihil est aliud, quàm ipsa mens, prout occasione vestigiorum in cerebro residuorum, & motuum spirituum animalium, per hæc vestigia discurrentium, ad certam rerum perceptionem determinatur, ut exponemus tum capite sexto, ubi de habitibus mentis

naturalibus erit sermo, tum maximè in Physica.

Phantasia, seu imaginandi vis in nomine itidem spectata, est *facultas, quâ mens humana res corporeas sub imaginibus corporeis percipit*; aut potius est ipsa mens, seu anima rationalis, quatenus ex impressis cerebro vestigiis, & spirituum animalium per ea vestigia fluentium motu, ad aliquid corporeum sub imagine corporea cognoscendum excitatur.

Ratio denique hoc loco est *vis ratiocinandi*, seu unum ex alio rectè inferendi: eaque proinde non *intellectum* solum, seu mentem, quatenus percipit; sed etiam *voluntatem*, includit, de qua modo est dicendum.

C A P U T V.

De humana voluntate, & libertate.

ALTERA mentis humanæ facultas, *voluntas* dicitur; eaque in Scholis definiri solet *facultas qua bonum generatim ab intellectu exhibitum prosequitur, & malum aversatur*: sive, est ipsa mens quatenus in bonum cognitum propendet, & à malo recedit, non enim est res aliqua, vel entitas ab ipsa mente, & ab intellectu reverâ distincta: sed quemadmodum humana mens, quatenus intelligit, *intellectus* dicitur; ita, quatenus vult, *voluntas*, nominatur. Quocirca voluntas minùs aptè *cæca* in Scholis dicitur. Nam quæ facultas est reverâ quid idem ac altera facultas quæ percipit seu cognoscit, ea minùs propriè *cæca* vocatur. Atqui voluntas est quid reipsâ idem ac facultas percipiens, nempe intellectus: cùm intellectus & voluntas nihil aliud sint, quàm ipsa mens, quæ diverso modo spectata, vel intellectus, vel voluntas nuncupatur. Ergo voluntas minùs propriè *cæca* nominatur.

Quoniam tamen aliud est *percipere*, aliud *velle*: nec quidquam ferè mens per voluntatem prosequi-

tur aut fugit, quin prius aliquâ saltem confusâ ipsius cognitione sit informata; hinc intellectus perceptio prævia dicitur voluntatis motioni; sive, ut Scholæ loquuntur, intellectus voluntati facem quodammo præferre concipitur. Nec tamen voluntas eam ob causam potest *cæca* pronunciari, cum facultas cæca lucentem faciem subsequi nequeat.

Jam ut intellectus lumine suo naturali tam ens generatim, quàm modum entis percipere potest; sic voluntas ad bonum universè, id est, ad Deum ipsum *implicitè* saltem, si non *explicitè* cognitum, naturali propensione tendit. Rursus, quemadmodum perceptio rei singularis, nihil aliud esse videtur, quàm limitatio quædam luminis naturalis, quo ens ipsum universè, seu, *Deum*, novimus; ita etiam propensio voluntatis in bona singularia, est generalis istius inclinationis quædam determinatio, aut restrictio, quâ bono cuidam privato adhærescit.

Ex hac verò voluntatis *amplitudine*, quâ bonum generatim prosequitur, soloque incommutabili ac infinito bono satiari potest, oriunda videtur illius *indifferentia* circa bona privata, per quam efficitur, ut iis necessario non adhæreat: sed quid sit illa voluntatis indifferentia ac libertas, paulò clariùs est definiendum.

Libertas humana.

LIBERTAS humana, prout hîc à nobis spectatur, nihil aliud esse videtur, quàm ipsa voluntas, quatenus in boni prosecutione & fuga mali à necessitate tum externa, tum etiam nonnunquam interna est immunis. Duplex enim in præfati negotio distingui solet *necessitas*: scilicet *externa*, quæ *coactio* dicitur; & *interna*, quæ est naturalis quædam & necessaria in bonum propensio, & à malo averfio. Duplex proinde est voluntatis libertas: altera à *coactione*; altera à *necessitate* naturalis inclinationis.

Libertas à coactione est *immunitas humana vo-*

luntatis ab omni vi externa, tam in boni profecutione, quàm in fuga mali: *vim autem externam seu coactionem* dicimus, *qua ab externo principio alicui contra propriam ipsius inclinationem infertur*, ut cum quis trahitur ad supplicium.

Ubi observandum nullam posse vim inferri voluntari, quoad ipsius actus *interiores & proprios*, v.g. quoad amorem, vel odium: non potest enim cogi ad amandum contra propriam inclinationem; alioquin amaret, & non amaret rem eandem; veller & noller simul, seu veller nolens & invita: quod sanè repugnantiam involvit. Sed ea tamen vim pati potest, quoad motus *exteriores & corporeos*, quos tanquam causa occasionalis in corpore suscitatur: v.g. detineri potest aliquis invitatus, dum cursum meditatur, vel pelli & moveri, dum quiescere amat.

Unde liquet voluntatem esse semper liberam à coactione, quoad actus proprios & intrinsecos, sive, quod idem est, omnem actum voluntarium esse semper liberum à coactione; quia fit *libenter*, & à voluntate citra ullam vim externam profiscitur: non tamen semper liber est à naturali necessitate. Etenim

Libertas à naturali necessitate, quæ *liberum arbitrium*, sive, *libertas electionis* dicitur, ea est *qua omnem prorsus necessitatem, tum externam, de qua modò dictum est, tum etiam internam amolitur*. Est autem necessitas interna, sive, necessitas naturæ, aut necessitas naturalis inclinationis, *propensio quadam voluntatis ad bonum necessario prosequendum, & malum necessario fugiendum*. Unde non sumus liberi à necessitate naturali & internâ circa amorem boni, & odium mali generatim: quia non possumus non amare bonum generatim, sive felicitatem nostram; neque malum, sive miicriam non odisse.

Sed bonâ privata voluntatem nostram ad se necessario non alliciunt: ideoque liberam habe-

mus eorum eligendorum potestatem, sive ex multis unum præ aliis assumere possumus: imò, si unicum sit, id assumere possumus, aut relinquere: quod citra indifferentiam quamdam nequit intelligi. Sed de his in Ethica fusiùs.

Cùm verò liberum arbitrium in voluntate positum Philosophi omnes fateantur, permirum videri debet *judicium*, quod idem est ac *arbitrium*, intellectui non voluntati solere in Scholis attribui. Ut autem veritati hac etiam parte consulamus, demonstrandum nobis est, quod in Logica polliciti sumus, *judicium* ad voluntatem, non ad intellectum propriè pertinere; ipsum semper voluntarium esse, cùm perceptio nonnunquam contra voluntatis nostræ inclinationem, in nobis excitetur, imò sæpissimè *judicium* à voluntate sic pendere: ut ferri possit, vel non ferri ad libitum. Sit igitur

PROPOSITIO PRIMA.

JUDICIUM ad voluntatem, non ad intellectum pertinet.

Probatur. Actus voluntatis ad voluntatem, non ad intellectum pertinet.

Atqui *judicium* est actus voluntatis: est enim affirmatio veri, vel negatio falsi; sive, est assensus, vel dissensus, quo voluntas aliquid approbat, vel improbat; sive, quo sese vel in partem affirmantem, vel in partem negantem, prout idæ aut consentaneæ, aut dissentaneæ sunt, inflectit.

Ergo *judicium* ad voluntatem, non ad intellectum propriè pertinet.

PROPOSITIO SECUNDA.

QUAMVIS perceptio nobis etiam invitis in mente nostra excitetur, *judicium* tamen omne semper est voluntarium.

Probatur. Illud voluntarium dicitur, quod fit tum voluntatis propensione, aut etiam ex libera determinatione.

Atqui omne *judicium* fit semper cum volunta-

tis propensione , & aliquando etiam ex libera determinatione, sive ex electione. Nam vel connexio aut separatio subjecti & attributi est evidens ; tumque voluntas in affirmationem & negationem libentissimè fertur , licèt necessariò , non ex libera determinatione judicet : vel ista connexio paulò est obscurior ; & tum voluntas ex electione , seu libera determinatione affirmat , aut negat , ut in judiciis *temerariis* accidit.

Ergo iudicium omne semper est voluntarium.

P R O P O S I T I O T E R T I A .

N O N rarò iudicium nostrum *liberum* est *libertate electionis* , quæ omnem necessitatem, etiam internam & naturalem excludit.

Probatur. Illud liberum dicitur ab omni necessitate , etiam internâ , quod ferri potest , aut non ferri ad libitum.

Atqui iudicium sæpissimè ferri potest , vel non ferri ad libitum , nempe cùm nec clara , nec necessaria est attributi cum subjecto connexio : ideoque *temeraria* iudicia prohibentur , & damnantur tanquam *libera* , ac in nostra potestate sita.

Ergo iudicium persæpè est liberum *libertate arbitrii*, seu *electionis* , quæ omnem necessitatem , etiam naturalem & intrinsecam removeret.

Responsiones ad objecta.

O B J E C T I E S primò. Iudicium est cognitio, ut fatentur omnes.

Sed cognitio pertinet ad intellectum , non ad voluntatem , quæ *cæca* vulgò vocatur.

Ergo iudicium pertinet ad intellectum.

Respondeo negando majorem. Quod enim est posterius cognitione , seu perceptione , non est cognitio seu perceptio. Sed iudicium posterius est perceptione , seu cognitione : siquidem est affirmatio veri, vel negatio falsi ; sive est assensus vel dissensus mentis aliquid approbantis vel improban-
tis : qui assensus aut dissensus præviâ rerum cog-

nitionem requirit : ideoque si minùs accuratè res cognoscatur , temerarium est iudicium , ut omnes consentiunt. Ergo iudicium non est cognitio , sed cognitionem sequitur. Idque omnibus ita persuasum est à natura , ut nihil in sermone familiarius sit apud homines , quam *non esse iudicandum de rebus ignotis* ; priusque ad ideas attendendum , quàm feratur iudicium. Ne quis verò detur cavillationi locus , admonemus nos hic cognitionis nomine intelligere nudam perceptionem mentis , non verò scientiam aut alium mentis habitum , qui ex pluribus perceptionibus ac iudiciis coalescat , ut notavimus in Proœmio Philosophiæ , cap. 2.

Objicies secundo. Intellectus solus versari dicitur circa verum , voluntas verò circa bonum tantum.

Atqui iudicium est circa verum.

Ergo ad intellectum , non ad voluntatem spectat.

Respondeo distinguendo majorem. Intellectus solus versatur circa verum , ut percipiendum , concedo : circa verum ut affirmandum , vel negandum , nego. Simili modo distinguo minorem , & nego consequentiam. Affirmatio igitur veri , & negatio falsi ; sive conjunctio idearum similium , & divisio repugnantium est reipsa quædam prosecutio boni , quod allicit ad se voluntatem quæ in bonum nititur. Unde fides , quæ divinitus revelâtis assentimus , quæque non secus ac scientia perceptionem simul & iudicium complectitur , *in voluntate est* , ut docet S. Augustinus lib. de prædest. Sanct. num. 10. aliàs cap. 5.

Objicies tertio. Iudicium plerumque non est liberum , sed necessarium.

Ergo à voluntate non proficiscitur.

Respondeo negando consequentiam. Quamvis enim iudicium non sit liberum , est tamen semper voluntarium. Nam nulli rei contra voluntatem nostram assentimur , vel dissentimus , nisi forte

ore tenus, scilicet, vel metu pœnæ, vel spe utilitatis, vel adulandi animo, vel aliâ quâvis injustâ ratione: sed multa percipimus contra voluntatis inclinationem, siue multæ in nobis excitantur perceptiones, à quibus liberos esse nos optaremus. Quare prava judicia vitio nobis vertuntur, non item pravarum rerum perceptiones, seu ideæ, quæ idcirco malæ cogitationes dici nequeunt nisi consensus, qui liber est, accesserit. Vide præterea secundam partem Ethicæ capite tertio circa finem.

Appetitus sentiens.

Q U E M A D M O D U M *intellectus*, quatenus per imagines corporeas percipit, *phantasia* nomine donatur; sic *voluntas*, prout in bonum sensibile nititur, aut à malo sensibili, ex motuum corporeorum occasione revocatur, *appetitus sentiens* dicitur: iisque rursus, in appetitum *concupiscentem*, & *irascensem* ex Platonis doctrina solet dividi, ut in *Physica* dicemus. Quamobrem eadem mens, quatenus quidpiam citra imaginem corpoream intelligit, *intellectus*; quatenus verò sub imagine corporea quodammodo rem contueretur, *phantasia* nominatur: si occasione motus spirituum animalium rei cujusdam recorderetur, *memoria*, si unum ex alio colligit, *ratio* dicitur. Simili modo, dum quidpiam citra motionem corpoream expetit, *voluntas* est: si ex occasione motuum corporis, idque præsertim cum aliqua vehementiori commotione, *appetitus sentiens* vocatur: qui insuper vel *concupiscentis*, vel *irascens* esse perhibetur.

C A P U T V I.

De naturalibus humana mentis habitibus.

Q U A M V I S naturales habitus mentis non ab ipsâ solâ, sed à corpore pariter magna ex parte pendeant, eâque ratione non magis

ferè ad Metaphysicam , quàm ad Physicam referri debere videantur : satius tamen existimamus hoc loco habitus saltem spiritales exponere , quàm eorum explicationem in Physicam differre ; ut nempe mentis essentia , facultates , & habitus uno se tenore consequantur. Quod verò ad habitus corporeos spectat , faciliùs intelligentur ex dicendis in Physica , ubi de nervorum origine , ac motu, tum naturali, tum spontaneo verba fecerimus.

Habitus porro generatim secundùm doctrinam Aristotelis , tum libro 2. Ethicorum , cap. 4. tum libro Categoriarum , cap. de qualitate , definiri potest *qualitas prima speciei adveniens potentia, eamque juvans ad operandum.*

Dicitur *qualitas prima speciei*: quia quatuor qualitaris species bimembres ab eodem Aristotele , cap. de qualitate, in Categoriis proditæ sunt; nempe *habitus & dispositio : naturalis potentia & impotentia, &c.*

Additur *adveniens potentia*, quia non illam habemus à natura, nisi quantum ad inchoationem: sed vel à Deo infunditur, vel repetitis actibus acquiritur.

Denique dicitur *facultatem juvare ad operandum* : quoniam habitus subsidio faciliùs , promptiùs, & jucundiùs operamur.

Ex habitibus porro alii sunt supernaturales, quos nempe Deus infundit nobis sine nobis ; ideoque dicuntur *infusi*, ut fides , spes , & charitas , de quibus hîc non agimus : alii sunt naturales , qui repetitis actibus comparantur ; unde etiam *acquisiti* vocantur. Quare breviter *habitus acquisitus* definiri potest *agendi facilitas repetitis actibus comparata.*

Habitus autem ille acquisitus ; vel *spiritalis* dicitur , cùm nempe *juvat facultatem spiritalem* ; tametsi ratione suæ entitatis ad corpus magna ex parte pertineat , ut mox videbimus : vel dicitur *corporeus* , si *facultatem corpoream ad agendum determinet.* Uterque vel bonus est, & dicitur *virtus* : vel est malus, & *vitium* nuncupatur.

Rurfus habitus spiritalis, vel *intellectualis*, vel *moralis* appellatur.

Intellectualis dicitur, *qui mentis intelligentiam, & cognitionem iuvat*: ideoque intellectum maximè respicit, quia perceptio, seu cognitio, quæ est primaria pars huiusmodi habituum, intellectui competit. Quæque autem huiusmodi habitus intellectuales recensentur ab Aristotele lib. 6. Ethicorum, cap. 3. *intelligentia, sapientia, scientia, prudentia, & ars*, de quibus in Proœmio Philosophiæ verba fecimus. Iique habitus, quia boni sunt, *virtutes mentis* dicuntur. Error verò, & *hæresis*, de quibus ibidem diximus, vocantur *mentis vitia*. Denique *opinio*, quæ ex ratione probabili ducitur, & *fides humana*, quæ hominum duntaxat auctoritate & testimonio suffulta est, habitus indifferentes nominantur.

Habitus moralis inclinat voluntatem vel ad bonum, vel ad malum morale. Si ad bonum inclinat, virtus moralis; si ad malum, seu peccatum, vitium morale nuncupatur, ut in Ethica dicemus.

Nunc autem paucis explicandum, in quo habituum spiritalium natura consistat. Quod ut facilius exequamur, in memoriam revocandum, quod antea sæpe inculcatum est; scilicet mentem nostram ex Conditoris voluntate corporeis motibus, tanquam occasionibus determinari, ut vicissim motus corporis cogitatione, tanquam occasione, sæpiùs excitatur. Ea enim est corporis & mentis societas, ut nulla sit cogitatio, quam non statim aliquis spirituum animalium motus subsequatur; quemadmodum nullus in cerebro motus accidit, quin aliqua oriatur in mente cogitatio. Omnis autem humani corporis motus per spirituum animalium fluxum perficitur, ut dicemus in Physica: qui spiritus animales nihil aliud sunt, quàm subtilior & purior sanguinis portio, quæ in cerebri anfractibus defecata, nervos inde exortos subit, ac per eos veluti canales, ad quaslibet corporis partes deducitur, ut ibidem explicabimus.

Cum ergo sæpius ex quarundam cogitationum occasione, ad easdem partes delati sunt spiritus animales, vias sibi paulatim latiores aperiunt, ac majores agunt sulcos, per quos reversi, iis ipsis, a quibus originem habuere, cogitationibus occasionem præbent. His porro ex Physica prælibatis, quæ jam attingimus in Proœmio Philosophiæ, cap. I. Sit

PROPOSITIO PRIMA.

Habitus intellectuales, cujusmodi sunt *scientiæ*, non sunt meræ qualitates spirituales, humanæ menti inhærentes; sed magna ex parte in impressis cerebro vestigiis, liberiori spirituum animalium fluxu, & omnium, ut vocant, impedimento-
rum remotione consistunt.

Probatur prima pars. Si habitus intellectuales essent meræ qualitates spirituales menti inhærentes: vel essent tantum affectiones quædam, aut dispositiones, seu modificationes humanæ mentis vel essent entitates aliquæ spirituales, menti advenientes, & in ipsa receptæ, ut fingi solent in Scholis.

Atqui nec sunt affectiones, seu modificationes duntaxat spirituales; nec entitates humanæ menti superadditæ, & in ea velut, *implantatæ*.

Primò, non sunt affectiones duntaxat, seu dispositiones ipsius humanæ mentis; tum quia simplex aliqua mentis affectio, aut dispositio integram scientiam, ex multis partibus constantem comprehendere posse non videtur; tum etiam quia mentis affectio, quæ spiritalis est, nec vi morbi, nec diuturnitate temporis aboleri potest, ut scientiam quotidie deleri cernimus: cum nec mentem afficiat morbus, nec res spiritalis corrumpatur.

Secundò, neque etiam sunt entitates humanæ menti succrescentes. Nam qui habitus intellectuales volunt esse entitates menti succrescentes, ii per illas entitates intelligunt *species* ab intellectu agente productas, quasi quosdam, ut

vocant, actionis vitalis, seu cogitationis *terminos*, sive effectus post cogitationem superstitēs. Non potest autem intellectus creatus ullas entitates è nihilo producere, cum id soli Deo sit proprium. Deinde intellectus noster non est activus sed passivus, ut est antea demonstratum. Denique si habitus intellectuales essent entitates menti inhaerentes, hinc sequeretur eos extra mentem subsistere posse, ut de quantitate, & cæteris accidentibus in Eucharistia extra subjectum subsistentibus docent communiter Theologi: quod tamen foret absurdissimum: nam scientiam vel sapientiam extra mentem posse consistere nemo dixerit.

Ergo habitus intellectuales, cujusmodi sunt scientiæ, non sunt meræ qualitates spirituales menti inhaerentes.

Probatur secunda pars. Habitus intellectualis est facilitas de rebus jam antè perceptis cogitandi, aut eas rursus tractandi, quas sæpè tractavimus.

Atqui ea facilitas magna ex parte in impressis cerebro vestigiis, liberiore spirituum animalium fluxu, impedimentorumque, ut aiunt, omnium remotione consistit: nam iste spirituum fluxus, seu motus, propter creatoris legem sæpius inculcatam, cum cogitationibus mentis sic illigatus est, ut semper sese simul offerant; & quò distinctiora sunt impressa cerebro vestigia, cò distinctior est spirituum motus, & clariore, ac distinctiores fiunt notiones.

Ergo habitus intellectuales, cujusmodi sunt scientiæ, magna ex parte in impressis cerebro vestigiis, liberiori spirituum animalium fluxu, & impedimentorum, ut vocant, omnium remotione consistunt.

Corollarium.

Habitus intellectuales præter mentis cognitionem, quæ est eorum pars excellentior, includunt affectiones corporeas, quæ cognitionem illam velut

occasiones determinant. Proindeque homo per habitus intellectuales, quos labore & studio sibi comparavit, *jus* illud in res quasdam sibi acquisivit, tanquam *mercedem* laboris à Deo concessam, ut cum attendere volet, eas percipiat.

PROPOSITIO SECUNDA.

Habitus morales, ut justitia, injustitia; temperantia, intemperantia, &c. præter mentis ipsius, seu voluntatis dispositionem, quæ pars est superior habitus moralis, aliquam requirunt agendi facilitatem, quæ in impressis cerebro vestigiis, expedito spirituum animalium motu, & impedimentorum remotione consistit.

Probatur. Habitus morales sunt ii, qui voluntatem vel ad bonum, vel ad malum morale inclinant, ut justitia, injustitia; temperantia, intemperantia, &c.

Atqui hujusmodi habitus præter bonam, vel malam mentis qualitatem, scilicet vel constantem amorem ordinis, si habitus sit bonus, vel aversionem ab ordine, si malus sit habitus, facilitatem adhuc aliquam agendi requirunt, quæ in spirituum motu & corporis dispositionibus sita est: nam voluntas naturaliter per solam intellectus perceptionem ad agendum satis determinatur, nec ullam patitur moram inter agendum, nisi quæ ab affectibus, seu motibus corporeis injicitur: unde vincenda tantum est resistentia, quæ à corpore oritur, idque per contrariam corporis affectionem, quæ in spirituum motu maximè est collocata.

Ergo habitus morales præter mentis ipsius, seu voluntatis dispositionem, impressa quoque in cerebro vestigia, expeditos spirituum animalium motus, & impedimentorum omnium remotionem requirunt.

Responsiones ad objecta.

Objicies primò. Si habitus intellectuales confi-

stant in impressis cerebro vestigiis , &c. erunt corporei, non spirituales : quod absurdum est.

Respondeo distinguendo propositionem. Erunt corporei, non spirituales, quoad substantiam, concedo : quoad usum , nego. Habitus autem intellectuales non ideo dicuntur spirituales, quòd eorum substantia sit omnino spiritalis, sed quòd facultati spiritali, seu ipsi menti , vi legis inter ipsam & corpus stabilitæ, famulentur : unde dicuntur spirituales *quoad usum tantum, non quoad substantiam*. Non diffitemur quidem novas dispositiones, aut affectiones, seu modificationes sive bonas, sive malas menti advenire ; sed in iis præcipuè habitus naturales & acquisitos reponi non concedimus, cum ex mentis dispositiones, aut modificationes , vel affectiones vi morbi deleri non possint, ut hæc tum scientiæ, ac rerum omnium memoriam diuturno morbo expungi , penitusque deleri non rarò comperimus.

Sed inquires. Habitus intellectuales producuntur per actus, qui sunt spirituales quoad substantiam.

Ergo sunt etiam spirituales quoad substantiam.

Respondeo distinguendo antecedens. Producuntur per actus spirituales , tanquam per occasiones, concedo : tanquam per causas propriè dictas, nego : quare nego consequentiam. Actus enim spirituales habitibus quidem occasionem præbent, non tamen sunt eorum causæ effectrices propriè dictæ.

Instabis. Nulla in cerebro facta impressio rei spiritalis ideam exprimere potest.

Ergo habitus intellectuales per impressiones corporeas non sunt explicandi.

Respondeo distinguendo antecedens. Nulla impressio facta in cerebro potest rei spiritalis ideam exprimere ; & tamen potest ei occasionem præbere , concedo : secus , nego : quare nego consequentiam. Non potest quidem species in cerebro impressa rem spiritalem per se exhibere ; sed potest ex Conditoris voluntate occasionem præbere

menti, ut de rebus spiritalibus cogitet. Quemadmodum voces, quæ nullam habent cum rebus, quas significant, similitudinem, ad eas tamen concipiendas animum, velut occasiones quædam, seu causæ occasionales determinant.

Urgebis. *Habitus intellectualis est cognitio habitualis, sive facilitas cognoscendi, non actus.*

Sed cognitio habitualis in ipsa mente, non in speciebus corporeis est constituta.

Ergo habitus intellectuales sunt in mente sola, non in speciebus corporeis constituti.

Respondeo distinguendo maiorem. *Habitus intellectualis est cognitio habitualis, sive est cognoscendi facilitas impressis cerebro vestigiis, & spirituum animalium motu, tanquam causis occasionalibus determinata, concedo: est cognitio habitualis, citra illum motum excitata, quæ præsertim sit entitas aliqua menti inhærens, eique adnata, nego.* Simili modo distinguo minorem: *cognitio habitualis in ipsa mente, non in speciebus corporeis est constituta; & tamen motibus corporeis, tanquam occasionibus, secundum Conditoris legem in mente excitatur, concedo: secus nego: quare nego consequentiam.*

Obijces secundò. *Habitus supernaturales & infusi, nempe fides, spes & charitas, sunt entitates ipsi menti superadditæ, & ab ea distinctæ, ut docent communiter Theologi.*

Ergo habitus quoque morales, & acquisiti sunt entitates aliquæ spirituales menti superadditæ.

Repondeo primò: dato antecedente, de quo non consentiunt omnes Theologi, præsertim antiquiores, negando consequentiam, & paritatem. Ratio disparitatis est, quòd habitus supernaturales, & infusi in nobis sine nobis à Deo producantur; habitus verò acquisiti sive intellectuales sint, sive morales, occasione quorundam motuum, qui in cerebro fiunt, à nobis ipsis comparentur.

Non possumus autem ullam entitatem novam in nobis procreare, tametsi deus id possit. Unde etiam si habitus supernaturales dicerentur entitates aliquæ à Deo in mente nostra positæ, quod non omnibus Theologis placet : non hinc tamen inferre liceret habitus naturales, sive intellectuales sint, sive morales, esse entitates quasdam menti superadditas, quæ proinde ab illa separari possint, & separatim subsistere : cum ne facultates quidem ipsius mentis, nempe intellectus & voluntas ab ea, tanquam entitates ab entitate, reipsâ distinguantur.

Respondeo secundò : negari posse antecedens cum doctissimo viro Johanne Morino Oratorii D. Jesu Presbytero, qui lib. 8. de poenitentia cap. 2. num. 13. ejuscemodi habitus, quales ex Arabum Scholâ prodierunt, ante annum Christi 1240. ignotos fuisse testatur ; quique cap. 7. ejusdem libri magnum recenset numerum Theologorum, à quibus hominis peccatoris justificatio sine hujus generis qualitarum subsidio fuit explicata. Jure tamen defendunt Catholici qualitates quasdam à Deo mentibus nostris inditas, in eaque permanentes : adeoque aiunt fidem, spem, & charitatem, non secus ac dona Spiritûs Sancti, gratiam habitualementem, & justificantem in mente justi hære, ipsique intrinsicam esse, non extrinsecam tantum, & imputatam : id quippe ex Apostolo Paulo Epistolæ ad Romanos capite 5. v. 5. adversus heterodoxos definivit Concilium Tridentinum sessione 6. cap. 7. his verbis : *Charitas Dei diffunditur in cordibus eorum qui justificantur, ac ipsis inhaeret.* Sed nullibi, quod sciam, definitum est eos habitus esse entitates quasdam spirituales, & consequenter à mente ita separabiles, ut sine ipsa consistere queant. Quomodo enim conservaretur *fides* extra mentem fidelem ? Quomodo *spes* sine sperante, & *charitas* sine diligente ? Hæc sanè sunt intellectu ardua, ne dicam impossibilia. Cum igitur ad fidem nostram

non pertineat eos habitus, tanquam entitates, defendere: nonne satius est id de iis sentire, quod de *labe originali* docuit S. Augustinus lib. I. de nuptiis & concupiscentia n. 28. aliàs c. 25. *Non enim, inquit, substantialiter manet, sicut aliquod corpus aut spiritus: sed affectio est quædam malæ qualitatis, sicut languor.* Certè si labe originalis, quæ non est duntaxat imputata, sed mentem intrinsecus & permanenter afficit, quædam sit affectio malæ qualitatis, sicut languor: nihil ob stare videtur, quominus boni habitus dicantur affectiones bonæ qualitatis, ut robur & valetudo. Verum id Theologorum iudicio libenter subijcimus.

Corollarium I.

Ex iis omnibus rectè intelligitur, causas effectrices habituum naturalium, etiam spiritalium, dici posse actus repetitos; seu potius, spiritus animales, quatenus per actus repetitos determinati vias sibi aperiunt, & altiora imprimunt cerebro vestigia. Illud enim est habitus naturalis causa effectrix saltem occasionalis, à quo habitus naturalis, saltem ut ab occasione, producitur.

Atqui habitus naturalis, etiam spiritalis, à spiritibus animalibus, saltem ut ab occasionibus producit, quatenus ii spiritus per actus repetitos determinati vias sibi aperiunt, & altiora imprimunt cerebro vestigia.

Ergo habituum naturalium & spiritalium causæ effectrices sunt spiritus animales, aut actus repetiti, quatenus spirituum ope aliqua cerebro vestigia inturunt.

Corollarium II.

Vix habitus naturalis per unum duntaxat actum comparari potest. Etenim habitus naturalis est operandi facilitas in impressis cerebro vestigiis, & liberiore spirituum motu constituta, quæ durabilis est, nec momento perit.

Atqui ea facilitas per unicum actum comparari posse non videtur : quandoquidem per eum actum non satis profunda inuruntur vestigia ; nec satis explicari possunt spirituum meatus , ita ut impedimenta omnia removeantur ; nisi fortè mollißima sit cerebri substantia : quo casu habitus tam faciliè deletur , quàm imprimitur ; adeoque nullus propriè generatur habitus , cùm is perseverare debeat , ac proinde aliquam in cerebri substantia firmitatem requirat: Ergo habitus naturalis per unum duntaxat actum comparari posse non videtur.

Corollarium III.

HABITUS omnes naturales per altiozem in cerebro vestigiorum impressionem , patentiores meatus , liberiozemque spirituum motum augentur , confirmantur , atque , ut Scholæ aiunt , *intenduntur* , ut quisvis adhibitâ mediocri attentione percipere potest.

Corollarium IV.

HABITUS naturales minuuntur , seu *remittuntur* ob causas iis contrarias , quibus augeri , seu *intendi* solent: nempe dum impressa cerebro vestigia paulatim obliterantur , aut spirituum animalium vitæ obducuntur , vel nimium constringuntur. Quòd si ea vestigia penitus deleantur , vel meatus occludantur , tunc habitus omnino pereunt.

F I N I S.

Legi & probavi die 6. Maii 1710.

ANGUETIL

194P86

I

COLUMBIA UNIVERSITY LIBRARIES



0315049221

194P86

Pourchot,

Institutiones philosophicae

MAR 31 1952 By Thorndike, J. M.

I
4

